


l
 G
 e
 d
 in
 re
 que
 it
 en
 res
 bit
 ron
 d
 for
 astr
 rps
 nt ad



HISTOIRE GENERALE DES LARRONS

CONTENANT LES VOLS,

Massacres , Affassinats, finesse &
subtilitez qui se sôt par eux faictes
en France, & principalement en la
Ville de Paris.

*Auec les punitiōs exemplaires qui s'en sont ensuiues
tant par Arrests des Cours Souueraines que
Subalternes.*

Oeuure remplie de varietez admirables, & d'histoires
estrangez, pour le profit & vtilité du public.

*Le tout recueilly des plus beaux memoires de nostre temps
par le Sieur d'Aubrin court Gentilhomme Angeuin.*

DERNIERE EDITION AVGMENTEE ET
Enrichie de plusieurs autres Histoires singulierement
tragiques & memorables.

Rem Caraballus de Vassavia

A P A R I S,

Chez THOMAS DE LA RUELLE au Pa-
lais , sur les degrez de la Sain-
cte Chappelle.

M. D C. XXVIII.

Auec Prin ilege du Roy.

HISTOIRE GÉNÉRALE DES LARVONS

CONTENANT LES VOIES
Méthodes, Allures, Manières de
habiter qu'ils ont par eux mêmes
en France & principalement en la
Ville de Paris.

Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.
Par M. de la Roche, Médecin de la Faculté de Médecine de Paris.

PARIS.
Chez Thomas de la Roche au Palais
des Arts, sous le Vestibule.
M D C C X V I I I

M. D. C. C. X. V. I. I.
Paris chez M. de la Roche

*Extrait du Priuilege
du Roy.*

PAR grace & Priuilege du Roy,
il est permis à Martin Collet
Marchant Libraire à Paris, d'im-
primer ou faire imprimer, vendre
& debiter vn Liure intitulé l'Hi-
stoire generale des Larrons & Ma-
tois, contenant les vols, massacres,
assassinats, finesse & subtilitez qui
se sont par eux faictes en France,
& principalement à Paris. Et des-
fences sont faictes à tous Librai-
res, Imprimeurs & autres, d'im-
primer ou faire imprimer ledit Li-
ure en quelque sorte & maniere
que ce soit, sinon du consente-
ment dudit Collet, & durant le
temps de six ans, entiers, finis & ac-
complis, à peine de confiscation

de tous les exemplaires, & de
huit cens liures d'amende, moi-
tié à nous, & moitié audit sup-
pliant. Voulant en outre que
mettant à la fin ou au commence-
ment dudit Liure vn extraict ou
sômaire des presentes, elles soiét
tenuës pour suffisamment noti-
fiées, sans autre signification, à ce
qu'acun n'en pretende cause d'i-
gnorance: comme plus ample-
ment est porté par lesdites Lettres
Patentes.

Signé, **LE GRAND.**

Ledit Collet a consenti & con-
sent que Thomas de la Ruelle
aussi Marchand Libraire à Paris
jouysse dudit Priuilege ainsi qu'il
a esté accordé entre eux.



L'HISTOIRE
DES LARRONS,
OV RECVEIL GENERAL
DE TOVS LES MASSACRES,
Vols, Tromperies, Rapts, Sedu-
ctions, & finesſes qui ſe ſont faiçts
en France, & principalement dans
la ville de Paris.

*De l'eſtrange & tragique aſſaſinat com-
mis en la perſonne d'un Gentil-hom-
me Angeuin.*

CHAPITRE I.



V temps où la Fran-
ce respiroit encore le
doux air de la paix
ſoubs le regne glo-
rieux de Henry le
Grand d'heureuſe memoire, & que

A

le Ciel sembloit espancher sur cest Empire ce qu'il auoit de meilleur en ses influéces, pour le rédre florissant à iamais. Arriua à Paris vn Gentilhôme du païs d'Aniou, pour rascher d'apaiser quelques querelles intestines qu'il auoit dés long temps avec vn de ses parens (ie le nommeray Clorindor) affin de ne rafraischir les douleurs de la playe qui saigne encor dans la memoire de plusieurs de ses intimes amis. Ce Gentilhôme côme il estoit né d'vne hōeste maisō & d'vne tige noble qui s'estoit rendüe recōmā-dable au seruice des Roys precedens, tāt aux guerres ciuiles qu'estrangeres, aussi auoit il ie ne sçay quoi de particulier qui le signaloit par dessus tous ceux de sō pays, de sorte que tout le mōde regrettoit de le voir en differēt avec les plus intimes parens, iugeāt assez que ce

LARRONS.

3

diuorce ne pouuoit resulter qu'au
desaduâtage de l'vn ou de l'autre.

Or comme il est quelque fois
dangereux de donner trop de co-
gnoissance de ses affaires à ceux a-
uec qui on voyage, principalemēt
quand ils nous peuuent verser le
moindre soupçō de leurs preten-
siōs, il est à remarquer que deux va-
gabons gēs déterminez & nourris
dans le sang, s'accosterēt de luy le
long du chemin, & feignās tenir la
mesme route que luy, vinrent en-
semble iusques à Orleans.

Ils le quitterent ayant sçeu aupa-
parauant de luy le lieu ou il sou-
loit loger estant à Paris, la confian-
ce que nous mettons quelquefois
sur autruy nous perd & nous abis-
me dans vn nombre infini de ma-
l'heurs, de façon que pour le iour
d'huy il faut estre doué d'vne grā-
de prudence pour verser parmi le

4 HISTOIRE DES
monde, les Argus les plus subtilz y
font trompez.

Clorindor estant arriué à Paris,
son deuoir l'obligeoit d'aller en
Cour quand son propre interest ne
l'y eust point appelle, il y est reco-
gneu par deux principaux Agens
qui estoient lors à Paris, qui n'atten-
doient que l'heure de luy ioüer vn
mauuaistour, car ceux qui l'auoient
accompagné iusques à Orleans, leur
auoient mandé par messager expres,
la façon, le port & la stature de ce
Gentilhomme affin de l'attraper, &
qu'en bref ils seroient vers eux, com-
me de fait deux iours apres ils arriue-
rent.

Ceste ligue pratiquée secrette-
ment entre eux, fit naistre les pre-
mieres estincelles de leurs desseins
à Fontaine-bleau ou la Cour & le
Conseil suiuoit le Roy pour quel-
que temps. Car les deux premiers

ayant sçeu qu'il estoit parti, le vinrent voir avec toute sorte de submissions de courtoisies & de signes debienveillance, ou ils leur tesmoignerent passionnément en dehors desqualitez toutes contraires à celles qui cachoient au dedans.

Il reuient à Paris, son logis estoit en la ruë S. Honoré ; mais par cas fortuit il arriua que son hoste quitta la maison pour venir en la ruë S. Denis, luy, ayment mieux changer de logis que d'hoste fit prendre par son laquais quinze cens escus d'or qu'il auoit dans vn sac affin de le transporter en la ruë S. Denis, comme ils estoient en chemin nos deux premiers vagabons (bien couuerts pourtant) le rencontrent pres de S. Eustache, ou ils le prierent de venir faire quelque promenade, luy de qui la courtoisie estoit ouuerte à tout le monde les suiuit, ayant

toufiours ſo laquais auprés de ſoy, ils firent tât qu'ils le menerent au fauxbourg S. Germain, où ils l'importunerent de iouer à la paume, en quoy il eſtoit aſſez expert, il fôt partie & veirent de fortune le ſac, ou le laquais prenoit l'argét pour mettre ſo⁹ la corde, cela les anima dauantage, touteſois ſoit qu'ils ſe laiſſaſſent perdre, ou qu'il euſt plus d'experience qu'eux, il leur gaigna dix piſtoles; heureux s'il n'eueſt point eſté ſi libre, mais ſa trop grande courtoisie le perdit, il les mena en la premiere Hoſtellerie du Faux-bourg, ou il com-manda le ſoupper; pendant lequel ils donnerent heure à leurs compagnons de les attendre ſur le Pont Neuf. Tout le ſoir ne ſe paſſa qu'en ris, ioyes, & libres diſcours, en fin Clorindor iugeant qu'il eſtoit temps de ſe retirer, vou-

lut prendre cōgé d'eux, avec promesse de les reuoir le lendemain matin, mais eux feignant de ne se pouuoit laisser vaincre par la courtoisie, s'offrirent à toute force pour le cōduire en sō logis, & le retarderēt en sorte qu'il estoit onze heures deuāt qu'ils fussent sortis; le long du chemin ils furent tout prests à executer leurs desseins car ils voyoiēt que la nuit leur estoit fauorable, mais autant de fois q; ceste pensee se formoit en leur interieur, vn remord & vne viue apprehension de ce qu'ils vouloient executer les retenoit. En fin comme ils sont sur le Pont Neuf, & commencent à aprocher la Samaritaine, deux autres les vindrent affronter estant masquez, avec iuremens & blasphemés estranges. Cloridor de qui la peur n'assiegea iamais le courage, met en melme

temps la main à l'espée, & sur la confiance qu'il auoit en ses compagnons se porta valeureusement au milieu de ces voleurs & assassins vn desquels il perça au bas du ventre d'un coup d'estoc, ses compagnons firent mine de le secourir, mais il y en eut vn qui prit la fuitte & se vint planter en sentinelle sur le Pont des Augustins, pendant que les autres acheuoient leur coup, le second qui l'auoit accompagné iusques la, tourne ses armes contre luy, de sorte que recognoissant qu'il estoit vendu, desesperé qu'il est entre trois (car son Laquais ne pouuoit pas auoir douze ans au plus) il se resolut de leur vendre bien cherement sa vie, il tue celuy avec qui il auoit souppé, & le paya de sa perfidie, celuy qui estoit au dela du Cheual de Bronze accourut à eux, & l'inuestirent si bien qu'il ne peut oncques s'eschapper de leur

furie, ainsi Clor. mourut miserable-
ment, & fut la proye de ces assassins
qui l'ayant percé de trois grands
coups d'espée dans le cœur se faisi-
rent de son or, & pour épilogue de
leur tragedie de peur qu'on ne le re-
cogneuſt luy enleuerent la peau du
viſage, & le défigurérēt entierement,
puis le ietterent dans la Riuiere avec
ſon Laquais encore à demy viſ: voi-
la le premier acte de pluſieurs eſtran-
ges & horribles accidens que vous
remarquerez en la ſuitte de ceſte
Histoire.

*De la vie estrange & Tragique de Cleo-
mas, Pendu à Paris au Cime-
tiere saint Iean.*

CHAP. II.

Bien qu'une personne de basse extraction soit ordinairement despourueu de courage, & que comme nous tenons la vertu en partage de nos ancestres, aussi selon l'ordre que nous avons parmi le peuple elle nous départisse ses faueurs, ie trouue pourtant de grands personnages, & de genereux guerriers parmi mesme la lie du peuple, & ou il semble à voir qu'il ny ait rien de recommandable; toutesfois en ce cas il faut plustost donner ceci à la fortune & au desespoir qu'à un vray courage, veu qu'il ne se retrouue d'ordinaire que parmy les Grands, & entre ceux qui sont vrayment No-

bles car la vertu se fait mieux paroistre, & fait naistre des effects plus admirables dans vn corps bié organisé, que nō pas dans vne masse rustique & vne personne stupide comme sont les gens des champs.

Cleomas homme champestre & plus addonné à cultiuer la terre, qu'à manier les armes, me fournira d'exēple suffisant de ce que i'ay dict du commencement dès l'instant de sa naissance; son nom ne luy pronostiquoit riē qu'à son désaduantage; mais comme le plus souuent nous sommes aueugles és choses qui nous regardent de plus prés, aussi dès sa plus tendre jeunesse oublia il la cognoissance de soy-mesme, pour oublier tout le respect & le deuoir qui l'obligeoit enuers Dieu. Il demouroit és enuiron de Paris ou il fut quelque temps à seruir dans vne

Hostellerie : le premier acte d'impieté qu'il fit soit que de son naturel il eust imbué la cruauté des long-temps, soit que la fureur luy eust transporté les sens, comme il venoit seul à Paris, ou les affaires de son maistre, ou bien son propre interest particulier le demandoiēt, ainsi qu'il estoit en chemin tout pensif & rauy dans ses propres passions qui ne respiroient que le sang : il aduise de loing vn Cocher monté sur vn chariot de bagage, qui menoit du bled à Paris, son chariot estoit trainé de quatre Cheuaux, ce qui dès l'instant embrasa tellement Cleomas qu'il se sent poussé d'une cupidité interieure de le tuer. Que ne faict vn homme quand vne fois il a lasché la bride à ses passions ! quelle cruauté ne s' imagine-il pas ; vn desir aueugle d'executer toutes sortes de fureurs

luy bouche les sens, il se transporte hors de foy, & se persuade qu'un cœur de Tigre n'est pas assez furieux pour animer & accompagner en ses actions. Cleomas sans autre consideration de ce qui luy pouuoit arriuer: attaque ce Cocher, le tuë de deux coups de poignard, & d'une resolution enragée se donna bien le loisir del'enterrer en la place; on estimeroit cecy estre vn songe si luy mesme nel'auoit confessé aux derniers iours de sa vie, ce ne fut rien d'auoir commencé ceste entreprise puis qu'il en auoit proietté de si grands fondemens, la fureur qui bouillonnoit encor en son ame, sembloit sourdement le pousser à l'acheuer, ayant enterré ce Cocher non qu'il voulust luy rendre les derniers obseques pour la pieté qui estoit en luy (car il n'en eut jamais) il môte sur sô chariot

& viendroit à Paris, il falloit que l'affronterie & l'impudence eust eu vn grand ascendant sur luy! il vient aux Halles avec le grain à guise d'un Laboureur, de là il vend son chariot, & du mesme pas il alla vendre les cheuaux en la place hors la porte S. Honoré, & avec tout l'argent qu'il auoit eu de son larcin ou sans autre forme ny contenance il poursuivit son exercice ordinaire, on fit à à Paris toutes les enquestes possibles pour decouurir qu'estoit deuenu ce Cocher, mais il eust fallu vn grand Argus pour en decouurir les faussetez.

Deux ans se passent pendant lesquels Cleomas ne fit esclorre autre actes de sa perfidie, qu'il cachoit en son cœur, soit qu'ils ne soient iamais venus à la cognoissance du public, ou que de fait il ne les ait iamais mis au iour. En fin la cru-

auté commençant à croistre avec
ses ans (car au plus il n'auoit point
encor atteint la 24. de ses années) il
se resolut de rompre la carrière,
il quitta son maistre pour se don-
ner tout à fait à soi-mesme, ses des-
seins ne le portoient qu'à de hau-
tes entreprises, que le plus souuēt
il effectuoit par l'inuentiō & indu-
strie qu'il auoit de la nature; dés-
lors il se retira dans les bois & s'ac-
colta des plus desesperez volleurs
qu'il peut rencontrer, de façō que
de iour à autre nouuelles bādes se
venoient enrooller sous ses esten-
dars, ils firent des vols signalez le
long de la riuiera de Marne, & aux
enuirons de saint Maur, Charen-
ton, Fontenay & autres lieux cir-
cōuoisins, tous les villageois trē-
bloient sous son nom, & bien qu'il
fust cogneu de tout le mōde, per-
sonne pourtāt n'eust eu la hardies

se de l'attaquer car pour l'ordinaire il se faisoit suiure de cinquante bons cheuaux , & rauageoit tout ce qu'il rencontroit au deuant; mais si sa vie fut estrange , sa derniere fin ne fut pas moins à admirer, pour y auoir fait paroistre des actes outre l'ordinaire conception des hommes.

La renommee de Cleomas croissant iournellement , les Villageois delibererent pour les repressailles dont il vsoit en leur endroit, de s'en depestrer , il estoit menacé vniuersellement , ce qui ne faisoit pourtant qu'enflammer de plus en plus son courage. A Charanton vn home appellé Floriandre, fit venir cinq ou six Archers en son logis pour le prendre , (car il auoit souuent coutume d'aller seul ,) Cleomas en fut aduerty , & de nuit il vint avec toute sa compagnie à la porte
du

du fus nommé, où il mit le feu avec
blasphemes & iuremens estrâges.
Cela esueilla tant les Archers que
les Habitans de Charenton qui le
poursuiuent à toute force. Sa com-
pagnie voyant qu'on les poursuit,
s'escarte qui deça qui delà, luy il
se sauue envn village assez proche,
& se met dans vne Hostellerie, la
poursuite qu'on faisoit de sa per-
sône le fit reserrer, on s'équeste où
il s'estoit caché, & sceurent lesdits
Archers qu'il estoit en l'Hostelle-
rie, le mode s'asséble, ils y entrét,
& côme deux estoient sur le pas de
la porte pour le saisir il sort de ta-
ble le pistolet en main, & en cou-
chevn par terre, puis il print son es-
pee & en fit autât à son cōpagnon,
de là il eut l'assurance d'aller bri-
der son cheual & de sortir du logis,
les Villageois le voyant se ruerent
sur luy, au nombre de plus de cent

cinquante avec bastôs, fourches,
& autres instrumens, de sorte qu'ils
le contraignirent de descendre de
son cheual, cela ne l'espouuenta
point pourtant, car en mesme
temps il quitte son cheual & prit
la fuite, de façon que lesdits Vil-
lageois ne le peurent attrapper; le
nombre pourtant s'acreat, on le
poursuit par ou il auoit pris la rou-
te, luy qui se voyoit au dernier
point de sa vie courut d'une telle
force que montant par dedans des
vignes il les auoit desia deuancés
d'une demie lieüe, mais comme il
le voulut reposer, il fut estonné
qu'en moins d'un quart d'heure il
se vid inuesti de plus de trois cens
personnes qui auoient sonné le
tocsin sur luy.

Estant en ces extremités il perce
de la seconde fois au milieu d'eux,
& vint abattre dans les valees de

sainct maur, où estant arriué il vit qu'il n'y auoit qu'un seul moyé de se sauuer, qui estoit de se ietter dans l'eau, il prit le loisir bié qu'on le poursuiuiſt en dos, de se deshabiller, & laisse ses vestemens sur le bord. Puis prenant son espee toute nue dans ses dents, il se mit à la nage dans la riuere de Marne, le riuage fut incontinent bordé de Peuple, on prepare des batteaux pour le prendre, & ce qui est d'admirable en son courage, c'est qu'il ne quitta iamais l'espee des dents, quand il trouuoit vne petite Isle, il s'y reposoit & reprenoit haleine. Plusieurs se mirent dans des batteaux pour le prendre, mais il y en eut cinq ou six de bleſsez pour s'approcher trop pres de luy.

En fin il vint à la nage depuis S. Maur iusques à Charenton, où le peuple voyât qu'on ne le pouuoit

auoir sans coup ferir, on luy donna trois ou quatre coups d'auirons sur la teste, cela abbatit toutes ses forces, & fut pris, on le mena chezvn Chirurgiè pour le penser, car il estoit grandement blessè, & apres auoir bandé ses playes, il fut condamné, & par appel r'enuoyé à Paris: ou il mourut en l'aage de vingt-cinq ans, apres auoir fait des actes estranges & inouys.

*D'une Inuention tres subtile, exercée
à l'endroit d'un Marchand, des
enuirons de Paris.*

CHAP. III.

LE desespoir nous fait souuent
embrasser des actes que d'autre
part nous reiecterions pour
pernicieux à nostre salut, si nos
passions n'auengloiet nos sens in-
terieurs, & le plus souuēt en telles

actions nous ne daignons consulter les aduis de la raison, ny attendre ce qu'elle opinera, pour faire ce que nostre imagination nous met au deuant, ce qui fait que l'homme ne peut avec tant d'auantage monstrer ce qu'il est, & d'où il tire son origine, que lors qu'il ne se laisse maistriser par aucune passion & quand sa volonté se moule tellement au compas de la raison, que la circonference qu'elle fait est esgalle.

En la mesme année qu'arriuerent ces deux premieres histoires, comme en cet épslà, la paix qui dominoit par tout allentissoit la fureur de plusieurs auant-coureurs, qui ne respirent que la guerre. Aduint que cinq ou six Vagabons, ne sçachant plus de quel bois faire fleche, sortirent de Paris comme desespererez de n'auoir plus de prati-

que, & resolurent entre eux puis-
que la nature leur auoit nié des cō-
moditez suffisantes pour leur vie,
d'en chercher & de faire tous leurs
efforts pour entrouuer, Ces gens
icy auoient esté rousiours nourris
dans les delices, bien qu'au milieu
de la guerre, & de tout temps ils a-
uoient esté fort luxurieux en leur
manger. Mais comme souuent il
arriue qu'au mal qu'on croit estre
au dernier degré, on trouue quel-
que inuention pour releuer celuy
qui y apour l'embrasser, ces Va-
gabons trouuerent en leur che-
min vn petit Garçon aagé de dix
à douze ans qui estoit enuoyé de
douze lieües de là pour quelque
affaire vrgente que son pere auoit
à Paris, ils l'arrestèrent, & vn d'en-
tre eux voulant iouïr de son inuē-
tion conseilla à ses compagnōs de
l'habiller de neuf & de meilleurs

habitbits qu'on eust peu trouuer,
& que pour le reste il se faisoit fort
de si bien prattiquer son inuentio
qu'il seroit loüé de ses entreprises;
on l'habille, de sorte qu'on l'eust
pris pourquelque ieuneSeigneur,
bié qu'il fustvn peu cōtraint en ses
habits, & que par ses actions il tes-
moignast assez de quel estoc il e-
stoit, par le fruiet on cognoist l'ar-
bre & la fueille fait paroistre quel-
q; chose de la forme de la tige. La
noblesse se recognoist autāt en de-
hors q; par la vertu qui est en leur
interieur, car la vertu a cela de pro-
pre qu'elle veut faire ses fonctiōs
& se plaist à demeurer dās vn corps
bien organisé, & quiconque vou-
droit vestirvn rustique en habit de
Gentilhomme on verroit tou-
siours paroistre des effects de sa
rusticité: ce ieune enfant estāt ain-
si reuestu, son imagination le por-

roit desia iusques au nuës, il croioit estre vn des grâds Seigneurs de la France: on luy deffendit pourtant de parler en quelque façon que ce fust autre chose que ces deux mots, *Etiam, maximé*, ce commencement s'estât pratiqué de la sorte, ils s'en allerent prendre logis en vne Hostellerie des meilleures qui soit es enuïrons de Paris (ie ne veux pas nômer le lieu peut estre que quelqu'un s'en offenceroit,) estans arriuez en ce lieu, ils feignent estre de la maisõ de l'Ambassadeur extraordinaire de Holande, & dirent à l'hoste qu'infailiblement, pendant quatre ou cinq iours ledit Ambassadeur debuioit passer par là, & pour tesmoignage tres-assuré de ce qu'ils mettoient en auãt, ils luy monstrerët ce petit garçon, disant que cestoit le Nepueu de l'Ambassadeur: le maistre de la maisõ, qui ne voioit q; superficial-

lement ce qu'il luy disoient, le tenoit pour vray, & de fait il les traita fort somptueusement de tout ce qu'ils demanderent; & remarqua on pendant le seiour qu'ils firent en ce logis, que tous en general portoiēt vn grand hōneur à leur ieune maistrequ'ils feignoiēt estre Mignon de l'Ambassadeur, cela faisoit croire à ceux de l'hostellerie qu'il y auoit quelque apparence de verité en leur faict.

Cinq iours se passent qu'on n'entend point de bruit sinon celuy qu'ils font dans la maison parmi leurs banquets & resiouyssances, l'hoste ne sçait qu'en iuger, toutefois ne pouuant penetrer au fond de l'affaire, il fait resjaillir sō doute, sur la reuerence qu'il voit estre faite enuers le petit villageois, cela le retient & luy donne, quelque esperance de la future venue de l'Ambassadeur, enfin huiet iours

s'estans coulez que personne ne paroissoit, Nos Vagabons songerent qu'il estoit temps de prendre l'air, & pour acheuer ce qu'ils auoient entrepris, vn d'entre eux enuoya son Laquais vn iour auparauant pour voir si persone ne venoit (mais l'Ambassadeur n'auoit garde de venir, puis qu'il n'estoit point parti) & luy commanda de retourner le lendemain au matin dés trois heures pour les aduertir que Monsieur estoit prés du lieu. Ceste fourbe estât bié pratiquée, le Laquais ne manque point de venir à l'heure dite, & de frapper à la porte, cela les fit leuer tous en diligence, & commander qu'on mist les cheuaux en ordre, tous se leuēt & attendoit-on l'Ambassadeur en toute assurance; quand leurs cheuaux furent prests, vn d'eux vint dire à l'hoste qu'ils alloient au de-

uât demōsieur, & qu'ils ne māque-
roient d'estre à son logis pendant
deux ou trois heures au plus, qu'au
reste on leur preparast à desjuner à
leur retour, & pour arre de leur
despence qu'ils laissoient le petit
Prince (ainsi l'appelloient ils) cō-
me de fait ils luy osterent sa No-
blesse, & tous ses habits sōptueux,
& mirent ses vieux haillons aupres
de luy, luy cōmandant de ne par-
ler à personne qu'il ne fust mydi.
Ainsi ils sortirent tous & battirēt
aux champs apres s'estre bien re-
siouis aux despens del'hoste.

Cependant on prepare tout le
logis pour Monsieur l'Ambassa-
deur: Mais midi estant desia passé
qu'il ne venoit point, l'hoste se
commença à appercevoir de la
fraude, il monta en la chambre
pour voir ce ieune Prince, à qui
auparauant on portoit tant de res-

pect, mais il fut estonné qu'il ne trouua qu'un pauvre Villageois avec son habit de toille, on l'interroge, on luy demande qui il est? qui sont ceux qui estoient venus loger en ceste hostellerie? il ne respond point, & à peine peut-on tirer autre parole de luy que ces mots *Eriam, maximé*, l'hoste pourtant qui auoit fait vne grande despence autour d'eux, ne se contenta pas de Latin, il fit prendre mon Villageois & luy fit on parler François à coups de verges. Voilà comme se passa toute la tromperie, le dernier acte de la Tragedie fut plus sanglant que le reste.

*D'un Tour admirable joué à l'endroit
d'un Medecin de la rue S.
Martin à Paris.*

CHAP. III.

CEs Histoires seront d'autant plus admirees du public qu'elles porteront au frontispice de leur exterieur la verité entretis-
sue & engrauee pour marque tres-
asseuree qu'elles ont esté execu-
tees d'as ceste Ville; & ie m'asseure
que la rareté des inuentiōs qui s'y
retrouuēt pouffera plusieurs à en
desirer la lecture, & comme i'ay
dit du commencement, la curiosi-
té que i'ay inferee d'as celiure ani-
mera beaucoup de personnes à en
voir les actes signalés, l'Histoire
que ie vous veux décrire en ce Li-
ure est veritable, & aduenüe il y a

30 HISTOIRE DES
quelques ans en ceste Ville à l'en-
droit d'un medecin, que ie n'omé-
ray Alcáder, car ie ne veux pas ter-
nir sa memoire puis qu'il est enco-
re viuant, & toutes les fois que ie
iette les yeux sur iceluy, ie ne puis
que ie ne m'escrie avec le Prince
des Poëtes latins.

Quid non mortalia pectora cogis

Auri sacra fames?

Quelle inuention ne pratique
l'hôme pour attrapper des riches-
ses! & toutes fois c'est vn bié si fre-
fle & si caduc qu'au moindre re-
uers de fortune ceux qui estoient
esleuez au sommet de leurs desirs
& qui auoient vn comble parfait
de tout ce qu'une heureuse & fa-
uorable, destinee peut depar-
tir & prodiguer à ses mignons,
se voyent en vn instant anean-
tis, & tellement rabaissez de leur
premiere grandeur, que ceux

mesme qui ne releuoient que de leur puissance & autorité les maistrisent le plus souuent & se moquent d'eux: Alcander sage & renommé Medecin en ceste Ville, de quil l'experience cogneuë de long réps l'a appellé, & l'appelle encor to⁹ les iours aux maladies qu'o⁹ estime les plus incurables, & de qui la guarisó est desesperée, de tout réps ce personnage s'est fait paroistre en diuerses cures, ou il s'ébloit que l'art humain n'auoit plus aucune force pour agir cõtre la nature inueterée du mal. Cela fait qu'on l'a recherché, & recherche encor tous les iours pour ce subiect.

Or pour entrer dans le fil de nostre Histoires, vous sçauéz que comme ledit Alcander alloit souuent visiter les malades en diuers endroits de la Ville: vn certain Voleur des plus insignes & affrontez

qui fussent pour lors dedâs Paris, s'imaginât qu'il pouuoit faire vne bonne rencôtre s'il pouuoit attrapper Alcâder, car on le tenoit pour vn hôme riche & opulent, à cause des affaires & cures qu'il faisoit tous les iours, ceste resolution sortit son effet: vn Samedy sur les neuf heures du soir, côme ledit Alcander venoit de receuoir vne grande sôme d'argent de diuerses maisôs ou il auoit des praticques particulieres: ce compaignon n'eust sceu choisir vn tēps plus opportun ny vne heure plus fauorable à ses desseins, mais l'artifice dōt il vsa pour attrapper Alcander, ne fut pas vn des moins subtils, il sçauoit asseurément qu'alcander estoit chargé d'argent, & qu'il ne pouuoit eschapper qu'il n'en tiraist pied ou aisle, c'est pourquoy l'ayant attendu à son retour dans vne petite
rue

ruë destournée, & ayant aperceu de loing, il luy vint au deuant tout eschauffé, Monsieur luy dit. il d'une voix feinte, il y a long tēps que j'ay ce bon-heur de vous frequenter, ie ne demeure pas loing d'icy. Iouste que vostre experience que j'ay admiree de tout tēps, m'a fait vous importuner de vous prier de venir chez moy pour visiter ma femme, qui depuis dix ou douze iours a vn tel flux de ventre qu'il ny a aucun moyen de la retenir, plus va auant, plus elle s'éuacue; Au reste j'ay pris la hardiesse de vous deuancer, ie viens de vostre logis, ou ie vous ay attendu vne heure pour le moins. Je vous supplie Monsieur me faire ceste faueur que de venir chez moy: l'exterieur de ces paroles eust attiré le plus deffiant du monde, & Alcander qui se sentoist plustost at-

tiré du gainque des paroles, ne m'a
qua pas de luy faire toutes sortes
de bié veillâce, avec ceste respôce.
Monsieur, c'est beaucoup de fa-
ueur que vous me faictes, ja à Dieu
ne plaise que ie vous dénie ce peu
que ie sçay ès sciences & pratiques
de Medecine, si ie peux effectuer
quelque chose à l'endroit de Ma-
dame vostre femme, ie m'y porte-
ray avec autant d'affection que
ma charge le requiert: sur ces
complimens, le drolle le conduit
de ruë en rue d'as son logis, où ayât
fermé la porte, il prend en main
vn pistolet, & de l'autre vne grâ-
de bourse, & se tournant tout fu-
rieux vers le Medecin; Voyci dit-
il ma femme qui est tourmentee
d'un flux de ventre il y a long tēps.
C'est à vous à chercher la gue-
rison de sa maladie, où autre-
ment ie suis resolu de la chercher.

moy mesme avecce pistolet, le Medecin tout tremblant & esperdu de se voir à l'impourueu abusé de la sorte eust crié: mais l'autre qui luy tenoit le pistolet sur la gorge l'espouuenta, de maniere qu'il fut contraint de quitter sa bourse & de réplir celle qui auoit le flux de ventre.

Ceste Tragedies'estant ioüee de la sorte, le Larron voulut tesmoigner à Alcander qu'il auoit encor quelque courtoisie, il luy en rendit quelque chose, & luy dit qu'il le vouloit conduire iusques à son logis, ce qu'il fit, tenant tousiours son pistolet en main, si l'autre eust crié tant soit peu: estant arriué à la maison dudit Alcander, le larron frappe luy mesme à la porte, & voulant dire Adieu à son bien faicteur, il luy dit que desormais il n'auoit que faire de craindre la

pluye, & qu'il falloit necessairemēt
qu'il l'accommodast de son man-
teau. D'autāt que l'obscurité de la
nuiēt lui presageoit quelque pluie
& à l'instāt il luy prit sō mâteau &
s'enfuit, Alcāder n'en sceut auoir
autre raison, car dēs le lēdemain le
drolle changea d'hoste & de logis.

*De la plaisante Tragedie iouee par deux
Voleurs chez un Drappier de la
ruē sainēt Honoré.*

CHAP. V.

NOus auons veu par cy de-
uant combien l'homme est
second en conceptions, principa-
lement quād le temps & l'oisiueté
luy abatardissēt tellemēt les sens,
qu'il demeure comme enseuely
dans la lascheté d'une solitaire & a-
ueugle paresse, nous le pourrons

voir encor plus amplement par la
suinte de ce discours, où nous re-
presenterons comme dans vn ta-
bleau, la diuersité des actions hu-
maines qui se sont fait remarquer
par l'industrie & la differente in-
uention de plusieurs personnes, la
pluspart incogneus pourtant, &
de peu de consequence pour leur
nom, mais dignes de louanges en
leurs subtiles conceptions, bien
que de soy elles fussent vicieuses.

Car la conception ne peut estre
de soy mauuaise, veu que cela
prouient de la nature & de la sub-
tilité de l'esprit; mais la mettre
en acte, c'est là ou est le vice, ce
n'est pas tout que d'inuenter de
grands & specieux stratagemes, il
faut voir s'il y a du danger à les
executer.

Sur la fin du mois de Iuillet,
de l'an six cens onze, que la Cour

n'estoit pas autrement troublee ny agitee de la guerre, on parloit fort aparis de Voleurs, entre autres deux coureurs s'imaginerēt qu'ils pourroient faire vn bon tour chez vn ieune marchand nouuellement marié, ce qui se pratiqua de la sorte.

Ces deux compagnons auoient recogneu de longue-main que le plus souuent il n'y auoit qu'un garçon dās la boutique qui distribuoit les denrees & que le maistre ayant des affaires & negoces particulieres pour vne succession qui luy estoit tombee entre les mains, il ne pourroit descouurir la fourbe & l'inuention qu'ils auoiēt conspiree de iouer.

Vn de ces deux choisit son opportunité, lors que le maistre & la maistresse ne seroient point à la boutique, il vint trouuer vn Chi-

rurgien de la rue de M^ot marte, lequel tirât à quartier, il luy dit, que lors qu'il luy ameneroit vn ieune garçon de telle & telle façon qu'il ne manquast de le conduire en la chambre, & qu'infailiblement il auoit vne maladie secrette à luy communiquer. Qu'au commencement il feroit à la verité quelque difficulté de luy declarer son mal, comme estant vne chose qui doit estre plustost cachetee du sceau du silence que proposee aux oreilles de tout le monde.

Le Chirurgiē qui croyoit infailiblement que ce qu'on luy disoit estoit vray, tant la nayueté estoit peinte en ses paroles, luy promit de ne manquer à tout ce qu'il luy auoit proposé, & qu'il feroit en sorte qu'il se cōtenteroit de luy, & quand bien il y auroit quelque secrette maladie, il ne se promettoit

pas seulement d'en tirer le secret du dit ieune garçõ, mais aussi de le rendre parfaitement guari, son mal fut-il incurable. Sur ceste promesse, le compagnon ioyeux de ceste inuention dõt il voyoit le progres assez bien reüssir, vint aduertir son Camarade de ce qu'il auoit aduancé, & qu'il n'y auoit plus qu'à mener celuy qui gardoit la boutique chez ledit Chirurgien pour acheuer la Tragedie.

Ils ne manquerēt pas de s'y trouver du matin au tēps qu'ils croyoient que le Maistre estoit allé à ses affaires, vn des deux qui auoit commencé la promenade, vint à la boutique: mais de mal'heur, comme on luy ouuroit des marchandises, la maistresse du logis suruint, ce qui luy donna du soupçon de ne pouuoir acheuer ce qu'il auoit (ce luy sembloit) si heureusement

proietté, il eut voulu alors estre dehors & n'auoir entré si auant, puis qu'en ce cas rien ne luy promettoit bonne issuë de ses affaires, toutesfois voyant que quitter vne chose si aduācee, c'est perdre courage du premier coup, il poussa fortune.

Il se fait apporter toutes sortes de draps, du sceau, de Berry, & autres menuës marchandises; En fin cōsultāt en soymesme que le drap d'Espagne estoit le plus fin: il en marchade vne piece entiere, & dit que son maistre qui estoit Chirurgien assez renommé, dont il luy disoit le nom & la ruë, luy auoit commandé de le faire, Vn clairuoyant eust bien tost descouuert ceste ruse, comme estant de peu d'apparence & peu subtile, mais l'inexperiēce qu'ont les femmes, & le peu de prudēce qu'elles font

paroistre en leurs actions, couvrirent ce qui estoit presque decouvert en ceste fallace. La marchand de croyant que son marchand ne l'eust voulu seduire, apres avoir conuenu du prix, l'esperance qu'elle auoit selon ses promesses qu'il ne manqueroit pas de retourner pour leuer des autres estoffes, fit qu'elle cōsētīt qu'on l'emportast.

Elle commande à son garçon de suiure Mōsieur où il le menera, & soignez dit-elle, à apporter l'argēt de vostre marchandise; sur ces mots ils sortent avec tous signes de bienueillance exterieure, ils ne furent plustost tournez que l'autre coureur arriue comme fortuitement & sans y songer, & pour mieux iouer leur persōnage, il luy demande d'ou il venoit, il luy respondit qu'il venoit de chez le Chirurgien, & qu'il alloit faire

une saignée, mais vous dit-il, auez vous fait ce que M^osieur vous a commandé? auez vous leué les estoſſes? le garçó qui entédoit toutes ces parolles, croyoit infailliblement cela estre vray, cóme de faire vn qui n'est pas rompu à telles & semblables tromperies se laisse bien tost emporter. Nos deux Vagabons s'estant quittez, celuy qui cõduisoit le garçón du marchand prit occasiõ de luy dire quel estoit son compaignon, & l'exercice qu'il faisoit, affin de l'induire de plus en plus à croire qu'il y auoit de la verité en son faict. Au reste quant vous entrerez chez monsieur (dit il) vous quitterez vos estoſſes en la boutique & monterez avec luy en la chambre, où il vous contera de l'argent, peut estre qu'il fera vn peu de difficulté du prix; mais il n'importe, quád il sçaura que i'en

le, il ne manquera pas de vous contenter; Ce ieune garçó estant instruiet de la sorte, ils vinrent au logis dudit Chirurgien, ils entrét en la Boutique ou le Maistre attédoit, qui fut bien aise de le voir.

Est-ce là ce ieune garçon dit-il, duquel vous m'auiez parlé? ouy Monsieur, respondit l'autre, s'il vous plaist menez-le en vostre chambre pour le contenter, disant ces mots il quitte la marchandise qu'il auoit sous son manteau, & alla droict à la chambre; l'autre qui voyoit la boutique sans personne, prend le drap & s'enfuit par vne petite rue, le Chirurgien cependant interroge le ieune garçon du mal qu'il auoit, & qu'il n'y auoit aucun danger de luy decouurir, que si les remedes humains y pouuoient luy doner quelque allege-

ment, qu'il esperoit de le guerir en bref, & de luy oster entiere-ment le mal.

Luy tout estonné ne scachant ce que le Chirurgien luy vouloit dire, luy respondit qu'il n'auoit aucun mal, grace à Dieu, & qu'il ne demandoit que le payement de son estoffe.

Le Chirurgien qui auoit eu charge de le presser mesme par menace s'il ne vouloit declarer son mal d'amitié, persiste en ses remonstrances. Mon amy luy dit-il, les maladies plus elles sont inueterées & plus difficilement en reçoit-on la guarison, le mal qui s'enuieillit prend racine, & bien souuent on est contrainct d'appliquer les ferremens, ou auparauant il ne falloit qu'un simple medicament.

Ce ieune garçon qui ne vouloit autre medicament que de l'argét,

pour ce que c'est la meilleure dro-
d'aujourd'huy, luy dit qu'il n'e-
stoit venu pour autre subiect que
pour auoir de l'argent du marché
conuenu, & pour prendre le paye-
ment de ses estoifes.

Le Chirurgien voyant qu'en
vain il auoit faict toutes ses remô-
strâces, il se persuada qu'il en tire-
roit la verité par menace, & de fait
il l'alloit outrager, mais quand il
entédit parler d'estoffe & de mar-
chandises, il commença à songer à
la fourbe, & l'interrogea de quel-
les estoifes il vouloit parler, l'au-
tre se courrouçoit de plus en plus
contre luy, l'appelloit trompeur,
& qu'il falloit necessairemēt qu'il
luy payast le drap qu'il auoit ap-
porté en son logis.

Ce bruit fit esmouuoir les voisins
qui estans accourus en la Boutique
dudit Chirurgien, s'estonnerent

d'une fraude si estrange.

Le Garçon du marchand voyant qu'il ne pouuoit tirer autre raison de ses estoifes, vint aduertir son maistre qui depuis eut vn grand procez avec ledit Chirurgien, lequel recogneut alors combien il y a de tromperie parmy les hommes, & combien on se doit peu fier à tout ce qu'on void pour le iourd'huy, veu que la fourbe a tellement pris pied dans l'intellect humain, que toute la bonne disposition & œconomie de la nature est renuersee & deboutee de son premier degré.

Del'Affronterie du Capitaine Garandin, & de la plaisante rencontre qu'il fit près S. Innocent.

CHAP. VI.

L'Impudence est l'apanage ordinaire des Larrons, & peu serencontrent parmi eux qui n'ayent imbu vne grande partie de l'affronterie que nous voyons dás la conuersation humaine.

Garandin aussi impudent que rusé es affaires du Monde, & qui pour ses larcins a esté executé à Rouën: comme il estoit vn iour à Paris comme il alloit tousiours parmy la Ville deçà, delà, pour attraper les nouueaux venus à la pipée, il aduisa deux Bourgeois qui pour ne s'estre point veus dés long - temps s'entre - bienueignoien

gnoient par ensemble, & se caressoient mutuellemēt, luy qui auoit tousiours vne oreille aux chāps, & l'autre à la ville, les voyant discourir à part de leurs affaires particulieres, s'accoste insensiblement d'eux, sans faire semblant toutesfois de vouloir participer aucunement à leurs discours, c'estoit au coing de la rue saint Innocent où il fit ceste rencontre; en fin apres plusieurs deuïs, vn de ces Bourgeois dit à celuy qui estoit avec luy qu'il le supplioit instamment de venir le lendemain à vnze heures prédre vn mauuais disner chez lui, avec quelqu'vn de ses amis, s'il le rencontroit, l'autre luy promet qu'asseurement il ne manqueroit point d'auoir ce bon heur que de le voir à l'heure ordonnee, & qu'il luy faisoit beaucoup d'honneur de le conuier. Garandin qui entédoit

HISTOIRE DES
ces mutuelles biëueillâces, se per-
suada qu'il pouuoit faire quelque
coup, c'est pourquoy, il se resolut
en soy-mesme de suiure son hom-
me de loing, & d'apprendre l'en-
droit & la rue ou il demeueroit, affin
de ne manquer le lendemain à on-
ze heures aussi-bien que celuy qui
estoit conuié, il suit d'ócques ledit
Bourgeois, & sçeut la maison & le
lieu de sa demeure, ce qu'ayant
bië remarqué, il ne faillit point le
lendemain à onze heures de faire
sa promenade aux enuirs dudit
logis, en attendant que celuy qui
estoit prié à disner vint pour luy
seruir d'ombre à la mode des An-
ciens qui estans conuiez menoiet
rousiours quelqu'un derriere eux,
pour les accompagner.

Or ayant aperceu de loing son
homme, il se vint rencontrer en
mesme temps vis à vis de la porte,

le Marchand croyant que Garandin fust prie du Maistre du logis, contestoit à qui entreroit le premier, l'autre ne vouloit point faire cōme l'ombre qu'amenavn iour Socrate à vn banquet qui entra deuant son maistre, n'estant d'ordinaire que l'ombre marchast deuant le corps : c'est pourquoy il entra le dernier. Le dîner s'apreste on s'entretient de diuerses nouuelles, & principalement de tout ce qui se passoit en Cour.

Garandin cependant n'auoit point les yeux arrestez, qu'en leurs mouuemens, il regardoit de tous costez s'il ne pouuoit se garnir deuant que quitter la place.

Les Tables estant dressées, on laue les mains. Garandin ietta l'œil sur le bassin qui valloit bien deux cens escus, il prit garde qu'on l'auoit laissé dans la cuisine.

Le Maistre du logis croyoit que son Amy l'eust amené & qu'il fust de sa cognoissance: l'autre croyoit d'autre part, que le Maistre l'eust conuié à disner, il falloit que carandin fust bien Sage, & qu'il vlast d'une grande prudence en ce lieu, car il estoit interrogé des deux, & respondoit à tout ce qu'on luy demandoit pertinemment; le disné se passe, & les tables estant ostées ils s'entretiennét quelque temps iusques à ce que carandin ayant aperceu que la seruant e estoit dehors, & que la maistresse du logis estoit allée en la chambre d'en haut. Messieurs dit-il, excusez moy si j'ay pris la hardiesse de vous importuner, ie ne manqueray point de vous venir retrouver pendant vn quart d'heure au plus, & ainsi ayant pris congé d'eux, il se iette en passant dans la cuisine, & met

le plat Bassin sous son bras & prit la fuite.

Il ne fut pas sorty que les deux Bourgeois & principalement celui qui estoit conuie, commença à s'enquerster qui estoit cest honeste gentilhomme? l'autre luy dit qu'il ne le cognoissoit pas, & que pour son regard il estimoit qu'il fut de sa compagnie, sur ce les voilà bien estonnez, ils appellent la Maistresse à qui ils conterent toute l'affaire. Mais ils ne se prirent pas garde de leur Bassin qui estoit desrobé, qu'une heure apres iusques à ce que la seruantte fut retournée de la Ville, ainsi Carandin eut à disner par son effronterie, mais il en a payé l'interest à ouen depuis.

*De la Misérable Aduenture du pauvre
infortuné Licidas.*

CHAP. VII.

Que la Fortune apporte de ma-
lheurs

A ceux *hélas* qui briguent ses fa-
ueurs.

Disoit vn des grands cerueau de
ce siecle, Iugeant bien que si elle
esleue quelqu'vn au sommet de sa
Rouë, elle mesure ses contente-
mens au despés de sa ruyne, & luy
fait acheter bien chèrement le
prix de son inconstance & le salai-
re de ses faueurs, ne bastissant ses
plus superbes triomphes que sur
les despouilles & renuersement de
ceux qu'elle auoit guindé si haut
auparauant. Ses Temples & les
Mausolees ne sont fondez que sur
le debris de son inconstance, Ses

arcs triomphaux, les portiques sa-
crez, & ses Pyramides les plus ai-
gues, qui voisinēt dauātage le Ciel
n'ont pour base & pied d'estail de
leur frontispice, que la varieté &
les vissitudes, les trophees se lisēt
apertement dans les changemens
dont elle gouuerne l'Vniuers. Bref
il semble quelle emprunte & man-
die du temps, la mutation & les
meflanges ordinaires qu'elle nous
fait paroistre tous les iours, tant
elle est foible en ses commence-
mens, debile en ses progres, &
peu assuree en sa fin.

Je ne veux que la vie de Licidas
pour tesmoignage tres-assuré de
ce que ie dis on y verra escrite en
gros Caracteres, l'inconstance &
la varieté de la fortune, Fortune
helas que tu es variable, combien
peu assurez sont ceux qui portent
tes liurees, tu bastis tes Trophees

56 HISTOIRE DES
de l'un sur les despoilles, & la ruy-
ne de l'autre comme si c'estoit vne
Loy irreuocable que tu ne peux e-
fleuer le premier, que le second ne
soit abaissé d'autant plus bas qu'il
auoit auparauant vn ascendant a-
uantageux sur l'autre. Mais que
dis ie ? ie minute icy vne accusa-
tion contre toy, & toutesfois tu
en desaduoüie le iugement, c'est la
Roüe qui tourne ainsi, de mesme
qu'il n'y a rié de plus effronté que
tes promesses, aussi ne peut-on rié
remarquer en ce monde inferieur
de plus inconstant que tes effects.
Licidas estoit Champenois, & d'v-
ne des premieres Familles dupays,
auparauant sa cheute l'homme le
plus doux, le plus accort & le plus
courtois qu'on eust iamais peu re-
marquer. Ses commencemens fu-
rent doux & paisibles, comme ce-
luy qui commence à voguer en

pleine Mer, il ne part qu'au temps de la bonnasse, mais quand il est au milieu des ondes, que les vêts n'ont que les Cieux & l'Ocean pour limites, il endure souuent de grandes & fascheuses trauerses, & de furieuses borasques : le mesme se remarquera aux commencemens de la fortune de Licidas, il n'y auoit rien qui ne luy promettoit vn calme perpetuel, tout luy respondoit selon ses desirs, & y auoit vn tel accord entre luy & tous ceux qui le cognoissoient, que chacun eut ressenti en soy-mesme le mal qui luy eust pû arriuer.

Mais helas! la fortune luy enuia bien tost ce bon-heur, il ne fut pas long temps à iouyr de ceste felicité. Ce repos si calme, & ceste tranquillité si douce, où il tramoit le cours de ses ans, fut bien tost agi-

38 HISTOIRE DES
té d'une grande & fascheuse tour-
mente.

Ce ieune Seigneur auoit vn voi-
sin grandement remuant, & qui
ne cherchoit que querelles en tou-
tes les compagnies ou il se rencô-
troit, desia en plusieurs endroits il
auoit formé des deffits & duels,
de sorte qu'on n'estoit pas ioyeux
de se trouuer avec luy cognoissant
son audace & son insolence.

Or il arriua qu'un iour comme
Licidas alloit à la chasse, il fit ren-
contre de c'est homme à l'impour-
ueu & sans y songer, c'est effrené
le regardant d'un œil foudroyant
luy dit, qui te fait si hardy de ve-
nir à la chasse en ces cartiers. Li-
cidas d'une voix douce luy res-
pond qu'il pouuoit venir avec li-
berté puis que c'estoit sur les ter-
res, & que luy mesme il n'auoit
que faire de prédre ceste authori-

ré que d'y venir, sur ceste responce ils querellerent tous deux. De façon qu'ils se donnerent vn cartel de deffi pour se trouuer le lendemain à vne lieuë de là.

La partie faicte, Licidas ne manque point de si trouuer, ils se battent, & Licidas eut vn tel aduantage sur son ennemy qu'il le coucha mort par terre.

C'estoit au temps qu'on faisoit de si rigoureux Edicts pour les duels. Les parëns du mort poursuiuent Licidas de si prez à la Cour de Parlement qu'ils confisquerent tous ses biens, & n'eut pas à peine le loisir de prédre mille escus qu'il auoit en or pour s'en fuir.

Ceste fuitte fut cause de sa perte, car s'il fust demeuré aux enuirs de son pays il n'eust point encouru les dangers où il se trouua depuis, cependant qu'il estoit en fuitte

60 HISTOIRE DES
toute sa maison fut rauagee, les
parties firent tout saisir pour auoir
contreuenu ausdictes Ordonnan-
ces & Edits du Roy.

Luy comme il venoit à Paris
pour solliciter son procez, en pas-
sant par dedans la Forest de Com-
piegne, il se vit attaqué de six Vol-
leurs, quant il les vit venir droit à
foy, il auoit vn petit sac où il auoit
mis deux cens pistolles, il le jetta
derriere vn gros halier s'as estre a-
perçeu de pas vn d'iceux. Ces En-
ragez le vinrent en mesme temps
environner, le saisissant au colet,
& le menerent dans le bois bien
deux lieües en auant, d'as des lieux
sombres & obscurs, là ils luy
osterent son Cheual, son argent &
ses habits, & le reuestirēt d'vn hail-
lon de toile: Fortune où sont res-
promesses: est-celà l'estat où tu re-
duits ceux qui courtisent tes fa-

ueurs? Cóbien hélas! peu assurez
sont ceux qui sont enroollez sous
tes estendars! Licidas ne croyant
auoir encor tout perdu puis qu'il
auoit deux cens pistoles, resolut
d'vn courage magnanime, bien
que la fortune l'eust entierement
despouillé de ses richesses, de se
mettre à l'abry du temps, & de
prendre patience, au premier Vil-
lage qu'il rencótra il acheta vn sac
pour mettre ce qui luy estoit resté,
& feignit d'estre quelque pauvre
Villageois affin qu'il ne fust pris
pour la seconde fois. Ainsi il arri-
ua à Paris, où estant trouué par
deux Volleurs qui l'acosterent, il
fut derechef conduit par eux dans
le faux-bourg S. Germain, où ils
luy promettoient de le faire en-
trer chez la Reyne marguerite qui
vuiuoit encor pour lors; luy qui les
croyoit estre Gentilhommes sui-

uant ce qu'un des deux luy auoit
diren s'enquistant de son pays, se
fia à eux du tout, & se fit faire vn
vestement neuf à leur instance, il
laissa tout son argēt en l'Hostelle-
rie où il auoit logé le soir avec eux
croyant qu'ils fussent cogneus la
dedans, le matin ils vōt à l'Hostel
de la Reine Marguerite, ou on dit
qu'elle n'estoit encore leuee, ce pē-
dant ils allerēt en vn tripot en at-
tendant qu'il y eust moyen de luy
parler, tandis vn de ces deux prit
congé de la cōpagnie, l'autre apres
auoir ioüé quelque coup, feignant
d'aller choisir vne meilleure Ra-
quette il prit la fuitte, & demeura
nostre pauvre infortuné Licidas
tout seul frustré de ses esperances,
sans pouuoir iamais tirer autre rai-
son de ses Volleurs, & ne luy fut
oncques possible de retrouver ses
Vagabons qui luy auoient ioüé

vn si mauuais tour, & ainsi on peut voir combien de malheurs arriuent de iour à autre dás Paris par l'entremise de telles gens.

*D'un bon Compagnon qui contrefit l'esprit
en vne Maison proche saint Iacques
de la Boucherie pour desrober, & de
la façon qu'il fut recogneu.*

CHAP. VIII.

C'Est vne chose admirable de s'imaginer combien d'inuention's ont trouué les Volleurs, pour executer heureusement leurs desseins, les vns se sont palié du manteau de deuotion affin que sous la triste mine de leur hipocrisie ils peussent paruenir au bout de leurs pretentions: les autres sous vne feinte amitié & sous vne demon-

stratiō exterieure de bien-ueillāce qu'ils tesmoignoiet à ceux qu'ils vouloient tromper & abuser, ont souuent emporté ce qu'ils demandoient: d'autres plus experts ont inuenté d'autres conceptiōs, pour n'estre recogneus, desquels ie vous en veux descrire vne signallee qui est arriuee assez proche de la rue de la vieille monnoye.

Là demeueroit vn certain Bourgeois, assez renommé pour sa prudence d'homme que ie nommeray Carillis, qui auoit vn sien seruiteur grandement cault & rusé, nommé Rauisio, ce cōpagnon estoit tousiours aux aguets pour tascher à surprendre quelque chose dans le logis, & nonobstant que ce soit vn crime capital, & domestique d'attenter sur les biens de son maistre & d'enuahir ce qu'il a, toutes fois on remarque que ce Rauisio auoit
vne

telle inclination à desrober qu'il n'auoit iamais les mains arrestees, non plus que ses yeux, on en venoit faire tous les iours des rapports à Carilis qui s'éplaignoit extrêmement, & par trois ou quatre fois ledit Rauisio pensa sortir du logis par le commandement de son Maistre; mais il desguisoit toujours si bien son faict qu'il n'y auoit aucun moyen de trouuer prise sur ses actions, tât il les pallioit d'un faux semblant, & du masque mensonger de la verité.

Or il arriua que ledit Rauisio demeurant dâs le logis de Carilis, vne personne de la dedans de qui ieveux taire le nom, mourut. Rauisio prenant ceste occasion par les cheueux, & se voulant seruir de ceste mort comme d'un pretexte tres-salutaire pour cacher ses larcins, s'imagina de faire l'Ef-

prit, & que c'estoit le vray moyen par lequel il pouuoit paruenir à son but, & emporter de grandes richesses du logis.

Pour cesuiet il alla prendre vne teste de mort dans le Cimetiere de Sainct Innocent, & avec des autres instrumens sur la minuiet, logé qu'il estoit au lieu le plus eminent de la maison, il faisoit vn tintamarre estrange & vn bruit espouuentable, tantost il prenoit vn pot cassé & parloit d'une voix rauque, tantost il se feignoit des mots incogneus, fraploit, battoit & esueilloit tous ceux de la maison.

Il continua cest exercice bien quinze iours, pendât lesquels il fit à croire à Carilis q; de nuit il reuenoit vn Esprit dâs la chābre, & q; desia deux ou trois fois il auoit parlé à luy; son Maistre qui n'adioustoit point foy de prime abord

à ces paroles, le creut en fin apres auoir luy mesme ouï le tintamarre & le bruit qui se demenoit dás la dite Chambre.

Rauisio voyant qu'on commençoit à adiouster foy à ses paroles, & que l'espouuente s'estoit infinuee parmi les domestiques à son suiet, il se resolut d'acheuer son entreprise. C'est pourquoy ayant vne nuit faict vn grád bruit à son accoustumee, le lendemain matin il ne manqua pas devenir aduertir Carilis de toutes les paroles que l'esprit lui auoit tenuës, & qu'il de-mádoit qu'on fist vn pelerinage à Nostre Dame de Lieffe, & qu'on chantaist vn seruice aux Bós Hommes de Chaliot. Le maistre qui croyoit nayuemét q; tout ce qu'il luy disoit estoit vray à cause de la dite personne qui estoit morte récemment dans ledit logis, se laissa

bié tost emporter à toutes ses persuasiōs, & le meilleur qui estoit en ceste affaire, c'est que ledit Rauiſio disoit, que l'esprit n'entendoit point que d'autres fissēt le pelerinage que luy. C'est ce quiesmeur Carilis à luy fournir la sōme d'argent qu'il luy auoit demandee pour faire ledit voyage, pendant lequel il se donna du bon temps, ne sortant de Paris durant tout ce long seiour ou il fit semblāt de faire son pelerinage & son seruice.

Or estant de retour, apres s'estre donné du plaisir dudit argent, il commença à suiure ses mesmes brisees, & vſer de ses mesmes inuentions. Deslors on entendit l'Esprit faire plus de tintamarre qu'auparauant, toute la nuit ne se passoit qu'en bruit, cris horribles, & hurlemēs espouuantes. La terreur s'insinua de plus

en plus dans l'imagination des domestiques, qui, comme ils estoient plus proches de la Chambre ou se faisoit le bruit, aussi en auoient ils imbuë vne plus grande crainte.

Cependant Rauision n'estoit point à peine leué qu'il demandoit de nouvelles offrâdes pour faire des Aumosnes, disât que l'Ombre du mort l'auoit derechef tourmenté, & ainsi il continua cest exercice vn mois durant, ou il attrappa vne grande quantité d'argent de Caril- lis, qui ne se doutoit aucunement de la perfidie & impudence signalée de son Seruiteur; & pour le dire avec verité il palioit si bien son fait, & masquoit si artistement sa fourbe, qu'en le voyant on ne se fust iamais imaginé qu'il eust vou- uiser de ceste tromperie, tant par son visage il desaduouoit ce que cachoit son interieur.

Le bruit de cest Esprit s'espan-
dit incontinent aux enuirs, &
paruint aux oreilles des voisins de
Carilis, qui formâs tous leurs opi-
nions sur ce qu'ils en oyoient dire
tous les iours, & sur les diuers rap-
ports qu'on leur en faisoit, en por-
toient diuers iugemens, les vns
disans que c'estoit vne pure ima-
gination, & qu'il est impossible
qu'un Esprit reuienne selon Ari-
stote qui dit que, *Aprimatione ha-
bitum non datur Regressus*, Les au-
tres soustenoient que cela pou-
uoit estre vray, & qu'on en auoit
veu assez d'experiences, tât à Paris
qu'en autres lieux de ce royaume.
Plusieurs incredules s'en moc-
quoient & se vanterét qu'eux mes-
mes ils chasseroiét l'Esprit, si Cari-
lis leur vouloit permettre de cou-
cher en sa maison: l'importunité
q; l'esprit faisoit à Carilis l'esmeur

à leur accorder ceste requeste, ayāt desia fourni plus de cent pistoles à l'esprit sur les demandes qu'il luy auoit faictes.

En fin vn soir sans autrement en aduertir Rauisio, lesdits Voisins qui s'estoient libremēt offerts, ne manquerent pas de venir au logis de Carilis, & comme ils se diuertissoient dans de ioyeuses recreations, en attendant ce que feroit l'E prit, vn commença à entendre le tintamarre plus que iamais. Ce bruit les fit mettre en campagne, mais comme ils furent arriuez aupres de la Chambre où ils entendoient toute ceste tempeste, vn des deux soit qu'espouuenté de l'E prit, & qu'il eust quelque doute de voir ou de trouuer ce qu'il n'eust voulu rencontrer, il prit la fuitte & descendit en bas, Son compaignon plus hardi & qui

voyoit qu'infailiblement on se
mocqueroit de son entreprise, s'il
ne la mettoit à chef, encouragé &
animé d'une ferme resolution il
poursuit son chemin, & approcha
de plus prez de la Chambre, ou il
entendoit marmoter, estant à la
porte; il fut long temps irresolu,
s'il deuoit entrer ou non, tãtost la
hardiesse & la hôte qu'il auoit d'e-
stre mocqué de ses Voisins luy fai-
soit aduancer le pied, tantost la
crainte le retiroit, ainsi balançant
dans la peur & la hardiesse, il ap-
perçoit par vn petit trou de la
porte qu'il y auoit de la chandel-
le, ce qu'ayant cogneu, d'un
coup de pied iette la porte en bas,
& entra dedás: or de prime abord
il pensa reculer ayant veu l'Esprit
enuironné d'un drap qui tenoit
vne teste de mort en sa main,
mais s'estant rassuré sur ce qu'il

ne vit personne d'as le liect, il s'alla prendre au collet de l'Esprit qui commença à crier. Luy de son costé, ioyeux de sa prise, il appella les domestiques qui tous s'estans portez en la Chambre de l'Esprit, ils le pelauderent comme il faut. Carilis en ayant eu le bruit, & comme hors de soy, ne pouuant imbuier ceste opinion, le fit enfermer dans sa mesme Chambre, ou il auoit fait l'Esprit iusques au lendemain matin qu'il fut mené au Chastellet au grâdestonement de tous les Voisins, qui tous regarderent l'Esprit, & luy donoit-on des brocars par toutes les ruës ou il passoit

Le mesme arriua il n'y a pas long temps aux enuirs de la Bastille, mais celuy qui contrefaisoit l'Esprit fut plus prudent, car ayant par les inuentions attrappé deux cens pistolles, il prit la fuitte de peur

HISTOIRE DES
d'estre prisonier, & ainsi il pre-
uint de bonne heure ce qui arri-
ua au premier.

*De l'effronterie & impudence signalee du
Sieur Amertis, enuers un Marchand
de Lyon, & comme il le trompa
dans le Palais de Paris.*

CHAP. IX.

LE siecle est aujourd'huy telle-
mēt de praué que plus il va en
auant, plus la corruptiōs y insinuē,
tout l'ordre & l'œconomiede l'ana-
ture est maintenant renuersé &
changé de sa premiere forme.

Ætas parentum peior auis tulit

Nos n. quiores, mox daturus

Progeniem vitiosiore.

Age vrayment de fer & de plōb,
puis que nous n'y remarquons que

des actions ferrees & hors du sens ordinaire des hommes & la source d'où procedent tant de malheurs, ie peux dire qu'elle vient d'une certaine effronterie qui prend accroissement avec nous, & qui se chage enfin par ses actes reïterez, & habitude en nostre Nature. Voyons-en vn exemple signalé en la personne d'Amertis, homme qui auoit voyagé en son temps, qui auoit des correspondances de tous costez, & qui estoit rompu aux affaires.

Comme il se promenoit vn iour dans la Salle du Palais pour tascher d'espionner les actions de quelques vns, il vit vn Marchant de Lyon qui estoit avec vn de ses associez, touchant quelques Marchandises qu'il luy auoit liuré, il fut quelque temps à le contépler pour tenter s'il le deuoit surpren-

dre. Mais ainsi qu'il ruminait en soy mesme sur le fait de son entreprise, il entendit trois ou quatre personnes qui parloient de luy, l'un disoit qu'il estoit de Lyon, & qu'il le cognoissoit bien. Amertis presse l'oreille, l'autre disoit qu'il auoit fait le voyage d'Italie avec luy, & qu'il luy deuoit encor quelque argent qu'il luy auoit presté à milá, de façon qu'Amertis aprit qui il estoit, ou il auoit esté, & en quel temps. Bref avec la memoire qu'il auoit, qui estoit tres-viue, il retint tout ce qu'il entendit dire de luy.

Sur ce il le vint trouuer au milieu de trois ou quatre personnes de qualité avec qui il traitoit, il le salua d'une profonde reuerence, l'autre qui ne l'auoit iamais veu se retourne & luy rend son salut avec ces mots, monsieur excusez moy s'il vous plaist, ie ne vous puis remet-

tre, il me sēble pourtāt vous auoir
veu quelque part, ce mot enfla en-
cor d'auantage le cœur d'Amertis.
Monsieur (luy repartit il) i'ay eu
cest hōneur de faire le voyage d'I-
talie avec vous. Le marchād qui ne
se pouuoit resouuenir de to' ceux
qui depuis quinze ans estoient en
sa compagnie au nombre de dou-
ze ou treize, creut que celuy cy
disoit vray, & le receut comme le
reconoissant.

Amertis prenant bon augure de
ceste feinte & nouuelle bien-ueil-
lance, apres plusieurs deuīs & en-
tretiens depuis le temps qu'il ne
l'auoit point veu: commença à luy
dire, puis qu'il le trouuoit si à pro-
pos, qu'il luy feroit vn extreme
plaisir s'il luy vouloit rēdre les cēt
escus qu'il luy auoit presté; le mar-
chand se trouua bien estonné à ce-
ste demande, & ne sçachant ce que

luy vouloit dire Amertis, luy respōdit qu'il ne luy deuoit riē. le ne crois pas, repliqua l'autre, qu'un homme comme vous, qui auez l'honneur en recommandation, & qui faites profession d'estre homme irreprochable, ayez la conscience si peruerle que de me dēnier ce qu'il m'est deu. Ce seroit violer non seulement les droicts de l'amitié & de toute la conuersation humaine, mais aussi renuerser toute la bonne opinion qu'on a conceu de vous, & dans Lyon & dans Paris. ne vous souuient il pas, dedans Milan que ie vous prestay ceste somme ? vous ne me le pouuez nier aucunemēt, vous encourriez blasme par tout de vous enrichir du bien d'autrui.

Le Marchant tout esperdu & qui ne sçauoit que respōdre, dit qu'à la verité il croyoit luy auoir esté

presté quelque argēt en son voyage, mais qu'il l'auoit rendu: l'autre luy nie, & persiste avec instance à luy demander.

Ceux avec qui estoit ledit Marchād, voyās qu'il y auoit quelque verité en l'exterieur de ces paroles, sans autrement descouvrir la fausseté qui estoit cachee deffous, donnerent le tort au marchand: & certes à voir la mine & le proceder d'Amertis, on n'eust iamais iugé qu'il y eust eu de la tromperie en son faict.

Sur ceste contestatiō ils se retirērent tous en leurs maisons, Amertis poursuiuit son homme iusques à son logis afin de le contraindre à luy faire ledit payement. En fin pour ce iour n'en pouuant tirer autre raison, il remit sa cause au lendemain matin, où de rechef il le vint trouuer ainsi qu'il estoit en

vne honorable compagnie.

Le Marchant se trouuant vn peu formalisé quād il se veid pressé de la sorte par cest affronteur deuant de si honnestes gens, craignoit d'en receuoir du blasme, c'est pourquoy il pria vn de sa compagnie de prédre ceste debte en son nom, & qu'on verroit ce qui en reüssiroit; de sorte que celuy qui auoit le mot voyant qu'Amertis poursuiuoit de plus en plus le marchand, il luy vint dire en pleine assemblée, Monsieur vous auez tort de vous prendre à cest homme icy pour ceste debte là, c'est moy qui vous la dois, & toutesfois chacun sçauoit bié qu'il n'auoit iamais esté en Italic.

Amertis rusé au possible, prit l'occasion aux cheueux, & luy respondit, Monsieur, il est bien vray, comme vous mesme vous le con-

fessez deuant ces messieurs que vous
me devez cent escus, pour vostre
regard vous ne le scauriez nier,
mais pour Monsieur à qui i'ay pre-
sté ceste somme en Italie, il faut re-
solutement qu'il me la donne; ainsi
il les couainquit si fort, & les pres-
sa si outrageusement que de peur
de perdre leur reputation, dans
vne si honorable assistance, ils luy
firent donner la moitié de son ar-
gent, luy promettant de luy don-
ner le reste à la premiere occasi-
on, & de fait il ne manqua pas d'y
venir, & de leur en apporter quit-
tance. Voila des effects d'une si-
gnalee impudence, & effronterie
s'il y en eust iamais.

*De l'inuention & industrie de Rapiny
Bourguignon, & comme il surprit un
Marchant en la rue saint
Anthoine.*

CHAP. X.

QVand l'habitude de quelque
qualité s'enracine dans l'es-
prit de l'homme, & qu'elle conti-
nue quelque temps à s'enuieillir
dans l'exercice & dans les actes de
ceste habitude, à peine s'en peut-il
retirer, il est violété de ses propres
passions à embrasser le vice, & est
rendu tellement captif de ses sens,
qu'il ne peut plus faire aucune re-
flexion sur soy-mesme, il faut de
necessité qu'il s'abandonne à ses de-
sirs & à ses cupiditez. Ce libre ar-
bitre qu'il auoit seul par dessus le
commû des Animaux, perd alors

son essence, & fait que l'homme qui estoit en degré bien plus haut & releué que les brutes simbolise tout a fait avec leur nature, & ainsi ces qualitez du commencement s'enracinent tellement en nous, qu'elles se changēt en propre substance & contraignēt nos passions de s'affuiection à leurs Loix, & ce qui est de plus déplorable en cecy, c'est que l'homme est tellemēt lié, & garrotté de l'habitude, qu'il a pris des sa ieunesse à quelque vice, qu'il ne s'en peut dépestrer & s'en faire quitte, tant le mal a pris d'accroissement & de vigueur.

Rapiny n'auoit fait autre chose des sa ieunesse que de piller, voler & exercer toutes sortes d'iniustice, tantost dans les Villes, tâtost dans les bourgades & sur les grâds chemins. On l'auoit couru plusieurs fois, mais il scauoit si bien ses de-

stours, qu'on ne le peut oncques attraper.

Il quitta son pays de Bourgogne pour venir à Paris, estant asseuré que c'est en ce lieu où on peut faire de bons coups; desia en plusieurs endroicts du royaume il auoit esté repris, toutesfois cest appetit interieur de desrober, auoit vn tel ascendant sur la partie superieure de son ame, qu'il estoit contrainct & assuietti à tout ce qu'il luy suggeroit.

A peine fut-il entré dans la Ville de Paris qu'ils s'accosta d'vn nôbre infini de Vagabons, & coureurs de nuict, en quoy ladite Ville est tousiours assez feconde & fertile, veu que si on les chasse par vne porte ils reuiennent par l'autre, & ainsi l'impunité qu'il y a, fait que le nombre s'accroist & s'augmête tous les iours au grand detrimant

de tous les Bourgeois & Habitans de ladite Ville qui en sont grandement incommodez.

Durant ce temps que rapiny fut à Paris il fit diuers Vols & raptis en diuers endroits de ladite Ville. Sónom se faisoit desia craindre partout, & les Citoyens en auoient imbuë vne telle horreur que partout on ne parloit que de les tróperies: Mais comme il estoit ordinairement bié couuert, & ne se móstroit que peu souuent, peu dans la Ville l'eussent veu sans le recognoistre particulièrement.

Vn iour voulant iouër vn tour de ses mauuaises inuentions, & tascher à surprédre quelqu'vn en ses tromperies, vestu qu'il estoit en habit de grand Seigneur, il mit vn petit garçon de ses associez dás vn coffre de bois blanc en façon de Balle, & vint chez vn Marchand

de la rue saint Anthoine, nommé Siriadre, soit qu'il le cogneust de longue main, ou autrement, le Marchant estoit grandement riche & auoit plusieurs denrees d'ordinaire pour les habitans de la Ville de Langres & de leurs circonuoisins. Ce fut ce qu'il conseilla à Rappiny d'y faire apporter sa Balle, feignant de la vouloir enuoyer à quelque vn de son pays, & de fait il vint trouuer vn matin. Siriadre avec ladite Balle comme i'ay dit, & luy pria de luy garder iusques à ce que le messager de Bourgogne vinst & qu'il le vouloit enuoyer en son pays. Or il est à remarquer qu'il auoit esté avec son petit garçon plusieurs fois là dedans, & qu'il scauoit bien ou estoit le Cabinet & l'Argenterie, Outre plus il auoit donné ordre mettant ledit garçon dās la Quaisse, qu'il ne son-

naist mort, & qu'à minuiet il ne manquaſt pas d'ouurir la porte. A tout cecy ſembloit fauoriſer l'abſence de la Maiſtreſſe du logis qui deux iours auparauant eſtoit allée à la Foire du Landy ou ledit Siriandre auoit vne Boutique.

Ce Marchand qui auoit des correſpondances en Bourgongne, & qui eſtoit couſtumier d'enuoyer des marchandises audit pays, ſans ſe douter de ce qui eſtoit enclos dans ladite Balle la receut & la mit dans ſa Boutique ſans autrement ſonger à la trahiſon de celuy qui luy auoit donnée.

Le ſoir eſtoit deſia venu, & la Nuiet mere des Larrons & fauorable à leurs deſſeins, auoit du noir & tenebreux voile des Ombres, caché ce qui eſtoit de plus beau dans l'Vniuers, quand ce ieune garçon qui ne dormoit point, ayant ap-

perceu que tous les domestiques estoient retirez, & qu'infailiblement tous ceux du logis estoient en leur premier sommeil, il ouure doucement la Quaisse où il estoit enclos, & vint à taston à la porte, où il se trouua bien estonné, car elle estoit fermee à la clef & l'auoit-on portee le soir au Maistre du logis, le desespoir luy pensa faire quitter alors son entreprise, & il demeura long temps en suspens s'il deuoit poursuiure ce qu'il auoit commencé, ou rentrer dans sa premiere loge, car il ne voyoit aucune chose fauorable ny respondante à ses desirs.

Estant en ceste perplexité il s'aduisa d'un seul expedient qui restoit : Sçauoir est d'oster vn ais de la Boutique, & donner entree à ses Camarades par là, ce qu'il fit si dextrement, que personne ne

s'esueilla iamaïs au bruit, il fut bié vn quart d'heure à attendre son Compagnon qui ne venoit point, car minuiet estoit desia sonné & estoit pres d'une heure qu'il n'estoit encore venu, Ce long temps luy faisoit perdre patience, toutes fois il s'imaginoit qu'il ne pouuoit pl⁹ beaucoup tarder, comme de fait Rapiny vint avec quatre de ses auât-coueurs en ladite Boutique, & sans entrer dedans, leur petit garçon les chargea tous cinq de Marchandise, car aussi bien n'eussent ils peu entrer pour ce que la place estoit trop estroite.

Quant il les eut chargé à leur gré de diuerses pieces de draps de lers, & de tout ce qu'il p^u attrapper dans la Boutique (car il ne voyoit pas ce qu'il prenoit) il se charge luy mesme & vint retrouver ses compagnons pres sainct Geruais,

sans autrement fermer la Boutique.

Les voisins qui se leuerent du matin, voyant que ladite Boutique estoit ouuerte, vinrent frapper à la porte, & ne pouuoit-on faire leuer les domestiques & Seruiteurs du logis, tant le sommeil les auoit saisis. En fin ils recogneurent toute la tromperie & ne sceurent recognoistre les Autheurs que quatre ans apres, par le moyen d'un des quatre qui auoient assisté au Vol, quit fut pendu à la Greue.

*De deux Italiens qui vollerent la maison d'un Bourgeois du Fauxbourg
saint Et Marceau, apres
l'auoir assassiné.*

CHAP. XI.

Ceux qui ont descript les mœurs & façons de faire des Italiens, & qui ont attentiuement considéré le peuple de ce Pays, il l'ont remarqué grandement rompu & cauteleux en toutes ses actions, iamais les Italiens ne sont ouverts ains ils ont vn cœur double, & bié souuent on pensera estre en leurs bonnes graces, & par l'apparence exterieure ils vous resmoigneront tous les signes de bienueillâce qu'on pourroit souhaiter, & toutesfois le plus souuent ils ont vne hayne irreconciliable con-

tre ceux à qui en dehors ils fôr des
demonstrations d'amitié. nous en
auons vn exemple signalé en la
personne de deux refugiez d'Ita-
lie, nommez Florétino, & l'Andoli
côpagnôs de fortune, côpagnôs de
cognoissance, mais sur tout côpa-
gnons de malice; la Florence les au-
uoit esleué, & vit leur accroisse-
ment, la France vit leur derniere
fin, ils sortirent de leur pays pour
leurs mauuais deportemens, &
sembloit que leur terre natale ne
les peust nourrir d'auantage; mais
la Frâce leur tesmoigna bié qu'el-
le n'a point de coustume de sou-
stenir long temps de tels auortôs,
ses Magistrats furent les Hercu-
les, qui trancherent la teste à ces
Monstres, & qui abatirent la fu-
reur de ces Hidres infernales.

C'estoit au temps que le marquis
d'Ancre tirannisoit les François

sous le ioug imperieux de ses loix:
& que ce Royaume comme atterré
sous le poix d'une infinité de re-
belliós, ne s'ébloit respirer que feu
& sang. Florentio & Landoly forti-
rent de leur pays pour venir en
France, & s'imaginerét puis qu'un
de si basse condition y auoit esta-
bly só Empire, que la fortune leur
pourroit departir par mesme moy-
en quelque chose de ses faueurs.

Ces deux Personnages estoient
tellement vnis de cœur, & d'affec-
tion, & auoient entre eux deux
vn tel accord qu'ils ne se dis-joigni-
rent iamais, les conceptiós de l'un
respondoient tousiours aux con-
ceptions de l'autre; & côme d'or-
dinaire les Italiens sont hauts à la
main & se persuadent des merueil-
les, aussi ces deux cópagnós auoiét
sie ne sçay quoy qui leur pro-
nostiquoit sourdement quelque

chose de grand s'ils eussent main-
tenue ce que leur promettoit leur
fortune.

Estant arriuez à Paris, comme en
la retraicte & pepiniere de telles
gens, ils vont en Cour, ou par le
moyen de quelques Florentins
qu'ils pratiquerent, ils commen-
çoient desia à entrer en la lice d'v-
ne fauorable destinee.

Ils choisirēt vn logis dans le faux-
bourg saint Marceau, ou estoit
pour lors vne partie du Regiment
des gardes, là ils sejournerēt quel-
que temps, & ne manquoierēt d'or-
dinaire d'aller au Louure estimant
que ceste visite leur pouuoit ap-
porter du proffit, cōme de fait leurs
compagnons Florétins se promet-
toient avec le temps de les faire
placer avec eux, & les faire entrer
en la mesme conditiō ou les auoit
placé ledit Marquis d'Ancre.

Landoly & Florétio sur ces espérances faisoient de iour à autre nouvelles parties, ils coméçoient à hâter lesdits Soldats du Regiment des gardes, & les traicter magnifiquement en leur Hostellerie (oultre l'ordinaire des Italiés, car ils sont fort retenus) la pluspart du temps ne se passoit qu'en ioye, banquets, festins, & autres plaisirs, & toute ceste resiouyssance n'estoit fondee que sur les fresles promesses de leurs cōpagnós qui n'auoient encor sorty aucune apparence d'effect, ain si ils s'en debterent grâdement, & toutes fois l'argët leur māquoit, l'Hoste du logis qui craignoit qu'ils ne fissent quelque escapade sans payer, les vouloit contraindre: la somme estoit grande, & leur demandoit quelqu'un qui les cautionnast, sur ceste demande si pressante ils delibérerent de s'en

départir, & deslors ils formerēt vn mal-heureux dessein sur sa vie, n'attendant que l'occasion de l'exécuter: Quelquefois le desespoir aueugle nos sens, & nous rend comme stupides à toutes les bonnes inspirations qui nous sont infuses d'en haut.

Landoly quelquefois desistoit ceste action, & de ceste meschante entreprise, & dissuadoit Florentio de l'acheuer; l'autre qui estoit enflammé de courroux contre le dit Hoste, & receuant comme vn affront de sa demande ne pouoit s'oster de la teste ceste resolution, tousiours il songeoit à ceste entreprise, & n'auoit aucun repos en l'esprit, tant l'homme est agité en ces accidens, sa propre conscience le bourreloit, & l'apprehensio du mal futur qu'il pouoit encourir luy faisoit quelquefois
quitte

quitter ceste proposition, mais en mesme temps il sentoît des esmotions en son cœur toutes contraires.

En fin le iour de sa mort fut resolu le sixiesme Feburier, & cependant ils l'entretenoiët de promesses disant qu'infailiblement il seroit payé ce iour là, comme de fait il fut payé mais d'une estrange monnoye: le iour des Roys estant venu que tout le mode se resiouyr, & par vn commun signe d'allegresse chacun détrempe ses fantastiques soucis dans la coupe de Bacchus, pour y noyer quant & quant toute la tristesse. Florentio & Ládoly disnerent avec leur Hoste, ou on pourra recognoistre combien il est difficile de sçauoir l'interieur d'un Italien & de iuger de sa façon de faire, car ny l'un ny l'autre ne luy monstrerent iamais

HISTOIRE DES
tant de signes de bien-veillance
qu'ils firent ce iour.

Après le disné ils se resiouyrent
ensemble, & luy promettoient de
le venir entretenir le soir, & qu'il
auroit de bonnes nouuelles de son
argent, cela fait, ils sortent & ne
reuinrent au logis que sur les on-
ze heures de nuict ou il faisoit vn
têps fort verglas, tout le môde du
logis estoit desia retiré, la seruan-
te pourtant leur vint ouurir la por-
te doucement sans esueiller le
maistre du logis, & la ferma à la
clef, ils montent en leur Châbre
qui estoit au second estage, & après
auoir attendu vne heure & demye
que tout le monde du logis fust
en son profond sommeil, ils des-
cendirent subtilemēt dans la chā-
bre de l'hoste, qui pourestre vn
peu escarté des autres ne leur
promettoit qu'un accez fauo-

rable, Ládoly qui ſçauoit les de-
 ſtours de crocheter, ouure la por-
 te de ladite Chambre. Le maistre
 s'eſueille en ſurfaut, & demande
 qui entroit, eux ſe voyans deſcou-
 uerts, approcherent du liēt, & luy
 parlerent craignant qu'il ne criſt
 & qu'il n'eſmeuſt ſes voiſins & ſer-
 uiteurs; comme ils deuiloient de
 choſe & autre, l'Hoſte commença
 à ſe douter de quelque mauuiſe
 entrepriſe ſur ſa vie. C'eſt pour-
 quoy il appella vn ſien ſeruiteur
 nommé Louys: Landoly voyant
 qu'il ne falloir d'auātage prolonger
 ceſte affaire, le prit incōtinēt au
 col de peur qu'il ne criſt, Florētio
 cependant ſe ietta ſur luy avec vn
 poignard & luy en deſcharge cinq
 ou ſix coups dans l'eſtomach &
 dans le ventre inferieur du cœur,
 ou il couppa la veine caue, ainſi il
 n'eut poit loīſir de reſpirer, ainſi

mourut à l'heure mesme, ce n'estoit rien d'acheuer ceste fureur, ils prirent les clefs qui estoient au cheuer de son liêt & ouurirent vn Buffet qui estoit en la mesme chambre d'où ils enleuerent bien deux cens escus d'argent monnoyé, & pour autant de vaisselle, puis trouuant la porte du logis fermee, ils monterent doucement en leur Chambre ou lians & ioignás leurs draps, couuertes, & ciel de liêt par ensemble, ils descendirent par la fenestre & se ietterét en bas du logis, & oncques depuis n'en ouyt on parler, sinó que l'an 1619. on trouua Landoly dans les Galleries de Marseille qui confessa tout le fait.

*De la drollerie des Filous de la Foire
Saint Germain, & des tristes
Infortunes de Dorilis.*

CHAP. XII.

PVis que nous auons deliberé de traitter en ce liure de tous les tours & finesses dont vsét ordinairement les Larrós, il ne fera pas mal à propos de toucher vn mot en passant de ce qui se fait tous les ans dans la Foire de S. Germain, affin que d'oresnauant ceux qui yront y puiffét prédre garde, car s'il y a lieu ou il se commette des vols & ou iamais on ait peu remarquer des souplesses de Volleurs, c'est en ce lieu où on les trouuera, & de ce cy nous en auós vn si ample exemple qui se fit és enuirós de l'an 1615 à l'endroit d'vn ieune homme d'Amiens que ie croy qu'en vn iour il

HISTOIRE DES
esprouua toutes les finesſſes des
larrons.

Ce ieune homme ſe nommoit Dorilis, lourd & ſtupide de ſa nature, & peu verſé aux aſtuces & finesſſes du monde ainſi que ſont tous les Picards, ils ont la pluſpart l'eſprit comme engourdi d'as vne ruſticit  abaſtardie, bien loing des autres Peuples de la France qui ſont eſueillez & rompus  s affaires qui concernent leur propre & particulier intereſt.

Dorilis ſe desbauche de ſes parens fort ieune, pour quelque querelle qu'il eut avec ſes freres, & deuant que partir il ſ'eſtoit charg  environ de c t cinquante eſcus qu'il auoit pris ſecrettem t dans le Cabinet de ſ  Pere pour faire ſ  voyage, car il n'eſperoit pas ſeulement de venir   Paris, mais de trauerſer toute la France, & d'aller en

Prouence, où il auoit vn sien Oncle fort riche & opulent; comme il estoit sur le chemin de Paris il s'acosta d'vn Marchand qui alloit à la Foire saint Germain, c'estoit environ sur la fin du mois de Ianuier de l'an 1615. quand ils furent à Paris ils se quitterent, & prirent tous deux logis à part.

Dorilis encor frais arriué en ceste Ville, & qui n'auoit iamais rien veu que le coin de son foyer, alloit de ruë en ruë pour voir les bastimés & raretés des Edifices de Paris, il fut recogneu par les Filo^s du p^ot Neuf, qui à mesme temps qu'ils le virét iugerét qu'il ne falloit point grand chose pour l'attrapper, vn le vint adresser à luy au de là de la Samaritaine, avec vn gros paquet de lettre, ou estoit ceste inscription. *La presente soit donnee en seurete à Madame de Robecour, de*

meurant à Abbeville. Et luy pria de luy dire à qui ce pacquet s'adressoit & qu'il le venoit de trouuer, qu'il y auoit peut-estre quelque chose enclose dás ladite lettre. Dorilis qui ne pouuoit penetrer au fond de ceste fourbe, pour n'estre encor rompu à toutes ces rencontres, lit l'inscriptiõ, & par le comãdemét de celuy qui luy auoit donné le pacquet lit la lettre, trouue vne Chaisne d'or qui y estoit empaquetee, la teneur de la missiue portoit ces paroles.

MADAME,
 Ayant par vos dernieres apris l'heureux succez de vostre *Mariage*, & que bien tost vous acheueriez vne si bonne entreprise, il eust semblé que ie n'en eusse eu aucun ressentiment de ressiouissance, si par ceste Chaisne ie ne le vous resmoignois, elle est de petite va-

leur au respect de vos merites , elle ne
couste que cent escus , c'est peu de chose
au regard de ce que mon affection vous
voudroit offrir. Prenez le Madame,
d'aussi bon cœur , que celui qui vous
l'enuoye vous la consacre de pure affe-
ction. Et cependant tenez moy
Madame,

Vostre tres-affe-
ctionné Seruiteur &
Cousin , A. de Ro-
becour.

L'alecture de ceste Lettre en floit
le courage de Dorilis, pleust
à Dieu disoit il, que i'eusse fait au-
iourd'huy ceste bonne rencontre!
l'autre luy respôd, vous avez fait
la rencôtre si vous voulez, i'ayme
autant que vous ayez la Chaisne
qu'un autre, vous voyez le prix
quelle vaut, donnez moy la moi-

tié de l'argét & prenez la Chaisne pour vous, vous aurez tousiours cinquante escus de profit. L'autre s'accorda avec luy, & lās la mōstrer à vn Orfeure si la Chaisne estoit d'or ou non, il conuint avec lui de quarāte escus, encor croyoit il auoir fait vne grande fortune.

Ceste premiere rencontre n'estoit qu'un aduertissemēt qu'il auoit de to⁹ les autres accidēs, qu'il récontreroit à l'aduenir, il ne s'en prit pas garde pourtāt, car il croyoit auoir gaigné sa iournee, & benissoit l'heure qu'il auoit passé sur le Pont, & qu'il auoit fait ceste heureuse rencontre.

Il poursuit son chemin tenant la route de la Foire, & comme il s'amusoit à regarder les Filous & Charlatans iouer sur le Pont des Augustins, vn d'eux s'accoste de luy, & ioüoit contre son Compa-

gnon feignât ne le point cognoistre, cependant il gaignoit l'autre filous, & auoit desia donné à Dorilis six quarts d'escus pour le moins, cela esmeut Dorilis de iouer & de suiure sa fortune : mais ces deux filous qui feignoient au commencement ne se recognoistre, ayans veu qu'il se piquoit au ieu luy gaignerent dix escus, & en eussent bié emporté d'autres si l'affectiô & le desir qu'il auoit de voir la foire ne l'eust fait retirer de bon-heure.

Et pour tesmoigner que le vray centre des Larrons c'est la foire S. Germain, & qu'ils ne sont iamais tant en saison que lors qu'elle est en vigueur, On verra par la suite de ce discours le hazard qu'il y a, & mesme aux plus experimentez de s'y trouuer.

Dorilis entre dans la foire couuertement, où selon sa coustume

rustique, il porte ses yeux deçà & delà sans estre iamais arrestez si nō sur la diuersité des choses qu'il voyoit, entre autres il s'arresta en vne Boutique ou il y auoit vne Blāque, là il regardoit les gaignās & perdans; mais ces messieurs ayans des gens attitrez qu'ils font gagner quād bon leur semble, il arriua qu'vn Filou vint iouer contre le maistre de la Boutique & voulut auoir des billets desquels il fit part à Dorilis, luy disant que s'il vouloit participer à la moitié de ses billets il luy en donneroit, & qu'il esperoit d'emporter quelque chose de la Blanque. L'autre qui vouloit faire le fin ayant desia esté attrappé quasi en vne mesme affaire, luy respōdit qu'il ne vouloit point estre de la partie, sur ceste respōse le Filou ouure ses billets & trouue vn Esguiere d'Argent qu'il

demanda aussi-tost au Maistre de la Blanque & la monstre à Dorilis luy reprochant qu'il n'auoit point voulu estre de la partie, & qu'il eust emporté la moitié de l'esguier ou la valeur d'icelle, Dorilis attirait par le gain imaginaire de ce luy-cy commēce à tirer des billets & a les ouurir, il en eut ce iour pour le moins pour vingt escus, & toutes fois il ne récontra pas vn seul benefice, n'estoit riē de toutes ces pertes, il mettoit toute son esperāce en sa chaine croyāt qu'elle luy seruiroit sur le dernier, & qu'il l'a pourroit vendre biē chèrement aux Orfeures. Ainsi qu'il est dās l'enclos de la Foire & qu'il visite les marchandises excellētes (cōme ordinairement ceste place pullule en beaux portraicts, & en richesses admirable d'innōbrable valeur, & autres auāt-courriers qui

font en ce temps cōtinuelle garde
dans ladite foire, le vinrent saluër,
Monsieur (luy dit vn de ces deux)
il me semble vous auoir veu quel-
que part, cela se peut faire, repli-
qua l'autre , ie suis d'Amiens pour
vous prester toute sorte d'humble
seruice en ce qui me pourra rēdre
vostre obligé, à ces mots le plus
vieil des deux va dire à son Com-
pagnon, vrayement mon Cousin
voicy nostre vray fait, nous auons
recontré monsieur tout à propos;
puis se tournant vers Dorilis. Mon-
sieur luy dit-il, cognoissez vous
Monsieur le Procureur du Roy?
ouy da Messieurs, repartit Dori-
lis, il m'est Parent & Cousin. Nous
en sommes tres-ioyeux, dirent les
autres, vous nous ferez ce bien de
luy faire tenir ceste Lettre en vous
contentant.

Dorilis qui ne sçauoit encore

tous ces destours, ioyeux outre mesure de cest accident, croyant que ce bon-heur compenseroit d'un costé ce que le destin luy auoit rai de l'autre, prend ceste lettre, & suit ceux qui luy auoient donné à leur instance, car ils le vouloient recópenfer d'une piece d'or (disoient ils) ils le menerent à la prochaine maison où l'ayans fait attendre quelque temps à la porte, ils luy vinrent dire que leur maistre n'auoit point de monnoye sinon vne piece de cent dix sols, & que s'il auoit vn escu ou cinquante sols de monnoye à rendre en échange, que ce seroit pour luy la dictée piece, il ne manqua pas aussi tost de leur donner ce qu'ils auoient demandé, pésant qu'il y auoit tousiours du gain pour luy, de là il retourne dans la foire: Mais le malheur en voulut qu'on luy

coupa sa bourse où estoit tout son argent. Cependant qu'il estoit dás la presse à contempler les Tableaux, Vaisseaux d'or & autre richesse, & ne luy demeura que la chaine seule & la piece d'or qu'il auoit receu des deux derniers Charlatans.

Il ne se sentit jamais surpris pourtant, tant lesdits coupe-bourses ont de subtilité & d'adresse en leurs tromperies, voila nostre pauvre Dorilis percé bien bas, & quand bié il auroit perdu sa bourse, & tout ce qu'il auoit apporté d'amies, si est-ce que l'estime qu'il fait de la valeur de sa chaine luy enfle le courage, & croyoit auoir assez de cheuance pour demeurer vn an à Paris, mais hélas! il fut bien esloigné de ses proiets, comme vous verrez par la suite de ceste histoire.

Après

Après auoir esté en diuers endroits de Paris, veut tout ce qui s'y remarque de pl^r beau, & visité vne partie de ce qu'on peut souhaiter de rare (car de voir tout il est impossible) il prit logis près du Pont Neuf, & fut si mal-heureux de loger au lieu mesme où tous les Coupe-bourses, Filous, & Vagabons se retiroient ordinairement.

Quand vne mauuaise destinee nous suit, il sèble qu'elle soit in-
neuitable, & qu'il soit impossible de fuyr le coup qui panche desia à nostre ruyne: ainsi il y a des hommes si infortunés & nez sous de si malignes influences, qu'il semble que le destin ait coniuré leur totale ruyne, tant ils sont subiets aux Loix de l'infortune & du malheur.

En mesme tēps q; Dorilis fut arrivé dās l'hostellerie, il s'aperceut

que sa bourse estoit coupee, ce fut alors d'auoir recours aux souspirs & aux larmes, car la tristesse luy auoit tellement bouché les côduits de la parole, qu'il ne pouuoit former aucunes plaintes, encor la ieu- nesse qui estoit en luy, le long che- min qu'il auoit à faire, les hazards de maladies qu'il pouuoit encou- rir, & mille autres infortunes qui se representoiêr à luy le mettoieût au desespoir; toutesfois il se remit vn peu en soy-mesme quâd il trou- ua la chaisne & sa piece d'or, qu'il auoit mis d'vn autre costé, cela ap- paisa tât soit peu la douleur d'vne telle perte, mais la fortune luy re- seruoit des mal'heurs plus grands, & le destinoit à de plus grâdes tra- uerses, car ainsi qu'il estoit dans la dite maison à gemir sur la perte, vn autre Filou s'acostât de luy, tascha à le côsoler, luy remonstrant qu'il

ne se falloit laisser dominer par la tristesse, & qu'en vain il se consumoit en pleurs, puis qu'il ne pouuoit rapporter les choses vne fois perduës, & qu'au reste puis qu'il estoit d'Amiens, (ce qu'il auoit ouy dire auparauant,) il luy offroit toutes sortes de seruice, & bien dauantage, que s'il auoit affaire d'argent, il luy en fourniroit.

Tous ces aduantages resiouyrent Dorilis, qui croyoit auoir rencontré vn heureux port en son aduersité, mais hélas! il ne scauoit la trahisó qu'on lui brassoit sous la feinte de ces paroles, il le remercie accortement, & l'approcha de plus en plus, l'autre de son costé le pria à souper, & lui dit que resolutement il luy vouloit faire donner vn bon party.

Or il est à remarquer que ledit Dorilis estoit fort bié couuert, c'est ce

qui attiroit tous ces Charlatans à sa queue, mais sur tout il auoit vn manteau de drap d'Espagne, qui estoit grandement beau.

Le Charlatan qui l'auoit prié de souper avec luy, d'une feintise admirable luy emprunte son Manteau, luy faisant croire, qu'il auoit laissé le sien en la chambre, & sous ombre d'aller près saint Germain pour acheter vn chapon, il tourna du costé de la rue saint Honoré, & oncques depuis il ne fut veu.

Cependant Dorilis estoit dans l'Hostellerie à attendre son manteau & son hôte, & ne se fut beaucoup soucié du souper s'il eust eue ce qu'il auoit emporté. Ce fut icy ou les plaintes recommencerent, maudissant les destins, de luy verser tant de tristes infortunes. Mais ce n'estoit point encor le dernier

mal-heur ou le fort l'auoit destiné,
car comme il eut soupé sur les vaines
esperances de sa chaisne & de
sa piece d'or, il trouua qu'elle e-
stoit fausse, & qu'il auoit esté trai-
treusement trôpé, sur ce il se couche
estimant puis qu'il auoit eu & en-
duré tât de trauerses, que la fortu-
ne le laisseroit en repos ceste nuit,
Mais ayant dès le commencement
dit que ce Logis est vn repaire de
Vagabons, & de Coueurs, ils ne
manquerent point de luy venir de
nuict secrettement enleuer ses ha-
bits, & demeura le pauvre & in-
fortuné Dorilis seulet, nud & sans
aucun secours de personne, dans
vn lieu d'où la pitié estoit bannie
& exilee.

Ceste Histoire semblera estran-
ge à quelques vns: mais ceux qui
en sçauront les particularitez cō-
me i'ay fait de Dorilis mesme quia

passé par toutes ces rencontres,
trouueront que ie n'ay oublié vn
seul point de la verité en ce que
i'ay descrit iusques à present.

*De la sanglante Resolution de deux Vols-
leurs és enuirs de Meudon
& S. Cloud.*

CHAP. XII.

C'Est il iamais remarqué vn Si-
ecle si detestable, & ou le vice
aye tellement planté ses estédars
victorieux, que celuy ou nous vi-
uons? C'est il dis-ie veu vn temps si
abominable que celuy ou no^r res-
pirons tous les iours, la perfidie &
iniustice s'est si fort enracinee
dans la pluspart des hommes,
que non contents des extorsions &
rapines dont ils vexent pour l'or-
dinaire ceux qu'ils voyent moins

versez, ainsencor par vn certain mespris de la religio couurét leurs meschâcerez, mesme des habits & vestemés dont vsent ceux qui font professiô de seruir Dieu, & qui viuent vne vie retiree du commun.

Lors que vne telle barbarie se presente à mes yeux, ie demeure comme esperdu & estonné de voir comment il est possible que celuy qui punit les meschâs n'eslâce son foudre d'vn bras vangeur contre telles gens.

Et vous ô pestes de la Republique, Est-il bien possible que vous puissiez encore respirer l'air de la vie au milieu de tant d'actions infames ou vous vo⁹ plôgez tous les iours? Ne craignez vous point les iustes punitions du tout Puissant qui ne peut souffrir en sa presence mesme, & deuant ses Autels son nom mesprisé & offencé? N'au^{ez}

vous point peur des rigueurs de sa Justice, & parmy vos abominables conceptions, ne vous souvient-il quelquesfois que celuy qui gouverne le Ciel & la terre sous l'Empire de ses Loix, a vne dextre vangeresse pour punir les meschans?

Tant s'en faut ~~helas!~~ ce sont des desesperes à qui ie parle, leurs oreilles sont bouchees aux remontrances, & leurs cœurs préoccupez d'un desespoir qui leur fait embrasser de telles actions, rien ne peut arrester leurs courses, il faut faire place à leurs passîons plus qu'enragees, puis qu'ils ne se peuvent arrester eux mesmes, & dompter cest appetit qui est en eux de faire toutes sortes d'extorsîons sur le public.

Lors que nous quittons Dieu & que nous mesprîsons de marcher dans la voye de ses cômandemēs

il nous abandonne, & nous met la bride sur le col; nous laissant viure selon nos appetits. C'est à lors que nostre Nature qui de foy panche, & encline grandement au mal, se porte à des actes que d'autre part nous aurions en horreur si nous ne nous estions retiré du seruice de Dieu, nostre imagination se ruerse & ce flambeau esclattant de la raison qui auoit la superintédance de toutes nos œuures s'éclipse, **helas !** & noye le iour radieux de sa face dans l'obscure nuit d'une oubliance letargique qui nous aueuglant les sens, nous redégaux aux brutes & animaux irraisonnables, & quelques fois nous sommes tellement enleuelis dás cest abisme, que nous demeurons plus insensibles que les pierres mesmes.

Desrober est vn vice bien grand, & repugnant aux Loix tant Diui-

nes qu'humaines. Mais desrober les choses sacrees, c'est vn crime bien plus enorme, l'action du premier ne regarde que l'interest particulier des hommes, Mais le dernier s'attaque directement à Dieu.

L'irreligion de François Dornandés & de Jean Langlois, les poussa à faire l'un & l'autre, n'ayans depuis l'Auril de leurs ans fait autre exercice que de desrober, aussi deuoient ils exercer ce mestier, puis qu'en ligne collaterale & directe leurs ayeuls n'auoiēt iamais exercé autre pratique, & à cecy les inuitoit la sentence du Poëte qui dit que

Sæpe Patri similis filius esse solet.

Et certes par l'Arrest mesme de leur condamnation qui se fit à Orleans, on remarqua qu'ils n'auoiēt en aucune chose forligné de la voye que leur auoit enseigné leur

Pere qui fut rompu à Rouën l'an
1604.

Ils estoient natifs des enuirons
de Gergeau, Ville du pays de So-
loigne, & passerent leur ieunesse
aux guerres de Sauoye ; & pour
oublier vne infinité d'actes mes-
chans qu'ils commirent, tant en
ceste guerre qu'en autres pays de-
puis leur retour, ie ne veux racôter
en ce lieu qu'une de leurs actions
des plus signalees qu'ils ont faiët
assez près de la Ville de Paris. Ce
ne fut pas loing du Môt Valerien,
là ces deux Demons enragez fai-
soiët leurs courses ordinaires, ce-
ste Carriere estoit leur seiour, & ne
se passoit iournee que quelqu'un
ne fust détroussé par eux, ils re-
noiët la superintédace du pays, &
ne les eust-on osé attaquer, tant
le Peuple des enuirôs auoit crain-
te de tóber entre leurs mains, les

bois leur seruoient de retraitte & les Cauernes de Tanierre , ou de nuit & de iour ils exerçoiēt sur les passans mille sortes de tyrannies, le renom de leur cruautés s'espanchant de iour à autre aux lieux circonuoifins , intimidoit les pauvres Vilageois, de sorte qu'ils n'osoient approcher ceste contree, les bons Religieux de Meudon qui ne sont point loing de là estoient seuls qui osassēt passer avec seureté. Aussi n'y a il que plumer apres eux, leur richesse ne consiste point ez biens de ce monde , ains aux tresors de la vie eternelle.

La faim contrainst souuētefois le Loup de sortir hors du bois, Dornaudes ne fust iamais sorti de la tanierre, s'il y eust trouué de la pratique: Mais son Compagnon qui n'aymoit qu'à se repaistre de sang, luy persuada de battre la campa-

gne affin de butiner, car il luy sem-
bloit qu'il y auoit vn siecle entier
qu'il n'auoit fait aucun butin. D'or-
nandes sollicité des prieres de son
Compagnon, quitte sa taniere &
vinrét fourrager du costé de la Ri-
uiere de Seine, ou de cas fortuit à
demic lieuë de S. Clou, ils firent
rencontre de deux pauvres Reco-
lets qui s'estás esgarez de leur vray
chemin, à cause que le soir s'appro-
choit & qu'ils ne pouuoient aller
à Paris, leur demanderent le che-
min de Meudon qui est le Mona-
stere des Peres Capucins vn des
plus fameux qui soit en France.
L'anglois qui ne respiroit que sãg,
vint dire à son Compagnó, que ne-
cessairement il se sentoit esmeu de
massacrer ces deux Religieux,
D'ornandes le retint, & luy remô-
stra le peu de consciëce qu'il auoit
de faire vn tel acte, & qu'il n'y a-

uoit aussi bien pas grande chose à gagner avec eux. Toutesfois ses remonstrances ne sceurēt riē emporter sur luy, il se retourna vers eux & leur dit qu'inailliblement il les conduiroit au vray chemin, & qu'il s'en alloit en ce quartier-là. Ces bons Peres sur le visage de qui estoit grauee la douceur mesme & la pieté le remercierent bien humblement de la peine qu'il prenoit.

Cœur de bronze pouuois tu alors auoit le courage de songer à massacrer de si bonnes personnes, de qui les paroles te tesmoignoient tāt d'offres d'amitié & de courtoisie? Ne peux tu te laisser vaincre par leur douceur, & ceste tendreté que tu vois peinte en leurs visages, ne peut-elle t'adoucir le cœur & t'amollir les sēs? O Dieu cōbien malheureux est celuy qui se retire

de vos voyes, puisque helas! il est tellement serf du peché & prisonnier du vice qu'il ne peut s'en dépestrer ! nonobstant tous les attraits & apparences exterieures qu'o luy puisse donner.

L'Anglois qui auoit fermé les yeux à la douceur, pour ouurir la porte de son cœur à toutes les rigueurs & iniustices qu'il se pouuoit imaginer, les conduit dans sa cauerne : là il se sent esmeu d'une nouvelle fureur, il est douteux de ce qu'il doit faire, autant de pas qu'il fait, autāt de fois il chāge d'opiniō : tātost le sang luy monte au visage, & d'une resolutiō enragée luy faict conspirer la mort de ces deux pauvres Religieux, tantost la crainte lui captiue les sens, & demeure cōme assoupi dans la consideration qui retient sa colere, bref son visage est vn miroir de l'incō-

stance tantost palissant, tãtost rougissant selon les diuers effects des passios qui le bourrellét au dedãs.

De massacrer ces pauures Religieux, la conscience luy diõoit le contraire, & n'auoit tellement imbulacruauté, qu'il ne fust touché en l'interieur de voir la douceur depeinte sur leur visage, de les laisser aller, le long seiour extraordinaire à telles gës où il n'auoit fait aucunes pilleries, ne luy sembloit aucunement permettre, en fin ataint des prieres de Dornãdes qui ne pouuoit signer la mort de ces pauures Religieux, il les introduit (comme i'ay dit) dans le creux de sa carriere, & là furieux qu'il est, & comme forcené, leur dit, que necessairement il falloit quitter la robe; si cela fût de si dure digestiõ à ces bons Peres, ie vous laisse à penser, car se voyãt reduits à ceste
extremité

extremité, il ne faut pas douter qu'ils firent tous les efforts qu'ils peurēt pour s'eschapper d'une telle oppression: mais en vain, car la terreur que leur donoit l'Anglois & Dornandes de leurs parolles, iuremens, & blasphemés, bien que le dernier n'y fust pas beaucoup porté, toutesfois cela les auoit déjà tellement saisis qu'il fallut quitter la Robbe, & toutes les remonstrances que leur peurent faire lesdits Religieux ne gaignerent rien sur ces cœurs Diamätins, qui plus durs que l'acier, fermoient l'oreille à toutes leurs remonstrances.

L'intention de l'Anglois n'estoit point limitée däs les despoüilles de ces bons Peres, il les auoit destiné plus loing, & en vne occasion ou il peult faire d'auantage son profit, & de fait Dornandes qui ne scauoit quelle intétion il auoit

en l'esprit: le conuia plusieurs fois de laisser aller ces bons Peres: mais luy qui se promettoit quelque autre succez de leurs despouilles ne voulut iamais fuiure son conseil en cecy. Car il esperoit quelque chose de plus grand de ces habits & vestemens, bien que pauures & chetifs de soy.

Quand il eud despoüillé ces pauures Religieux de leurs habits, il les conduisit hors du bois, & leur monstra le chemin de saint Cloud, où à cause de la nuit, ils allerēt logger: bien esloignez de ce qu'ils estoient imaginez du commencement; car ne pouuant aller ce soir à Paris, ils esperoient de coucher en passant à Meudon.

L'Anglois & Dornandes estans dans leur Cauerne, & discourans sur ce qu'ils auoient à faire, l'Anglois commença à declarer à son

compagnó la cause pour laquelle
il auoit pris les habillemēs des Re-
collets, & luy dit qu'infailiblement
il esperoit en attrapper quelque
bon butin (vous sçauiez dit-il) qu'il
n'y a pas loing d'icy à Argenteuil,
ie retournerois biē du costé de Meu-
don, mais les Religieux qui y sont
nous pourroient recognoistre à
nos deportemens, ie suis d'aduis
que nous prenions ces habits, &
que nous feignios d'estre Religi-
eux, laissez faire à moy du reste,
nous irons à Argenteuil où ie vis
dernierement vn Calice d'argēt do-
ré: ie vous promets de faire si bien
par mon inuention que ie l'attra-
peray. Dornandes luy respondit
voila à la verité vne haute & dan-
gereuse entreprise, toutefois si
nous en pouuons voir la fin, ce
nous sera vne voye pour en exécú-
ter bien d'autres à l'aduenir.

Sur ce ils resolurent entre eux de se seruir de ceste inuention, le soir ils s'habillerent, & se reueftirent des despouilles des Recolets qu'ils auoient le iour precedēt si inhumainemēt traittez, & vont coucher à Argentueil au logis du Curé, qui croyant que ce fussent quelques Religieux qui passassent leur chemin, les receut avec tous les signes d'amitié qu'on eust peu demōstrer à ceux de leur Robe, cest accez si libre leur donnoit bonne esperance de leurs pretentions. La nuit comme ils estoient couchez par ensemble ils furent quelque réps à mettre en deliberation s'ils deuoient aller assassiner le Curé pour auoir ses richesses & enuahir ce qu'il pouuoit auoir d'argent, toutesfois ceste resolution fut rompuë sur l'esperance qu'ils eurent d'attraper le lendemain

le Calice d'Argent doré que l'Anglois auoit recogneu des lóg téps.

Quelles conceptions ne suggere point le diable à ceux qui luy ont cósacré le meilleur de leurs actiós, & qui veulét poursuiure ses voyes & marcher dás le sentier d'iniquité? Le lendemain matin estant venu, nos pretendus Religieux sous vn masque feint de deuotion se leuerent sur les quatre heures, & vinrent à la chambre du Curé, où ils luy dirent qu'ils desiroient celebrer deuât que de partir, le Curé qui ne se fust iamais imaginé vne telle perfidie luy donna la clef des ornemens, & du Calice, n'estimant pas qu'il fust encor heure de se leuer. Miserable & perfide Demon, n'arresteras tu point icy le cours de ton insolence? n'est-ce point assez si tu as exercé tant de cruautez, depuis que tu és

au monde, se peut il faire que le Ciel ne brandisse la fureur de son foudre sur tó chef? peruers & infidelle Heretique; La Populace ne te peut donc empescher de ceste horrible & effrence proposition? tants'en faut, hélas! ces deux Demonsincarneez entrent dás l'Eglise ou personne ne les pouuoit empescher de leur entreprise. L'Anglois ouure le Coffre ou estoient tous les Ornemens, & charge son Compagnon de tout ce qu'il peut prendre de bon & duisible dans la dite Eglise.

Ainsi s'enfuirent ces deux Malheureux, & ne fut point la le derniera cte de ce qu'ils s'estoiét proposez, ils entróperét plusieurs autres encores de la façon, dans le Pays Vexin, & és enuiron de Ponthoise iusques à tant qu'ils furent pris proche d'Orleans, vsans des

mesmes repressailles à l'endroit
des passans, & furēt exrcutez en la-
dite Ville. Ceste Histoire a esté
extraicte mot à mot de l'Arrest de
leur execution.

*Histoire plaisante d'un tour ioué sur le
Pont aux Marchand, à l'endroit d'un
Bourgeois de Paris, & la façon
qu'il fut attrapé par un
Coupe-Bourse.*

CAP. XIII.

CHose estrange que les plus
Fins se trouuent le plus sou-
uent pris, & les mesmes inuentiós
qu'ils taschèt d'apporter pour en-
uahir le bien d'autrui tombent
quelquefois sur eux mesmes à
leur grád d'ómage, & ainsi le pie-
ge qu'ils dressét pour attrapper les
autres n'est qu'un passage pour se

faire attraper eux mesmes. Voyés-
en vn signalé exemple qui s'est fait
en nos derniers iours à l'endroit
d'un Marchand Chapier nommé
Clarinde homme auaricieux au
possible, & qui eust fait toutes les
inventions pour en auoir à droict
& à gauche, & bien qu'il n'eust au-
cun enfant qui peust succeder à ses
commoditez, toutesfois il viuoit
avec vne telle agitation d'esprit
qu'il n'estoit iamais en repos, tout
son soin n'estoit attaché qu'à sa
vente, & quand quelquefois il se
passoit vne iournee sans traffiquer,
il croyoit que la famine deust sor-
tir du creux des Enfers pour esta-
blir son Empire dans son logis.
Vne cupidité d'acquies luy bour-
reloit sans cesse l'interieur, & ren-
uersoit toute l'œconomie de sa
raison, de sorte que souuentefois
il oublioit le boire & le manger

pour songer à son avarice.

Entre tous les vices qui regnent aujourd'huy parmi nous, l'avarice y tient le premier lieu: depuis que ceste furie s'est emparee de nostre cœur, toute la tranquillité & le repos ou nous foulions auparavant detremper nos ennuits & noyer toutes nos tristesses s'éuapore en l'air & s'enuole de nous, de maniere qu'elle nous laisse comme captifs & enchainez sous la seruitude & l'esclavage de ceste Megere Infernale qui possedant le meilleur de nos actions nous conduit dans des voyes le plus souuent illicites & contraires du tout à ce que nous dicte la raison.

Clarinde estoit tellement adonné à ceste avarice qu'il n'estoit iamais en repos, & mesme quelquefois il prenoit vn grand contentemēt à nombrer & manier ses

escus, & le plus souuent il auoit vne grosse bourse qui luy pendoit dans sa pochette, tant il affectionnoit l'or & l'argent.

Ceste Bourse fut recogneuë parvn des frippons de la Samaritaine, comme d'ordinaire ils ne sont iamais oisifs, & qu'ils vont de ruë en ruë. Ce compagnon passoit diuerse fois par dessus le Pont aux Marchands, & iettoit vne œillade dans la boutique de Clarinde pour voir quel chemin il deuoit tenir à attrapper la Bourse, car ledit Marchand sortoit fort peu de sa Boutique de peur de laisser escouler quelque bonne occasion qui luy eust fait perdre la vente.

Les Coupeurs de Bourses qui sont seconds en inuentions & qui pullulent en ce qui concerne la tromperie, apres auoir plusieurs fois passé & repassé, s'aduifa d'vne

fourbe, & d'une inuention la plus
estrage qu'onques on ouyt parler.

Il prit un de ses Cópagnons sur le
Pótneuf (car ce lieu est leur retrait-
te ordinaire) & s'habillerent tous
deux en Villageois, le premier qui
côduisoit l'auâtgarde de cette en-
treprise estoit effróté au possible,
& à le voir on l'eust pris pour un
des plus habilles rustaux du Villa-
ge, car il auoit un port maiestueux
& une façon toute contraire à cel-
le des Villageois.

Il fut long téps avec son Compa-
gno à songer s'il deuoit entrer
ou reculer, car il voyoit des Mar-
chands en la Boutique, cela luy es-
mouffoit la pointe des ses desseins,
& desespéroit quasi d'en venir à
bout, car d'y entrer parmi tant de
Marcháds, il n'eust pas bien ioüé
son inuention, de desister aussi
tout a fait de l'entreprise, l'ha

bit qu'il auoit pris exprez luy cō-
mandoit de pousser sa fortune, sō
Compagnō d'autre costé le pouf-
soit, de façon qu'il estoit comme
suspendu entre deux opinions cō-
traires; & de mesme qu'on voit au
milieu de la Mer quand l'Autan
& le Nort s'entrechoquent, & que
le Ciel along tortis se resoult en
flammes & en pluyes, Le Nauire au
milieu des ondes est tantost pouf-
sé d'un costé, tantost de l'autre: le
Nort s'enueloppe dans ses Voiles,
qui le fait virer du costé du midy,
l'Autan de l'autre costé bien que
d'une aisle inegale resiste & lut-
te à l'encontre, le Nauire ce pen-
dant demeure comme suspendu
au milieu des tempestes & des on-
des, sans pouuoir tourner ny fle-
chir d'un costé ou d'autre: ainsi e-
stait le coupeur de bourse, il n'o-
soit auancer ny reculer plus la harç

dieffe le faisoit approcher, plus la craïte qu'il auoit d'estre recogneu, le reculoit, En fin il resolut d'attēdre que les Marchāds qui estoient dans la boutique fussent dehors, à cecy il estoit conduit de l'esperāce qu'il croyoit d'auoir du gain d'auantage, car il estimoit comme c'estoit la verité, que le Marchand ayant vendu ce qu'on luy marchādoit il auroit plus de traffic & de profit à luy couper sa bourse, iouxte qu'en tels actes ils ont de coustume de se porter le plus secrettemēt qu'ils peuuent, ce qu'il n'eust sceu executer voyant la boutique pleine de Marchās. Son cōpagnon se faschoit d'attendre si lōg temps sans voir reüssir aucun effect de ce que luy auoit promis son Camarade, l'autre l'encourageoit du mieux qu'il pouuoit attendre encore quelque peu de

temps, iusques à ce que la Boutique fust vuide, ce qu'il fit avec impatience pourtant.

En fin le premier ayant remarqué que la Boutique estoit vuide, & que les marchâds qui s'y estoient rencontrez estoient sortis, il vint aduertir son cōpagnó qu'il se tint prest pour receuoir ce qu'il luy deuoit, il se mit en sentinelle sur le bout du Pont des Marchâds du costé du Palais, luy d'autre costé vint en la boutique du Marchâd, ou il le trouua seul, & se fit ouurir diuerses Chapes, disant qu'il estoit de Gentilly, & que depuis peu on l'auoit esleu pour marguillier, & qu'il vouloit auoir vne belle Chape pourueu qu'on luy fist bó marché, Clarinde auide du gain au possible, & qui brusloit d'une sourde & interieure flamme d'amasser richesse sur richesse, luy monstre di-

uerſes ſortes de marchandises, de
damas, de taffetas, ſatin, & autres
denrees, entre toutes ces Chapes
il en choiſit vne qu'il marchanda,
& conuint du pris avec Clarinde, ce
qui eſtant faiſt le coupe-bourſe a-
uiſe de iouer de ſon reſte, il dit au
marchad qu'il deſireroit voir ſi la
dite Chape eſtoit bien faiſte, &
qu'il eſtoit de la meſme taille, &
port que le Curé de ſon Village,
qu'il luy feroit plaisir de l'eſſayer.
Clarinde qui ne ſe doutoit en au-
cune façon de ce que vouloit faire
ſon pretendu Marguillier, met la
Chape ſur ſon dos, & comme il ſe
retourne pour móſtrer audit mar-
guillier ſi elle luy ſembloit bien
faiſte: il luy met la main dans la
pochette, & luy coupe ſubtile-
ment la bourſe & prit la fuitte:
Clarinde ſ'apperçeut auſſi toſt
qu'on luy auoit coupé ſa bourſe,

il n'eut pas loisir de se deuestir ny
oster la Chape qu'il auoit sur le
dos pour courir apres son Mar-
chand: le monde regarde, il crie
de loing au volleur qui luy em-
portoit sa bourse, mais il l'auoit
desia donnee à son cōpagnon qui
faisoit la sentinelle, plus on regar-
de Clarinde plus il fuit & plus il
poursuit son homme, le coupeur
de bourse qui de son costé le de-
uançoit enuiron de trente pas, di-
soit par ou il passoit qu'on ne l'ar-
restast point & que c'estoit vne ga-
iure, Clarinde crioit sans cesse,
mais n'ayāt point les iambes assez
fouples, il perdit le Marguillier
de veuë, & fut contraint avec sa
courte honte de retourner en son
logis, avec la perte de son argent
qu'il auoit gaigné depuis huit
iours. Voyla la recompense de
son auarice.

De l'Industrie & artifice insigne de deux
Voleurs, & l'action estrange
qu'ils firent dans la rue
sainct Denis.

CHAP. XIII.

LE monde se subtilise tous les
Liours, plus va auant, plus les
hommes se deslient : nos Peres
mesmes s'estonnent que les enfans
de douze ans sont plus subtils &
plus cauts, qu'ils n'estoient en
leur temps à vingt. Cela prouient
d'une certaine malice qui se nour-
rit & entretient dans le Peuple, &
qui a pris tellement racine, qu'il
est impossible de l'esbrancher ny
esmonder.

Nous sommes dans vn siecle ou
le vice est en regne, & la Vertu exi-
lee: tout le monde ne songe qu'aux
rapines, tromperies, seductions, &

vne infinité d'autres actions, qui contraignent la plus part de succomber sous le faix, combien auôs-nous changé nostre estre seulement depuis deux cens ans, l'on pouuoit appeller ce siecle vn siecle de Saturne & vn âge d'or, au regard de celuy où nous viuons qui est vn siecle de fer & de plomb: la simplicité estoit alors l'apanage du tēps, & la Iustice qui dominoit parmy les Frâçois, pour lors entretenoit ce royaume en vne concorde si grande, & vne amitié si estroicte que ny les iniures du temps, ny les dissentiōs particulieres, ny les ruy- nes & émotiōs publiques ne l'eussent iamais pù disioindre.

Ce repos & ceste tranquillité si douces où viuoient nos ayeux, à bien changé sa nature: car depuis que les guerres ciuiles se sont engendrees en cest Estat, la discorde

s'est guidée au Trofne de la Iustice,
& la bannissant de la France a faict
éclore mille effects de ses fu-
reurs: serpentant iournellement
dans le cœur des hommes, & ren-
uersant toute ceste œconomie
qu'ils auoient auparauant au re-
glement tât de leurs propres pas-
sions en particulier, que de leurs
affaires en general.

Depuis ce temps on n'a veu que
malheurs, que tromperies & que
fallaces, plusieurs bonnes fami-
les ont esté ruynees, & cōtrainctes
d'en rechercher, ou par leurs in-
uentions & finesesses, ou par autre
voye illicite: voila d'où procedēt
tant de coureurs & vagabonds, que
nous voyons tous les iours dans
Paris: car estans sorty de bonnes
& riches maisons, & contraints par
la ruyne d'icelles, à chercher leur
mieux, nourris qu'ils sōt delicate-

ment dès le plus tédre de leur âge ils ne se veulent apliquer à aucun trauail, sinon à courir ça & là, & verser de mille sortes d'inuentions pour en auoir à droit & à gauche, & le plus souuent ils ne se peuuent empescher de tuer & massacrer pour mieux paruenir au but de leurs pretentions.

Siecle maudit! qui nous produit tant d'auortons! âge miserable helas! ou nous voyon tant de desordre, que plus aux Diuinitez d'en haut no^s faire naistre vn autre Hercule pour purger la trâce de tāt de Mōstres que nous y voyōs tous les iours; c'est vous ô Magistrats qui le pouuez, en vous est nostre seule esperance? & cōme vous auez desia commencé à bannir ceste Canaille de vostre Ville, poursuiuez en la fin, iamais le victorieux & triōphant Hercule ne s'acquit rant de

loüange, que quand il purgea son pays & les grands chemins de voleurs.

Lucio & Petroly furent deux Vagabons & desbauchez, qui estoient partis de Sauoye pour faire quelque fortune en France parmy les guerres Ciuiles & remuemens qui s'y faisoient du tēps du mareschal d'Ancre, trop tard mort pour les François. Ces deux auantcouriers (de bonne maison pourtant) auoient quitté leur pays pour vn desdain & mespris qu'ils auoient contre leurs Parens, ce qui les occasionna de tourner du costé de France, car ils ne voyoient aucun suiet ny pretexte, qui les peust faire prendre le chemin d'Italie: comme ils se veirent au deça de Lyon, sans argent ny cognoissance, ils se mirerent à voler sur les grands chemins, & en peu de temps attraperent plusieurs

Marchands & Voyageurs qui ne se doutans de la perfidie ny du piege qu'on leur preparoit, allerent librement parmy les champs.

Mais ils ne furent pas long temps à vser de ces repressailles, que les preuosts desmareschaux ne les courussent avec quantité d'Archers: mais en ayant eu le vent, ils prirēt la fuitte & gaignerent Paris, ou estant, les premiers huit iours se passent à recognoistre le lieu, & voir la façon des Parisiens, qu'ils remarquoient assez traittables, ils prirēt logis dās la rue saint Denis, en vne certaine hostellerie que ie veux passer sous silence, on les logea sur le derriere, & la fenestre de leur chambre respōdoit immediatement sur le feste d'une maison d'un riche Marchand, dont ils regardoiēt attentiuelement la Boutique, car elle estoit grandement

pleine de marchandise, & deslors ils s'imaginèrent de iouer quelque mauuais tour audit marchand & d'enuahir sur luy, mais ils ne sçauoient trouuer occasion d'auoir prise du haut de leur chambre, ils voyoient toutes les marchandises qu'on transportoit d'un lieu en l'autre: mais les fenestres estant fermées ils ne pouuoient par où entrer.

Enfin vn iour apres auoir visité & deuant & derriere tout le logis, (car ils estoient enflâmez tout à fait & deliberez d'y entrer) Lucio dit à son compaignon qu'il trouuoit vn tres bon expedient pour cecy, vous voyez (dit il) ceste cheminee qui est contre nostre fenestre & qui respond immediatement deuant nostre chambre, ie me suis imaginé qu'à la façon de nostre pays où l'on entre dans les

maisons par le haut des cheminees, que nous pouuons facilement entrer si vous me voulez croire, & suivre mon opinion.

Petroli admirant la conception de son camarade approuua ce conseil: & loua vne inuention si excellente, car par ce moyen ils esperoient d'entrer dans la Chambre qui estoit au second estage, & ou ils auoient veu les Marchandises (comme d'ordinaire outre la Boutique vn Marchand ne laisse pas d'auoir encore ses Chambres garnies principalement quand la fortune luy a faict quelque vne de ses faueurs.)

Le iour fut pris entre Lucio & Petroli d'entrer dans ladite chambre, qui fut le iour de la Pentecoste, ils auoient faict vne preparation de corde & autres instrumens, pour descendre dans ladite

Chambre & enleuer les Marchandises qui y estoient: ils espionnerent si tout le monde estoit sorti du logis: ce qu'ils creurent quand ils virent l'huis fermé, & toutefois il y auoit vne Seruante qui estoit demeuree pour garder le logis.

Leurs preparatifs estant dressez, ils decendent avec vne petite eschelle de leur chambre sur les thui-les de la maison du Marchand: Or il est à noter que quand ils vinrent sur la cheminee pour entrer dedas ils se trouuerent bien estonnez, car il y auoit trois emboucheures, & ne scauoient en laquelle entrer, Petrol y fut long temps à contester avec son compagnon, & lui asseurer que infailliblement il falloit entrer par l'emboucheure du milieu, & qu'elle respondoit immediatement en ladite Chambre; sur ceste esperance. Lucio entre

dans la cheminee, & tenant la corde fut decédū par Petroli iusques au plus bas de la maisō, ou se trouuant frustré de ce qu'il esperoit, il fit signe à Petroli de le retirer, ce qu'il fit avec beaucoup de peine routesfois, car il est biē plus facile de descendre que de mōter.

Quant il fut guindé au fesse, & qu'il fut sorti de l'emboucheure, il dit à Petroli, qu'il deuoit descendre à sō tour & qu'il auoit pris l'vn pour l'autre, Petroli entre, & ayāt pris la corde en main il descend le plus doucement qu'il peut dans la chambre ou estoient les marchandises, quand il fut decēdu il commence à choisir le plus beau des estoffes qu'il peut trouuer, & se chargea de diuerses pieces de drap & autres menuēs marchandises qu'il trouua dans ladite chambre, ce qu'ayant amassé il fait signe à son

compagnó de luy ayder à remonter, car la charge luy empeschoit grandement pour la pesanteur, cõme Lucio le retiroit, & qu'il estoit tout proche l'emboucheure prest à sortir, la corde se rompt & tomba ledit Petrolí fort rudemẽt, la peur toutesfois qu'il auoit le fit releuer subtilement, la premiere chose qu'il fit, ce fut de serrer la corde sous vn lit qui estoit vis à vis de la cheminee, la Seruante qui auoit ouy vn grand bruit en la chambre de derriere vint à monter, Petrolí qui l'entendit se cacha subtilement dans vn coin.

Lucio d'autre costé crioit apres son compagnon qu'il vint viste-ment, la Seruante visita la chãbre, qui pour estre vn peu obscure, iouxte que les fenestres estoient fermees, ne peut aperceuoir le Larron, & s'en retourna sans autremẽt y prendre garde, croyant que ce

fust quelque Chat qui eut faict ce bruit. Petroli se reiettant aussitost dans la cheminee, appelle Lucio qui attendoit de pied ferme sur l'emboucheure, & mit la corde qu'il auoit en double, de peur qu'il ne tombast pour la seconde fois. Petroly bien que grandement blessé au derriere de la teste recharge les marchandises & se guinda dehors au mieux qu'il peust, & de là ils rentrerent dans leur chambre, & deux iours apres ils sortirent de Paris ayant tout leur butin de peur d'estre recogneus, & tournerent du costé de Lyon pour prendre la route de leurs pays, d'où le memoire est venu comme tres asseuré, & depuis a esté confirmé par ledit Marchand de la rue S. Denis qui trouua vne grande quantité de ses draps, Serges & autres marchandises enleuees.

*D'un Stratageme admirable qui fut fait
au logis d'un Hostellier de la rue S.*

*Honoré, & comme il fut me-
né prisonnier à Soissons.*

CHAP. XV.

Sil est requis en l'art Militaire
d'auoir des forces & quantité
de troupes pour faire ioug à tout
ce qu'un grand Guerrier rencon-
tre, & pour affrôter les armées les
plus aduantageuses, il ny est point
moins requis de prudēce pour s'y
gouuerner, quelquefois on aduā-
ce des effects par ceste vertu qu'on
n'effectueroit jamais par la force;
& certe puisque tout l'artifice de la
guerre ne cōsiste qu'à vaincre son
ennemy. Celuy qui desire estre
vainqueur doit tēter les voyes les
plus douces, & faire en sorte q; par

ses subtilitez il puisse paruenir au but de ses desseins, & iacqoit qu'on loüe grâdemēt ceux qui se portant d'un courage zelé de se sacrifier à la vertu, se iettent au milieu des coups, & remportent de grandes victoires sur leurs ennemis, toutefois puis qu'en ceste actiō il s'agist du salut du public, & du particulier, il faut dire avec le Poète.

Dolus an virtus quis in hoste requirat?

Il n'importe pourueu qu'on puisse auoir le dessus: deuant la ville de Troye qui a soustenu l'effort d'un Siege de dix ans, il y auoit vn Ulysse aussi bien qu'un Achille, si l'un faisoit de grands & admirables effects de force & par la grâdeur de son courage, l'autre se signalloit par son Conseil, d'où il faisoit reussir de grands proiects, & a fait en fin seul en vn iour ce q; toutes les

forces d'Agamemnon, & de tous les Princes de la Grece ne peurent faire en dix ans, & de fait on a tousjours remarqué les grands Guerriers ioindre la queue du Renard à la peau du Lyon, pour monstrier qu'un stratageme bien prattiqué apporte quelquefois de l'honneur à celuy qui l'entreprend, comme vous le pourrez remarquer par cette Histoire.

Au temps que la Frâce tyrannisee sous les imperieuses & insolentes factions du Marechal d'Ancre se consumoit en Guerre Ciuile, & s'entretuoit elle mesme par le moyen de ses propres Nourrissons, estoit à Soissons vn braue & genereux soldat que ie nommeray Gratiander, Homme des long temps versé dans les armez & au fait de l'Art Militaire, qui voyant que le Marechal d'Ancre vsurpoit

l'autorité Royale , & pourſui-
uoit les Princes François dans leur
propre pays, vint s'enrooller ſous
les drapeaux de Monſieur le
Duc de Mayenne le vray Alcide de
ſon ſiecle, & de qui la memoire
engrauee à lettre d'or ſur le bron-
ze Eternel de l'immortalité ne
pourra iamais eſtre ternie ny vio-
lentee par la ſuite des temps. Ce
ſoldat auoit eſté nauré dans les
Guerres de Hollandes, ou il auoit
fait des preuues ſignalees de ſon
courage, principalement au ſiege
d'Hoſtande qui eſt le plus beau
Theatre ou ſe voyent représenté
de Valeureux Guerriers ſ'il en fut
iamais : là Gratiandor fit paroître
l'ardeur qui animoit ſon courage,
& qui boüillonnoit au dedans, de-
puis il ne s'eſt rié paſſé en Frâce de
ſigné ou il n'eût paru par deſſus
tous ceux de ſa condition. Mon-
ſieur

fieur le Duc de Mayenne s'estant retiré dans Soissons pour resister aux attaques que luy dressoit le marquis d'Ancre, recogneut la valeur de ce Soldat envne sortie qu'il fit sur les ennemis, où luy mesme il se portoit d'un courage incroyable se prodigant indifferément au milieu des coups pour deffendre sa Ville & sa Patrie de l'oppression iniuste de ce Tyran, qui en vain dressoit des batteries contre vn tel Prince, car quand bien la Parque luy eust conserué la vie qu'elle luy rauist pour ses perfidies & traitemens iniustes, il n'en eust emporté que de la honte pour ses plus riches Lauriers.

On ne parloit que de Gratiander qui faisoit des merueilles en toutes les rencôtres où il se trouuoit, & ne retournoit iamais du Cáp ennemy qu'il n'y laissast des marques

tres certaines de la valeur. Bref
c'estoit vn foudre de Mars, tant il
faisoit d'effort contre les ennemis;
Mais comme la force est de peu de
consequence en vn Guerrier s'il n'a
de la subtilité & de l'invention
pour se gouverner prudemment
aux rencontres ou il se trouue,
Gratiander voulut faire preuue
qu'il n'estoit pas moins versé aux
stratagemes qu'aux assauts & escar-
mouches.

Vn iour apres vne sortie furieuse,
ou plusieurs des troupes du Ma-
reschal d'Ancre, & principalement
des Estrangers estoient morts (car
cest homme ne se pouuoit estant
estranger seruir d'autres gens que
de ses Voisins) il prit vn de ses plus
intimes Compagnons, & luy dit,
qu'il auoit vn grand coup en l'es-
prit, & que pour le mettre à chef
il falloit s'armer d'une ferme & ge-

nerieuse resolution, son Camarade qui estoit de mesme taille & de mesme nature que luy, luy preste l'oreille, & luy promet que s'il pouuoit l'obliger en quelque chose, ou que son assistance luy fust agreable, qu'il l'accompagneroit en toutes les entreprises.

Gratiander le voyant resolu luy declara son intention qui estoit de venir aux portes de Paris, & de prendre quelqu'un prisonnier pour tirer de luy quelque bonne rançon, la partie faicte ils sortirent secretement de Soissons, & firent semblant d'aller donner vne camifade aux ennemis (car la Ville n'estoit point tellement enclose, ny inuestie que les ennemis bouchassent toutes les aduenues) estans partis du matin bien montez, ils trauserent le corps de l'armee & vinrent à Paris, on n'eust iamais

estimé a les voir qu'ils eussent esté de la Ville de Soissons, car ils n'auoient plus aucune façon de Soldats. Iouxté d'autre costé, qu'on se persuadoit à Paris, pour lors que personne n'eust peu sortir de la Ville avec tant de facilité.

Gratiander pour mieux faire son coup vint descédre à vne des meilleures Hostelleries de Paris. Ie ne veux pas declarer le nó de l'Hoste ny de la ruë, estât assuré que plusieurs scauroient de qui ie parle en faisant la lecture de ceste Histoire, Comme ils furent arriuez en ladite Hostellerie, l'Hoste qui s'appeloit Florimond, croyant que ce fussent deux Gentilshommes, comme le plus souuent on s'abuse à voir l'exterieur d'une personne, les traitta fort somptueusement & avec toute sorte d'honestetez & de gentilleesses, ils

passerēt bien 8. iours dās son logis, où ils firēt de grādes despēces. Florimond esperoit d'auoir vne grande somme de leur argēt, mais il ne se doutoit du stratageme qu'on luy vouloit iouer, comme il vishi-
toit quelquefois son Escurie, il admiroit que ces deux personnages auoient chacun vn bon cheual, & dont le moindre valloit plus de cent escus, Orainsi qu'il estoit en deuis avec nos deux Soldats; Gratiander luy dit qu'il luy estoit venu vne grāde infortune, & que l'argēt qu'il attendoit pour le contenter auoit esté pris en chemin: au reste qu'il auoit deux cheuaux, & qu'il regardast lequel des deux il voudroit prédre pour en faire prix raisonnable, & déduire la somme qu'il luy deuoit.

Florimond qui auoit desia ietté l'œil sur lesdits cheuaux, fut e-

pris d'en achepter vn des deux, & leur fournir le reste, & le surplus qui demeurerait, le marché se fait; Gratiander aduertit son Compagnon du stratageme qu'il auoit enuie de iouer à leur hoste, Sçauoir est de l'attirer hors de la Ville avec le cheual & le mener prisonnier à Soissons.

Ceste affaire fut si bien pratiquée & iouée avec autant d'artifice que Florimond ne se doutant aucunement de la fourbe conuint de marché avec Gratiander, & par sa priere monta à cheual avec eux & sortit hors de la porte saint martin pour esprouuer ledit cheual, Gratiander l'attiroit autant qu'il pouuoit hors de la Ville, & son Compagnon d'autre costé faisoit tout son possible, bien qu'il fust à pied de l'engager plus loing, enfin comme ils sot à demie lieuë

de Paris, ou Florimond esgayoit son pretendu cheual comme par forme de promenade & de recreation. Gratiander s'approche de luy, & tirant vn pistolet de ses pochettes cependant que son Compagnon luy tenoit la bride de son Cheual, luy presente sur la gorge, & l'espouuenta, de sorte qu'à peine pouuoit-il respirer; il veut crier & tout hors de soy leur demande ce qu'ils requierent de luy, Gratianderne luy respondoit autre chose sinon qu'il falloit necessairement qu'il vint à Soissons avec eux, & ainsi ils le lierent & garroterent, & de là l'enleuerent aux yeux mesme des Parisiens, Florimond se trouua grandement estonné de ce stratagemme, & croyoit de prime abord qu'ils le voulussent massacrer: mais ayant sceu qu'ils ne luy demandoient que sa rançon, il se rassura

vn peu d'auantage, & fut conduit par eux iusques dans la Ville de Soissons, ou apres leur auoir payé leur prise, il fit deliurer l'argent qu'ils luy demandoient, on luy donna vn passeport pour retourner à Paris, où il fut receu avec applaudissement de ses amis nonobstant sa perte, car on croyoit qu'il eust esté assassiné & qu'on luy eust osté la vie le long du chemin.

De la façon que se gouuernent les Compens de Bourse à passer Maistre de leur Mestier, & du plaissant traicté arriué dans le Cimetiere S. Jnnocent sur ce subiect.

CHAP. XVI.

L'Impunité du vice & l'abus qui se commet maintenant dans la vaste esté duë de cest Empi-

te, sert comme d'échelon à plusieurs Vagabonds pour se ietter dās les crimes, car voyans qu'on les souffre deuant les yeux de tout le monde, & qu'on ne les recherche autremēt de tant d'insolences qui se font tous les iours, ains que celui qui plus trōpe est aujourd'huy estimé le plus galant homme de tous: cela les attire au mespris des Loix, & à ne faire cas des Ordonnances.

Les meschans ne se veulent traicter que par la rigueur & punition, la douceur en rameine quelques-uns au sentier de leur deuoir, mais depuis qu'ils ont frāchi les bornes de l'oisiuete, & que ceste paresse a lentit vne partie des bonnes actions qu'ils pourroient executer, la rigueur alors y est tres-necessaire. Ainsi que quand vn mal commence à paroistre on y applique des re-

170 HISTOIRE DES
medes rafrachissas, & du premier
coup on n'y doit pas mettre les
ferremens, ains attendre si la mali-
gnité de la playe ne se pourra pas
guarir & revnir par douceur ; mais
depuis que la gangrene s'y engen-
dre tout à fait, & que la pourritu-
re gaste les membres voisins, de sa
putrefaction, ou auparauant il n'y
estoit requis que de simples reme-
des, on y doit appliquer les ferre-
mens, & inciser le mal sans atten-
dre que le membre pourri gaste le
reste du corps.

Ainsi le deuroit-on faire au gou-
uernement & en l'œconomie des
choses publiques, car si la douceur
ne peut riē obtenir à l'endroit des
melchans, il faut apporter les fer-
remens conuenables & requis en
ce subiect. L'impunité comme
i'ay dict du commencement, est
cause de tant de mal'heurs que

nous voyôs: parce que vne infinité de ieunesse s'associe avec les Coupeurs de bourse, voyant le peu de dâger qu'il y a à suiure leurs drappeaux: le vous veux raconter vne plaisante Histoire en ce Chapitre, qui s'est faiçte dans le Cimetiere de sainct Innocent, & dont les Marchands des enuiron en pourront dire des certaines nouuelles, le fait se passa de la façon.

Il y auoit vn ieune garçon nouuellement arriué à Paris qui s'estoit associé avec cinq ou six Vagabons & coupeurs de bourses, soit que sa Destinee l'eust conduit à suiure de telles gés, ou que d'une inclinatio peruerse & melchâte il fust poussé à se venir rendre sous leurs estêdars: il demeura pour le moins quinze iours avec eux sans rié faire, ny executer autre acte du mestier qu'il vouloit apprédre: enfin

comme à toutes choses il y a commencement, l'assemblée des Vauriens resolut puis qu'il vouloit estre de leur caballe de luy faire passer Maistre (car en ce mestier on ne fait pas comme aux autres, ou il faut estre apprenti deuant que d'acquérir la Maistrise)

On commet ceste charge à vn des plus subtils de toute la bande, luy enioignant qu'il ne retournast au logis que ce ieune garçón n'eust faict son coup, le bon compagnon qui sçauoit les tours & destours, & comme il se faut comporter en ceste affaire, comme en ayant des long temps exercé la charge, prit son Camarade & le mena de costé & d'autre de la Ville ou ne rencontrant aucun subiect auquel il peust traffiquer, en fin il le mene dans le Cloistre de saint Innocent, ou ayant apperceu vne bonne Vieille Femme qui estoit sur vne tombe

priant Dieu pour les Trespassez, il dit à ce ieune garçon qui le suiuiroit, que resolument pour passer Maistre en son Art, qu'il falloit aller subtilement couper la bourse de ceste bonne Vieille. L'autre luy resistoit & disoit qu'il ny auoit aucune apparence qu'il osast s'approcher de ladite Vieille, puis qu'elle estoit seule, & qu'il falloit aller en quelque lieu ou il y eust dauantage de peuple, affin que parmi la foule il y eust plus de moyen de se seruir de l'espee qu'on luy auoit donnee, qui n'auoit autre fourreau que sa pochette: celuy qui le conduisoit, tant par menaces qu'autrement, le pressa & le contraignit si fort qu'il luy mit ceste resolution en l'esprit, sçauoir est de couper la Bourse de la Vieille pour de la tirer acte de sa Maistrise.

Ce ieune Garçon s'approche de

la Tombe, & se vint mettre à genoux assez proche d'elle, ceste femme qui ne se doutoit point de la fraude, croyant que la deuotion amenoit ce ieune drolle en ce lieu, poursuiuit ses prieres & n'interrompit en aucune façon ses oraisons, Ce coupe-bourse qui l'entendoit marmotter estoit en grande perplexité d'esprit, & ne sçauoit s'il deuoit aduancer son entreprise & hazarder son coup. Son camarade ains plustost son conducteur qui estoit dās le Cloistre luy faisoit signe qu'il se dépeschast vistement de faire sa besongne, celuy-cy fit en sorte voyant qu'il falloit passer par là pour estre Maître, que s'approchant de plus en plus de ladite Vieille il luy coupe subtilement sa bourse, & se retirāt au petit pas vint retrouuer son compagnon qui l'attendoit dans

le Cloistre bien ioyeux d'auoir fait son coup.

L'autre qui regarde d'as la bourse & qui la trouua fort peu garnie, commence à dire à son compaignon qu'il n'auoit point encore passé maistre, & qu'il luy alloit monst rer vn tour de son mestier, il le tint par la main, & cria tout haut à la vieille. Madame voicy vn coupeur de bourse qui vous a desrobé, la vieille regarda aussi-tost à sa pochette, & n'y trouua que les cordons de sa bourse: le peuple s'assemble, aussi-tost, on poursuit ce ieune garçon, & fut conduit à coup de baston hors du Cloistre dans la rue saint Denis, c'estoit ou son conducteur le vouloit auoir, car il esperoit que parmy ladite foule il attrapperait quelque bon butin, tous les Marchands de la rue saint Denis voyant que chacun

couroit apres ce ieune apréty, fortirét de leurs Boutiques avec leurs rasses: le vieux routier ce pendant prenant l'occasion aux cheueux, se porta dans la foule, & couppa quatre ou cinq bourses à ceux qui frapportoient son camarade, les Marchands s'apperçurent cependant qu'ils frapportoient sur le Coupeur de bourse, qu'il y en auoit vn autre qui les auoit attrappé, ils le chercherent, & iugeans de la façon du vieux routier qu'ils voyoient dans la presse, ils luy trouuerét encore vne bourse dans les mains: le peuple alors courut apres luy, on l'attrappa deuant saint Jacques de la Boucherie, ou vn certain se tenant pour luy coupper l'oreille, comme il auoit ietté sa main sur son oreille gauche elle luy demoura dans les mains, & trouua que c'estoit vne oreille d'escarlante, l'autre

tre gaigne au pied, & fit si bien ses affaires que s'enfuyant dás la Greue, ou pour lors il y auoit vne grande quantité de monde à cause d'une execution qui s'y faisoit, il remporta encor deux bourses au logis apres auoir esté bien battu, & son nouveau aprenty d'autre costé qui se formalisoit qu'il l'auoit trahy si perfidement, reuint au logis ou il trouua son compagnó qui auoit attrappé de bon butin parmy la foule: ainsi ce ieune garçon passa maistre en son Mestier, apres auoir esté bien frotté & traitté comme il meritoit.

M

*De l'industrie & inuention admirable que
pratiqua Rodencourt, soy disant Gen
tilhomme Breton. Pour attirer
vne riche Marchande.
de Paris.*

CHAP. XVII.

Iusques icy nous n'auons point
touché que superficiellement
des souplesses des Volleurs, & de
l'industrie qu'ils ont en leurs exer-
cices ordinaires, en ce Chapitre
vous verrez avec estonnement l'in-
uention & l'artifice admirable
qu'il ont recherché pour venir au
but de leurs desseins.

A Paris és enuiron de l'an 1616.
il y auoit vne Dame accomplie de
toutes les perfections qu'on peut
souhaiter en vn beau suiet (ie ne
veux pas dire sa demeure: car m'e-
stant proposé dès le commence-

ment de n'offécer personne, ie ne
 veux en aucune façon me de stour-
 ner des limites que ie me suis libre-
 ment donné:) Ceste ieune Dame
 se nommoit Clorilde, mais si ie
 change son nom pour vn certain
 respect de bienueillance que ie luy
 dois, sa beauré admirable par ou
 elle attrayoit les yeux de tout le
 monde ne se pourra iamais chan-
 ger: ceste Nimphe sur qui la Na-
 ture auoit prodigué ce qu'elle a-
 uoit de meilleur en la produisât, e-
 stoit ioincte depuis peu par maria-
 ge à vn honnesté Marchand qui
 auoit des moyens. mais comme
 dans le mariage s'insinuënt peu à
 peu les rixes & la discorde au lieu
 d'vn lien tres. estroit d'amitié qui
 deuroit lier & ioindre les cœurs
 des Amans, & principalement de
 ceux qui sont vnis d'vne affection
 coniugale, aussi vit-on en bref

Clorilde en disgrâce avec son mary, elle luy faisoit pourtant destemoignages de reciproque amitié, mais ce n'estoient que des pures feintises. Ceste ieune Dame se mit le cheuestre de la liberté sur le col, & bien souuent se trouuoit en des compagnies qu'elle eust deu fuir, si elle n'eust resolu desia de faire banqueroute à son honneur.

Comme elle estoit vn soir à vn Ballet qui se ioüoit aux enuirôs de sainct Opportune, vn certain Gentilhomme de Bretagne, soit qu'il le fust d'effect ou qu'il feignist de l'estre, s'acosta d'elle & la mena dancer. Apres la dance ou chacun fait preuue de quelque trait de courtoisie, Ce ieune Gentilhomme bien apparent & de bonne grace l'entretint quelque temps, & tira vn si bon augure de ses demandes & de ses responses qu'il

creut deslors auoir prise sur elle, & certes il ne falloit pas grand chose pour l'esmouuoir, puis qu'elle estoit desia assés esbranlée de sa nature; mais d'un premier coup forcer & violer les droits de l'honneur, outre que cela n'est pas bien sceant, aussi est-ce vn faict de trop grande impudence.

La raison & la bienseance ne voulut point que Clorilde pour ceste premiere fois donnast dauantage de priuauté à ce Gentilhomme, elle prent congé de luy & luy d'elle, mais leurs cœurs qui sembloient se conuier à vn plus long entretien, ne demeurerēt pas long tēps qu'ils ne ressentissent egallement les rigueurs de ceste absence. Cela fut toutesfois temperé par la veuë qu'ils firēt l'un de l'autre, Ce Gentilhomme s'estant à diuerses fois trouué au logis de la Dame

pour s'entretenir & bienueigner
par ensemble.

Durant toutes ces visites & entretiens arriua à Paris vn autre habillé en façon de Gentilhomme nommé Rodencourt, hómecault, fin & rusé, il cognoissoit de long temps celuy dequoy nous auons parlé, ils s'acosterent, & furent quelques iours à se promener dans Paris, pendant ce temps Rodencourt sceut toutes les aduentures de son compagnon, & principalement l'heureuse rencontre qu'il auoit fait de Clorilde, & côme elle l'acommodoit souuentefois d'argent, & de tout ce qu'il luy estoit necessaire, Rodencourt qui entend toutes ces nouuelles ne les laissa pas tóber à terre, il s'imagina qu'il pourroit participer à ce butin, & qu'en ceste affaire il n'estoit besoin que s'entendre, & y

proceder plustost par feintise qu'autrement, il pressa de plus en plus son compagnon, de luy declarer le logis de Clorilde, l'autre luy monstra, & mesme luy declara vn iour secrettement la facon comme il se gouuernoit enuers elle pour l'auoir, luy disant qu'il choissoit le temps que s^{on} mary estoit dehors, & qu'il venoit de nuit secrettement par vne fausse porte qui estoit au logis de ladite Clorilde, Rodencourt ayant pris vent de tout cecy, conceut en soy mesme qu'il falloit y auoir sa part, & attrapper quelque chose de ladite Clorilde. Quinze iours se passent qu'il va & vient, il passe pardeuant la boutique de ladite Marchande, & se sentit esgallement poussé d'auoir quelque part en ses bonnes graces & en ses richesses. Or il arriua qu'un de ses Voisins se maria

cependant que son mary estoit allé au champs, qui fut l'occasion qui esmeut Clorilde de se trouuer au bal ou elle auoit donné l'heure à son fauori, qui voulât faire preuue à Rodencour de ce qu'il luy auoit dit touchant ladite Bourgeoise, le mena avec soy & le rêdit spectateur des beautez de Clorilde.

Rodencour cependant s'allu-
moit aux rayons d'une telle beau-
té, & se consommoit quasi en
flammes sans en oser dire mot au
Gentilhomme son compagnon, car
il en eust eu de la ialousie; Neant-
moins en ce cas il falloit suiure le
conseil le plus opportun & le meil-
leur, il s'accosta insensiblement de
Clorilde & de son camarade qui
s'entretenoient secrettemēt dans
vn coing de la Salle, & entendit que
Clorilde supplioit le Gentilhom-
me de la venir voir le lendemain,

& que son mari alloit à Rouën pour quelque marchandise qu'il auoit fait venir d'Espagne ; sur ce le Gentilhomme luy respondit qu'il ne mâqueroit pas à effectuer ses commandemens , mais qu'il la supplioit de son costé de luy trouver vne centaine d'escus, & qu'il en auoit vn grandissime besoin , Clorilde luy promet de les luy apprester, luy recommandant tousiours le secret en cecy.

Rodencour qui auoit entendu tout ce discours sans faire semblât de rien, se promene dans la Sale, & rumine en son imagination ce qu'il deuoit faire en vne telle rencontre , il voyoit que la beauté de Clorilde auoit de grands attraits, mais le desir qui le brusloit d'attrapper les cent escus estoit encor plus preignant.

Sur ceste rencontre il se resolut

de passer outre & d'auoir l'un & l'autre, il s'imagina qu'il n'estoit requis en ceste affaire que de détourner le Gentilhomme d'aller le lendemain chez Clorilde, & que luy mesme il prendroit sa place: mais quand il se representoit ceste resolution, il ne scauoit quel pre-
texte trouuer pour faire absenter son compagnon qui brusloit apres les beautez de ceste ieune marchande.

Comme il reuassoit sur ce suiet, il s'imagina de le faire absenter par le moyen d'une lettre qu'il feindroit estre escrite d'un de ses parés pour l'aller trouuer à Melun. Ceste inuention luy reüssit avec tant d'auantage & un si heureux succez, qu'ayant adressé une lettre audit Gentil-homme de la part d'un de ses Oncles, il le fit sortir de Paris. Voicy les propres mots de la lettre qu'il luy escriuit.

Monsieur mon Neveu, ie vous ay
enuoyé ce porteur en haste pour
vous supplier de vous trouuer demain a-
pres midy en ceste ville, car i ay vne affai-
re d'importance à vous communiquer tou-
chant les nouueaux acquers que fait Ma-
dame: s'elle vostre Mere, desquels elle &
nous sommes grandement trauessez des
creanciers, ce porteur vous conduira en
mon Hostellerie où ie suis logé. Ce pen-
dant en attendant le bon-heur de vous
voir, ie demeureray du meilleur de mes
affections, Monsieur & Neveu,

Vostre tres-affectionné
Oncle à vous seruir,
de Roqueuille.

De Melun ce 27.
Nouembre 1618.

Ceste Lettre fut portee audit Gentil-homme en haste, mais le porteur auoit charge de quitter son homme au mesme temps qu'il seroit à Melun, sans luy enseigner aucun logis : Cela fit monter ledit Gentil-homme à cheual, & fut tellement precipité qu'il n'eut pas le loisir de dire adieu à Clorilde, tât il auoit haste de se trouuer à Melun, où e stât arriué, il n'eut aucune adresse touchant son oncle, & visita presque toutes les Hostelleries sans rien rencontrer, cela le faisoit sortir hors de soy mesme : car outre ce qu'il esperoit d'auoir ce bonheur de voir son Oncle, & de l'entretenir de tout ce qui se passoit en son pays touchant ses affaires, il estoit marri infinimēt d'auoir laissé eschapper vne occasion si bōne & de frustrer Clorilde de son attēte : mais il n'importe, laissons-le à Me-

lun, & voyons ce que fera Rodencourt à Paris.

La nuit auoit defia enuironné l'Vniuers de ses nuages obscurs, & le silence espanchoit le repos dans les yeux du peuple, quand Rodencourt vint immediatement à minuit frapper doucement à la porte de Clorilde, la seruante qui estoit coustumiere d'ouurir l'huis au Gentil-homme, ayant eu aduis de sa maistresse qu'il deuoit venir le soir, s'estoit tousiours tenuë sur ses gardes: quand elle ouyt frapper à la porte, elle prit la chandelle & luy vint ouurir, Rodencourt qui en ce lieu estoit ennemy de la lumiere, souffle la chandelle, & le né dans son manteau va droit à la chambre où Clorilde l'attendoit: de dire en ce lieu les pretensions amoureuses de Rodencourt, & ce qu'il fit quand il fut arriué en ladite chambre, la

biēseāce me le desēd, outre q; sortir hors des bornes de l'hōnesteté, ce seroit m'engager en vn labirinte que i'ay abhorré dés le commencement de mes ans, il suffira de dire qu'ayant eu tout ce qu'il desiroit d'une part, sō appetit interieur qui pouſsoit ses desirs plus auant le fit resoudre à demander les cēt escus qu'il esperoit: mais il fit cecy si dextrement & avec tant de prudence, que nonobstant tous les artifices q; Clorilde apportast, qui s'esmerueilloit de la façon, & du silence que sō fauori luy tenoit outre son ordinaire, il luy pria de lui liurer la somme de l'argēt qu'elle sçauoit, & qu'il falloit necessairemēt qu'il partist de grand matin pour quelques affaires d'importāce qu'il feignoit auoir; ces parolles qu'il disoit bas à l'oreille de Clorilde (car il n'eust osé parler haut de peur

d'estre recogneu) firent mettre la marchande hors du doute où elle auoit esté toute la nuit: car elle ne se pouuoit imaginer qu'un autre que le Gentil-homme susdit luy eust ioué ce tour.

Elle appelle doucement sa seruante, & luy donne la clef de son Cabinet, la chargeant sur tout de luy apporter vn sac qu'elle auoit mis'en vn lieu quelle luy enseignoit, la seruante ne manque pas de luy apporter, Rodencourt ayant receu le sac se trouua grandement ioyeux d'auoir ce qu'il cherchoit il y auoit si long temps.

Sur ce il prend congé de Clorilde bien qu'à son grand regret, par ce qu'elle n'auoit point accoustumé de voir son Gentil-homme sortir si matin. Estât dehors avec le butin, il estoit tellement embrasé apres les richesses, qu'il ne voulut point

terminer son inuention en si peu de chose ce luy sembloit, il se mit en l'esprit que par le moyen de sa bourse il pourroit en auoir d'autre. Doncques le iour mesme il voulut ioüer de son reste, il choisit le téps que la maistresse estoit en la boutique, & d'une feintise accorte & admirable, luy vint demander à voir des estoifes des plus belles qu'elle eust: mais sur tout il s'arresta sur vne piece de drap du sceau qui luy sembloit grandement belle: tandis qu'ils deuisoient ensemble du marché, le sang monta au visage de Clorilde, & comme balancee dans vn respectueux doute elle ne scauoit que dire, en fin les lis candides de son tein s'effacerent peu à peu par le pourprinvermilló de ses roses: que la honte auoit semées sur sa face: mais elle se rassura vn peu quāt elle ouyt parler Roudencourt

dencourt, non pas tant toutesfois qu'un soubçon ne luy restast encor en l'ame de l'auoir veu quelque part. Rodencourt qui laissoit à veüe ouuerte tous ces changemēs sur le marbre poly de son vilage, ne laissa pas pourtant de poursuiure son marché, & fit en sorte qu'il couint de prix avec elle: mais ce fut vne chose admirable de voir Clorilde comme il commença à ouurir la bourse qu'elle luy auoit donné le matin, & qu'elle recogneut les mesmes especes de l'argent qu'elle croyoit auoir liuré à son Gentilhomme, ce fut alors que comme pasmee & hors de soy vn saisissement general la prit, & voyant qu'elle estoit descouuerte, elle resolut d'apporter en vne affaire si importante à son honneur le meilleur remede qu'elle se pourroit imaginer, elle tira Rodencourt à

cartier & luy dit à l'oreille qu'elle le supplioit de tenir secret ce qu'il ſçauoit, & qu'au reſte recognoiſſant qu'elle auoit eſté trôpee, elle luy donnoit de bô cœur & la bourſe & la marchandife, pourueu qu'il luy pleuſt ne la point deſhonorér où il ſe trouueroit

Rodencourt qui auoit veu à ſon maintien & à ſa façon de faire la crainte qu'elle auoit que le tour ne fuſt ſceu, lui promet qu'infailliblement on ne le ſçauoit iamais de ſa part, comme de fait il a confeſſé en bonne compagnie, qu'il n'en parla iamais iuſques apres la mort de ladite Clorilde qui trespaffa deux ans apres que le tour fut fait. Voila comme Rodencour eut la bourſe, le plaifir & la marchandife, par le moyen du ſtratageme dont il vſa pour paruenir à ſon but & au point de ſes pretenſions.

*De la subtilité dont usa vn Gentilhomme
Poiteuin pour retrouver sa Bourse
qui auoit esté coupee dans
le Palais.*

CHAP. XVIII.

QVelquesfois les trompeurs
sont trompez & se trouuent
bien esloignez de leurs pretensions
sans pourtāt y songer, & bien sou-
uent le mal qu'ils conspirēt sur au-
truy tōbe sur eux mesmes par vne
certaine vengeance & punition
d'en haut, & du Ciel qui gouuerne
par ses influences les choses d'icy
bas, qui les entretient, nourrit, ali-
mente, & leur donne le bon & le
mauuais accroissemēt qu'elles ont
selon les dispositiōs qui se retrou-
uent en elles; de ceste proposition
nous en auons des argumens par

toutes les œuvres de la nature, & dans les Histoires d'Antiquité, où on peut voir que iamais le Ciel n'a veu de bon œil ceux qui ne vivent que parmy les tromperies, & dans les seditions : mais ie vous en veux signaler vn en ce Chapitre autant risible que remply d'admiration, où vous verrez que les plus fins, & ceux mesmes qui font profession de tromper & d'attrapper les autres, sont souuēt pris eux mesmes.

Vn certain Gentil-homme Poiteuin nommé Morindor, estoit venu à Paris pour quelque affaire d'importâce qu'il auoit en Cour, & auoit apporté avec soy quantité d'argent, iâ pour fournir aux despences de son voyage que pour ses affaires particulieres. Or estât arriué aupres du Louure où estoit son logis, vn autre Gentilhomme de son pays luy manda par Messa-

ger exprés, qu'il luy pleust de songer vn peu à vne affaire de grande importance qu'il auoit à la grand Chambre, sur vn differend & partage qui luy estoit venu depuis peu.

Ce Gentil homme qui ne vouloit pas desobliger son amy, prit la cause en main, & nonobstant qu'il fust empesché à son propre interest, il ne laissoit pas de faire les affaires de celuy qui l'en auoit prié avec instance. Ce pendant qu'il va & vient dans le Palais, qu'il sollicite l'vn & l'autre pour son bon droit, il fut apperceu de deux coupeurs de bourses qui resolu-
rēt entre eux de luy iouer vn mauvais tour s'ils pouuoient auoir prise sur luy.

Ils l'accostent à diuerses fois, mais ils ne peurent oncques luy mettre la main à la pochette, car estāt tres-

asseuré que le Palais affluë d'ordinaire de telles canailles, principalement quād la Cour est à Paris, il se donnoit garde au mieux qu'il pouuoit de telles rencontres: mais les finesse des coupe bourses surpassant le soing qu'il auoit de ne se rencontrer avec eux, il s'y trouua pris vn iour qu'il estoit dās la foule de la grand Chambre, deux ou trois le vinrēt presser, & ce pendāt qu'il regardoit d'oū venoit ceste esmotion & le poussemēt, vn d'entre eux luy porte la main à la poche & luy emporte sa bourse & s'enfuit, ce qu'il ne recogneut pas que deux heures apres comme il vint pour payer des liures qu'il auoit marchandé dans la Gallerie des Libraires, ce fut alors qu'il se trouua bien estonné, ne se pouuāt imaginer le tēps ny l'heure ou on l'auoit vollé, tant les coupeurs de

bourses sont subtils & desliez en leurs ouurages.

De dépiter les destins & iniurier le Ciel, la nature luy auoit infus trop de sagesse pour ne le point faire, bien que la perte fust grâde, car il y auoit plus de cent cinquante pistoles qu'il auoit apporté ce iour pour fournir aux espices de son procez, & contenter les Conseillers & Aduocats. Si est-ce qu'estant vn peu rusé aux affaires du téps, il delibera de se venger desdits Pirates (ainfi les dois-ie nommer, puisqu'à guise des Escumeurs de Mer ils emportér tout ce qu'ils rencontrent en leur passage:) C'est pourquoy voulant leur rédre leur change & les payer de mesme monoye, il alla chez vn Serrurier, où il luy commande de faire vn résort pour mettre dans sa poche, le Serrurier expérimenté en son

art, luy fait vne des belles & ingenieuses pieces qu'on eust peu imaginer, & ce avec tant d'artifice & tant de subtilité, qu'il ne falloit qu'y toucher du doigt pour la faire deferrer.

Morindor ayant veu la structure de la piece contenta le Serrurier, & se la fit attacher dans la mesme pochette où auoit esté prise sa bourse, & ainsi il se vint promener dās le Palais à diuers iours, car ses chalans ne l'auoient point veu. Apres s'estre pourmené par quatre iours cōsecutifs pour attendre les lieures au piege, il voyoit qu'ils ne venoient point, cela lui faisoit perdre l'esperance qu'il auoit de les liurer. Toutesfois il y vint le cinquiesme en la mesme posture & disposition, en intention s'il les rencontroit, de non seulement les prédre au piege qu'il auoit dressé,

ains de les outrager à coups de baston, enfin comme il estoit à la porte de la Grand Chambre, & qu'il contemploit les Effigies des Roys le long des Pilliers de la Salle, il fut recogneu par vn de la bande des coupeurs de bourses, qui dit à ses compagnons, que celuy à qui dernièrement on auoit pris les cent cinquante pistoles estoit encor là, & qu'il falloit derechef le fouïller pour luy attrapper le reste de son argent, les drolles qui n'attendent que le premier sur qui ils adresseront leurs mains crochuës, l'ayans apperceu enuoyerēt querir le mesme qui luy auoit volé la bourse, il n'y auoit que huit iours, car il estoit allé faire son cartier en vn autre endroit, il arriue & luy monstre on au doigt le Gentil-homme à qui il auoit desia pris les cent cinquante pistoles.

les, ce qu'ayant veu il s'acoste de luy secrettement, & l'ayant pressé au mieux qu'il peut dans la foule du Peuple qui arriuoit en grande abondance, parce qu'on sortoit de la Grand Chambre, il mit doucement sa main dans la poche, mais il n'y fut pas si tost entré que le ressort commença à se débâder, & se trouua pris par le poignet, morindor qui entendit le bruit du ressort ne fit pas semblant de voir le coupeur de bourse, ains ce fut alors de se promener de costé & d'autre, dans la Salle, grand Châbre, Galleries du Palais, & és environs. Le coupeur de bourse le suiuiot pied à pied, car il n'eust sceu se retirer tant il estoit serré estroittement, on ne vit iamais vn homme plus hôteux, quelquefois le Gentilhomme se retournoit & pouffoit ledit coupeur de bour-

se, comme feignant qu'il s'approchoit trop pres de luy. L'autre d'un visage suppliat luy disoit à l'oreille, Monsieur ie vous prie de ne me point scandaliser d'auantage, Morindor pourtāt faisoit semblāt de ne le point ouyr & alloit toujours çà & là, plusieurs du Palais l'apperceurent & se mocquoient du coupeur de bourse qui estoit mené de la sorte, enfin apres l'auoir biē promenē de costē & d'autre il se retourne d'un visage colerē & luy dit, que faictes vous icy à me suiure pas à pas monsieur le Larron? l'autre ne scauoit que luy répondre tāt il estoit hôteux, c'est toy dir alors morindor qui as pris ma bourse, il faut que ie te face pēdre, à ces mots l'autre se met à genoux & promets de la luy rendre s'il vouloit le déchaifner, Morindorne le voulut deslier qu'il n'eust

204 HISTOIRE DES
son argent que ledit coupeur de
bourse enuoya querir parvn de ses
camarades qu'il rencontra là par
cas fortuit. Ainsi les trompeurs
furent trompez.

*D'un Espagnol qui fut trompé en ve-
nant de Tours à Paris par le
moyen d'un faux
Diamant.*

CHAP. XIX.

Bien qu'au commencement de
ce Liure ie ne me sois proposé
de parler sinon de ce qui s'est fait
dans l'enclos de la Ville de Paris,
ou es enuirs. Pourrant ie croy-
ray ne fortir trop loing de mes li-
mites quant i'inséreray icy ceste
Histoire qui est arriuee du temps
que le Roy estoit à Tours, & de-
quoy la verité est assez asseuree.

Vn certain Espagnol qui auoit demeuré dix ou douze ans à Thoulouse & qui faisoit semblât d'estre bien fin & bié versé aux astuces du monde, voulut venir voir Paris, & y remarquer les raretez dont il auoit autres fois ouy faire recit. Or comme il eut passé Tours où il vit toute la Cour qui y estoit, il vint prendre le chemin d'Orleans & fut remarqué de deux auantcourriers & Vagabons qui ayans veu son maintien estant à Tours, resollurent de le poursuiure & de l'attrapper le long du chemin; côme ils firent; ils l'acostét sous vn faux semblant de tenir la mesme route de Paris, & de suiure le mesme chemin que ledit Espagnol, ils cheminerent quelque temps ensemble ou ils s'entretindrét de ce qui se passoit à Tours, & de tout ce qui se faisoit en la Cour du Roy de

France. L'Espagnol estoit bien aise de les entendre discourir sur ce suieſt, ils vinrent de compagnie iufques aupres d'Orleás, où il eſt à remarquer que par le chemin il y a vne Fontaine ou tous les paſſas alloiét boire pour ſe rafraiſchir, car il faiſoit grandement chaud. Vn de ces deux Vagabons prenát ſon temps, va deuant à la Fontaine & y laiffa ſubtilement vne lettre emballée avec ceſte inſcription.

*A Monsieur, Monsieur le Gros,
Marchand Orfevre
à Paris.*

AYant laiffé ceſte lettre ſur le bord de la Fontaine, il appelle ſes compagnons & leur demande ſ'ils ne ſe vouloiét point rafraiſchir & repoſer, ils y vont pour y boire, & principalement l'Eſpa-

gnol ne māqua pas d'y aller le premier pour tascher d'espargner son souper à boire de l'eau: comme il est sur la fontaine il apperceut la lettre, il la prent aussi tost, ses deux compagnons cōmencerent à crier, & dire qu'ils vouloient participer au gain & à ce qu'ils auoiēt trouuē, il ouure la lettre, & leur promet de les faire participans du butin s'il y en auoit, de prime abord ayant ouuert le paquet il trouue le Diamant qui brilloit à la lueur du Soleil comme s'il eust esté de grand valeur, l'Espagnol se sentit tout transporté d'auoir fait ceste rencontre, mais il fut encor bien plus esmeu quand il eut leu la lettre qui portoit ces mots.

Monsieur, vostre fils estant arriué en ceste ville pour les affaires dont vous m'auiez escrit, i'ay creu que ie ne vous eusse

ſceupar qui mieux enuoyer le Diamant dont ie vous auois parlé en mon dernier voyage que par son moyen, ie vous prie me le faire valider, il me couſta deux cens eſcus lors que ie me mariay, & n'eſtoit que le procez que i'ay ſar les bras ne m'importunaſt ſi fort, iamais ie ne l'euffe voulu vendre pour ce que ie ſçay bien qu'il ſeroit aſſez difficile pour le prix d'en recouurer de ſemblable: ie vous ſupplie donc Monsieur de faire en ſorte d'en auoir à tout le moins l'argêt qu'il m'a couſté, i'eſpere en bref vous aller voir de delà & vous contenter, tant de ce que ie vous dois que des bons ſeruices que i'ay receu de voſtre bien-ueillance. Tenez moy ce pendant pour voſtre

Tref-affectionné ſerui.
teur, Iean le Doux.

De Tours, &c.

LA lecture de ceste Lettre l'enflammoit, ces deux Vagabons d'autre costé vouloient auoir part au gasteau. Enfin apres plusieurs contestations ils s'accorderent de prix, l'Espagnol deuoit liurer cinquante escus, moyennât quoy on luy laissoit le Diamant. Ainsi il croyoit auoir fait vne bonne rencontre, mais il fut bien estonné qu'ayât liuré tout son argent, lors qu'il vint à Orleans on luy dit que son Diamant ne valloit point cinq sols, cela le pensa faire detester, & ne peut deslors recognoistre ses gens, car ils estoient retournez à Tours pour en attraper d'autres.

De la rencontre estrange de Polydamor, & comme il fut traité à ses despens par les Larrons & coupeurs de bourses.

CHAP. XX.

Rien de plus effronté qu'une personne qui a fait banque-route à l'honneur, rien de plus impudent, ny de plus orgueilleux qu'un homme esleué de la poussiere depuis qu'une fois il perd la cognoissance de ce qu'il est, & se laisse regir par ses propres passions, il s'imagine q; tout ce qu'il voit luy doit rendre hommage, les Cieux mesme ny le Soleil ne sont point assez brillans, & ont des lumieres trop sourdes pour l'éclairer en ses actions: chose estrange que nous sommes si aveugles en ce qui concerne nostre bié, & aux choses qui

ne nous peuuent apporter que du mal nous auons des yeux Linx.

De ceste nature sont ces pauures desesperez de Larrons ainsi (les dois-ie appeller puisque d'eux mesmes & de leur propre inclination ils embrassent le mal pour se rendre ennemis mortels de la vertu) telles gens se persuadent que la terre (masse lourde & indigeste) n'est pas assez suffisante pour les soutenir, & leur semble que tout ce qu'ils rencontrent leur doie faire ioug, siecle peruers! pire que celui de nos ayeux, & qui doit engendrer vn temps plus miserable. Ne verrons nous iamais ceste Ville de Paris, purgee de ceste peste infecte, & de tant de Vagabonds que nous voyons tous les iours dans les ruës, & qui mesme nous viennent affronter iusques dedans nos maisons? Ne verrons

nous point l'heure que toute ceste racaille perisse pour ne renaistre iamais ? Nô il est impossible, Paris est leur Afile, Paris est leur refuge, Bref Paris se peut dire le magazin ordinaire de telles gens ; & comme iadis pour accroistre la Ville de Rome, Romulus & Remus se seruirent d'un stratageme qui estoit de receuoir tous les Bannis esclaués & refugiez, ainsi en est de Paris, c'est la retraicte ordinaire de tous ces Pirates exilez & Vagabons, & ce qui est de plus admirable, c'est que telles gens sont tousiours en si bon ordre & tellement bien couuerts, qu'on les prendroit pour les premiers Gentilshommes de la Cour.

Voyons ce qui arriua à Polidamor par les entreprises de tels coureurs & Vagabons. Polidamor estoit vn Aduocat fort celebre &

renommé, tant par la prudence
que par son bien dire, on n'enten-
doit parler que de luy dans le Pa-
lais, son nom estoit l'entretien or-
dinaire des hommes d'honneur, &
sa reputation luy auoit acquis vn
tel aduantage sur les autres person-
nages de son temps, que tout le
monde le choisissoit pour prote-
cteur de sa cause.

Les auantcoureurs qui sont
rousiours aux aguets, oyant parler
de cest Homme si celebre, reso-
lurēt par ensemble de l'attrapper.

Ce complot estant fait ils es-
pierent à diuerses fois l'occasion
de le surprendre, ils sceurent son
logis & sa demeure, qui n'estoit
pas loing des Cordeliers, & par
trois ou quatre fois ils le manque-
rent, En fin vn iour comme il re-
uenoit seul avec vn petit Laquais
ils le recogneurent pres de saint

André des Arts, incontinent trois levinrent inuestir, & l'arrestèrent en la mesme place, ou l'ayât fouillé, & ne luy trouuans aucun argēt sur soy, ils luy prirent vn manteau de drap d'Espagne qu'il auoit, double de panne de soye, lequel estoit tout neuf & de grand prix. Polidamor qui se faschoit infinimēt d'estre despoüillé de la sorte, leur dit, Messieurs ie vous supplie me faire la courtoisie, puis que vous me prenez mon manteau, de le pouuoir rachepter de l'argent qu'il sera estimé, aussi bien quand vo⁹ le porterez autrepart n'en aurez vo⁹ iamais ce qu'il m'a cousté, & ce qu'il vaut, si d'auēture la proposition que ie vous fais vous est agreable, demain à telle heure que vous voudrez, ie vous apporteray l'argent. Les Larrons l'oyant parler de la sorte, luy respondirent

qu'il ne māquaſt le lendemain de ſe trouuer à ſix heures du ſoir en la meſme place, & qu'on luy rēdroit ſon manteau, & qu'au reſte ſ'il eſtoit ſi hardy d'amener quelqu'vn avec ſoy pour ſe ſeruir d'eſcorte, qu'ils ſ'eſtoient informez de ſon logis, & de ſa qualité & qu'infailliblement il ne retourneroit iamais en ſa maiſon.

Polidamor eſtonné de telles menaces leur promet ne point manquer à l'heure dite, cependant il fut cōtrainct de ſ'en retourner en ſon logis ſans manteau, ce qu'il trouuoit bien indigeſte, & principalement à vn homme de ſa qualité qui n'auoit point accouſtumé d'eſtre traicté de la façon; mais en ce cas il falloir prendre patience, car on n'y euſt ſceu apporter remede, quād il fut de retour en ſon logis, il n'aduerſit point ſa femme

de tout ce qui s'estoit passé, & défendit à son laquais d'en ouurir la-
mais la bouche ce qu'il fit.

Le lendemain il prend secrette-
mēt vne bourse où il y auoit quan-
tité d'argent, & sans sonner mot à
persōne, il sort sur les cinq heures
& demie, & vint à la mesme place
ou le soir precedent il auoit perdu
son manteau, là où il fut quelque
temps à attendre, en fin immédia-
tement à six heures il apperceut vn
Carrosse & trois ou quatre Gentils-
hommes dedās, il ne se fust iamais
douté que c'eust esté à telles gens
qu'il eust eu affaire. Ceux-cy le
voyās arresté en la dite place, font
arrester par mesme moyen leur
Carrosse & luy demādent si c'estoit
à luy à qui on auoit le iour prece-
dent pris vn manteau doublé de
Ranne, il respondit qu'il n'estoit
venu en la place que pour ce suiet,

& qu'il auoit apporté l'argēt qu'il auoit promis, sur ceste responce vn d'eux s'auance, & luy vint à demander tout bas à l'oreille, s'il n'estoit point accompagné, & que si cela se trouuoit que sa vie estoit en grand brâsle, apres leur auoir dit qu'il estoit seul, alors on le préd & le met-on dans le fond du Carosse, ou on luy banda les yeux, pendant quoy il y en auoit vn qui luy tenoit le pistolet sur la gorge, si de fortune il eust tant soit peu crié. Voila Polidamor bien estonné, & se trouua tellement saisi (car il croyoit estre mort) qu'il tomba du siege ou il estoit placé, mais il fut rassuré quand on luy dit qu'on ne luy vouloit faire aucun mal, ils font abaisser les portieres, & commandent au Cocher de marcher, ce Carosse en mesme temps prit sa course, & ne sembloit point courir mais voller

tant il estoit trainé rapidement. Polidamor demeuroit cependant comme pasmé ayant tousiours les yeux bandez, & ne sçauoit ou on le transportoit, & de fait c'estoit pour auoir grandement peur de se voir parmi des gens incognus traitté de la façon, son esprit estoit comme balancé entre l'esperoir & la timidité, il ne sçauoit que iugerny quel euenement esperer de ce rauissement si extraordinaire.

Après auoir bien couru de ruë en ruë, ils arriuent à vne grande maison superbe & haute esleuee, on ouure incontinent la porte & les fait on entrer dedans, ce fut ici ou Polidamor redoubla sa peur & commença à attendre le coup de la mort. Car il ne croyoit iamais en reschapper, on luy desbande les yeux, & le mene-on droit à

vne grande Sale ou il trouua les
 tables couuertes de toutes sortes
 de viandes exquisés, il fut gran-
 dement estonné de se rencontrer,
 au milieu de tant de gens, tous en
 bon ordre & bien couuerts, de sor-
 te qu'il les prenoit pour hommes
 de qualité releuée, on luy dit qu'il
 n'auoit que faire de craindre, &
 qu'il estoit en bonne compagnie,
 & qu'on ne l'auoit amené en ce
 lieu que pour leur faire ceste hon-
 neur de prendre vn mauuais sou-
 per avec eux Mais Polidamor
 eust bien voulu souper ailleurs &
 en vn lieu plus seur, car il ne se
 pouuoit remettre, ny en quel car-
 tier de la Ville il estoit, ny en
 quelle compagnie on le, vouloit
 faire soupper.

Cependant on apporte à lauer
 les mains, chacun prend sa place
 & quant bien ils eussent esté chez

vn Prince, ils n'eussent iamais esté mieux seruis, on fit asseoir Polidamor au haut bout, qui pourtāt n'auoit pas beaucoup d'appetit, car il auoit vne espine qui ne se pouuoit oster hors du pied, sçauoir est, la fin de ce qui revssiroit de tout ceci qu'il attendoit avec impatience. Neantmoins il fit semblāt de souper parmi les autres, iugeant puis qu'il estoit au milieu des loups, qu'il ne pouuoit faire autre chose qu'imiter leurs actiōs. Quand on eut soupé, & que les tables furent leuees, on vint à entretenir Polidamor qui estoit plus mort que vif, de ce qu'il n'auoit point mangé, il ne sçauoit que respondre, car il craignoit de parler mal à propos, & d'offencer l'vn ou l'autre: pendant qu'on l'entretenoit l'vn prédy vn Luth, l'autre vne Viole, & se resiouyssoient entr'eux apres le

souper. Enfin apres plusieurs de-
uis & discours , celuy qui le iour
precedent auoit pris le mâteau de
Polidamor vint s'adresser à luy,
& luy demanda s'il auoit apporté
l'argent qu'il auoit promis , Poli-
damor respond que l'argent estoit
prest, & de ce pas luy conta trente
pistoles sur le bout de la table
(bien que le manteau en valust
plus de quarante), Cela fait on luy
monstre vne petite chambre qui
estoit à costé, & luy dit-on qu'il
regardast ou estoit son manteau,
Polidamor estonné de voir vn tel
amas de manteaux commença à
repandre couleur & à se rasséurer
vn peu plus qu'auparauât, il trou-
ue son manteau parmi les autres,
& vint retrouver ses gens dans la
Salle, avec toutes sortes de sub-
missions (car il n'estimoit pas en
estre quitte à si bon marché) mais

ce ne fut pas tout , car comme il estoit prest à partir, on luy vint dire que pour le Cocher qui l'auoit amené & qui l'alloit conduire il falloit vne pistole outre son escot qu'il falloit payer d'auoir soupé avec eux. Polidamor leur donna encor deux pistoles, & prit congé d'eux, incontinent on fait atteler le Carosse, & comme il est prest à se ietter dedans, on luy bande les yeux pour la seconde fois, & le ramena-on en la mesme place ou on l'auoit pris, qui est aux enuirôs de S. André des Arts, là on lu desbande les yeux, & le mirét à terre avec ce billet cachetté au bas de cire verte ou ces mots estoient escrits en grosses Lettres, *La grande Bande y a passé*, & luy dirent si de fortune il rencontroit quelqu'un qui luy voulust faire mal ou oster le manteau qu'il luy monstast ce passe-

port, & qu'inailliblement on le
 lairroit aller. Polidamor prend
 congé d'eux, bien-heureux avec la
 perte d'eschapper de leurs mains
 sa vie sauue : mailil fit comme les
 nautonniers de Sicile qui ne sça-
 uent point le destroit, *Incidit in*
Scillam cupiens vitare carybdin, à pei-
 neles eust il quitté pour tourner à
 la seconde ruë qu'il trouua trois
 autres Volleurs, luy qui du com-
 mencement ne faisoit conte de ce
 Billet qu'on luy auoit donné à son
 depart, se ressouuint ici qu'il s'en
 pourroit seruir, & de fait il leur
 presenta ce passeport qui fut leu &
 recogneu par l'vn d'eux qui por-
 toit vne fausse Lanterne, ainsi il
 passa & reuint en son logis ou sa
 femme estoit demeuree toute es-
 ploree, & ne sçachant qu'estoit de-
 uenu son mary, elle fut grande-
 ment ioyeuse de le reuoir, & d'en-

tendre comme il auoit esté traicté,
ne se souciant autremét de la per-
te qu'il auoit faicte, puis qu'il n'a-
uoit point perdu la vie.

*De la Vie & actions estranges de Pal-
lioly Tholosain, des Tours qu'il fit
dans Paris, & de l'inuention
Diabolique des Poires
d'Angoisse.*

CHAP. XXI.

IL n'y a rien qui attire dauātage
l'homme au mal, & qui le de-
stourne plus de la vertu que le
mauuais exemple qu'on luy don-
ne dés le printemps de sa ieunesse;
car il est alors comme vn arbris-
seau qui peut estre rourné & manié
à droit & à gauche, porter du
fruiet ou demeurer sterile & in-
fertil. Nostre nature qui de son
propre

propre poids & de son inclination interne panche au mal, l'embrasse avec bien plus d'ardeur & de vehemence quand elle s'y voit portee par les exemples, & que ses actions sont autorisees par celles d'autrui. C'est l'estat des peres d'aujourd'huy, qui au lieu de tenir leurs enfans dans les limites du respect, & du deuoir qui les oblige enuers eux, les laissent courir à bride abbatue apres les vices & mauuaises mœurs, & souuentefois les y poussent & incitent.

Pallioly estoit natif des environs de Tholose, l'affection trop grande que son pere luy porta dès le commencement de sa ieunesse le perdit, car ayant mis sous le pied cest office qu'un fils doit à son pere en la recognoissance de sç estre, il embrassa toutes sortes de vices, & fut impossible au pere de le re-

tenir, ny de plier le tronc qui s'estoit desia enraciné au mal, parce que dès la ieunesse il ne l'auoit point chastié, ains l'auoit laissé suivre & viure selon ses appetits particuliers.

Ce ieune garçon fit plusieurs extorsions, vols, massacres & pilleries dans son propre pays, & à diuerses fois il fut contrainct de s'abséter parce qu'on le cherchoit à pied & à cheual pour tirer raison de ses déportemens : cela l'occasionna de quitter sa terre natale, & de venir de deça, ou il ne fut plus tost arriué qu'il fit des actions estranges, que ie graueray en ce lieu pour marque eternelle de la faute que font les parens quád ils ne chastient pas leurs enfans de bonne heure, & qu'ils les laissent aller à l'abry de leurs propres passions.

Pallioly estant à Paris, il se mit à fourager de costé & d'autre, & ne fut pas long temps sans s'acoster des coupeurs de bourses, qui pullulent ordinairement en ceste ville; là il fit preuue à diuerses fois des inuentions & conceptions estranges que luy dictoit son iugement, qui estoit fertile en nouuelles machines pour attraper autrui. La premiere action qu'il fit fut à S. mederic, où il alla vn iour de feste, où à cause d'un grand personnage qui y preschoit, il y auoit vn grand concours de monde, en sorte que l'Eglise n'estoit point capable de receuoir tous ceux qui attirez des rōsemmeillez de l'eloquence de ce grand personnage venoiēt pour l'ouyr: Pallioly y venoit avec les autres, suiuant ceste maxime des coupeurs de bourses, qui est, que plus il y a de monde & de

presse, plus il fait bon pour eux : il soigna de bonne heure à prendre sa place, de peur qu'il ne peust entrer s'il arriuoit trop tard. Comme on attendoit le Sermon, & que les vns en attendant le Predicateur lisent quelque liure de deuotiô, ou fôr quelque autre exerciceil, voulust imiter ceste bonne action par vn faux semblant qui le conduisoit à ceci : mais ce fut vne chose admirable de voir l'inuention & la machine qu'il auoit apportee: quâd il vit que la foule s'augmentoït tousiours de plus en plus, & que l'Eglise commençoit fort à se peupler, il auoit des mains de cir artistement faictes qu'il attacha à son col & les fit passer hors de son manteau, & desdites mains il tenoit vn liure où il auoit tousiours la veüe fichee, & faisoit semblant de lire, en ceste posture il s'accoste

d'une grand Dame qui auoit vne monstre d'argent doré de grand valeur & fort bien trauaillee; elle qui le voyoit (ce luy sembloit) tenir vn liure dans ses mains, ne se doutoit pasqu'il eust d'autres bras ny d'autres mains sous son manteau, mais ce Briaree l'eut bié tost attrappée, car regardât de trauers il porte ses mains naturelles à la la monstre, cependant que les artificielles tenoient le liure, & ainsi il la couppa sans que ladite Dame s'en fust en rien apperceuë qu'une demie heure apres, ou elle vit que sa môstre n'estoit plus en sa place : cela la mit tout hors de soy, mais toutes les enquestes qu'elle peust faire ne luy seruient de rien, car le drolle auoit gagné la porte & s'en estoit allé placer en vn autre endroit, où il vfa du mesme stratageme à l'endroit d'un

ne grosse Bourgeoise de la rue S. Martin, à qui il coupa la bourse en faisant mine de prier Dieu: ce fut icy la premiere inuention qu'il trouua pour attrapper les bourses, de laquelle plusieurs depuis de ses compagnons se sont seruis, ayant veu par experiéce qu'elle est fort seure; mais vn d'entr'eux y ayant vne fois esté pris & attrappé, les autres firent des mains de bois qu'ils couuroiét de gans avec des ressorts, ce qui leur revffit quelque temps assez bien, mais la à fin ladite inuention a perdu s^{on} temps, car le monde se subtilise tous les iours.

Pallioli commença deslors à acquerir vn grand aduantage parmy ses compagnons, de maniere qu'ils le firent Lieutenât de la compagnie, où à diuerses fois il fit paroistre que les Gascons

sont cauts & rusez. Le second tour qu'il fit fut dans l'Eglise saint Germain, où au milieu du chœur comme on se preparoit pour aller à la procession, il couppa vne grande piece du derriere d'une Chape de damas, sans que celuy qui la portoit s'en fust aucunemēt aperceu, sinó q; lors qu'il fallut marcher il vit que sa Chappe estoit plus longue par deuant que par derriere.

Il vſa plusieurs fois de ceste finesse dans le Palais & autres places publiques, principalement à la foire saint Germain, où il se rencontra trois ou quatre fois, le plus souuent on s'estonnoit de voir son manteau en lambeaux & emporté par la moitié: mais toutes ces inuentions n'estoient que pures frivoles au regard de celle qu'ils imagina de faire.

Il eut accointance d'un Serru-

rier fort subtil, où il fit faire vn instrument à qui il donna le nom de *poire d'angoisse*, instrument diabolique tout a fait, & qui a fait de grands maux d'as Paris, & par toute la France: cest instrument estoit fait en façon d'une petite boule, qui par de certains ressorts qui estoient dedans venoit à s'ouurir & à s'eslargir, en sorte qu'il n'y auoit moyen de la refermer, ny de la remettre en son premier estat que par le moyen d'une clef qui estoit faite expressement pour ce subiet. Ce fut Pallioly qui practiqua le premier ceste inuétion, & qui s'en seruit aux occurrences: inuention detestable, s'il en fut iamais, car depuis qu'on auoit mis ceste poire dans la bouche de quelqu'un, elle venoit à s'ouurin, & estoit impossible de la retirer que par le moyé de ladite clef, qui seule remettoit

le ressort en sa premiere forme.

Le premier qui esprouua ceste maudite & abominable inuentio, ce fut vn gros Bourgeois des enuiron de la place Royale, que ie nommeray Eridas, homme riche, opulent & qui auoit de grandes commoditez : Pallioly qui auoit esté constitué Lieutenant de la bade pour lastuce & les inuentions qui estoient en luy, ayant reconnu ce bon vieillard, & sceu qu'il auoit de grands tresors, choisit le iour que tout son train estoit en vne sienne maison qu'il auoit aux chaps, & qu'il estoit demeuré seul au logis avec son homme de chambre & vn laquais, il vint accompagné de trois autres vauriés comme luy au logis dudit Eridas, ou de fortune il n'y auoit pour lors qu'un laquais, qui croyant que ce fussent quelques Gentils-

hommes, vint aduertir son maistre qui estoit encore dans le liect, & les fit entrer à la salle, comme ils sont là quelque tēps, ils se conseilloyēt par ensemble de ce qu'ils deuoyēt practiquer en cecy: les vns vouloyent tuer Eridas, les autres donnoient vn aduis tout contraire. Sur ceste contestation Eridas arriue & leur demande ce qu'il leur plaisoit, Pallioly le prend par la main & le tire à cartier avec ces mots enflez de blasphemes & iuremens estranges. Monsieur il faut necessairement que ie vous tue, ou que vous nous donniez ce que nous demandons, nous sommes pauures soldats qui sont contraincts de viure de la façon, puisque maintenant nous n'auons autre exercice.

Eridas surpris pensa crier au voleur, mais à l'instant les trois autres accoururent, & l'empoignans luy firent ouurir la bouche & luy

mirent leur poire d'angoisse dedans, qui en mesme temps s'ouurit & se delascha, faisant deuenir le pauvre Eridas comme vne statue, beant & ouurant sa bouche sans pouuoir crier ny parler que par les yeux.

Ce fut alors que Pallioly prit ses clefs dans sa pochette & ouure son cabinet où il prit deux sacs de pistoles: ce qu'ayant faict à la veüe mesme d'Eridas, Dieu sçait quelle angoisse il eut, & quelle tristesse de voir ainsi emporter son bien sans oser sonner mot, outre que l'instrument qu'il auoit dans la bouche luy cauſoit vne grandissime douleur, car plus il taschoit à le retirer & l'oster de sa bouche, plus il s'eslargissoit & s'ouuroit, en ce cas il ne pouuoit faire autre chose que de prier de signes lesdits

volleurs de luy oster ce qu'il auoit en la bouche : mais luy ayans rendu les clefs de son cabinet, ils s'en allerēt avec son or & ses richesses. Eridas les voyant dehors, commēce à aller querir ses voisins, & leur monstra par signe qu'on l'auoit vollé, il faict venir des Serruriers qui tascherent à limer ladite poire d'angoisse, & à luy oster de la bouche, mais plus ils s'auançoiet pour l'emporter, plus elle luy faisoit de tourment, car mesme en dehors il yauoit des pointes qui luy entroient dans la chair, ainsi il fut iusques au lēdemain où il emploia tout l'artifice qu'il peut pour s'oster cest instrument de la bouche, mais oncques il n'y peut paruenir nonobstāt les plus experimentez ouriers qui y trauaillassent.

Or comme la cruauté ne loge pas tousiours dans vn esprit, ains que

quelquefois la douceur préd possession de son ame, vn des quatre Volleurs persuada à ses compagnons qu'il ne falloit pas estre cause de la mort d'Eridas, ains qu'il luy falloit enuoyer la clef de la Poire d'Angoisse. Ses compagnons ne vouloient point adherer à cecy, mais il fit tant par ses prieres qu'il obtint de Pallioly la dite clef qu'il mit aussi tost dans vne Lettre, où il y auoit ces mots.

Monsieur ie ne vous ay point voulu mal traiter ny estre cause de vostre mort, voicy la clef que ie vous enuoye, affin d'ouurir l'instrument qui est en vostre bouche, ie sçay bien que cela vous aura donné vn peu de peine, ie ne laisse pas pourtant de demeurer vostre seruiteur.

Il cachette ceste Lettre & la donne au premier porteur qu'il trouua, car il ne la voulut point

porter. De dire ici la ioye qu'Eridas receut de ceste clef, n'obstant la perte qu'il auoit faite, qui se montoit à plus de mille escus, il est impossible de se l'imaginer, il fut bien aise d'auoir la vie sauue, & d'estre garanti d'un mal d'ot il ne croioit iamais eschapper. Voila l'inuention abominable de Poire d'Angoisse, qui depuis fut plusieurs fois mise en œuvre par les coupeurs de bourses qui s'en seruoient pour attrapper par ce moyen les Marchands, & pour leur faire confesser où ils mettoient leur argent, Ceste inuention a eu cours en diuers endroits de la France, où le nom & la puissance des coupeurs de bourses à peu auoir le dessus. Passons au reste des actions de Pallioly.

Vn iour comme il se promenoit sur le Pont-Neuf, avec deux ou

trois de ses compagnons, il vit passer vn homme assez bien couuert, mais qui auoit vn bon manteau, Pallioly dit alors à ses gens (nonobstant que ce fust en plain iour) qu'il falloit auoir ce manteau là, ses compagnons luy dirēt qu'il se mocquoit, & que parmi tant de Peuple il estoit impossible d'auoir ce butin.

L'autre les instruisit & leur dit qu'ils fissent semblant de cognoistre ledit personnage, & qu'il le vinssent saluër avec toute sortes de signes de bienueillance, ce qu'ils firent, & comme ils s'entrelaluoiet par ensemble, Pallioli vint par derriere & prit son Manteau & s'enfuit, l'autre se retire; mais les coupeurs de bourses le tenoient par la main luy faisant mille caresses. En fin dit-il Messieurs on ma pris mô manteau sur

més espaules, ils commencerent alors à chercher, & à faire les estonnez, ainsi le pauvre homme fut contraint de s'en retourner au logis sans manteau. Ce pendant que pallioly s'en estoit garni & l'auoit emporté, ses compagnons le retrouvèrent en vn autre endroit où estoit le rendez vous, qui firent bonne chere aux despés de celuy à qui on auoit vollé si impudemment le manteau.

De iour à autre on n'entendoit murmurer dans la Ville que des faits de Pallioly, tantost les marchands les plus releuez se trouuoient surpris par ledit coupeur de bourse, tantost il s'attaquoit aux Gentilshommes. Bref il ne se passoit iournee ou Pallioly ne fist quelque tour de son mestier.

Vn iour se promenant aux Halles avec vn ieune compagnon qui n'auoit

7'auoit pas encore passé maistre de la compagnie des vagabonds, il apperceut vn Villageois qui estoit assis à vn coin de la ruë avec sa hotte pleine de fruiçts rares & excellens, ce qui estoit alors fort cher pour la sterilité de l'annee qui auoit esté infructueuse. Ce Villageois selon leur ordinaire mettoit tout son argent dans vne bourse qui luy pendoit du col dās sa chemise, pour esuiter par ce moyē le cousteau des coupeurs de bourses. Pallioly le voyant cāpé de la sorte, dit à celuy qui l'accompagnoit, qu'il falloit qu'il coupast la bourse du Villageois pour passer Maistre: l'autre luy respondit qu'il ne pouuoit, & n'osoit entreprendre vne chose si ouuerte: Pallioly là dessus luy repliqua, puis que tu n'oses entreprendre ceste affaire, regarde & considere atten-

tiuement la façon comme i'y pro-
cederay, afin qu'à mon exemple
tu ſçaches vne autrefois t'y com-
porter prudemment. Ayant dit
ces mots, il vint fubtilement au-
pres du Villageois, & feignant d'a-
uoir quelque paille dans le dos
luy dit, mon amy ie vous ſupplie
au nom de Dieu de m'oſter vne
petite paille qui m'eſt entree dans
le dos, ſur ce il le baiſſe & le Villa-
geois luy mit la main dans le dos,
pendant quoy il prit ſon couſteau
ordinaire & luy coupe ſa bourse ſi
dextre ment qu'il ne s'en apper-
teut aucunement.

Ayant fait ſon coup il vint trou-
uer ſon camarade, qui luy dit que
d'oſeſnauât il ſçauoit bien en fai-
re autant: Pallioly en voulut voir
l'experience ſur le champ à l'en-
droit d'un autre Villageois qui e-
ſtoit pres de ſainct Innocent: mais

comme ce pauvre apprenty vouloit executer son coup, il fut recogneu par vne femme qui marchadoit les fruiçts, & fut tant battu qu'à peine se peut-il retirer de la main de ceux qui le poursuiuoiet.

En fin pour epilogue des actions impies & meschantes qu'il commit, il surprit le Messager de Châlons, de cinquante pistoles par le moyen d'une lettre de chage qu'il auoit falsifiée, il fit bien d'autres actions & d'autres rauages qui ne sont venus à ma cognoissance, ie les lairray en blanc aussi biẽ que la fin miserable de ses iours, car ayãt fait plusieurs vols & pilleries dans Paris & aux enuiron, & craignant qu'on ne luy en fist payer bien cherement les arrerages, il prit la fuitte, & dit-on qu'il alla aux guerres de Hongrie & d'Allemagne, où finalement on tient qu'il est mort.

*De la subtilité iouée dans le Palais en-
uers vn Gentil-homme du bas
Poictou, & comme il
fut surpris.*

CHAP. XXII.

PLusieurs ont creu que les cou-
peurs de bourses auoient quel-
ques intelligences Magiques qui
les conduisoient en toutes leurs
actions, puis qu'ils font des actes
& des subtilitez si esloignees de
l'humaine conception: il est bien
vray qu'on a decouuert que plu-
sieurs d'eux ont de l'accez avec
les Demons, & ce mesme par la
confessiõ de quelques-uns de leur
cabale, qui estans pris & apprehen-
dez ont declaré qu'ils auoient des
colloques avec le diable, & qu'au-
trement ils ne pouuoient faire rã
de tours, ny inuenter tant de sub-

tilitez sans cest accez & ce collo-
que. Mais quoy que s'en soit, ou
qu'ils communiquent avec les de-
mons, ou autrement, (ce n'est point
en ce lieu à le definir,) ie diray qu'il
faut estre grandement subtilisé, &
d'une nature bien esueillée pour
trouuer tant d'imaginacions qu'ils
inuētent tous les iours: & bien que
iusques icy nous en ayons donné
des preuues & des tesmoignages
irrefragables de ce qui est mesme
arriué en nos iours & deuant nos
yeux, ceste histoire le confirmera
encore dauantage.

A Paris arriua vn Gentilhom-
me du bas Poictou, qui auoit vn
sien frere de robbe longue, qui de
cas fortuit estant venu en ladite
ville pour hâter le barreau & s'ex-
ercer au Parlement, y prit party,
& se ioignit par mariage à vne hô-
neſte Damoiselle des meilleures

maisons de ladite ville : ce Gentilhomme ne voulut point prendre autre logis que celui de son frere, tant pour auoir ce bien de luy communiquer les pieces d'un procez qu'il auoit sur les bras, que pour vne déence particuliere qui le conduisoit à prendre logis chez luy, comme luy estant proche & affidé de sang.

Là il demeura enuiron vn mois ou six semaines, pendât lequel temps il vacquoit à son procez & alloit souvent au Palais pour solliciter son affaire, ou son frere apportoit vn grandissime soing. Vn iour comme ils estoient à table tous deux, l'aîné demanda à son cadet qui estoit le Gentilhomme, si allant tant de fois dans le Palais il ne craignoit pas de rencontrer quelque coupe bourse qui luy emportast son argent; l'autre luy respon-

dit qu'il croyoit n'y auoir aucun (si effronté fust-il) qui luy osast mettre la main dās la pochette, & que si de fortune il y en pouuoit rencōtrer quelqu'un, qu'il luy feroit payer bien cherement vne faute si lourde: son frere luy repartit qu'il n'auoit que faire de se fier en ses forces, & que plusieurs & mesme des plus fins y auoient esté attrapez, ce qu'il luy confirmoit par diuers exemples & tesmoignages aduenus depuis peu à diuerses personnes de qualité qu'il luy nommoit, neātmoins cela ne luy pouuoit persuader qu'ō le peust attraper, tant il auoit conceu vne bōne opinion de soy mesme, il insistoit tousiours au contraire, & disoit que libremēt il iroit par tout sans auoir aucune crainte d'estre preuenue de telles gens. Son frere le voyāt si opiniastre en ses discours

luy dit qu'il se donnast garde pendant huit iours, & qu'il ne portast aucun argent sur soy que bien à propos, & qu'infailliblement on parloit de plusieurs tours qui s'estoient faicts depuis peu. Cependant il trouua moyé par certaines personnes qu'il entremet, de parler à deux coupeurs de bourses, à qui il promit vne dizaine d'escus s'ils pouuoient attrapper la bourse de son frere & la luy porter, leur en chargeant qu'ils fissent tout leur possible deuant qu'il fust huit iours, d'executer ce coup.

Nos gens qui auoient sceu du dit Iuriconsulte, l'habit, le port, & la façon de son frere, ne manquerent pas de l'espier à diuerses fois; mais ils ne pouuoient auoir prise sur lui, car la doute & le soupçon que son Frere luy auoit imprimé en l'esprit le faisoit mettre sur

ses gardes. Ils l'inuestirēt par trois ou quatre diuerses iournees, mais en vain car on ne le pouuoit surprendre. Son aîné d'autre costé se formalisoit contre ses partisans qui n'exécutoient point leur entreprise selon le proiet qu'il en auoit fait, mais enfin ils espierent si bien leur homme qu'un iour comme il trauersoit de la grand Chambre en la Salle pour descendre vne petite montée qui mene dans la gallerie des Libraires, ils vinrent trois ou quatre l'accoster & le presser, il se retourne pour voir ceux qui le pressoient avec tant de rudesse, mais les autres feignans d'estre pressez de plus loing firent en sorte qu'il tomba par terre, en mesme temps ils accourēt à lui pour le releuer avec toute sorte de submissions & bienueillâces, L'un luy tient les bras, l'autre le

corps, & se blent à qui mieux mieux s'ouurir pour luy faire seruice, vn cependant met insensiblement sa main à sa pochette & emporte cent pistoles qu'il auoit apporté ce iour, apres auoir remercié outre mesure ceux qui l'auoient desrobé, Les drolles apporterent aussitost la bourse au Iurifconsulte, Frere dudit Gentilhomme qui leur donna ce qu'il leur auoit promis pour vn si bon office, tandis le Gentilhomme se promenoit dans le Palais selon sa coustume, mais vne heure apres il s'apperceut que son argent estoit vollé, il pensa despiéter les Cieux, & les destins, tant il estoit en furie, Non point pour son argent, bien que la perte fust grande, mais pour la mocquerie & l'affront qu'il receuroit de son Frere s'il venoit à le sçauoir, il va de tous costez, il cherche & ne se

peut imaginer en quel endroit a esté surpris, midy estant sonné il reuint au logis de son Frere fort triste, & à peine pouuoit-il parler tât le regret luy auoit saisi le cœur.

Son frere qui vit à sa mine qu'il ressentoit de grandes & vehementes douleurs de sa perte, luy demâda ce qu'il auoit, & quel nouveau subiet de tristesse l'auoit pris depuis le matin qu'il estoit si gaillard & en si bonne disposition? l'autre ne sonnoit mot, & n'osoit luy declarer sa perte, de peur d'encourir la honte & la vergongne qu'il meritoit pour s'estre tant fié en ses propres forces.

On disne cependant, & ne peut ledit Gentilhomme manger vn seul morceau, tant la tristesse luy auoit serré & bouché les conduits de l'estomach. Le Iurisqueultre prenoit vn singulier plaisir à cecy

& auoit donné charge à ses seruiteurs qu'ils missent la bourse dans vn plat couuert, & qu'on l'apportast sur la table en seruât le desert, ce qu'ils firent.

¶ Derechef on pria ledit Gentilhomme de disner, & de manger à tout le mois quelque fruit, mais il n'en peut oncques gouster: le Iuriconsulte alors prit le plat qui estoit couuert, & dit à son frere, il vous faut manger de ce fruit icy, peut estre que l'ayant veu vous reprendrez vos appetits, à l'heure mesme il découure le plat & lui môstre sa bourse, le Gentilhomme tout hors de soy, & côme rauy de voir ce dont il n'esperoit, cômeca à s'écrier de ioye, & à s'enquerir de la façon qu'on auoit trouuè ladite bourse: le Iuriconsulte luy dit & declara le tout: encor l'autre ne se pouuoit imaginer qu'on lui eust

vollé son argent sur la montee,
& s'opiniaistroit encor en cecy: son
frere luy dit, demain à ii. heures
promenez vous derechef dans la
Salle du Palais, & prenez garde à
deux personnes que vous verrez ha-
billez l'un de gris, l'autre de rouge
qui vous cotoyeront, ce sont ceux-
là qui vous ont desrobé vostre
bourse, ils ne manqueront pas de
s'y trouver, & de vous attrapper
pour la seconde fois. Le Gentil-
homme fit vne gajure avec son
frere qu'on ne le pourroit surpré-
dre. Le Iuriconsulte fait derechef
aduertir les gés qui se tinrēt prests
à l'heure dite, le Gentilhomme les
ayāt recogneus fit quelques tours
de promenade dans la Salle du Pa-
lais, & auoit tousiours ses mains
dans ses pochettes, de peur qu'un
autre faute de gands n'y vinst es-
chauffer les siennes, tantost les

coupeurs de bourses s'appro-
choiét de luy, tantost ils reculoiér,
iusques à ce que toute la foule ve-
nant à sortir, l'un de ces deux luy
vint ietter son chapeau par terre,
& cepédât qu'il le ramassoit, l'aut-
re luy mit subtilement la main à
la bourse & l'emporta; mais il ne
fit pas comme le premier coup, car
au lieu de retourner au logis du
Iuriscôulte rapporter ladite bour-
se, il prit la fuitte & gagna au pied
avec ceste somme qui se montoit
bien à cinquâte pistoles au moins.
Le Gentilhomme retourna au lo-
gis ayant apperceu sa bourse prise,
mais il ne s'en estonnoit pas, car
il esperoit la recouurer comme il
auoit faict la premiere fois, ce qui
l'esloigna bien de son esperance,
car toutes les attentes qu'ils firent
luy & son frere furent vaines & in-
utiles, car le volleur choisit la

meilleure partie pour soy, iugeant que rapporter la bourse deux fois à vn mesme maistre, c'est sortir des alignemés du mestier de coupeur de bourses.

*De la façon que fut prise & emportee
la Tapisserie d'un grand Druide
de la Ville de Paris.*

CHAP. XXIII.

EN tous les endroits de Paris les Volleurs ont fait des extorsions estranges, ils n'ont pas mesme porté reuerence aux Eglises ny aux Prelats, & n'ont eu aucune honte de porter leurs mains sacrileges sur les choses qu'ils deuoient reuerer d'un saint respect. En diuerses Eglises de ceste ville les Larrons y ont executé vne grande partie de leurs desseins, pollués par leurs in-

ſes actions le lieu ou Dieu doit eſtre dignement ſerui & honoré, mais de memoire d'homme on n'a point ouy parler d'une telle eſſroterie que celle qui eſcouteray en ce Chapitre, elle s'eſt faicte chez vn grand Druide de ceſte ville, de qui la prudence, les vertus & la doctrine ſignalee l'ont rendu recommandable à iamais dans le Temple de la memoire. Ceſt ancien perſonage ſuit d'ordinaire le Roy en ſes Conſeils, & tient vn grand rang parmi ceux de ſon ordre, de façon qu'il eſt viſité de pluſieurs pour affaires particulieres & publiques qui ſ'agiſſent deuant luy.

Vn iour comme il eſtoit en ſon logis avec quantité de perſonnes ſignalees qui le venoient voir, les vns pour auoir ce bô-heur de l'entretenir & de iouyr de ſon accez, les autres pour autres particulieres affaires

affaires qu'ils auoient, deux Vol-
leurs delibererent d'enleuer de
haute lutte la tapisserie dudit
Druide, c'estoit vne imagination
bien haute & vne conception de
grande entreprise, car la salle & le
logis estoiet tousiours remplis de
quantité d'honorables personnes
qui eussent peu decouurir cecy.
Neantmoins ayât fermé les yeux
à toutes les considerations, & à ce
qui en pouuoit arriuer de sinistre,
ils entrent impudemment avec
deux Volleuts dans la salle dudit
Druide, pendant qu'il estoit luy
mesme en son Cabinet avec ses
gés ou il traittoit de ce qui passoit
en Cour, & sans rougir deuant
tant de monde qui les regardoit,
à quatre ou cinq charges ils enle-
uerent ladite tapisserie sans autre
forme de procez, & personne ne
les arresta iamais, car tous ceux qui

se promenoient dans ladite Salle ne se doutoient pasqu'on eust peu voir de si impudens personages au monde, ils s'imaginoient que c'estoit ledit Tapissier dudit Druide qui emportoit ladite tapisserie: mais ils furent bien esloignez de leur imagination, car lors que le Druide eut traité avec ceux qui estoient entrez en son cabinet, & qu'il eut veu sa tapisserie emportee, il demanda si son tapissier estoit venu en son logis, quelques vns luy respondirét qu'ils l'auoiér veu, il laissa donc ceste pensee quelque peu de temps, car il croyoit qu'il y eust quelque chose à refaire ausdires tapisseries, & que son homme l'eust enleuee pour y traualler. Mais comme trois iours apres on alla chez le tapissier pour voir si la tapisserie estoit raccommodee, on trouua qu'il ny

auoit aucunement songé, & que les volleurs l'auoient emportee, ce qu'estant recogneu pour vray, on commence à faire des enquestes de tous costez, & ainsi que les domestiques dudit Druide alloiér dās la Halle pour en trouuer quelque nouuelle, ils rencontrèrent les Drolles qui vendoient ladite tapisserie à vn Frippier, & que le marché estoit fait; incontinent on les faist au collet & les mena on en prison, ou apres auoir esté apprehendez, ils cōfesserent le rapt, & deliura-on ladite tapisserie à son premier Maistre, eux par arrest de la Cour furent condamnez aux Galleres perpetuelles pour vne si grande & si impudente effrôterie.

*De la plaisanterie qui se fit dans le Pré
aux Clercs, a l'endroit de dix ou
douze Bourgeois de Paris.*

CHAP. XXIII.

LEs Parisiens, entre tous ceux qui demeurent dans l'enclos de la Gaule Celtique, aiment grandement la liberté, & sont bien aises de sortir de leur ville pour prendre l'air des champs & se retirer de la foule & du concours ordinaire du peuple qui aborde de iour à autre dans ladite ville: outre que demeurer tousiours dans vn air grossier & impur c'est s'acquiescer de mauuaises humeurs, & ne se soucier beaucoup de sa santé.

C'est pourquoy plusieurs ont pris plaisir de se bastir des maisons aux champs, afin de se diuertir quelques fois & prendre quel-

Pre
eux
los
ent
bié
our
re-
or-
de
tre
vn
ac-
, &
té.
ont
ai-
er-
el-
que heure de relasche de tant d'affaires qui leur sont comme iournalieres : voila la raison seule pour laquelle on voit és enuiron de Paris tant de beaux lieux & de superbes bastimens que les Bourgeois ont faict esleuer à diuers temps.

Or il estoit expedient que le peuple se ressentist en quelque chose de cecy, & si leurs moyens ne leur permettent point d'auoir des maisons aupres de Paris où ils se puissent égayer en leur particulier, que le public soignast pour eux en general: & ainsi le Pré aux Clercs fut destiné de l'Vniuersité & de la Ville pour le menu peuple, afin de luy donner moyen de prendre l'air, & se garantir des incommoditez & maladies qu'il peut puiser dans le fatras de la Ville.

Ceste place est située en fort bel air, bordée d'un costé du fleuve de Seine, & de l'autre d'un petit costau où l'estenduë est agreable, diuersifiée & qui apporte du contentement à ceux qui y vont faire leur promenade : là le iour des Festes se retrouve vn nombre infiny de tout sexe qui s'y va esgayer, de sorte que quand ie contemple ceste place, il me semble voir les champs Elisiens, tant la diuersité y est admirable : car tout ce que les Poëtes nous racontent de ces lieux se trouue avec bien plus dauantage en ceste place : on y voit toutes sortes de ieux & exercices, où les Citoyens de Paris y prennent d'honnestes recreations & passe-temps : & tout ainsi que le peuple s'y diuersifie en qualité & humeurs, aussi les exercices que l'on y voit sont-ils dif-

ferens en soy & dissemblables.

Entr'autres choses le jeu de la bouley est fort commun, en ceste recreation s'exercent plusieurs des Citoyens quand ils s'y vont promener, & mesme ceux qui sont de haute qualité sont bien aises quelques fois de passer le temps à cest exercice, comme estant honneste & remply de ioyeux entretiens.

Or il arriua vn iour, comme ceste vaste estenduë est le promenoir ordinaire des Parisiës, & qu'il y a vn grand concours de peuple, qu'un Auant-coureur du Pont-Neuf, qui peut estre n'auoit fait aucun trafic ce iour là, vint se promener dás les allees dudit Prè aux clerks avec les autres pour rascher à gagner son soupper, il alla donc de to⁹ costez dás les allees au près de l'eau, où pour lors il y auoit

quantité de ieunesse qui se bai-
gnoit , là il fit tous les efforts
d'attrapper quelque habillement
& se saisir de quelque manteau,
mais il trouua qu'on y faisoit si bô-
ne garde qu'il n'espera de pouuoir
faire son profit de ce costé là , il se
faschoit pourtant infinimēt de ce
qu'il voyoit de si bons butins , &
qu'il n'y pouuoit mettre la main,
s'il les eust peu aussi bien piller
d'effect, comme il les pilloit des
yeux , & d'une vaine esperance
de les emporter, cela luy eust ap-
porté vn grand contentemēt, mais
il estoit comme les chiens qui cou-
rent le Cerf, qui pensans ietter la
dent sur leur venaison ne boient
que le vent & se repaissent d'esper-
ance, car toutes les industries
qu'il y peut apporter ne seruiroient
de rien.

En fin de desesperé de ne pouuoir

mettre à chef aucune entreprise, il rebrousse chemin & vint faire sa promenade le long de la grande allée qui s'estend depuis le commencement du Pré aux Clercs, du costé de l'hostel de la Royne Marguerite, iusqu'au bout de la Prairie: là il suiuit long temps vn certain Villageois qui estoit nouuellement arriué de Brie, mesme il s'accosta de luy & l'entretint quelque temps, & desia il conceuoit vne bonne esperance de son entreprise, & croyoit qu'il pourroit attraper quelque chose dudit Villageois, mais comme ils se promenoient par ensemble, sans que ledit Villageois se doutast aucunement du tour que l'autre luy vouloit iouer, il arriua de fortune qu'vn certain de Brie vint à faire ré-contre dudit Villageois, & le reconnoissant le mena avec soy: cela

penſa faire deſeſperer le Volleur, qui croyoit deſia auoir priſe ſur ſon homme, & ſ'imaginoit que ſa iournee eſtoit faiçte, tant il auoit imprimé vne bonne eſperance du proceder dont il auoit vſé à l'endroit dudit villageois.

Il tourne alors dans les allees qui ſont du coſté de l'hospital de la Charité, où il vit diuerſes ſortes de perſonnes, mais il ne trouuoit aucun ſubieçt pour l'arreſter plus long-temps en ceſte place: il pouſſe ſa fortune, & voyant de loing vne bande de Bourgeois qui ioüoient à la boule (comme ceſte façon de ioüer eſt vne des plus honneſtes recreations qui ſoit maintenant en vigueur), il s'approche d'eux & les contempla long temps ioüer, eſperant qu'à la fin de leur ieu il commenceroit le ſien. Comme il eut eſté quelque temps à les regarder,

il aduint q; quelques-vns d'iceux perdirent la partie, où il s'agissoit du gousté, alors chacun se prepara pour s'en aller, on dōne le rendez-vous de la troupe, qui estoit bien au nombre de douze personnes, dans le Faux-bourg S. Germain, à l'une des grosses & fameuses hostelleries qui soit dans ledit Faux-bourg.

Le Volleur qui auoit entendu tout le complot & leur rendez-vous, & mesme ce qu'ils auoient enuie de gouster, delibera de faire son profit de tout cecy: il part insensiblement deuant eux, & vint premier qu'ils y peussent arriuer, en ladite hostellerie, où il commanda qu'on apprestast le gouster pour douze personnes de qualité, le maistre du logis qui croyoit que cest homme fust depute vers luy pour faire vistement ses apprests

se mit aussi tost en besongne, & fit ses preparatifs pour les recevoir au mieux qui lui estoit possible; sur ces entrefaictes la compagnie arrive, il commanda qu'on leur dressast à goustier: c'estoit icy ou le Volleur les attendoit, car comme ils entrerēt dans la cour, Messieurs, dit-il, donnez moy vos manteaux, & montez à la premiere chambre; eux qui ne le cognoissoient pas, & qui croyoient que ce fust le serviteur du logis, luy baillent leurs manteaux & monterent en haut sans autrement se douter de la fallace; qu'il vouloit faire, cecy fait il r'entre dans la cuisine & met les manteaux à cartier, ce pendant on les sert & dresse-on les tables, le goustier s'appreste, ils prennent leurs places & commencerent à se resjouyr, le Volleur les servoit la serviette sur l'espaule, le Mai-

stre du logis croioit qu'il leur appartinst, eux d'autre costé s'imaginoiét qu'il estoit domestique de là dedans. Quád ils eurent gousté, le volleur deuant que partir, voulut en taster comme les autres, il gousté fort bien de ce qui estoit resté, & apres auoir pris s^{on} repas il préd les manteaux les meilleurs, & ayāt choisi le butin qui luy sembloit le plus conuenable, il sortit de l'Hostellerie & s'en alla dans la ville pour se décharger de la prise & de la conqueste qu'il auoit attrapée: Les Bourgeois d'autre costé ayant fait collation & demeuré quelque temps dans ladite Hostellerie à deuiser par ensemble, ils demandent à conter avec l'hoste: ce qu'il fit, il les vint visiter, & apres auoir receu l'argent dont il estoit conuenu avec eux, il prit congé de la compagnie, qui en mesme temps

décendit de la chābre en bas, mais comme ils vinrent à demander leurs manteaux ils se trouuerent grandement esperdus de ne trouuer rien de ce qu'ils cherchoient: l'hoste de son costé demeura le plus estonné, car il croyoit infailiblement que celuy qui auoit emporté tout le butin fust de leur bande, & qu'il appartinst à quelqu'un de leur compagnie; eux d'autre part croyoient que ledit volleur fust du logis & sous la protection de l'hoste: ceste croyance apporta vne grande confusion de part & d'autre: le Maistre del'hostellerie se deschargeoit sur ce qu'il pensoit que le Larron fust venu avec eux, les autres faschez de perdre leurs manteaux se courrouçoient contre luy, & peu s'en fallust qu'ils ne l'outrageassent en son propre logis, tant ils estoient

transportez contre vne fourbe si manifeste, mais on appaisa les plus furieux, de parolles par l'entremise de quelques voisins qui calmerent ceste querelle, non si bien pourtant qu'il n'en soit revssi vn grand procez entre l'vne & l'autre partie, & le tout arriua pour le sujet du larron qui auoit emporté le plus beau & le meilleur de ce qu'il auoit rencontré, & ainsi on doit aujourd'huy bien prendre garde à ce que l'on voit & à ceux qui nous suiuent & qui regardent nos actions.

Des Aduentures du pauvre & miserable Colirias exyle de son Pays, & comme il fut surpris par plusieurs fois.

CHAP. XXV.

COlirias estoit d'une des bonnes familles de la Guyenne, & né d'un pere de qui la vertu luy deuoit seruir de phare & de conduite en ses actions, s'il ne lui eust esté rauy par le commandement ineuitable des Parques qui trament & filent selon leur plaisir les courtes de nos destinees.

Son Pere estant mort il fut donné en charge à son Oncle, qui prit vne entiere autorité sur luy: mais cela ne dura pas long temps, car il relascha ceste seuerité maiestueuse qu'il luy monstroït au commencement, & peu apres il le laissa aller
au

au gré de ses volonte: ainsi font la plupart des tuteurs des enfans d'aujourd'huy, ils ne s'oublient pas de s'accommoder de leur argent, mais s'oublient de faire ce qui est du deuoir de leur charge: voilà ce qui corrompt la ieunesse, côme nous le voyôs de presët, car la plupart, & des peres mesmes, donnët trop de familiarité à leurs enfans, & les laissent exercer librement tout ce que leur dicte leur puissance concupisçue qui ne se peut assez iamais repaistre de ce qu'elle recherche, esperant tousiours plus loing.

Colirias eut vne telle liberté, que vn iour voyât que sôn oncle le vouloit cōtraindre, il voulut aller faire vn voyage à Bordeaux pour voir la ville, il luy desroba vne grande somme de deniers & partit secrettement de sa maison sans estre auë

cunemēt apperceu finon d'vn petit laquais qui reuenoit des chāps où son Oncle l'auoit enuoyé, mais en contr'eschāge il deuoit encourir de grāds hasards comme nous verrons. Le premier lieu où il voulut aller ce fut à Bordeaux, car il auoit enuie de visiter ceste ville il y auoit long temps, pour le recit qu'il en auoit ouy faire estant en son pays: quand il y eut seiourné quelque temps il luy prit vn desir de venir à Paris, estimant n'auoir rien veu s'il n'auoit esté en ladite ville, comme de fait il y a tant de raretez, que ne les point voir c'est ne rien voir du tout. Sur le chemin il vint loger en vne hostellerie qui estoit vn coupe-gorge, & ou d'ordinaire les pauures passans estoient miserablement assassinez, c'estoit en vne ville sise sur le Loire que ie ne veux pas nommer, puis que

i'ay pris ma naissance assez proche de l'enclos d'icelle : cest hôte estoit vn autre Lycaon (Tyran d'Arcadie) qui iadis mangeoit ceux qui venoient loger chez luy.

Licorias sans se douter de l'hôte ny du logis où il se logeoit ce iour, prend sa refection, & de fortune se rencontra avec vn Prestre qui venoit à Paris, ils s'entretenoient du chemin, & comme ils eurent souppé, vn autre Marchand qui venoit d'Orleans, voulut prendre pareillemēt, logis là dedās sās autre soupçon de la perfidie qu'on leur vouloit ioüer, ils souppent & demanderent tous à se coucher, on les conduit tous trois en vne chambre ou il y auoit trois liets, chacun choisit le sien, & se couchēt ayant fermé l'huys de la chambre, mais l'hôte sçauoit comme il le falloir ouurir, car il auoit vne

fausse porte qui respondoit en ladite chambre, & par ou souuentefois ce Licaon cruel & sanguinaire venoit tuer miserablement ses hostes.

Comme la minuit fut sonnee, & que le sommeil eut captiué le sentiment des hommes qui estoient en ladite chambre: l'hoste entre insensiblement par la fausse porte, & vinst en la châtre ou il visite les lits, de fortune Licorias estoit esueillé, & pour le bruit qu'il auoit entendu toute la nuict il ne pouoit dormir, il vit le Maistre du logis avec trois autres qui alloient doucement par la chambre, & qui s'arrestoient au lit prochain, cela le mit en doute de quelque attentat, qu'on auoit sur sa vie, il commença alors de faire semblant de ronfler & de dormir d'un profond sommeil, sentant toutesfois d'e-

stranges pointes en son ame de l'aprehension qu'il auoit imprimee pourvoir à heure induë vn tel preparatif que celuy qui se presentoit à ses yeux.

Ce Tiran apres auoir visité le liét de ses compagnons, il vint au sien ou il mania sa chair pour voir si elle estoit grasse & delicate.

Colirias ne scauoit en ce cas de quelle façon se comporter, car il n'osoit respirer, toutesfois il faisoit séblât de dormir; quādils l'eurent visité ils dirent qu'il n'estoit pas de bonne paste, & que les deux autres estoient de meilleure chair & plus fraische, alors ils allerēt au liét des compagnons de Colirias & massacrerent miserablement le Prestre & le Marchand qui dorment, Colirias fut bien estonné de voir vn tel accidēt, la peur alors s'imprima en son cœur & ne sca-

uoit s'il deuoit s'enfuyr pendant que la porte estoit ouuerte, mais la crainte qu'il auoit qu'on courust apres luy le retenoit comme vn pauvre Promethee attaché dans le Caucaſe de ſon liſt, & rongé au dedans d'un Vautour & d'un ſoupçon eſtrange qui le maiſtriſoit entierement, il n'attendoit ſinon qu'on luy viſt faire le meſme qu'à ſes pauvres compagnons qu'il vintemporter à ſes yeux: ceſte attente luy ſembloit vn ſiecle, & chaque moment vne année, car il n'eſperoit iamais eſchapper de la meſme peine ou il auoit veu ſes compagnons miſerablement reduits, toutesfois l'hoſte luy fut plus miſericordieux qu'aux autres, car ayant diſpoſé des corps de ſes compagnons, il vint à luy & le fit leuer de ſon liſt, & luy ayant pris ſon argent, qui ſe montoit à quatre-vingts dix eſcus

il le conduit par le bas d'une galerie ou il y auoit vne ratiere en forme de pont-leuis, qui par le moye d'une barre de fer qui se couchoit de l'og, venoit à se leuer & abaisser, là fut conduit Corilias, mais comme il marche sur ladite ratiere il tombe à bas & se trouue dans vne rue esloignee & deserte, il fut gradement estonné de se voir reduit en vn si miserable estat & hors d'esperance de pouuoir loger, mais d'autre costé il estoit bié aise ayant veu ses compagnons massacrez & assassinez de la sorte, d'auoir eschappé vn tel danger, & d'auoir euité le fer tranchant de la mort qu'il auoit veu si proche de soy: comme il est dans ceste rue à se lamenter en soy mesme de sa triste fortune, & du malheur ou le destin l'auoit reduit, deux volleurs par cas fortuit vinrent à entendre ses

gemiffemens du bas de la ruë, ils s'approcherent du costé où ils entendoient les sanglots du pauvre Colirias, & l'ayant apperceu en vn coin qui regrettoit sa perte, ils luy demanderent quelle estoit la cause & le subiet de ses plaintes, & pourquoy il estoit si tard en ceste place: il leur respondit, que le Maître de l'hostellerie prochaine l'auoit traité de la sorte, apres luy auoir desrobé le meilleur de son argent; outre ce il leur declara comme on auoit massacré le Prestre & le Marchand qui estoient couchez en la mesme chambre, & qu'il auoit esté ietté d'en haut en ce lieu, eux feignans de le consoler luy dirent, qu'il ne falloit point se consumer en pleurs & en gemiffemens, qu'à la verité le sort luy auoit versé vn grand malheur, mais que la patience

luy deuoit seruir de bouclier contre tant d'infortunes, & qu'au reste s'il vouloit venir avec eux ils rascheroient de luy tesmoigner qu'il ne pleut pas tousiours sur vn bled, & qu'il participeroit à la mesme façon de viure qu'eux mesmes.

Sur ceste promesse il les suit, & fut quelque temps avec eux à attendre à vn coin de ruë sans sçauoir ce qu'ils auoiét enuie de faire, car il ne se pouuoit imaginer qu'il fust avec des Larrons: quand ils eurent attendu long temps & que personne ne passoit, ils prirent vne autre route par le milieu de la ville, & se trouuerent vis à vis d'un puits, vn d'eux voyant le puits, se sentit esmeu de boire & de se rafraischir, mais il n'y auoit que la corde, les seaux n'y estoiet point, il dit alors à Colirias, qu'il falloit qu'il descen-

dist dans ledit puits pour luy apporter de l'eau.

Colirias fut quelque temps à songer & à ruminer en son esprit s'il deuoit descendre dans le puits pour tirer de l'eau à celui qui luy en demandoit, mais il auoit peur qu'estant descendu il eust de la peine à se retirer, ou que peut estre on ne luy iouast de quelque mauuais tour quand il seroit descendu, toutesfois contraint des prieres de l'autre qui l'importunoit d'y entrer, il y va, on le descend au fond du puits; or de fortune comme il est au plus creux & qu'il a desia puisé de l'eau pour l'apporter à son compagnon, la garde va passer (c'estoit au temps qu'on parloit du remuement des rebelles, & des machinations & sousleuemens qu'ils ont fait depuis) les deux Voleurs voyant paroistre les premiers

foldats du guet & de la rōde quitterent la corde qu'ils tenoient & s'enfuyrent, & n'eust esté que Colirias auoit pris pied sur vne pierre qui estoit dans le puits il s'y fust noyé. Si quelqu'un deuoit estre bien estonné, c'estoit le pauvre Colirias, car ayant appelé ses gens & n'ayant eu d'eux aucune respōce, il croyoit qu'ils l'eussent laissé dās le puits expressémēt. La Garde venāt à passer, il prit enuie au Sergēt qui conduisoit la compagnie de se rafraischir & de boire de l'eau du puits (on estimeroit cecy vne pure imagination si ceste Histoire n'estoit pas bien authorisee) il commande à deux de son escoüade de lui tirer de l'eau, ils y vont, & croyās q; le sceau fust au fonds du puits ils le tirent: Colirias qui croioit que ses compagnons le retirassent selon qu'ils luy auoient pro-

mis, saisit aussi-tost la corde & se fist guinder en haut, ceux qui le tiroient firent venir encor deux soldats pour les ayder, disans, qu'il y auoit quelque chose dans le sceau, & qu'il n'auoit accoustumé d'estre si lourd ny si pesant, on tire enfin Colirias dehors; mais peu s'en fallust qu'il ne retombast au fonds, & certes s'il n'eust promptement ietté la main sur l'emboucheure, il eust esté en hazard de ne point sortir, car en mesme temps que les soldats le virent sortir du puits ils prirent tous l'espouuante qui les auoit entierement saisis. Colirias fut bien aise de se voir hors du puits, car il n'esperoit pas en sortir à si bon marché, il fut quelque temps à attendre ses compagnons qui le vinrent enfin retrouver, & luy demanderent comme il estoit sorty.

Cen'estoit rien de routes ces rencontres, Colirias estoit destiné à vne plus grande entreprise: il est à remarquer que quatre ou cinq iours auparauant que Colirias fust arriué en ladite ville, que l'Euesque du Diocese vinst à mourir, & auoient les compagnons de Colirias assisté à son enterrement, où ils auoient remarqué qu'on l'enterroit avec vne Crosse & vn Anneau de grâde valleur: ceste proye les enflammoit à l'attrapper, il y auoit desia 2. iours qu'ils auoient ensemble conspiré de leuer la tombe où ledit Prelat estoit enterré, & de luy desrober l'Anneau & la Crosse qu'ils auoient remarquee à son enterrement (conspiration diabolique s'il en fut iamais) mais ils s'y trouuerent dauantage incitez quand ils furent en la compagnie de Colirias, à qui ils dirent

que necessairement il falloit qu'il les accompagnaſt à vne entrepriſe qu'ils auoient en l'eſprit: Colirias qui euſt eſté bien aiſe d'eſtre hors de leur compagnie, fut contraint de les ſuiure, ils le menerēt dans vne Eglise qui eſt ſur le bord de l'eau où ledit Prelat eſtoit inhumé, & crocheterent la porte avec des ferremens ordinaires à telles perſonnes; la porte ouuerte ils font entrer Colirias dedans l'Eglise & luy monſtrèrent le tombeau, où ils luy dirent qu'il n'y auoit qu'à leuer la pierre de deſſus, & qu'il y auoit vne caue où eſtoit enterré ledit Prelat, & qu'il luy falloit neceſſairemēt apporter la bague & la Croſſe dudit Eueſque, ou qu'il eſtoit en danger de mort.

Colirias plus eſpouuanté de leurs menaces, qu'atrait du gain & du profit qu'il pouoit eſperer de

son vol, voulut leur obtemperer en cecy, ils entrèrent donc dans la Chappelle ou estoit le cercueil dudit Euesque, & avec des ferremens qu'ils auoiēt ils leuerent la pierre qui couuroit l'entree de la caue; icy Colirias se sentit grandement chagē, la peur maistrifa entierement les sens, il n'osoit se resoudre à entrer dans ladite caue, ses compagnons d'autre part le menaçoient de mort, cependant il demeueroit comme suspendu, & n'osoit aduācer ny reculer, en fin le commandement de ses associez tant de fois reïteré, eut le pouuoir sur luy de le faire entrer dedans, apres auoir long temps contesté avec la crainte, l'entree d'un lieu si obscur & si ombrageux, estant descendu au fōds de la caue, il porta ses mains sacrileges sur le cercueil de ce Prelat, & enleua la plāche qui le cou-

uroit, En quoy on peut voir facilement combien il est dangereux de s'associer de mauuaise compagnie, car cela nous fait porter à des choses que nous reietterions de nostre conception.

Colirias ayant pris la crosse & la bague vint retrouver ses compagnons qui l'attendoient de pied ferme sur l'emboucheure du Sepulchre, il leur dit que pour la crosse il l'auoit apportee, mais que pour la bague elle n'estoit point dās le cercueil (il vouloit par ceste fourbe garder l'Anneau pour luy, & se recompenser de l'argent que son premier hoste luy auoit vollé) eux d'autre part qui auoient assisté à l'enterrement, & qui sçauoiēt assurement que ledit Anneau auoit esté enclos dans le cercueil, luy respondirent, qu'infailiblement il y estoit, & qu'il falloit
retour-

retourner pour la secóde fois afin de l'attrapper, adioustant à ces parolles des menaces excessiues, ce qui contraignit Colirias de descé- dre pour la seconde fois, affin d'a- uoir loisir de songer à ce qu'il de- uoit faire, ou de retenir ledit An- neau, ou de leur donner, comme il est entré, voicy que deux hom- mes vinrét à passer aupres de ladi- te Eglise, & la voyant ouuertes'a- resterentquelquetemps pourvoir ce qu'il y auoit dedans, les Vol- leurs ayans apperceu cecy abais- serent tout doucement la pierre, & reftermerent le sepulchre. Lico- rias alors pensa mourir de peur & de desplaisir de se voir enfermé la dedans, les volleurs cependant auoient pris la fuitte, Corílias n'eust sceu leuer la pierre tant elle estoit pesante & massiue, il fut la dedans isques au matin que le

T

Peuple ayant reconnu que la pierre auoit esté remuée, ouurit le Sepulchre & trouua le voleur dedans qui confessa tout le fait comme nous l'auons raconté des le commencement de ceste Histoire.

*De la drollerie qui se fit en la rue de saint
Denis cependant qu'on volloit vn
Marchand de ladicte rue.*

CHAP. XXVI.

Bien que l'homme soit fertile en conceptions, & que par le moyen de ceste raison qui domine en sa partie superieure, il ait vn grand ascendant sur les choses que nous voyons icy bas, toutes fois on a tousiours remarqué que ceux qui voysinent dauantage le midy, & qui tirent du costé de la ligne

equinoctiale, seblent auoir quelque prerogatiue par dessus les autres: & certes si nous en voulons rechercher la cause Naturelle, nous trouuerons que comme la chaleur est plus excessiue & domine avec bien plus de vigueur en ces carrieres là, que par mesme moyen le sang se cuit avec plus d'ardeur, & y est plus pur: de ceste pureté naist & prouient l'agilité des esprits, & le mouuement, tant de l'ame que des organes du corps. Et ainsi on remarque que les Italiens sont plus desliez que les François, & les Gascons plus subtils que les Picards. Bien que quelques-uns ayent voulu soustenir que les Parisiens entre tous ceux de la France soient les plus desliez, & d'un plus profond iugement; mais de dire que le vulgaire soit doüé de ceste subtilité qui se peut remarquer parmy

les autres peuples, qui voysinent le Midy: le contraire se peut voir tous les iours, & principalement parmy les Gascons gens d'esprit, desliez & corrompus s'il y en a en France.

Je dis cecy pour ce que l'Histoire que ie decris en ce Chapitre fut prattiquee par deux bons compagnons dudit pays qui estoient venus à Paris pour la sollicitation de quelque procez: ce qui se passa de la sorte.

Il y auoit vn different à terminer entre deux habitans de Thoulouse, & deux autres Marchands des pays circonuoisins, qui fut lóg temps au Parlement de ladite Ville; mais les Marchands firent tant qu'ils euocquerent le procez qui estoit en ladite Cour pour le rapporter au Conseil du Roy, fondez sur ce pretexte, sçauoir est que

lesdits Citoyens de Thoulouse auoient beaucoup de parens dās la Chambre où s'agissoit leur cause. Ce qui leur fut accordé, sur ceci ils enuoyēt deux sollicitateurs de procez, vn pour chaque partie affin de faire leurs affaires vn peu plus seurement, enquoy la Gascogne se peut vāter par dessus toutes les autres Prouinces, car tout leur but & leur vie ne respire que par les procez, & ne pourroient pas viure autrement.

Or pour entrer dans le commencement de ceste Histoire, nos Facteurs estāns à Paris, ils se virent fort souuent, & se mocquoient des parties qui les auoiet enuoyez exprez pour solliciter leurs affaires, despensant tous les iours leur argent aux rauernes & hostelleries, outre l'ordinaire des gens de ce pays qui sont fort sobres : mais

grandement ataricieux. Cecy duraquelque temps ou tous les iours ils se consommoient en jeux, promenades, banquets & autres plaisirs au lieu de faire ce qui leur estoitenioint & recômâdé par leurs parties ; mais enfin le bon temps ne dure pas tousiours, apres auoir despencé tout leur argent, & employé la pluspart des commoditez qu'ils auoiét à Paris, il fallut trouuer vn autre expedient pour viure & pour passer ioyeusement le téps comme ils auoient commencé, car quand on a imbu vne façon de faire, & que par l'espace de quelque mois on s'est reuestu d'une coustume qui s'est enracinee en nostre ame, il est bien difficile de s'en dépestrer & de s'en faire quitte. Nos solliciteurs d'oc apres auoir desployé toute leur finesse pour auoir de l'argent, tantost par l'in-

telligence qu'ils auoient avec le
messager de Thoulouse, tantost
par le moyen d'une fausse lettre
de change qu'ils supposoient, &
qu'ils ne sçauoient plus (comme
on dit) de quel bois faire fiesche,
ils deliberent puis qu'il n'y auoit
moyen d'en auoir autrement, de
se mettre à suiure les tireurs de lai-
ne, en quoy l'Vniuersité est tous-
jours garnie, principalement es
enuirons de la saint Remy, &
quand les Escoliers reuiennent du
pays, ils passerent bien quinze
iours dans l'enclos de l'Vniuersité
à roder de costé & d'autre, pen-
dant lequel temps ils firent diuers
vols, principalement entre l'Egli-
se saint Estienne du Mont & saint
Estienne des Grecs, mesme il y eust
vn iour de grands massacres ou as-
sisterent nos Facteurs, & ou ils
tenoient le premier rang; mais

ayans veu qu'on en faisoit recherche, ils gaignerent au pied, & s'enfuirēt hors de la Ville, affin d'euitter la prise qu'on eust peu faire de leurs personnes si on les eust rencontré.

Le bruit estant passé ils reuinrent, où plus que deuant ils firent des vols, pilleries & extorsions inouyes, mais tout cecy se faisoit si secrettement qu'on n'en pouuoit iamais couvrir les auteurs.

Vn iour ils s'associerent de deux autres volleurs, & ayāt sçeu qu'un certain Marchand de la rue sainct Denis, appelé Giraldin, estoit allé en vne sienne maison qu'il auoit à deux lieües de Paris, pour prendre l'air, & se rafraischir pendant les grandes chaleurs de l'Esté, ils y vont de nuit, & prirent diuerses sortes d'instrumens, comme Luts, Violes, & Hautbois, s'estant iour-

nellement garnis des ferremens necessaires pour crocheter & ouvrir la porte du logis dudit Marchand.

Mais pour executer ceste entreprise, ils trouuerent que leur nombre deuoit estre plus grand, ils prirent donc deux autres voleurs avec eux & vinrent de nuit à la porte dudit Marchand, ou on commença à entendre vn concert emmiellé de Musique, & vn meslage agreable de Haut-bois, Luts, Violles & de voix, de façon que tout le monde des enuirs estoit ravi.

Pendant ces chants harmonieux on crochette la porte & ouvre-on l'huis. Les voisins croyoient infailliblement que Giraldin fust de retour, & qu'on luy vinst faire ceste aubade à cause d'une fille qui estoit preste à marier, & qui mesme estoit desia presque accordee, on

ne se fust point douté qu'on l'eust dérobé de la façon, cependât deux montent à la chambre, rompēt vn Buffet ou il y auoit vne grande somme de deniers qu'ils mirent de costé, de là ils descendent en la caue, & apportèrent du vin aux Musiciens qui estoient à la porte.

Les voisins voyoient tout cecy à leurs yeux (car l'harmonieuse melodie de leurs instrumēs en auoit éueillé la plus part) & toutes fois ils furēt to⁹ tellement trôpez que pas vn ne se douta iamais de ceste fourbe; apres que ces Messieurs eurent beu ils recommencerent leurs concerts, & a reiouër comme aupara-
uant, tandis les facteurs estoient en la chambre, qui prirent toute la Vaiselle d'argent, & les deniers qu'ils auoient mis à part: ainsi apres s'estre resiouy aux despēs du Marchand, ils se chargerent tous

qui de drap, qui de serge, qui de
vaisselle: bref chacun s'estoit saisi
de quelque bonne piece: toutce-
cy fait & prattiqué, ils quitterent
la place, & ayant refermé le logis,
ils sortirent tous & reuinrent pour
passer par dessus le Pont Neuf ou
pour lors il y auoit vne grande
quâtité de volleurs qui rodoient
aux enuirs, quand ils virent les
premiers de ceste troupe, ils s'at-
taquerent à eux (car ils n'alloient
pas tous ensemble) & les voyant
chargez resolurent de les déchar-
ger, on cōmence à se battre, ceux
qui estoient derriere accoururent,
& recognoissans quelques vns de
ceux qui les arrestoient, ils se don-
nerent à cognoistre & eurent li-
bre passage à cause seulement des
facteurs Gascons qui estoient con-
ducteurs de la troupe, & qui de-
puis peus estoient enroollez en la

compagnie des volleurs, mais cōme ils furent passez le Cheual de bronze, peu s'en fallut qu'ils ne furent tous saisis, car le Cheualier du Guet passa par là avec grande quantité d'Archers qui prirent l'avant-garde & se saisirent de deux de leur troupe qui alloient devant, & qui s'estoient chargez de draps de serge : au mesme temps ceux qui marchoiēt apres eux ayans recogneu ceste prise, rebrousserent chemin & tournerent par vn autre endroit, ceux cy furent apprehendez, confesserēt le faict, & au bout de huiēt iours ils furent pendus en Greue: leurs compagnons ayans veu cecy prirent la fuitte, & se resolurent puis qu'ils auoiēt de l'argent de s'en seruir en vne occurrence & occasion si opportune, & depuis n'en a-on ouy parler, trop bien sceut on que les

Marchands Gascons & Tholosains
vinrent eux mesmes à Paris pour
solliciter leur procez, n'ayans eu
aucun vent ny aucun bruiet de
leurs sollicitateurs & facteurs.

Mais quand Giraldin reuint des
champs avec toute sa famille, il se
trouua bien esmerueillé de voir
toute sa maison vollee, il s'enque-
ste de ses voisins cōme cest affront
luy auoit esté fait, on luy declara le
tout, & furent bien estonnez de
sçauoir comme il auoit esté si sub-
tilement vollé; on en fit quelques
enquestes, mais lesvolleurs auoiet
pris le meilleur pour eux, car ils ne
s'estoient fiez qu'à leurs iambes.

*De la vie prodigieuse de Veron, Com-
piegnois, des massacres estranges
qu'il fit, & comme il fut pris.*

CHAP. XXVII.

AV lieu où la Riviere d'Oize
& la Riviere d'Ene se ioignent
ensemble, afin de venir d'une pa-
reille course perdre leur nom dās
la Seine, surgit une belle & gaillar-
deville nommee Compiègne, pla-
ce assez renommee pour son anti-
quité, elle fut bastie par Charles le
Chauue, c'est d'où vient son nom
de *Carlopolis*. Ceste ville a toutes
les commoditez qu'on peut desi-
rer en une place, car premieremēt
l'air y est tres-bō, l'aspect agreable
& le seiour plaisant; d'un costé elle
est arrousee du fleuve d'Oize, qui
la separe d'une grande & spa-
tieuse prairie, bordee d'une coste

fertille en vins, & fecode en bleds; de l'autre à demie lieuë elle a vne large & immense forest, ou se retrouuent les plus beaux arbres de France: ceste forest leur apporte vn trafic inexplicable en la ville de Paris, car de là on tire la pluspart du bois qui vient en ladite ville, nō seulement pour le chauffage, mais aussi pour le bastimēt des maisons qui s'y esleuent tous les iours.

Les Rois prennent plaisir quelquesfois à passer le temps dans ceste ville, pour l'agreable diuertissement qu'ils ont à la chasse des environs, & principalement dans la susdite forest, qu'on peut à iuste tiltre nommer vne des plus belles de France.

C'estoit dans ceste forest & aux environs ou Verō a fait de grands vols & pilleries, iusques là mesme que comme vn autre Anthee, il ra-

uageoit tout le pays circonuoisin,
& n'osoit on se trouuer en sa pre-
sence tant il estoit cruel & barba-
re, mais deuant que de parler des
actes estranges qu'il a fait durant
sa vie, il n'est pas mal à propos de
toucher vn mot de son origine &
extraction.

Quelquesfois nos parens nous
perdent, & sous le faux semblant
d'vne affection superficielle qu'ils
nous tesmoignent, ils sont cause
que le plus souuent nous nous iet-
tons à bride abbatuë dans le vice,
& nous laissons raurir au gré de nos
propres passions.

Veron estoit d'vne des meil-
leures familles de Compiègne,
homme dès le commencement de
son aage peu craignant Dieu, &
addonné à toutes ses libertez, tou-
tesfois à cause qu'il estoit né de
parens assez honnestes il trouua
vn bon

vn bon party dás ladire ville, mais
 hélas! depuis que nous quittons
 Dieu, Dieu nous quitte, & laisse
 aller toutes nos affaires au declin.
 Pluſtoſt Veron n'eust la iouyſſance
 de ſes biens qu'il commença, non
 ſeulement à tourmenter ſa femme,
 ains à vendre & engager tout ſon
 bien pour aſſouuir la cupidité in-
 fame qu'il auoit d'eſtre touſiours
 parmy les tauernes & cabarets: ceſ-
 te forme de vie ne dura pas long
 téps, l'yurongnerie eſt vn labirin-
 the, d'où ceux qui s'y abisment ne
 ſe peuuent retirer quád ils veulét,
 & bien ſouuent enſeuellissent dans
 ces lieux vne grande partie de
 leurs biens, & conſomment meſ-
 mes iuſques aux choſes qui leur
 ſont les plus neceſſaires.

Quand Veron eut paſſé quel-
 ques années en ceſt eſtat, il ſe trou-
 ua deſpoüillé de routes ſortes de

commoditez, iusques là mesme que les parens de sa femme levoulurent faire separer pour les indignitez qu'il luy faisoit iournellement, & mesme son impudence & effronterie insatiable le porta iusques à ce qu'il luy prit ses habits, bagues, argenteries & ioyaux pour obeyr aux appetits de son ventre, & contenter ses sens: ce proceder sembloit bié indigeste à sa femme, qui estant encore fort ieune, se falchoit de se voir captiuee & maistrisee de la sorte,

Toutes les remonstrances que ses parens luy peurent faire ne seruirent de rien en son endroit & furent inutiles, il estoit trop tard de plier cest arbre qui s'estoit desia mutilé dans son escorce.

Deslors il mesprisa tous les bons aduis qu'on luy donnoit, & commença à courir dans les bois, estât

quelquesfois plus de huiet iours
sans retourner en son logis, de ma-
niere que souuēt on le tenoit pour
mort pour la longue absence qui
le retenoit dehors: on n'entendoit
parler que de volleurs dans ladite
forest, & pas vn Marchand n'y o-
soit passer avec hardiesse qu'il ne
fust destroussé, tantost il estoit du
costé de Pierrefonds, tantost il e-
stoit du costé de la Verberie, il n'y
auoit taniere dans la forest qu'il
ne sceust, quelquesfois il se iettoit
à la cāpagne & voltrigeoir de l'au-
tre costé de l'eau, aux enuirs de
Venette, Remy & lieux circonuoi-
sins, & le plus souuent on s'eston-
noit qu'ayāt fait vn coup ou quel-
que massacre en vn endroit, trois
heures apres on le trouuoit à six
lieues de là.

Cest homme estoit grand, robu-
ste & alegre, estoit vn autre reiet-

ton d'Hercule tât il auoit les nerfs
roides & forts, iusques là mesme
qu'on luy a veu faire des actes d'ot
on n'auoit iamais ouy parler. Vn
iour comme on le poursuiuoit d'as
la ville pour le prendre & tirer rai-
son de ses deportemens, il se ietta
du Pont en la Riuere à l'endroit
ou descendent les batteaux, en la-
quelle place l'eau est grandement
rapide, & va mesme d'une telle
impetuosité, que quand bien vn
homme ne scauroit nager, l'eau le
portera vn demy quart de lieuë
sans qu'il soit besoin de se remuer.
Veron se iette là dedans, (& ce qui
n'auoit iamais esté veu) il eut vne
telle force qu'il remonta le quay,
nonobstant la rapidité de la riuie-
re. Ceste action fut admiree com-
me d'un homme le plus fort qu'on
eust iamais remarqué.

Les bois estoient sa demeure or-

dinaire, il y couchoit to⁹ les iours, & bien souuent on leuoyoit sur vn arbre avec vne harquebuze qui guettoit les passans & les attédoit au piege, au dessus de Choisy au bacil auoit vne ranniere, il tua vn iour six Marchands qui reuenoiét d'une prochaine foire, bref tous les enuirs trembloiét au bruiet de ses cruautéz; luy au contraire quand il s'estoit remplumé il retournoit dans Compiègne, & personne ne l'eust osé affronter, car il faisoit tousiours les affaires si secrettemēt, qu'il estoit impossible de trouuer tesmoins ou preuue suffisante contre luy, mais voicy le commencement de son malheur.

Il arriua és enuirs de l'an mil six cens neuf, au temps que la France estoit calme & tranquille sous les Zephirs d'une paix heureuse, q;

comme la coustume est dans le

Royaume de s'entretenir en ieux honnestes & agreables: le prix general de l'harquebuze se fit à Cōpiegne, où de tous les costez des Prouinces de France arriuerent des Deputez pour tirer & tascher d'emporter quelq; chose du prix. Ceste coustume est tres-loüable, car par ce moyen on ne laisse point abastardir les exercices de la guerre, ains on s'y entretient sans toutesfois grande peine. Le iour estant donné qu'il falloit fournir au prix de l'harquebuse, & que chacun y deuoit contribuer: Veron comme estant vn homme qui vouloit paroistre, & qui se trouuoit d'ordinaire dans les compagnies, ne voulut laisser eschapper ceste occasion, ains il delibera d'estre de la partie, mais ce qui estoit de plus important pour luy, il n'auoit alors aucun argent, & pas vn

de ses parés ne luy en vouloit prester, car on sçauoit trop bien sa façon de faire, si est. ce pourtāt qu'à tort ou à droict il s'efforça d'en auoir, car on se fust mocqué de luy s'il n'eust paru dans le ieu de l'harquebuse en vne occasion si remarquable. Ainsi voyant que d'autre part il ne pouuoit auoir d'argent, il se mit en l'esprit d'en auoir par vne voye illicite.

Or il est à noter qu'à vn quart de lieuë de la ville de Compiègne sur le bord du bois où est le grand chemin de Soissons, est vn petit Hermitage appelé la Croix du S. Signe, où de tout temps il y a de bons hermites qui venoient mander leur pain dans la ville, mesme il y a vne fort belle Chappelle où plusieurs s'arrestent en passant pour prier Dieu.

Dans ceste Hermitage demeure

roient pour lors deux bons Peres, vn desquels se nommoit Frere Claude, l'autre ie ne sçay pas son nom: Or Veron auoit accoustumé le plus souuēt de venir coucher là dedans apres auoir couru dans le bois, où il faisoit séblât de chasser, ces bons Peres le receuoient à toutes heures qu'il venoit frapper à la porte, & mesme luy donnoient de ce peu qu'ils auoient recueilly par la ville, & deux ans auparauant qu'o eust parlé du jeu de l'harquebuzé, ny du grand prix, il hantoit là dedans, de façon que nonobstant tous les bruiets qu'on entendoit de luy, ces bons Hermites ne s'en espouuantoient aucunemēt, & ne laissoient pourtant de le recevoir toutesfois & quantes qu'il luy plaisoit de venir coucher en leur Hermitage.

Mais le trop d'accez les perdit,

car comme il hantoit souuent là dedàs il recogneut que l'un & l'autre auoient de l'argent caché en quelque part, il n'eust pourtant voulu leur faire mal, car bien qu'il fust cruel & sanguinaire, encore portoit-il tousiours quelque respect à ces bons Peres: mais enfin se voyant pressé d'argent & ne sçachât de quel bois faire fleche, parce que huit iours apres il deuoit contribuer au grand prix ou on faisoit vne grande despence, parce qu'il y auoit quantité d'argenterie & autres belles pieces, il delibera de voller les Hermites & de leur emporter leur argent, mais il ne sçauoit par quelle inuention y proceder que persóne ne s'en doutast, voicy ce qu'il fit.

Vn soir sur les 8. heures (c'estoit aux enuirs de la Pentecoste que les iours estoient grâds) comme il

voulut sortir de la ville il demâde à deux diuerſes perſonnes quelle heure il eſtoit, on luy dit qu'il eſtoit huit heures, il tourne auſſi toſt par vne petite ruë pour gagner la porte, fit telle diligence qu'il ne fut pas demy quart d'heure en chemin, il entre dans l'Hermitage où perſonne toutesfois ne le vit, eſtant là dedâs il ſ'adreſſe au plus vieil des deux Hermites (car l'autre eſtoit allé tirer de l'eau en vn puits qui eſtoit proche de là) il luy demanda la bourſe, ce bon Pere croyoit qu'il ſe moquaſt, ne faiſant conte de ce qu'il luy diſoit, mais il fut eſtonné qu'il ſe vit terracé de ce parricide, qui en meſme temps luy donna vn coup de poignard au deſſous de la mammelle droite, l'Hermite ſe voyant frappé luy monſtre l'endroit où eſtoit ſo argët, l'autre redouble ſon coup &

luy enfonce le cœur, de ce coup mourut le bon Pere Hermite sans aucunement crier, car Veron luy tenoit le pied sur la gorge: l'ayant tué il prit l'argent au nombre de deux cens frâcs que ledit Vieillard luy auoit descouuert.

Frere Claude cependant reuint du puits avec vn sceau d'eau, sans se douter de Veró qu'il voyoit debout à la porte de l'Hermitage, car il auoit accoustumé de le voir encore bien plus tard, comme il est entré il void son compagnon par terre, il commence aussi tost à s'escrier, mais Veron luy vint d'un visage enflammé donner vn coup de poignard dans le sein, & le coucha à demy mort & sanglottât par terre, & iamais il ne dit que ces mots: *Ah Veron tu me tues!* est il possible que ma vieillesse ne puisse arrester la fureur qui bouillonne

en ton ame ? Ces paroles pourtant n'empeschèrent pas ce Tyran (ainsi le doit-on nommer, puis qu'il se prit à deux si bons & si religieux personnages,) qu'il ne luy perçast le cœur du second coup.

Ce massacre, ains plustost ce sacrilege estant fait il se donna le loisir d'allumer deux torches qui estoient dans la Chappelle & les estendit tous deux l'une cōtre l'autre, plaçant lesdites torches à leurs pieds : de là s'estant chargé de leur argēt il referma la porte, puis jetta les clefs au milieu des chāps, & reuint à Compiegne, & ce qui est de plus admirable, il fit tout ce massacre en vn quart d'heure, de çon qu'il estoit de retour dans la ville à huit heures & demie, sans que personne l'eust apperceu, sinō vn ieune garçon de Boulanger qui reuenant des bois en passant

assez proche dudit Hermitage entendit vn de ces bons Peres qui disoit, *Veron que fais-tu tu me tues.*

Or afin qu'on ne se doutast qu'il eust fait le coup, il vint trouuer les mesmes personnes à qui il auoit demandé il y auoit demie heure, quelle heure il estoit, & leur vint faire la mesme demande, on luy respondit qu'il estoit huiet heures & demie. Or Veron faisoit cecy afin de tirer acte comme au temps de ceste execution il auoit esté dans la ville & n'estoit point sorti, iouxte qu'il s'en vouloit seruir en temps & lieu, si de fortune on le venoit accuser de cest assassinat.

Toute ceste tragedie s'estant passée de la sorte, il retourne en flagranté en son logis, sans toutesfois aduertir sa femme de l'acte perfide qu'il venoit de commettre: deux iours s'escoulent qu'on ne prit pas

garde autrement aux Hermites qui auoient de coustume de venir tous les iours : Veron ne laissoit pas pourtant d'aller librement par la ville la teste leuee. En fin vn iour que quelques bonnes fēmes estoient allees visiter l'Hermitage elles ne trouuerēt personne pour faire leurs Oraisons , mesme la Chappelle estoit fermee outrel'ordinaire, elles eurent alors vn soupçon , qui toutes fois fut suspendu, en ce que quelques vnes d'icelles dirent que lesdits hermites pourroient estre allez aux champs faire quelque voyage, neantmoins il y en auoit vne entre les autres, qui dit qu'il falloît ouurir la porte, & que peut estre ils estoient malades, ou que quelque accident leur estoit arriué.

Ce conseil fut suiuy , elles firent venir deux hommes exprez

de la ville pour rompre la serrure, qui ayans ietté la porte bas, trouuerét les deux pauvres Hermites estendus par terre, icy vn saisissement general s'imprima au cœur des Bourgeoises de Compiègne, qui demeurèrent comme esperduës de voir vn tel accident deuant leurs yeux, elles visiterét leurs corps, qui commençoiet desia à se corrompre, & virent les playes, qu'ils auoient au cœur, on enuoya aussi tost en la ville, ce bruit vint aux oreilles des Citoyens, qui estonnez d'un tel assassinat allerent voir vn si estrange spectacle, tout le monde y accourut, & y auoit vne si grande foule, & vn si grand concours de peuple, qu'il estoit impossible d'y aborder: Veron y vint parmy les autres Citoyens, & faisoit seblant de regretter la perte de ces bons Peres, maudissant

mesme avec iuremens & execrations ceux qui auoient faict ce meschant acte, ceux disoit-il, sont bien miserables & mal-heureux, qui ont commis vne perfidie si execrable, de tuer de si religieux & deuots personnages, mesme aux derniers iours de leur vie, il faut qu'ils soient grandemēt possedez du Demon, comme il disoit ces paroles, il ne pouuoit si bien palier son fait, qu'on ne recogneust de grands changemens & alterations en son visage; plus il approchoit de l'hermitage, plus il se sentoit esmeu, la crainte se lisoit ouuertement sur son front, ce qui occasionna ceux qui l'accompagnoient de soubçonner quelque chose sur luy, ce soubçon prit encore racine bien dauantage dans le cœur des assistans, quand il fut arriué deuât le corps de ces
pauures

pauures Hermites, car en mesme temps ces cadauers qui estoient comme secs & arides, ayans espanché tout le sang qui estoit dans leurs veines commencerent à ruisseler de tous costez, tout le peuple lors d'une commune voix dit, que necessairement il y auoit quel qu'un en la compagnie qui estoit auteur de la conspiration, puis que les corp en demandoient si apertement vengeance, chacun iettoit les yeux sur Veron, toutes fois par sa mine exterieure il raschoit à reietter hors de soi l'opinion qu'on en auoit desia cōceue, mais sa conscience qui se sentoit broullée au dedans, d'un tel forfait & impieté, ne le laissoit point en repos, ains comme vn Vautour eternal luy becquettoit sans cesse l'esprit, & lui faisoit paroistre des marques certaines en dehors de ce

qu'il couuoit en l'ame, la Iustice y
vinst pour enleuer le corps, ce pé-
dant tous les Bourgeois iettoient
l'œil sur Veron, & le soubçonnoïent
de cest assassinat, comme l'ayât re-
cogneu de tout temps hanter dās
ledit Hermitage, mais on n'eust
osé ouuertement le prendre, par-
ce qu'il n'y auoit aucun tesmoin,
qui peut dire quelque chose de ce
meurtre.

Mais plus va auant, plus on mur-
mure: on ne parle plus que de Ve-
ron, c'est le commun entretien
des Compiegnois, & des compa-
gnies, tous ces discours pourtant
n'empeschent pas qu'il ne se dise
innocent contre ceux qui l'accu-
sent, on fit toutes les recherches
possibles pour trouuer l'auteur
de tel acte, mais on n'en peut tirer
de raison, la coniecture est seule
qui opine cōtre Veron, en fin com-

me on estoit en ces doutes & perplexitez, le garçon d'un Boulâger dont nous auons parlé, vint déposer qu'il auoit entendu à huit heures ou enuiron du soir, l'Hermite qui crioit, *Veron tu me tues.* sur ceste simple déposition, & sur les cōiectures vniuerselles du peuple, qui le deseignoit pour l'executeur de ceste sanglante entreprise: on resolut dans le Cōseil de se saisir de Veron: mais c'estoit la difficulté de trouuer le moyé de l'attrapper sans coup ferir, car s'il en eust eu le moindre vêt, il ne se fust pas arresté dedés Compiègne, (bien qu'il eust dit depuis, qu'il ne se fust jamais imaginé qu'il eust osé prendre sur de si fresles & steriles cōiectures) toutesfois on minuta le iour de la prise & la façon qu'on y debuoit proceder, qui estoit de l'engager à jouer vne partie à la

paume à la main (jeu assez triuial en Picardie) au deuant de la prisõ, & la le saisir. Le iour destiné estant venu on ne manqua de l'alleroir, deux ou trois Bourgeois luy vinrèt demander s'il vouloit prendre quelque peu de recreation , ou jouier vne petite partie : luy qui estoit assez iouial , leur dit qu'il estoit contèt, & certes on n'eust sceu trouuer vn homme plus agile ny plus prompt, & estoit estimé vn des premiers de la ville pour iouër au tripot , Comme il ioüoit deuant la grande porte de la Prison, ceux qui deuoient le prendre, ne manquerent pas de s'y trouuer en grád nombre, en cas de resistance, car il estoit grandement fort & robuste, & les eust tous terracez si on luy eust donné le loisir, ou qu'il se fust mis tant soit peu sur ses gardes. Or comme on est au milieu du ieu

il y eut vn Sergét qui fit rouler insensiblement vne balle dás l'entree de la prison, & pria Veron de la rapporter, il va pour la recueillir, mais il fut estonné qu'il se vit inuesti & faisi de douze ou quinze Satellties, qui de par le Roy luy firent commandement de les suivre: Veron fut bien estonné, quád il se vit pris de la sorte, il pensa enrager de despit, de tous costez il couroit comme vn forcené, avec iuremens & blasphemés execrables, & cherchoit quelque espee ou instrument offensif, & pour le dire avec verité, ceux qui luy mirent la main sur le collet auoient assez peur de l'attaquer, car ils scauoient trop bien de quel bois il se chauffoit; toutesfois nonobstant tous les efforts qu'il peut faire, il demeura prisonnier, & deslors on luy donna les fers aux pieds, & les

menottes aux mains, afin qu'il ne peust faire ce qu'il voudroit.

Cependant on instruit son procez, de tous costez on vient déposer contre luy, sur diuers vols & pilleries, qu'il auoit commises d'as le bois, mais pas vn ne disoit l'auoir veu faire le massacre, & toutesfois c'estoit sur ce point, & pour ce seul subiect qu'il auoit esté arresté prisonnier, il n'y auoit que le garçon du Boulanger, qui disoit, vn tel iour auoir entendu les paroles susdites; luy pour sa deffence mit deux Bourgeois irreprochables en teste, qui affermoient l'auoir veu à huit heures & à huit & demie, adioustant qu'il estoit impossible qu'il eust executé vne telle entreprise en si peu de temps, sur ceste affaire, qui estoit ambigue grandement, il falloit auoir des yeux de Lynx, & toutesfois

celuy qui deuoit iuger vne cause si douteuse, estoit tout nouuellement entréen charge, il n'y auoit que ceste seule consideration qui faschoit Veron, quand on l'excuta, de se voir condamné par ce nouveau Iuge,

Plusieurs Conseillers voyās qu'il n'y auoit aucune preuue suffisante, se deporterēt du iugement, & aymerēt mieux n'y pas assister, que de faire quelque chose qui hazardast leurs consciences, plusieurs mesmes des Citoyens demeurerēt suspendus en ceste cause, & ne scauoit-on que dire, car on ne remarquoit que des apparences, il n'y auoit preuue bastante pour le faire mourir, toutesfois voyant qu'on ne pouuoit tirer autre chose de lui qu'une negatiō generale d'un tel forfait, & que ny la question ordinaire, ny extra-ordinaire n'y ser

uoit de rien , on ne laissa pas sur les apparences qu'il y auoit , & sur les autres actes qu'il auoit fait durant l'espace de cinq & six ans tant dans la Forest qu'aux enuirs de Cöpiegne, qu'il auera, de poursuiure, mesme il fut condamné à estre rompu tout vif. Dieu scait si les ressentimens qu'il eut d'un tel iugement furent grands, car il n'y auoit point d'appel, il falloit passer par là. Cela sembloit bien rude à vn homme de sa qualité, & qui estoit en la fleur de son aage, (cöme luy) on luy bailla vn Confesseur Minime, pour le resoudre à la mort, mais il ne voulut aucunement ouyr parler de mort, car nonobstant qu'il fust iugé, il s'imaginoit qu'il ne mourroit point de ce coup. Mais voyant qu'il n'y auoit plus de respit, on tascha peu à peu à le disposer à ce passage.

Ceste homme auoit vn courage inexplicable, & ne se pouuoit résoudre à mourir à la fleur de ses ans, il calomnioit les Conseillers, dépitait le ciel & la terre: bref il escumoit de rage (s'il faut ainsi parler) & la fureur auoit tellement saisi son ame, qu'il estoit comme hors du sens, & à peine son Confesseur osoit il se presenter deuant luy.

Il se confesse, mais quand on luy venoit à parler de l'assassinat des pauvres Hermites, il rejettoit cela avec iuremens espouuérables, & disoit, qu'à la verité il auoit fait plusieurs vols & pilleries qui estoient cotez sur le papier, mais que pour ce qui regardoit les Hermites il ny auoit iamais songé.

Les Iuges pourtant passerent outre, & fut condamné à estre rompu tout vif au milieu du grand marché de Compiègne, ce

qui fut executé, mais il n'est point hors de raison de dire icy en passant quelque chose de la mort, autant tragique que la vie auoit esté horrible & estrange.

Il fut conduit sur les cinq heures hors de la prison, au lieu destiné pour le supplice, és enuirs de la feste du saint Sacrement, de l'année susdite: ce iour il y auoit dans Compiegne vn tel concours de peuple qui estoit venu expres pour voir ceste execution, qu'il estoit impossible de se remuer dans la place publique. De tout sexe, & de tous costez des enuirs de la ville, le peuple y estoit conflué pour voir ce spectacle. Veronestant arriué sur l'échaffaut qui auoit esté dressé deuant l'Eglise S. Cornille, il fit paroistre des traits de la force & de la vigueur, qui l'animoit au dedans, faisant des ac-

tions presque hors de la commune conception des hommes.

On auoit remarqué durant le temps qu'il estoit en prison, que nonobstant qu'il eust les fers aux pieds, toutesfois il faisoit des sauts & agilitez de corps merueilleusement hardies; icy l'on vit autre chose, car dés l'instant qu'il fut sur l'eschaffaut, il se promena les bras au costé, & fit dix ou douze tours aux enuirs du theatre, avec vn visage qui portoit plustost signe d'vne ame desesperée, que d'un homme bien reconcilié avec Dieu, & qui deuoit auoir apprehension de la mort, la colere luy auoit peint le front d'un vermillon d'effronterie, hardi & assuré: quand on luy voulut lire la Sentence, il l'escouta d'une grauité nonpareille, se relevant la moustache comme vne personne qui se

soucioit peu de la mort, & qui ne croyoit mourir ce iour là, & de fait s'il eust trouué le fer dont on le deuoit rompre, l'executeur de la haute Iustice estoit en hazard de perdre la vie avec plusieurs autres, car il luy faschoit tellement de quitter, si ieune & robuste comme il estoit, le seiour de ceste vie mortelle, qu'il eust fait to⁹ les efforts possibles pour se sauuer de ce coup.

Mais quád en lisant sa sentence, il vinst à entendre qu'il estoit condamné pour auoir tué & assassiné miserablement deux pauvres Hermites, il s'escria par trois fois, & dit tout haut que le Iuge & les Conseillers qui l'auoient condamné en auoient menty, & que iamais il n'y auoit songé.

On auoit fait venir deux hommes expres, pour acheuer son execution, ausquels il dit qu'ils n'ap-

prochassent point de sa personne,
& que iamais on ne le coucheroit
sur la rouë, que de son consente-
ment, & pour monstrier qu'il auoit
vne grande force, il fut veu par
neuf fois consecutiuelement cou-
ché sur l'eschaffaut, & les deux
Bourreaux sur luy, & neantmoins
il eut vne telle force qu'il les rele-
ua par neuf fois, & à chasque coup
qu'il se releuoit il recommençoit
ses promenades, maudissant le
iour qu'il auoit pris son estre, &
vomissant plusieurs autres blas-
phemes contre la Iustice, & prin-
cipalement contre le Iuge duquel
il se faschoit d'estre le premier ap-
prenty, car c'estoit le premier cri-
minel qui s'estoit rencontré en-
tre ses mains, en fin voyant qu'au-
trement il ne se pouuoit eschap-
per, & qu'il falloit de necessité su-
bir le passage de la mort, il s'y reso-

Intrauec grande peine toutesfois;
 car ceste vigoureuse ieunesse ne se
 pouuoit laisser abbattre si tost: on
 le couche sur la Croix, ou il fut rô-
 pu tout vif, ce cœur de bronze qui
 ne se pouuoit fleschir auparauant,
 apres auoir enduré de grands
 maux & des tourmens inexplica-
 bles, songea enfin en soy mesme,
 & appella son Confesseur, auquel
 on tient qu'il declara tout le fait:
 mais oncques on ne sceut tirer au-
 tre chose de luy, il auoit fait ceste
 affaire si secrettement, & avec tant
 de preuoyance, que iamais on n'en
 sceut rien descouurir que par les
 coniectures: ainsi mourut Veron
 en la fleur de ses ans, & pouuoit-
 on dire avec verité ces mots de lui,
 que Virgile profera de Turnus.

*Vitâq; cum gemitu fugit indignata
 sub umbras.*

Car il eut bien de la peine a se

resoudre à la mort, mais le massacre, ou plustost le sacrilege qu'il auoit commis, à l'endroit de si deuots & de si Religieux personnages, deuoit encore estre puny plus griefuement pour l'enormité, & la grandeur du forfait dont il estoit iustement criminalisé & accusé, Voila le sommaire de la vie prodigieuse de Veron, que i'ay bien voulu icy inserer, comme en ayant eu de bons & excellens memoires.

*Du Sieur Polindor qui fut volé sur le
le Pont-neuf, & la façon com-
me il fut attrappé.*

CHAP. XXVIII.

LEs honnestes recreations,
qu'on prend és compagnies
par les entreueuës, ont de tout
têps esté estimees parmi les Fran-
çois. Car c'est en ces lieux ou on
fait voir des apparences & des ar-
gumens asseurez de courtoisies,
car s'il y a nation qui se puisse dire
courtoisie, & auoir vne bienveillâ-
ce naturelle, ouuerte à tous, ce sôt
les François: ceste nation a ie ne
sçay quoy d'entregent, qui la di-
stingue de toutes les autres natiôs
de la terre: mais entre toutes les
Prouinces de la France, les Parisi-
ens partagent en cecy le premier

rang, a tout le moins si quelques vns d'eux ne sont pas portez d'une si grande & ardante affection dans le cœur, ils ont de grands témoignages de bien-veillance, & d'amitié en dehors & à l'exterieur.

Mais entr'eux il y a d'honnestes gens qui ont ceste coustume, de se joindre dix ou douze d'un quartier ensemble, & de s'entrevoir fort souvent, & se traiter l'un l'autre, chacun selon son rang: coustume qui est honneste, & qui entretient plusieurs en amitié.

Suiuant ceste coustume, Polindor fut vn soir prié d'aller souper chez vn de ses amis, qui demouroit dans la rue Daufine, ou pour paroistre d'avantage, il auoit pris vn manteau doublé de panne, comme sa qualité le requeroit, car il estoit Secrétaire du Roy, & de bonne maison, il ne manqua pas de se

trouver au lieu assigné, là on se festoioit en amis, chacun boit à la santé de son compagnon, & la coupe fait la ronde par toute la table à la façon des anciens, de façon qu'on pouuoit dire d'eux, *Vinum & pocula coronant.* Cela se faisoit toutesfois avec tant de bien ueillance & de modestie qu'on n'eust sceu y rien reprendre, il n'est pas quelquesfois deffendu de rire, pourueu que la raison puisse retenir la bride quand il luy plaist, les recreations qu'on prend en telles compagnies, sont honnestes & l'entretien souhaitable.

Les tables estant leuees, apres plusieurs autres deuis, ce qui se pratique ordinairement en telles assemblees & cōpagnies : chacun prit congé de celuy qui les auoit conuié, pour s'en retourner en sō logis, Polindor sort avec son la-

quais, qui de mal-heur n'auoit point amené son cheual, à cause d'un coup qu'il auoit eu à la iambe l'allant abreuer, son maistre le reprit aigrement de cecy, & mesme celuy d'où il venoit souper, luy offrit le sien, tant pour ce qu'il faisoit mauvais temps, que pour la consideration des volleurs, desquels alors on faisoit grande rumeur par la ville: Sa courtoisie toutesfois trop grande en cecy luy fit refuser l'offre qu'on luy faisoit, il part accompagné seulement de son laquais, encor le mal-heur voulut pour lui, que son prochain voisin, qui estoit conuié du mesme lieu pour y venir souper, se trouua malade ce soir, & ne luy tint pas compagnie.

Comme il passe deuant le cheual de Brôze, il vit de loing sous la clarté de son flambeau deux hom-

mes qui se battoient ensemble, cela l'espouuenta, & pésa reculer en arriere, mais il se rassura quand il les vit disputer ensemble & quitter leurs espees: ces deux volleurs faisoient vn grand bruit & contes-toiét entr'eux sur vn papier qu'ils auoient. Polindor voyant qu'il n'y auoit aucune contestation & querelle particuliere entr'eux, passe & poursuit tousiours son chemin, & comme il est à l'endroit d'eux, vn d'iceux se tourne de son costé, & luy dit, Monsieur nous sommes icy en contestation sur vn billet que nous venons de trouuer, ie vous supplie puis que vous auez vn flâbeau de nous esclarcir, mon cōpagnon le veut auoir seul, & moy ie loustiens l'auoir trouué, de façon que ie crois qu'il m'appartiét de droit plustost qu'à luy, Polindor qui estoit courtois de sa

nature, ne pouuoit profiler ceste fourbe ny en descouvrir les enuemenens, il faict donc approcher le flâbeau que portoit son laquais, pendant quoy ces deux volleurs l'investirent avec le pistolet en main qu'ils tenoient caché sous leurs manteaux, luy il prend le billet, & à cause qu'il n'auoit pas la veuë trop bonne il se donna la patience d'atteindre ses lunettes, il ouure & trouue ces mots escrits en grosses lettres.

Il est defendu a toutes personnes de quelle qualité, estat ou condition qu'ils puissent estre, a pied ou a Cheual, de passer icy a dix heures du soir sans quitter le manteau, & en cas de resistance, nous les contraindrons par force.

Polindor se trouua bien estonné de ceste lecture, il auoit commencé à leur lire tout haut iusques au milieu du billet, mais reconnois-

sant que le paquet s'adressoit à luy & qu'il falloit quitter le manteau, il leur ietta le billet par terre & voulut prédre la fuitte, mais les deux Volleurs qui l'auoient inuesty le retinrent, Monsieur, luy dit vn de ces deux, n'entendez vous pas le François ? vous voyez bien à quicela s'adresse, Polindor voulut faire quelque resistance, mais les autres luy presenterent le pistolet dans la gorge, ainsi il fut contraint de quitter le manteau & de s'en retourner en s^{on} logis couuert de la mandille de son laquais, car il pleuuoit grandement, Dieu sçait si le laquais fut bien frotté de n'auoir amené le cheual, car il eust eschappé de ces Volleurs par ce moyen.

*De l'impudence signalée de six Voleurs qui
desroberent le manteau d'un Gentil-
homme en plein iour en la rue saint
Denis.*

CHAP. XXIX.

LEs Poëtes nous racontēt par-
my leurs fables, que Mercure
Dieu des Larrons fit vn iour vn
traict de ses subtilitez par le com-
mandement de Iupiter: ce Dieu
Porte-foudre enflammé d'un a-
mour extraordinaire enuers Io,
ieune Nymphē & admirable en
beauté, qui estoit fille d'Inachus
Roy des Grecs, afin de paruenir
au but de ses desseins, & de iouyr
des beautez plusque diuines q; la
nature auoit prodigué sur ceste
Nymphē, craignant d'autre part
que Iunon jalouse de ses larcins
amoureux, ne vinst à esuêter quel-

ques estincelles de ceste affection, la metamorphosa en Vache, (en quoy les Poëtes ont grandement bien rencôtré, car l'amour illicite nous faict changer d'estre & de nature, & nous transforme en bestes brutes quâd il peut auoir pied sur nous) Iunon toutesfois de qui l'esprit estoit continuellement bourrellé d'un soupçon douteux sur ce subiect, descouurit ceste fourbe, & pour priuer son mary du contentement qu'il prenoit en l'aspect de ceste Nymphé, elle cōmit vn Concierge à ceste feinte Vache, nommé Argus, à qui elle auoit donné cent yeux, de peur qu'on ne luy enleuast sa proye & que Iupiter ne le surprist.

Mais ce Dieu second en inuentions en commit la charge à Mercure, duquel dez long temps il auoit expérimenté les finesses,

Mercure d'oc nonobstant les yeux
d'Argus qui ne se fermoient iamais,
& qui en tout temps faisoient sen-
tinelle sur la Vache que Iunon luy
auoit doné en garde, fit si bien par
ses surprises & se gouuerna avec
tant de subtilitez qu'ayât fraudu-
leusement endormy ledit Argus, il
le tua & luy enleua la Vache qu'il
auoit gardee avec tant de soing.

Quand ie lis ceste fable, i'y voy
totalement dépeinte la nature des
Larrons, qui nō seulement vollēt
& pillent de nuict, mais mesme en
plein iour & aux yeux de tout le
monde, encore quand la nuict fa-
uorise à leurs desseins, & qu'elle
couure leurs entreprises du sōbre
manteau de ses aisles, il semble
q'cela les doit inciter à faire leur
coup, mais en plein iour & deuant
mesme des personnes de qualité
vsr de repressailles, c'estvne gran

HISTOIRE DES
de impudence, & faut nécessaire-
ment auoir imbu vne grande ef-
fronterie pour faire telles actiōs.
Cela s'est pourtant faict depuis
peu & dans Paris mesme, & ce à
l'endroit des gens de qualité & de
maison: l'histoire se passa de ceste
sorte.

Il y auoit vn Gentilhomme de Pi-
cardie qui auoit eu vn procez au
Parlement pour quelque differēd
particulier qui estoit entre luy &
ses voisins, & cōme il estoit sur son
depart il fut recogneu par cinq ou
six coupeurs de bourses qui s'e-
stoient enquis de son logis, la qua-
lité, demeure & extraction: or
ayans sceu le iour qu'il deuoit par-
tir ils vinrēt l'attēdre dans le clois-
tre de S. Innocēt, ce pédāt qu'un
d'eux faisoit le guet pour aduertir
ses compagnons quand il passe-
roit, mais iugeans que ceste lon-

gue attéte leur seroit peuvtile s'ils demeuroient oisifs, comme d'ordinaire plusieurs seruantes s'arrestét à regarder diuerses peintures & images qui se retrouuent dás ce cloistre, il y en eut deux qui perdirent leur chaisne d'argent, & furét bien estonnees de se voir vollees en si peu de réps qu'elles seiournerent dans ledit cloistre; tandis on les vinst aduertir que le Gentilhomme s'estoit arresté sur vn prochain Passementier, & qu'il auoit vn manteau tout neuf chamarré d'or & brodé d'vne riche estoffe.

Leur dessein estoit de le surprendre dans le Fauxbourg, & de l'attirer par finesse ou autrement dás vn lieu qu'ils auoient destiné pour luy voller tout ce qu'il auoit, mais voyans qu'ils ne pouuoient executer ceste entreprise sans vn grád scandalle, ils delibererent de faire

autrement: on le conduit de l'œil iufques deuant l'Eglise de S. Leu, où eftant, deux de ces effrontez luy vinrent prédre la bride de fon cheual & l'arrestent court, luy eftonné de ceste façon de faire leur demande ce qu'ils vouloient, de luy, vnd'eux va répondre puis qu'il estoit sorti de son logis fans payer qu'il estoit plus que raisonnable qu'il le vinst deuancer, le Gentilhomme surpris ne ſçait que dire ſi non qu'il ne luy deuoit rien, l'autre commence à l'importuner & assembler tous les Marchands des enuirs.

Deux autres alors des compagnons de celuy qui tenoit la bride du cheual dudit Gentilhomme, s'approchent feignans de ne cognoiſtre ceux qui arreſtoient le cheual, & leur demâderét ce qu'il y auoit qui les mouuoit à faire vn ſi grand

bruiet, Monsieur disoit celuy qui tenoit la bride, voici vn Gentilhomme qui a logé aujourd'huy & depuis huit iours chez moy, qui toutesfois s'en veut aller s'as payer & a fallu que nous soyons courus apres luy.

Le peuple qui escoutoit cecy, croyoit ce qu'ils disoiēt estre vray. N'est ce pas vn de ces courtisans (respōdit l'autre) il me souuiēt q; l'autre iour il y en eut vn qui me paya de la mesme monnoye en la rüe de S. Martin, il vous luy faut prendre son manteau: comme il disoit cecy arriuerēt les deux derniers, qui s'enquesterent quel bruiet il y auoit, adioustant plusieurs indignitez cōtre le Gentilhomme qu'ils disoiēt auoir veu, & qu'asseurément ce n'estoit qu'un Volleur, sur ces mots ils dirent à celuy qui tenoit la bride de son

cheval puis qu'ils'en estoit fuy sās
payer qu'il deuoit luy prendre son
manteau & se payer de ses propres
mains, que c'estoit le moyé d'estre
payé: ce qui fut plustost executé
que commandé, car en mesme
temps on luy tire le manteau des
espaules, & le pensa-on renuerler
de son cheval tant la furie leur
commandoit; le Gentilhomme
det estoit de se voir surpris si ef-
frontément, & encore en pleine
ruë: & certes ces affrôteurs auoiēt
par leur impudence signalee telle-
ment persuadé leurs discours aux
assistans, que nonobstant toutes
les remōstrances que peut faire le
Gentilhomme, il fut contrainct de
se retirer sans mâteau avec la cour-
te honte, encore le Peuple l'appel-
loit-il imposteur, & peu s'en
fallust qu'on ne courust apres luy:
voila des traicts d'une grāde per-

fidie & d'une impudence signalee
s'il en fut iamais.

Les volleurs sans autre maintien
de crainte d'estre poursuiuis, re-
vinrent le long de la rue S. Denis,
& r'entrerent dans le Cloistre de
S. Innocent, où ils se donnerent
le rendez vous pour retourner en
leur logis ordinaire.

*De l'intention que tiennent les Coup-
peurs de bourses pour se donner le
Rendez-vous en quelque lieu, &
des finesses de Lucromis, Seno-
nois.*

CHAP. XXX.

NOnobstant que la compa-
gnie des Volleurs ne ressen-
te rien de la societé humaine, com-
me estant nourrie parmy toutes
sortes d'infames actions, si est-

ce qu'ils ont erigé des statuts pour se maintenir en leurs limites, & à guise d'une Republique ils ont constitué des loix & des peines pour ceux qui cõtreniendroient à leurs Edicts, loix, constitutions & ordonnances qui ont esté en fin decouvertes par le moyen de leurs associez mesmes, qui ont esté pris & apprehédez par la Iustice. Ainsi Romulus fit vne Republique de brigans, de fugitifs, volleurs & scelerats.

Le plus grand stratageme de telles gens dont ils palient leurs menées & entreprises, c'est d'estre bien couverts, de porter la panne, la soye, le drap d'Espagne, & l'espee qui leur batte tousiours les flancs, car estans accommodez de la façon, si de fortune ils couppét vne bourse, ou qu'ils facent quelque autre acte de rapt ou de pillerie

lerie, on n'ose pas mesmes les regarder ny les attaquer: plusieurs villageois & gens des villes circonuoifins de Paris y ont esté attrappez de la sorte, se trouuans à l'improheu saisis & surpris de leur argent, & toutesfois bié qu'à leurs yeux & deuant eux ils eussent les larrons en face, ils n'osoient leur dire qu'ils les auoient vollé. Le second stratageme dont ils se sont lóg téps soustenus, c'est le secret & le silence qu'ils ont eu grádement en recommandation, iusques là qu'ils se sont laissé donner la torture & la gehenne pour ne vouloir decouurir les secrettes menées, pratiques & cóspirations de leurs cópagnons, toute fois on en a trouué qui n'ont point esté si constans, & qui à la moindre menace se sont laissé emporter, & ont déclaré ce qui se faisoit d'ordinaire en leurs

HISTOIRE DES
assemblees. Le troisieme strata-
game dont ils se sont seruis, a esté
d'assigner à chacun son quartier,
afin que de tous costez qu'on se
peut rencontrer on trouuast tou-
siours quelqu'un d'eux. Vne au-
tre finesse pour se donner le ren-
dez-vous a esté descouuerte de-
puis peu par vn de leur cõpagnie
& assemblee, qui voyant qu'on ne
vuiuoit qu'en crainte parmy eux, &
que demeurer tousiours avec tel-
les gens, c'estoit non seulement
perdre sa reputation & sa renom-
mee, ains se filer vne corde, fit
banqueroute à leur brigade, & de-
clara que lors que leur Capitaine
leura assigné à chacun leur quar-
tier, & qu'il a distribué toutes les
Eglises (car il ne faict cecy que les
bõnes Festes, au rapport de celuy
quia descouuert leurs finesse) ils
ont vne certaine place d'as l'Eglise

qui leur est assignee, où ils mettēt
vne figure quarree faicte en for-
me de dez marquee de tous les co-
stez. Le premier qui vient dans la-
dite Eglise (car c'est en ces lieux,
& principalement les iours des bō-
nes Festes, où se font les coups) il
met & couche le dez sur vn point,
celuy qui vient apres va aussi-tost
en la place assignee, & pour sçauoir
au vray le nombre de ceux qui sōt
en ladite Eglise, de ses compagnōs
il regarde le dez, & l'ayant trouué
sur le premier point il le remet sur
le deux, & la mesme chose prati-
que le troisieme qui arriue, & sic
deinceps, iusques à ce que le nōbre
de stinē soit complet, alors celuy
qui arriue & qui voit que le nom-
bre est parfait sort de l'Eglise & va
en la prochaine, où il obserue la
mesme chose : voila l'inuention
qu'ils ont en leurs rendez-vous.

HISTOIRE DES

Voyons maintenant ce que fit Lucromis, c'estoit vn ieune garçon de vingt ans, natif d'aupres de Sés en Bourgongne, fort lubrique & addonné à ses plaisirs: depuis que ce vice empiete sur nous, il nous redinepres à toutes autres actiōs, il estoit tellement maistrisé de ceste passion amoureuse, qu'aueuglé qu'il est dans les vains obiects de ses amours illicites, il viola la fille d'un gros Laboureur des enuirōs; comme il fut contrainct de l'espouser par les parens de la fille qui le poursuiuirent en Iustice, il prit la fuite & s'en vint à Paris: là il fut quelque temps à viure sur sa bourse, mais n'ayant plus de quoy poursuiure la vie qu'il menoit, il fallut iouer de son reste & vsfer d'autres inuentions.

Vn iour ayant recogneu qu'un Aduocat fort renommé qui de-

meuroit dans la ruë de S. Honoré, estoit allé à Melun pour vne consultation où on l'auoit appellé à cause de la grande experience qu'il auoit aux affaires, ayant descouuert d'autre part qu'il n'y auoit que sa femme en son logis, d'un visage effronté il vient frapper à la porte, on luy ouure & luy fut demandé ce qu'il desiroit, il respondit qu'il vouloit parler à Madaemoiselle d'un affaire de consequence & qui la touchoit de pres, on va aduertir la femme de l'Aduocat qui estoit encore couchee, & deuisoit avec vne de ses sœurs qui l'estoit venuë voir le matin, la Damoiselle dit à sa seruante, qu'elle s'enquist de celuy qui la demandoit, & de ce qu'il desiroit, la seruante luy vint dire que sa Maistresse estoit encore dans le liët, & qu'il l'excusast si pour l'heure elle

ne pouuoit parler à luy, qu'au reste elle le supplioit de lui dire de bouche ce qu'il desiroit.

Lucromis qui recogneut que la Damoiselle n'estoit encore leuee, poursuiuit sa demande avec plus d'instance, conceut vn bon augure de ceste responce; & certes au commencement il doutoit de son proceder & de ce qu'il deuoit faire, mais ayant forcé les limites il delibera de n'ē sortir qu'il ne rapportast ce que son effronterie luy promettoit, il respond impudemment à la seruante, qu'il auoit des affaires d'importance à luy communiquer de la part de son mary, & qu'il falloit necessairement qu'il les luy declarast de bouche, cecy fut rapporté à la femme de l'Advocat, qui ne sçachant que luy vouloit cest effronté, croyāt d'autre part que ce fust quelque nouz

uelle de la part de son mary, dit à la seruâte qu'elle le fist monter, ce qu'elle fit, Lucromis en entrant fait de grandes salüades & reuerces, il regarde & porte ses yeux de tous costez dans la châtre pour voir quelles personnes il y auoit là dedans, on luy apporte vne chaire, il commence effrontément à discourir qu'il auoit veu son mary à Melun, & qu'il se portoit bien, c'est ce que demandoit la Damoiselle, car quand elle entendit qu'il pressoit si fort la seruante pour monter en haut, elle creut qu'il luy apportast quelque mauuaise nouuelle touchât son mary, mais elle fut releuee de son doute quâd il luy dit qu'il se portoit bié, apres auoir deuisé quelque temps, & discouru sur diuerses occurrences qui se presentioient, Lucromis dit à la Damoiselle qu'il

luy vouloit dire quelque chose de particulier, elle aussi tost fit signe à sa sœur qu'elle se retirast, ce qu'elle fit, Lucromis s'approche & tirant de sa pochette vn petit pistolet qu'il portoit tousiours quant & soy, il vient d'vn visage enflammé dire à la damoiselle à l'oreille qu'il falloit presentement qu'elle mourust ou qu'elle luy baillast cent escus, & mesme qu'il ne falloit pas que sa sœur en sceust rien: ceste pauvre Damoiselle prise à dépourue de la sorte ne sceut que répondre, elle demeure comme toute esperduë, les forces luy manquent, & croit, tant l'apprehensio qu'elle a est grande, que ce volleur la vueille assassiner, en fin apres auoir esté quelque temps en cest estónemēt comme assoupie dans vn profond saisissement, elle reuint à soy, & d'vne voix toute tremblante luy

dit qu'il ne l'outrageast point, & qu'elle le contenteroit, sur ce elle appelle sa sœur qui s'estoit retiree à quartier & qui ne scauoit rien de tout cecy, à qui elle donna charge de prendre cent escus en son buffet & de les donner à Lucromis, sa sœur qui croyoit qu'on luy deust ceste somme, ou qu'il l'allast porter à Melun, luy deliure promptement l'argent, cestuy-cy d'un visage effronté & d'une hardiesse impudéte préd l'argét sans changer aucunement de contenâce ny de couleur, le met dans un mouchoir, & fut bien mesme si insolét de demander une demie pistole qui luy manquoit de son compte, & ayant derechef parlé à la Damoiselle à l'oreille, prit cōgé d'elle & de sa sœur avec toute sorte de courtoisie, il ne fut plustost sorty du logis que sa sœur s'enqueste

qui est cest honnestre Gentilhomme, ainsi l'appelloit-elle (car il estoit assez bien couuert seló l'ordinaire de telles gens, comme i'ay dit au commencement) la Damoiselle luy descouurit alors tout le faict, & se trouuerent toutes deux grandement estonnees d'une impudence si notable.

Vn autre vol que fit en mesme temps Lucromis, aduint assez proche de saint Jacques de la boucherie, sur le soir à la clarté de la Lune, comme Lucromis passoit prez de ladite Eglise il vit reluire vn plat bassin sur les fenestres d'une chambre qui estoit au troisieme estage, il dit aussi tost à vn de ses cõpagnons qu'il falloit de necessité attrapper ceste piece: or il est à remarquer que le bassin n'estoit que d'estain sonnante, mais à cause qu'il estoit neuf, & que la

Lune parvne reuerberation en faisoit naistre & rejaillir vnelueur rayonnante, Lucromis se persuadoit qu'il estoit d'argent.

Ils vont en mesme réps envn lieu où on receloit tout leur larcin, & prirent vne eschelle pour auoir le bassin, laquelle comme ils eurent planté cōtre la muraille, il se trouua qu'elle estoit trop courte d'vne toise, toutesfois par le moyen d'vne pierre qui sortoit de la muraille Lucromis alloit pour prendre le bassin, quand il fut estonné qu'il ne le trouua plus, car cependant qu'il montoit à l'échelle la seruant l'auoit retiré.

Ce Larron esloigné de son dessein descend alors bien fasché de ce qu'il auoit perdu vne si bōne occasion, mais comme ils sont prests à réporter leur eschelle les Archers du Guet commencerent à

passer, eux en mesme temps oyans ce bruiet quittent l'eschelle & l'attirail & prennēt la fuitte, de façon que le lendemain matin on trouua l'eschelle encore dressée cōtre la muraille au grand estonnement des voisins, qui n'enauient ouy ny entendu aucun bruiet.

Mais ceste aduēture peu fauorable à ses desseins, ne luy seruit que d'ascendant à vne meilleure inuētion: ce fut le premier qui inuenta dans Paris de monter dans les chambres avec des cordes. Vn soir ayant dans la ruë sainct Victor decouvert vne fenestre au second estage qui estoit entre-baillee, il prit vn de ses compagnons pour luy ayder à porter sa corde, au bout de laquelle il auoit attaché vn croc: il vint donc immédiatement sur la minuit deuant ladite maison, & bien que d'ordinaire

dans la ville de Paris, pour le peuple qui s'y retrouue, on voye les rües peu souuēt vagues & solitaires, si est-ce pourtant que ce iour, à cause qu'il auoit faict vne grande pluye & qu'il estoit fort tard, le silence & les ombres de la nuict sembloient leur fauoriser, car ils ne rencontrerent personne. Comme ils eurent presté l'oreille si on ne faisoit point de bruiet, cependant que le compagnon de Lucromis estoit aux escouttes, celui cy iette son croc, qui la premiere fois manqua pour n'auoir bien adressé, cela fit qu'en tombant il causa vn grand bruiet dans la rüe, Lucromis qui auoit peur que le bruit n'eust elueillé quelqu'un des voisins, vint prendre son compagnon pour faire vn petit tour en attendant que ce soupçon fust effacé, comme ils vont pour monter en l'Vni-

uerfité du costé du College de Nauarre, ils apperceurent vn homme qui descédoit tout seul sans flambeau ny sans espee qui prenoit sa route vers la place Maubert, Lucromis se retire en mesme temps dedans vne petite ruë qui descend à saint Nicolas du Chardonnet, & tenant son espee toute nuë pendant que son compagnon tenoit les cordes, il luy vint au deuât de pleine fureur, & luy demande effrôtemēt la bourse, l'autre voulut s'enfuir, mais Lucromis ayant de l'aduantage sur luy le perce d'un coup d'estoc au haut de l'espaule droicte, ce qui fit tomber son aduersaire avec vn grand cry, Lucromis pourtant qui ne vouloit estre frustré, ny de son coup ny de son esperance, le voyant couché par terre prend son manteau & s'enfuit, il y eut quelques vns des

voisins des enuirs qui sortirent de leurs logis ayans ouy ce bruiet, contre leur coustume, car quand on assassinerait vn homme au milieu des ruës, pas vn des Parisiens n'ouuriroit sa fenestre pour voir qui c'est.

Ce personnage estoit grandement blessé, mais en vain courut-on apres les volleurs, car ils estoient bien esloignez de là, il fut donc mené en la maison où peu auparauant Lucromis vouloit ietter son croc, car c'estoit l'hostellerie la plus proche, là on enuoya querir vistemēt vn Chirurgien qui pensa la playe, & promit qu'en peu de temps il seroit guarý, luy asseurant que la blessure estoit legere, cecy faict le monde se retire.

Lucromis d'autre costé rodoit aux enuirs de saint Estienne du Mont, où de fortune il fit rencon-

tre de cinq ou six frippons d'escolliers, qui l'ayns veu cottoyer la muraille qui mene en la rüe de saint Marceau, coururent apres luy, & apres quelque vaine resistãce luy desroberẽt le manteau qu'il auoit vollé peu auparauant, encore fut-il bien aise de se sauuer, car on luy en eust donné autant qu'il auoit faict à l'autre: ceste rencontre le mit en furie, & quoy que son compagnon lui peust représenter pour le faire retourner en son logis (car il s'en alloit trois heures) il luy dit qu'il auoit enuie de se seruir ce iour de son croc & esprouuer si son inuention luy seroit fauorable, ils viennent donc pour tenter la fortune au lieu ou il auoit veu la fenestre ouuerte, ou estans arriuez il iette son croc qui adressa mieux que la premiere fois, Lucromis monte aussi tost en la chambre

la chābre, où estāt descendu il fut
ouy des domestiques de la maisō
qui ne s'estoient point couchez à
causedu malade qui auoit esté por-
té en ladite hostellerie, on vient
voir en la chambre où on surprit
le volleur, vn bruiēt aussitost se fit
par la maison, le Maistre s'es-
ueille & voulut voir celuy qui a-
uoit esté si effrōté que de se guin-
der si haut, le malade en a le vent,
on luy faiēt voir Lucromis, il le
recongneut incontinent, ce qui en-
flamma dauantage l'hoste, qui en
ce cas s'imaginant qu'il n'estoit
point seul & qu'il auoit d'autres
cōpagnons, resolut de ioüer d'vn
stratageme pour attirer ses asso-
ciez, il dit à Lucromis, que s'il vou-
loit faire entrer ses compagnōs, il
luy promettoit la liberté, Lucro-
mis se voyant pris cherche vne au-
tre inuention par laquelle il fru-

streroit bié tost l'hoste de sa prise,
il lui promit de faire entrer ses cō-
pagnōs si on le veut laisser parler
à eux.

Il s'approche donc de la fenestre,
& faisant au commencement sem-
blant de l'appeller par vn siffle-
ment qu'il donna, il se iette insen-
siblement hors de la fenestre & se
calle en bas, de façon que deuant
que les seruiteurs & domestiques
du logis fussent descendus pour le
poursuiure, il estoit bien loing, &
ne le sceut-on attrapper ce iour.
Mais il ne fit depuis que traïsnier
son lien, car quinze iours apres il
fut pris sous les pilliers des Halles,
fut condamné d'estre pendu en
Greue, & ainsi il fut recompensé
de toutes ses peines.

*D'un Cheual d'Espagne qui fut pris à
vn grand Seigneur de la Cour,
par la subtilité d'un Volleur.*

CHAP. XXXI.

ENTRE toutes les Prouinces de la terre on remarque le Royau-
me de France pour y trouuer vne
bonne Cauallerie, les François ont
faict des exploits & des conquē-
tes qui les ont signalez & immor-
talisez en toutes les contrees de
l'Vniuers, mais tout l'honneur de
leurs victoires n'est tóbé que sur ce
que leur Caualerie estoit en grād
nombre & en fort bon ordre, car
bien qu'on estime les Polonois
versez en l'art militaire, pour ce
qui est d'auoir vne bonne Cauale-
rie, les François pourtant l'empor-
tent par dessus eux; les Histoires &
Annales de France m'en peuuent

seruir de garand, ou on pourra remarquer que ceste nation a tousiours esté renommée en ce qui est d'auoir conduit contre ses ennemis vne Caualerie forte & puissante, les dernières guerres d'Italie en peuuent faire foy, & maintenant que ces nouueaux remuemens se sont sousleuez, on le peut voir par experience. Ce n'est pas qu'en France il y naisse de bons cheuaux, mais c'est que les François ont vn air tout different des autres pour les monter, & pour s'en seruir aux occurrences, en cecy la Noblesse de France se fait paroistre curieuse de conseruer l'honneur que ses ancestres ont acquis, car s'il ya de beaux cheuaux en Espagne, ou en quelque endroit que ce soit, on les trouue à la Cour du Roy, les François ont vne certaine forme pour bien dresser vn cheual, ainsi les

les Espagnols s'ot seurs pour auoir
vne bonne Infanterie, chaque Re-
gion a son inclination à quelque
chose de particulier, en quoy les
voisins ne simbolisent pas.

*Hic segetes, illic veniunt felicius
vna.*

*India mittit ebur, molles sua thura
Sabæi.*

*At Calibes nudi ferrum, virosaq;
pontus.*

*Castorea Eliadum palmas Epiros
equarum.*

Ainsi comme i'ay dit, la Castil-
le se peut vanter d'auoir de bons
cheuaux, mais la France en a de
meilleurs, car les François sont
plus curieux de les dresser.

Sur le commencement de l'Hy-
uer, & sur la fin de l'annee 1620.
que le Roy reuint de Bearn en po-
ste, vn grand Seigneur que ie ne
veux pas nommer en ce lieu, vint à

Paris pour voir sa Maieſté qui eſtoit fraiſchement arriuee de ces contrees loingtaines, il ne ſçauoit où mieux choiſir ſon logis qu'aupres du Louure, afin par ce moyen d'auoir plus de facilité de voir le Roy, & de ſçauoir quand, & à quelle heure il ſortiroit pour luy pouoir tenir compagnie, & auoir le bon-heur de courir à la campagne & le ſuiure à la chaffe.

Or en ce temps on ne parloit que de Volleurs, par ce que le Regiment des Gardes eſtoit nouuellement arriué & fatigué de ce long & penible voyage, où les Rebelles de France auoient contrainct ſa maieſté d'aller pour remettre tout en ſon deuoir, & n'ayans eu durant le ſeiour de quatre ou cinq mois toutes leurs ailes, pluſieurs d'iceux ſe mirent à brigander, on n'oſoit meſme ſe trouuer dans les rues eſ-

cartees en plein iour, ce qui pour-
tant ne dura pas long temps, car la
Iustice & le Magistrat y mit bon
ordre. durant ceste tempesté deux
soldats des Gardes qui logeoient
en la mesme maison ou le seigneur
susdit auoit pris logis, delibere-
rent de le surprendre.

Ceste conspiration sortit son ef-
fect le lendemain que ledit sei-
gneur fut arriué en Cour, car estât
allé avec sa Maiesté à la chasse és
enuirons du Bois de Vincennes, il
arriua par cas fortuit, qu'il fit vne
grande pluye, de sorte que plusi-
eurs retournerent à Paris tous
moüillez, & n'auoient pas loisir
de regarder derriere eux.

Vn de ces deux soldats scachant
que le susdit seigneur deuoit venir
en bref, se tint sur ses gardes, & dit
à son compagnon qu'infailible-
ment il esperoit d'attrapper le che-

ual sur lequel il estoit monté ce iour là: l'autre luy laisse manier ceste affaire, celuy-cy va aux Halles, & achete vne longue casaque de toile qu'il vestit, puis oyant le bruiet que le Roy & toute la Noblesse retournoit en grande haste, vint attendre immédiatement à la porte de l'escurie, où le susdit seigneur mit pied à terre & donna charge à vn deses laquais de penser s'il cheual & luy faire dōner ce qu'il estoit besoin, le laquais qui estoit mouillé aussi bien que son Maistre, & qui estoit biē aise de se rafraischir, dōna la charge du cheual à nostre soldat, croyāt qu'il fust domestique de la maison, & qu'on luy eust dōné charge de l'escurie, le soldat qui n'attēdoit autre chose que cecy, fit semblant de l'accommoder, il demāda foin, auoine & tout ce qu'il luy falloit, cecy

estant ourdy de la sorte il vint ad-
uertir son compagnon du lieu où
il le pourroit trouuer, & d'un mes-
me pas feignant d'aller abreuuer
le cheual à la riuiera, il tourne de
l'autre costé, son compagnon le
suit & quitterent leur premier ho-
ste de peur d'estre contraincts de
payer ce qu'ils luy deuoient pour
tourner brisée d'un autre costé,
trois heures se passent que nostre
pallefrenier ne venoit point, le
laquais se persuadoit au commen-
cemēt qu'il fut allé chez le mares-
chal pour faire mettre quelques
fers aux pieds de son cheual, mais
ceste attente ne luy apporta que
de la confusion dauantage, car a-
pres auoir long temps attendu, il
trouua que son cheual estoit vol-
lé, cheual qui valoit plus de qua-
tre cens escus, il demande à l'ho-
ste qui estoit son pallefrenier,

l'hoste luy monstre, & demeura le laquais bien estonné de cest accident, il n'osoit le dire à son Maistre, car il luy eust faict vn mauuais party, il prit resolution des'en aller, ce qu'il fit: le lendemain il se leue du matin & prit la fuitte pour obuier au mauuais traitement que luy eust fait son Maistre: mais celuy qui fut le plus fasché ce fut le seigneur susdit, car ayant perdu vn si bon cheual il pensa creuer de despit; & certes s'il eust trouué en sa colere son laquais qu'il soupçonnoit autheur de ce vol, il luy eust passé son espee au trauers du corps tant il estoit en furie pour ceste perte.

Tandis nos soldats se tinrent clos & couuerts & furent quinze iours à faire la desbauche dans les maretts du Téple avec l'argent du cheual qu'ils auoient vendu à l'hoste

mesme qui les logeoit, deux cens escus. Ceste amorce les attira à faire vn autre vol, car vn iour vn d'iceux se promenant dans la rue du Temple, rencontra vn laquais qui menoit vn cheual abreuer, le soldat alors demanda audit laquais si son cheual estoit à vendre, l'autre qui auoit charge de son Maître de vendre ledit cheual en cas qu'on le vinst marchander, luy respondit que s'il en vouloit donner 80. escus qu'il luy vendroit, mais qu'à moindre prix il ne le pouuoit liurer. Nostre soldat entendant le laquais parler de la façon, s'approche, manie le cheual, le visite de tous costez, & faisoit semblant d'estre bien expert afin d'enjoler le laquais qui n'auoit au plus que 15. ans, en fin apres l'auoir visité de tous costez, il pria le laquais de luy laisser monter pour voir mieux

son pas, luy disant, que s'il luy en
vouloit faire bon marché, que c'e-
stoit là son vray fait, le laquais des-
cend pour faire voir s^{on} cheual au-
dit soldat, qui estant monté dessus
faict trois ou quatre tours le long
de la rue, en fin quand il se vit as-
sez esloigné du laquais, il donna
deux ou trois coups de houffine
au cheual & prit la poste, le laquais
ne s'en estonnoit pas, mais voyant
qu'il courroit tousiours & qu'il ne
retournoit pas, il commēce à cou-
rir apres, la course toutes fois fut
inutile, car le soldat luy raut le
cheual, & oncques depuis on n'a
ouy parler d'eux.

*Histoire estrange de la prise de sept
Voleurs, & comme vn d'iceux
se sauua de la prison apres
auoir desrobe le
Geolier.*

CHAP. XXXII.

Q Vand nous sommes bien, &
que la fortune nous rit, l'ai-
se nous charoüille & n'y pouuons
demeurer, le changement est tel-
lement naturel aux hommes qu'ils
ne peuuent demeurer long temps
en vne mesme posture, nous te-
nons cela des choses d'icy bas, qui
ne viuent que par les mutations;
mais entre tous ceux que ie voy
dans l'Europe, ie trouue le Fran-
çois vn des plus inconstans com-
mé ayant tiré ceste maxime de ses
ancestres qui ont tousiours tenu à
ferme le changement, & la muta-

tion si nous en voulons voir vne
preuue recente nous le verrons &
le pourrons remarquer en la fuit-
te de ce discours.

Au temps que l'Empire de l'Al-
lemagne commença à se remuer
par le sousleuement des Protestās,
six ieunes esuentez de la Prouince
de Normandie sortirēt par cōpa-
gnie de leur Pays, & delibererent
de voir les Allemaignes, ils alle-
rent donc premierement s'enroo-
ler sous les drapeaux dudit comte
de Buquois, braue & genereux
guerrier qui s'est acquis vn los im-
mortel au fait des armes, & quia
prodigué sō sang au milieu de ces
derniers troubles pour la deffence
de la Foy & de son Prince; là ils fu-
rent quelque temps où ils firent
paroistre des effects de leur valeur
contre l'armee de Bethengabor,
mais nonobstant qu'ils fussent

sous vn bon Capitaine, ils voulurent esprouuer si les destins leurs seroient plus fauorables en vn autre lieu, ils demanderēt leur cōgé, feignans de reuenir en France, mais ils vinrent s'escrire au nombre de ceux qui suiuiroient les drapeaux du Duc de Bauiere & du Baron de Tilly; ils ne furent point là deux mois qu'ils eussent voulu estre sous leur premier maistre, bien que le dernier ne cede aucunement au premier en grandeur de courage; de la ils suiuirent les estendars du Marquis de Spinola qui estoit dans le Palatinat pour le Roy d'Espagne son maistre, ou ils firent voir que ce n'est point à tort ny a iniuste tilte que la France est si renommee par les armes, & qu'elle s'est acquise tant d'auantage sur ses ennemis, car on ne parloit que d'eux dans les troupes.

dudit fleur Marquis, mesme vn iour il voulut les voir à cause qu'un d'iceux auoit esté blessé à vne rencontre où on auoit donné vne charge fort furieuse aux ennemis: mais ces esprits nourris d'as le changement quitterent les armes pour roder par toute l'Italie, ils furent visiter les belles villes de ce pays, & des lors ils commencerent à voler par les grands chemins, car l'argent leure estoit manqué à Floréce, & depuis iusqu'à Milan ils ne vescu-
rent que sur la bourse d'autrui.

Ils s'accoustumerent si bien à voller & desrober, qu'en peu de tēps on les prit pour les plus grāds volleurs d'Italie; mais comme on est fort exact en ce pays contre telles gens, ils sortirent secretement de là & vinrent en France, mais ceste coustume de desrober leur estoit tellement imprimée
dans

dans l'esprit, que mesme quand
 ils furent dans Paris ils ne velcurét
 d'autre chose que de larcins & pil-
 leries qu'ils exerçoient sur les al-
 lans & venás, leur giste ordinaire
 estoit sur le Pont Neuf ou ils de-
 strouffoient plusieurs passans, pil-
 lans & emportans ce qu'ils pou-
 uoient attrapper d'eux, vn soir sur
 les dixheures, côme le Cheualier
 du Guet estoit en campagne pour
 les surprendre, ils en eurent le vêt,
 cela les fit mettre en sentinelle le
 long du Pont Neuf, & ayans reco-
 gneu vn des Archers du Guet qui
 estoit seul, ils l'arresterét vis à vis
 de la prison du Fort l'Euesque sur
 le quay qui va respondre à la riuie-
 re, & le percerent d'outre en ou-
 tre de trois ou quatre coups d'es-
 pee en sorte qu'ils le laisserent
 pour mort, & bié luy aduint qu'il
 feignit d'estre tué, car sa feintise

eust esté suiuiue dela realité, & ne fust iamais sorti de la place, quand il vit qu'ils estoient vn peu esloignez, & qu'ils ne le pouuoier plus voir, bien que grandement blessé & tout ensanglanté il se leue, & tournant par vne petite ruë il viét droit au logis du Cheualier du Guer, ou il le trouua avec 2. ou 3. Archers, il luy monstre les coups qu'il a receus & demande qu'on ait à poursuiure lesdits assassins, & qu'inailliblement ils estoient és enuiron du Pont-Neuf.

Le Cheualier qui le vit si inhumainement traité & ensanglanté de la sorte, despesche aussi tost vn Archer pour aller au corps de garde qui estoit ce iour aupres du Palais, afin qu'on inuestist promptement toutes les aduenues du Pôrt-Neuf. L'Archer fait sa commission & enuoye par diuers endroits

toute la troupe pour fermer les passages du Pont-Neuf, par ou on croyoit que lesdits volleurs pouuoient prendre la fuitte.

Tout cest appareil estant dressé de la sorte, on commence à approcher de part & d'autre, pour contraindre ceux qui estoient sur ledit Pont de tourner de quelque costé que ce fust, le Corporal enuoyevn de ses gés pour descouvrir s'ils estoient sur le Pont, de quel costé ils s'estoient logez, & le nombre, on vint rapporter qu'au plus ils estoient luy six.

Les volleurs alors ayans apperceu quelque chose de ceste visite, se persuaderent qu'on les poursuiuoit, ce qui les émeut tellement que trois s'enfuyrent qui çà qui là pesse-messe, il n'y en eut que deux qui comme les plus hardis attédi-

rent le choc & se perdirent pour deffendre leurs compagnons qui fuyoient, on les attaque rudemēt, les Archers approchent d'eux le pistolet en main, ce que les deux ayans remarquē gagnerēt au pied comme leurs compagnons & pensoient eschapper le malheur qui les talonnoit.

Mais comme ils vont pour descendre sous l'Arche du Cheval de Bronze afin de se ietter dās l'eau, ils se trouuēt à l'impourueu inuestis des autres Archers qui venoiēt du Pont des Augustins, cela pourtāt ne les espouuēt point, 3. d'eux se iettēt dans la riuiera à la nage, & n'eust esté que quelques Archers coururent viltēment sur les bateaux prochains pour les deuācer, on ne les eust iamais attrappez, mais ils furent preuenus, car comme ils penserent se sauuer dans les

Nacelles & Gondolles qui sont d'ordinaire sur le port, ils se virent surpris par trois ou quatre Archers qui les menerent au Four l'Euesque, cependant que leurs compagnons apres quelque vaine resistance y furent conduits de l'autre costé. Or ce iour mesme il aduint que par soupçon ou autrement vn certain volleur fut pris en la rue des Blancs-Manteaux pour auoir desrobé vne monstre d'argët doré à vne hōneste Damoiselle des enuiron qui reuenoit sur le tard de la Ville; ainsi comme on mettoit ceux-cy dans la prison, l'autre arrive qui les recognoissant ne fit aucun semblant de les voir, car il auoit crainte qu'on ne le broüillast parmi leurs affaires, estimant que c'estoit assez s'il se pouuoit desbroüiller des siēes propres ou sō peu de prudence l'auoit engagé.

Les autres ne furent pas long tēps
emprisonnez, car le lendemain on
vint lire leur sentence de mort
pour auoir vollé de nuit vn des
Archers du Guet, ils furēt tous six
conduits sur le bout du Pont-Neuf
où ils furent pendus par compa-
gnie, & certes il sembloit que la
raison vouloit qu'ils mourussent
tous en vne mesme iournee, &
qu'ils encourussēt le mesme dan-
ger, puis qu'ils auoient passé vne
partie de leur ieunesse ensemble;
aussi se tintēt ils cōpagnie iusques
à la mort, & pour signe de leurs
vols, on leur attacha à chacun vn
escriteau sur le dos, où il y auoit
ces mots en gros caracteres. *Vol-
leurs de nuict pris par le Guet*, ainsi
ils furent executez au grand con-
tentement de tout le monde,
& principalement des Bourgeois
de Paris qui se faschoient d'estre

tous les iours importunez de semblables canailles.

Reuenons maintenant à nostre prisonnier que nous auons laissé dans le Four l'Euesque, c'estoit vn des plus subtils voleurs qu'il y eust alors dans Paris; quinze iours au parauant qu'il fust prisonnier, il auoit fait de grands vols dans le faux-bourg de saint Germain, & principalement à l'endroit d'un Orfeure à qui il emporta (comme il a confessé depuis) pour plus de six cens escus de ioyaux qui estoient en sa boutique.

Ce compagnon auoit recogneu que dās ladite boutique il y auoit vn petit buffet ou il y auoit vne boete pleine d'anneaux & de diamās, il eut la subtilité d'aller chez vn Menufier du mesme faux-bourg & de faire faire vne boete semblable à celle qu'il auoit veüe

chez l'Orfeure (car peu auparavant il auoit esté en ladite boutique, feignant de marchader quelque pierrerie, & auoit pris à peu pres la mesure) ayant ladite Boëte il espia qu'il n'y auoit que la seruante au logis & vn petit garçon qui estoit fils de l'Orfeure, il entre effrôtement dans la boutique & demande qu'on luy face encor voir de ces perles qu'il auoit marchandé l'autre iour, on luy apporte aussi tost la boëte, luy voyant qu'il ne pouuoit bié iouer son personnage, si l'vn ou l'autre de ces deux n'estoit dehors la boutique, s'imagi- ne alors d'une finesse, il pria au jeune garçon de luy aller changer vn escu d'or qu'il luy bailla, le garçon y va, pendant quoy ledit voleur se fait ouurir la boëte ou estoient les Perles & les Diamás, il choisit & s'enquiert du prix, met-

tât subtilemēt sa boēte en la place de celle del'Orfeure; cependant quela seruante songeoit à autre chose il luy dit qu'il reuiendrait en bref, & que le garçon qui estoit allé changer son escu d'or l'attendist avec la monnoye, la seruante ne prit pas garde à ce qu'il emportoit, car elle voyoit la boēte sur la table, & croyoit que ce fust celle-là mesme que le garçon auoit tirée du buffet, cependant le fils de l'Orfeure reuiet avec la monnoye croyant retrouver son hōme en la boutique, mais le marchand auoit gagné au pied, il fut quelque tēps à l'attendre, mais voyant qu'au bout d'vne heure il ne reuenoit point, il se persuada alors qu'il y auoit quelq; fourbe cachée so^r ceste affaire, il ouure la boete pour voir s'il n'auoit rien emporté, mais il trouua qu'elle estoit vuide, &

que ce n'estoit point celle qu'il auoit descendüe, il appelle la seruante & demeurent tous deux comme estonnez de ce larcin si apert & si notoire, en vain ils courrēt apres pour l'attrapper & luy faire rendre ce qu'il auoit enleüé, car ils ne le trouuerent pas.

Ce larcin toutesfois ne luy dura pas long temps, car quinze iours apres il fut pris, & n'esperoit autre chose que d'estre en bref puni selon ses demerites, quand ils s'allä inuenter vne ruse pour sortir. Lors que nous nous rencontrons aux extremittez quelquefois, bien que lourds & stupides de nostre naturel, l'apprehension de la mort & la crainte que nous auons, d'encourir vn dāger, nous suggere des inuentions ä quoy nous ne songerions iamais si nous estions tousiours en prosperité. Ce vol-

leur auoit vne certaine correspon-
dance en vne maison de ceste ville,
que ie ne veux point diffamer,
l'hoste de laquelle receloit to⁹ ses
larcins: il l'enuoye vn iour querir
par vn petit garçon, & luy supplia
qu'il luy fist faire vn grad pasté de
venaison, ce q; fit ledit Bourgeois,
il fit mettre vn Lieure en paste, &
apres qu'il fut cuit il l'apporte au
four l'Euesque: alors le volleur
supplia le Geolier d'en vouloir
manger sa part, le Geolier qui ne
sçauoit ou buttoit ceste tragedie,
fut bien aise de soupper avec ledit
volleu, où le Bourgeois susdits e-
stoit trouué par mesme moyen,
à la fin du soupper que le Bour-
geois se vouloit retirer, le volleur
le tire à quartier & luy tient ces
paroles, vous sçauiez (dic-il que
me voicy reduit en vn lieu, d'ou
ie ne sortiray iamais qu'à ma

confusion & à mon malheur, vous n'ignorez point avec combien de familiarité i'ay versé autrefois avec vous, il faut que me faciez vn plaisir pour me sauuer la vie, ie vous ay fait faire ce pasté que nous venons de manger expres pour attrapper le Geollier, demain ie vous prie de me faire vn autre pasté de sa forme & grandeur, ou au lieu de viande, vous mettrez vne longue corde, & des ferremens propres à crocheter: par ce moyen vous ferez cause que i'auray la vie sauue, car aussi bien cognois ie qu'é brefsi ie n'vse d'inuentions ie seray condamné, le bourgeois qui le cognoissoit dès long téps, & qui luy porroit vne particuliere affection, luy promit de ne point manquer à cecy.

Et de fait le lendemain sur le soir on apporta le pasté au prisonnier,

lequel estant mis entre les mains du Geolier luy fut donné croyant qu'on luy apportoit pour son souper, mais le volleur ayāt donné ordre à toutes ses affaires va secrettement en vn lieu qu'il auoit destiné pour ce subiect, ou il sçauoit bien qu'on ne descouuriroit point son fait, & sur la minuit il fit en sorte, soit qu'il eust crocheté la porte avec les ferremēs, ou qu'il eust vsé d'vne autre industrie, il sort secrettement du lieu ou il estoit enfermé & vinst attacher ses cordes à la muraille, puis se guindant au mieux qu'il peut sur icelle: il descendit du costé de la riuiera, & laissa les cordes pour marques de sa sortie.

Mais hélas! qu'est-ce que d'vn hōme depuis q; la coustume a empieté sur luy, & qu'vne fois il s'est enraciné au mal, ce volleur s'estoit sauué le plus industrieuse-

398 HISTOIRE DES
ment du monde, sans que per-
sones'en fust aperceü, que deux pri-
sonniers à qui il auoit declaré son
dessein, mais il ne sceut iouyr de
son bon heur, il pouuoit prendre
la fuitte, & se retirer hors de Paris
secrètement, mais il estoit telle-
ment accoustumé à mal faire, qu'à
peine fust il descé du de la murail-
le, que venant à faire vne reueüe à
l'entour de la porte de Paris, & de
S. Innocent, il rencontra vn home
seul, qu'il attraque impudemment,
& luy desroba le manteau, ceste
homme qui demouroit là-aupres,
entre aussi-rost en son logis, prend
sa hallebarde, & avec deux ou trois
de ses domestiques, poursuiuirēt
le compagnon qu'ils prirent en
fin, & le tinrent prisonnier en la
maison, apres auoir repris le man-
teau, iusqu'au lendemain matin
ou les sergés des Archers du Pre-

uoist de Paris, le menerent dere-
chef au four. l'Euesque, sans sça-
uoir s'il y auoit esté ou non.

Le Geolier fut fort estonné de
voir ce volleur, il ne luy dit rien
pourtant, car si on eust descouuert
que ledit volleur se fust eschappé,
on se fust attaqué à luy comme à
celuy qui doit respondre de ceux
qui sont en sa garde, deux iours se
passent pendant lesquels on in-
struit le procez dudit volleur: l'Or-
feure du faux bourg S. Germain
en ayant eue le vent, vint déposer
contre luy, sur les vols qu'il luy a-
uoit faicts de la boite, & ainsi apres
pluseurs autres plaintes qui se fi-
rent contre luy, il fut iugé à estre
pendu, de quoy l'exécution s'en
ensuiuit à la Croix du Tiroir.

*Histoire estrange & prodigieuse ar-
riuee au pays de Suisse en la ville de
Lucerne, en la personne de Dom Va-
lesio vn des premiers volleurs & as-
sins du pays. Sa perfidie descouuer-
te, le succez de sa vie & la fin misera-
ble de ses iours.*

CHAP. XXXIII.

LA perfidie s'est aujourd'huy
tellement insinuee dás l'esprit
des hommes qu'il semble qu'elle
n'ait iamais pris naissance, que
pour seruir de soubassement & de
pied d'estail à leurs trophées: la na-
ture est maintenant deprauee, &
hors de ses alignemens ordinaires
qu'on ne peut rien rencontrer en
l'Vniuers qui ne gauchisse, & ne
s'entrebaille aux rapines & sedu-
ctions: nous bastissons des tri-
omphes sur nos propres ruynes, &
esleuons

esleuons nostre grandeur sur nos bassesses, nos cœurs qui se persuadent de pouuoir mettre à chef les entreprises les plus hautes, se trouuent souuent enchainés par l'impuissance & l'imbecillité de nostre naturel, & le plus souuent les ruynes que nous machinons contre nos voisins, & le desastre que nous leur minotons ne s'éclatte qu'à nostre perte propre & à nostre mal-heur: les dards que nous brandissons sur autrui rejallissent souuent sur nous mesmes: l'antiquité me fourniroit d'un millio d'exemples, si nos derniers siècles ne m'en signaloient vn par dessus les autres, autant prodigieux & espouventable que hors du sens, & de la cômune opinion des hommes: il n'y a siècle, ou l'Autheur de la nature n'ait fait paroistre quelque éclat de son

courroux pour la perfidie & l'insolence des hommes qui se portent à des actes que les diables mesmes abhorrent & detestent: l'Histoire que ie vous descris icy est vraye, & arriuee il ny a pas long-temps, la suite en est autāt admirable q; la fin en est prodigieuse & horrible: Mais ô Ciel est-il possible que tu engendres des ames si abominables? se peut-il faire q; la terre puisse se soustenir des esprits si dereglez & si infames que de produire des actes tellement hors de la conception des humains? S'il y a de l'estonnement en ceste Histoire, ce n'est pas sans subiect, puisque nous sommes dans vn siecle de fer, & que Saturne a quitté le sceptre & le gouuernement de l'aage d'or pour en laisser l'vsurpation au foudroyant Iupiter.

On me dira que ie sorts icy des

bornes que ie me suis donné du commencement, toutesfois la varieté estrangede ceste histoire m'a conuié de l'inserer en ce lieu.

Dom Valerio estoit natif de Berne, canton de Suisse, & donna des son bas aage des tesmoignages euidens, & des preuues remarquables de la perfidie qu'il executeroit vn iour; il fut enuoyé de s^{on} pere en la ville de Lucerne, vne des principales forteresses de la Republique de Suisse, pour y estre instruit: il auoit l'esprit fort & apte à entreprendre quelque chose de haut, comme il estoit en la pratique pour prendre le party de Procureur, il hantoit souuent au logis d'un Hostellier, nommé Lucio de Zurich, homme riche & opulent, & avec le temps prit vne telle connoissance avec cest homme qu'il ne pouuoit boire ny manger

qu'en sa compagnie, il estoit logé vis à vis de sa maison, & sembloit que le Ciel luy versoit de funestes influences quand il ne trouuoit point la rencontre de cest homme qu'il affectionnoit passionnément, mais ceste affection s'alluma bien dauantage quand il eut pris pied dans le logis, & qu'il fust épris de la beauté de sa fille, qui estoit unique, & qui seule apres son pere pouuoit partager toutes ses richesses. Ce ieune Valesio se sentit esmeu, voyant les traicts de ceste ieune pucelle, d'un feu extraordinaire, de sorte que le pretexte qu'il prenoit de voir son pere luy fit changer d'aduis, & n'y alloit plus que pour auoir ce bõ-heur en passant de voir la fille, il la caressoit souuent par les yeux qui prattiquoient desia sourdement vne alliance entre eux deux par la recon-

tre de leurs rayons, leur cœur ad-
uoüoit au dedans ce que leurs
yeux prattiquoient en dehors: de
sorte que ce ieune homme voyant
ses affections secondee d'un fauo-
rable zephir, delibera de rompre
la carriere de la honte pour ouurir
la porte de sa bouche & dire ou-
uertement à ceste ieune beauté ce
que son cœur cachoit secrettemēt
pour elle; il l'accosta avec autāt &
plus de hardiesse que la bonne vo-
lonté de sa Maistresse sēbloit luy
seruir de garand pour vne si gene-
reuse entreprise: ces affections fu-
rent mutuelles, le pere en fut ad-
uerty, & voyant les inclinations de
ces amans les lia par mariage sous
les doux auspices d'hymenee. Heu-
reux helas! s'il n'en eussent pas abu-
sé, & qu'ils eussent acheué le ter-
me de leurs anneés sans s'escar-
ter du vray sentier de la vertu. Ce

mariage fut bien-venu & applaudi vniuersellement de toute la ville, les parens du mariés'y trouuerent avec autant d'allegresse que le parti leur sembloit aduantageux, ils passerét deux ans & demy ensemble avec toutes sortes de contentemens, au bout desquels le pere mourut d'une fieure léte, afin qu'il n'eust ce desauantage de voir le funeste accident qui deuoit arriuer à sô gédre, côme nous verrôs & qu'il ne suruescust à ce triste spectacle.

La mort de Lucio fit tomber toute la succession entre les mains de Dom Valefio, car la mere de sa femme estoit decedee quatre ans auparauant leurs nopces; il se resolut de tenir la boutique de son beau pere, & de pratiquer ses mesmes partisans, puis qu'aussi bien il trouuoit la maison & les apprests tout preparez: le bô trait-

rement qu'il fit du commencement
à ses hostes luy fit doner le renom
& le bruiet par toute la ville, de
maniere que quand on vouloit
traicter quelqu'un somptueuse-
ment il falloit aller chez Valesio; on
y estoit seruy grandement bien &
avec toutes sortes de cōtētemēs,
ô que tu proferas avec verité ces
mots (grand Poëte.)

Ætas parentum peior auiis tulit

Nos nequiores, mox daturos

Progeniem vitiosiore.

Combien voyons nous mainte-
nant la verité de ces paroles! la vo-
gue que prit Valesio luy enfla le
courage & luy fit oublier son estre,
pour s'oublier soi-mesme: la cour-
roisie qu'il tesmoignoit à ses ho-
stes se changea en cruelle tyran-
nie qu'il exerçoit iournellement
sur les passans, les tuât & massacra
comme vn autre Lycaon Tyran

d'Arcadie, s'as se souuenir de la puni-
tiō que prit Iupiter des cruantez
plus que barbares de cet impie, son
logis auparauant le receptacle & la
demeure de la courtoisie, fut le
couppe gorge & le lieu funeste où
les pauures passans estoient pris au
piege, il les déhachoit cruelle-
ment & en faisoit des pastez, (bar-
barie prodigieuse) il n'eust osé
practiquer ceste tyrannie enuers
les Citoyens de Lucerne, car son
fait se fust descouuert, cela les attri-
roit d'auantage, chacun admiroit
la delicateſſe de la viāde qu'il leur
donnoit: le pauure hōme ne pen-
soit iamais finir ses iours si misera-
blement comme il fit depuis, cho-
se estrange de la conception des
humains, qui se persuadent qu'il
n'y a point de Diuinité vengeres-
se des crimes & forfaits! nous
nous auenglons tellement en nos

prosperitez , que nous ne nous
pouuons imaginer de tomber ia-
mais de la rouë de la fortune , &
toutesfois nous voyons les plus
graues succomber sous le fardeau.

Valesio ne se pouuoit faire croire
que les cieux prinssent vn iour le
party de tant d'innocentes ames
qu'il auoit meurtrierement occis,
mais le grád moteur des astres ne
peut lóg téps endurer des crimes
si atroces , le sang de tant de pau-
ures gés espandu crioit vengean-
ce deuant l'Auguste Maiesté de sa
face, & toutesfois ce grand Mo-
narque du ciel & de la terre adou-
cissoit pour vn téps les fureurs de
la Iustice, pour entendre aux dou-
ces requestes de la Misericorde
qui demandoit l'intherinement
du pardon de tant de lourdes of-
fêces, que ce cruel hostelier faisoit
tous les iours, mais en vain, puis-

que le poids de tant de crimes attiroit le bras de la iuste vengeance de Dieu pour le punir autant seuerement & exemplairement comme la faute le requeroit.

Il arriua entre les sanglantes def-faiétes de tant de gens, qu'un certain Marchand François de natió, reuenant de Bohême, vouloit voir en passant les cantons des Suisses, & particulierement la ville de Lucerne, pour visiter les particularitez du lieu, & voir le Monastere qui y est qu'on tient pour le plus beau du pays, apres auoir veu quelques singularitez, & la Riuiere Rüssi, qui passe dans la ville sortant d'un grand lac, ainsi qu'on peut voir le Rhin sortir du lac de Constance, il luy prit enuie de se reposer, il demande à loger, on luy enseigne l'Hostellerie de Valesio, comme pour la plus fameuse

de la ville, il y va, & y fut fauorablement receu par ces Sirenes cruelles, qui allechoiēt les passans par les concerts harmonieux de leurs voix, pour apres les deuorer, & s'en seruir de proye. La confiance qu'vn Hoste a tousiours, (à la coustume de France) au maistre de l'hostellerie, fit descharger le marchand de 2. mille escus qu'il auoit en or, pour demâder vn lieu à Valesio, où il les pourroit mettre à seureté; cest hostellier tousiours double en ses œuures, auoit aussi vn Buffet fort & massif, & deux clefs qui le pouuoient aisément ouurir, il en donna vne à ce marchand, pour mettre son argent à sauue-garde, & retint l'autre secrettement pour s'en seruir aux opportunités, il fut esmeu la nuit, de le tuer, affin d'arrester ensemble sa vie & son argent: Mais

soit que Dieu en voulust disposer autrement, ou que sa fin fust arriuee, la femme qui voyoit vne courtoisie plus qu'ordinaire en ce Marchand, l'en dissuada & luy rompit ce sanglât dessein, pour luy en faire embrasser vn autre moins cruel, mais qui luy deuoit faire couster la vie, Ce Marchand se leue du matin pour aller visiter le reste de la ville qu'il n'auoit peu voir le iour d' auparauant : Valesio cependant ouure le Buffet, descouult la bouterre du Marchand par dessous, & prit conte sur vn papier de tout l'argent qu'il y trouua, se reseruât vn memoire de la quantité de l'argent, & de toutes les especes qu'il y remarqua, puis reioignant subtilement la bourse, il referma le buffet, de sorte qu'il eust esté impossible de s'imaginer qu'oy eust touché, toute ceste finesse estoit ar

tistement coufue, Mais celuy qui penetre au plus creux de nos pensees scauoit bien descouurir ceste ruse: comme nous pourrons remarquer.

Le Marchand ayant fait ses visites, & veu en passant ce qu'il esperoit de voir, reuint au logis de son hoste sans songer aucunement à la fraude qu'on luy brassoit, paye ce qu'il deuoit, prend sa bougette, & monte à cheual pour poursuiure son chemin, Valesio incontinent croyant qu'en vain il auoit ouuert le theatre & commencé le jeu s'il n'acheuoit la tragedie: rompt son buffet par dessous, & commence à crier au volleur, feignant que le marchand l'auoit desrobé, le peuple s'esmeut, chacun croit ce qu'il dit, tant en son maintien il auoit emprunté le manteau de la feintise, plusieurs se preparer

& de ses amis mesmes qui ne son-
geoient rié moins que la trahison,
de suiure le volleur à la piste, il
leur enseigne le chemin qu'il a-
uoit pris, ils coururent apres, & l'at-
traperēt à deux lieues de Lucerne,
côme il alloit tout ioyeux du bon
traittemēt de son hoste, on se saisit
de sa personne, côme d'un mal fai-
cteur, on l'accuse de larcin, & au-
tre mille sortes d'outrages, bref on
l'ameine pieds & mains liees en la
ville, luy estonné du fait, semble
quasi par son silence approuuer ce
qu'ō lui met sus, il est côme esper-
du d'entendre vne telle trahison,
il rougit de honte nō pour soy qui
se sēt au dedās innocent, mais pour
la perfidie desō hoste, ils le menēt
seurement en Iustice, & fut cōduit
en la prison, ou pendāt qu'il y est,
on instruit son procez, son hoste
remonstre son memoire, & de-

mande qu'on ne s'enquist pas du
faict qu'on n'eust veu son escrit, il
fait voir son buffet rompu par le
dessus, on ouvre la bougette, on
trouue les mesmes especes, & le
mesme argent qui estoit cotté sur
le memoire de l'hoste, les iuges
les plus sages, & les plus prudents
eussent esté empeschez en ceste
affaire, il eust fallu vn grand Argus
pour en descouurir les faussetez.
L'euidence du fait presque auéré,
fit qu'on resserra le prisonnier dás
vn cachot plus estroit.

Ce pauvre innocent gemit en ces
grottes si obscures, & ne sçait en-
cor pourquoy il est si estroitte-
ment resserré. Miserable que ie
suis! (disoit-il) faudra-il que ie pe-
risse en ce lieu, sans auoir aucune-
ment encouru ce dont on m'ac-
cuse? quelles puissances celestes
ay-ie tellement offencé, pour estre

reduit à ceste cadene, suis ie nay
sous des astres si cruels que mon
innocence propre me trahysse, &
me face perdre la vie? O grand
Dieu qui sous tes iustes iugemens
peux penetrer dás le fond de ceste
affaire, endureras tu mô innocéce
criminalisee de la sorte? seray-ie
ainsi le iouët de la trahyson? com-
me il prodiguoit ces parolles avec
vne ardeur indicible, vn Diable
s'apparut à luy en forme humaí-
ne, remarquable principalement
en ce qu'il auoit vn bonnet rouge,
il s'accoste de luy, s'enqueste de
son tourment, & luy dit que s'il luy
vouloit donner son ame, qu'il le
deliureroit de la Cadene où il e-
stoit attaché, plusieurs eussent en
ce lieu franchi le pas, & se fussent
donné à luy, pour se redonner la
liberté des champs, toutesfois
le Marchand n'ayant autre recours
qu'en

cours qu'en Dieu, luy dit qu'il ne feroit iamais ceste faute, & qu'il aymoît mieux mourir innocét du crime dont on l'accusoit, que de viure criminel d'une telle iniure faicte à Dieu. Ce Demon destiné du Tout-puissant pour sô salut, & pour le deliurer de la mort, luy offre nonobstât son seruice, & luy promet toute asseurâce de sortir libre, pourueu qu'il pratiquast ce qu'il luy diroit. Il luy declara donc que le iour propre qu'on le meneroit au supplice, il s'y trouueroit pour deffendre sa cause, & qu'il le prist hardimét pour se seruir d'Advocat contre les impostures de son hoste, & qu'il le recognoistroit à son bonnet rouge, luy promettant qu'inailliblement il le sauueroit du danger, ou l'impudence de Valesiole vouloit precipiter. Or il est à remarquer,

qu'aux Cantons des Suisses, quant on veut condamner quelqu'un à la mort, le Senat luy lit son arrest au milieu de la place sur vn eschafaut: & donne permission au patient de choisir tel qu'il voudra de la compagnie pour deffendre son party: ceste coustume s'est pratiquée de tout temps, & se pratique encor maintenant.

Le iour donc estant venu, ou on deuoit punir ce Criminel pretendu, les Iuges luy commandent par leurs Sergens, de venir en la place publique. On l'ameine lié & garrotté dans le Carrefour, où vn nombre infini de peuple l'attendoit, pour voir la fin de son execution, se persuadans tous que ce crime (dont il estoit accusé à faux) deuoit estre rigoureusement puny pour donner exemple à l'aduenir,) aussi fut-il, mais non pas en

sa personne, ains de son hôte) on le conduit sur l'eschaffaut, son hôte estât present, on luy lit l'Arrest de la mort, & selon la coustume on luy demande, s'il y auoit quelqu'un en la compagnie qui voulust prendre la parole pour luy, il regarde de tous costez, & remarquât le Bonnet rouge, (bien dit-il) que mon innocence parle assez d'elle-mesme & qu'elle iustifie assez mes actions, pour auoir vescu en hôte de bien, & puis qu'il vous plaist, ie prends ce Bonnet rouge, que vous voyez, pour me iustifier, chacun regarde cest homme, & ne peut-on que s'imaginer, car il n'auoit aucune ressemblance d'un homme du pays de Suisse, toutesfois on le conduit sur l'eschaffaut, ou estant il fait venir l'Hôte, commence à declarer le nœud de la besongne, confronte les tesmoins

les rembarre, imprime la crainte aux accusateurs: verse la honte sur le front de Valesio, le peuple admire son eloquence, il declare la fraude & monstre comme la bougette auoit esté decoufue, outre ce, il fait aller chez l'hoste & decouure le lieu où il cachoit ses corps, & détranchoit les chairs humaines; Valesio pourtant infiste contre luy, & par des raisons superficielles tasche à palier son fait, luy monstre que le dit Marchand la vollé: le Demon alors le voulant prendre au piege, luy dit: puis que tu asseures avec tât de tesmoignage que cest Innocent est coupable de mort, & qu'il t'a desrobé, iurerois tu ta foy sur ce cas qu'il l'a fait? l'hoste aussi tost pour authoriser son discours, ç'a esté luy seul (dit-il) qui m'a pillé mon argent, & qu'ainsi ne soit, ie

veux que le diable m'emporte en
corps & en ame, s'il n'est vray de
ce que ie dis, le Demon alors ne
la fit plus longue, ains prend vne
figure horrible, il l'empoigne, &
l'emporte par le vuide de l'air, le
roulant ça & là, le choquant impe-
tueusement contre les murailles
qu'il rencontroit: & ainsi paya il
la perfidie dont il accusoit le pau-
vre Innocent qui aussi tost fut re-
cogneu & mis en liberté avec son
argent, les Iuges luy demanderēt
pardon de ce qu'ils auoient esté si
peu exacts à le condamner, luy ne
voulut autre chose d'eux pour son
depart qu'un acte de certificat de
la presente histoire, pour laisser à
la posterité des marques eternal-
les de la perfidie de Valesio.

De l'assassinat estrange du sieur Melander Citoyen de Paris, & comme les assassins furent surpris.

CHAP. XXXIII.

Silaville de Parisa cest aduantage par dessus toutes les autres villes qui sont en l'Vniuers, q; d'estre la pepiniere & la source de tout ce qui se peut trouuer de rare sous le Ciel, & si la renommee qu'elle s'est acquise sur les autres nations pour estre la demeure des plus beaux esprits du monde, est grande & à estimer, elle a beaucoup de parties qui rabaisent cét honneur, & qui luy contrebalancent cest aduantage, car en cōtr'eschange elle se peut dire aussi la retraite & la demeure ordinaire du vice; & n'estoit que la vertu y est vraiment recogneüe

& aduouee de quelques-vns, ie ne doute pas que le vice n'en partageast la premiere place; & certes plusieurs s'estonnent comme les meschancetez & perfidies qui s'y commettent tous les iours ne la font abîsmer pour les actions tragiques que nous y remarquons: mais de cecy on ne se doit aucunement estonner, Romulus Architecte de la premiere Republique du monde, n'esleua iamais ses triomphes, & ne planta point ce grand Colosse qui a commandé à tout l'Vniuers, car que le moyen de l'assemblage qu'il fit d'une infinité de bannis, refugiez & scelerats. Ainsi Paris sembleroit ne pouuoir viure sans ceste maudite & perfide engeance qu'elle nourrit au milieu de ses entrailles.

L'Histoire que ie vous veux descrire en fera foy, c'est d'un dome-

stique qui assassina son Maistre contre toutes les loix Diuines & humaines, & de l'hospitalité mesme. Le simple assassinat qui se commet entre deux personnes indifferentes est grand à la verité, & doit estre puni selon la rigueur des loix, mais le massacre que le seruiteur minute contre son Maistre est bié plus cruel, & doit estre puny plus rigoureusement, veu que le maistre tient son seruiteur comme sa personne propre, & ne se deffie aucunement de ses actions.

Dans la ville de Paris il y auoit vn honneste Bourgeois nommé Melander, homme opulent & qui auoit de grâdes commoditez; entr'autres qualitez & vertus ou il excellloit, il estoit grand Architecte, de tous costez il estoit appellé & recherché pour ce suiet: ce personnage auoit vn seruiteur qui estoit

marié (que ie nommeray Alexis)
homme sauuage & peu accostable;
toutes fois la cognoissâce que Melander en auoit dés long temps,
faisoit qu'il le retenoit en só logis
pour ses affaires particulieres, en
quoy ledit Alexis estoit assez versé,
car il y auoit six ans qu'il demeu-
roit avec Melander. Le trop de co-
gnoissance que luy dóna son Mai-
stre l'enfla du vent d'orgueil &
d'ambition, & perdit alors la co-
gnoissâce qu'il deuoit auoir de son
estre, & oublia ce qui estoit de son
deuoir pour se repaistre d'vne vai-
ne fumee de presumption, qui eut
vn tel ascendant sur luy, que mes-
prisant tout ce que son interieur
luy pouuoit suggerer touchant le
deuoir & le respect quil'obligeoit
enuers Melander, il minuta la to-
tale ruyne, & voicy la façon dont il
voulut proceder en ceste affaire.

Melander auoit vne maison proche de Paris, ou quelquesfois il alloit passer huit iours de réps, & mesme y tenoit vne partie de ses moyens, Alexis qui estoit marié & chargé d'enfans, poussé d'un esprit d'auarice, resolut de desrober son Maistre & de luy enleuer ce qu'il auoit de meilleur en icelle maison, mais autant de fois qu'il se mettoit ceste pensee en l'esprit, autant de fois la reiettoit-il, par ce qu'il ne se pouuoit imaginer le moyen qu'il deuoit tenir en vne si hardie & sanglante entreprise; routesfois come de nous mesmes nous sommes assez enclins au vice sans y estre poussez d'autre part, le diable subtil precepteur de ses escolliers luy persuada de s'accoster des vagabons & coupe-bourses qui sont d'ordinaire dās Paris. Ce qu'il fit, comme vn iour il alloit par

ladite ville pour certaines affaires de son maistre, & ce avec tant d'aduantage, qu'en ayât practiqué quatre ou cinq des plus fameux & des plus releuez, il les pria de venir au iour qu'il leur donnoit à vne lieüe de là en vne bourgade prochaine qu'il leur nommoit, & qu'il leur vouloit declarer quelque chose d'importance, tant pour leur vtilité que pour la sienne propre. Les volleurs & mauuais garnimés à qui il s'estoit adressé l'ayans entédu parler de la sorte, luy promirét qu'ils ne manqueroient point de se trouuer au lieu assigné, ce qu'ils firent: ils s'assemblerét tous au lieu dit au nombre de cinq, vn desquels estoit tauernier, l'autre masson, & les trois autres estoient alliez entr'eux de parentage.

Alexis qui leur auoit donné l'heure, le lieu & le iour, ne man-

que pas de s'y trouuer, ils s'entre-
saluënt & firent preparer le disner,
apres auoir beu à la santé l'un de
l'autre, & qu'ils sentirent leur cer-
ueau eschauffé, Alexis commença
à leur descourir ce qu'il preten-
doit de faire, Messieurs, dit-il, (si
Messieurs se doiuent appeller telles
racaïlles de gens) ie vous ay donné
la peine de venir en ce lieu, l'entre-
prise que i'ay en l'esprit est telle:
I'ay icy vn Maistre fort riche & o-
pulent, & qui a de grandes cômo-
ditez, ie me suis imaginé, voyant
d'autre part que nous sômes pau-
ures, qu'il y auoit moyë de faire icy
sa fortune, il nous le faut assassiner
secretement & emporter son ar-
gent, ie sçauray bien me démesler
du reste; cecy estant ouy de ses
compagnons, quelques vns ap-
prouuerent son conseil, les autres
n'y vouloient point cōsentir, touz

tesfois cela fut arresté entr'eux, Alexis deuoit estre conducteur de l'entreprise, comme scachant la piste des lieux, & les cinq autres deuoient suiure & luy obeyren tout ce qu'il leur commanderoit, vn de ces cinq au iour prefix amene vn petit batteau le long du fleuve pour emporter tout le butin (car le logis de Melander respondoit sur la riuiera) & ayant attaché sa nacelle au riuage, il vient de soir avec ses compagnons conduits par Alexis au logis dudit Melander qui y estoit pour lors, car c'estoit la saison des vendanges, en quoy ledit Melander estoit grandement riche & opulent.

Comme ils sont tous fix à la porte, Alexis frappe, la seruante à cause qu'il estoit tard, demande qui frapport, mais ayant entendu qu'Alexis respõdoit, elle ne fit au-

cune difficulté d'ouurir, toutes fois elle eut vncertain remord, quand elle leuid fuiui de cinq personnes, elle les fit entrer, & ferma la porte sur eux. A peine furent-ils en la cuisine, qu'à coups de marteau ils tuerent & assassinerent la pauvre Seruante, qui n'eut pas le loisir de crier, car ces bourreaux l'auoient atterree, & luy tinrent le pied sur la gorge iusqu'à ce qu'elle fust morte.

Ce premier coup estant donné Alexis conduit tout en furie sa troupe en la chambre, ou Menander luy vint au deuant, & luy demande quelle fureur le transporte & pour quelle raison, il fait vn tel rauage dans son logis? l'autre qui auoit fermé les yeux au respect qu'il deuoit à son maistre aussi-bien que les oreilles à ses remonstrances, luy dit qu'il auoit delibe-

ré de le tuer, & qu'il se recomman-
dast à Dieu. melander en ceste ex-
tremité ne sçait que songer, mais
resolu nonobstât que vieil & cassé
de leur vendre cherement sa mort
va pour se saisir d'une Hallebarde
qui estoit contre le cheuet de son
lit: mais Alexis qui preuit ceci fit
signe à ses compagnons qu'ils se
ruassent sur luy, ce qu'ils firent, ils
l'atterrerent & luy donnerent
vingt ou trente coups de marte-
aux, desquels ils luy fendirent la
teste de part en part, Voila de
grandes cruautéz & des barbaries
estranges en vn simple domesti-
que, mais il semble que la suite
fut encor plus inhumaine.

Melander auoit amené en son lo-
gis des champs vne de ses filles,
belle au possible, pour auoir soing
de regarder aux vendanges, & de
prendre garde à tout ce qui se fai-

loit pour lors dans le logis. Ceste fille estoit desia enaage de marier, & mesme on luy prattiquoit vn fort bon party si la cruauté de ces Tyrans ne luy eust coupé le cours de la vie. Elle estoit couchee dans vne chambre prochaine, & en mesme temps qu'elle entendit qu'on assassinoit son pere, elle s'estoit cachée dans la ruelle du lit, affin de fuyr le coup de la mort. Alexis toutesfois qui l'auoit les adresses du logis, ayant couché Melander par terre vint dans la chambre de ladite ieune pucelle, & l'ayant apperceüe qui se blottissoit dās la ruelle de son lit, il commande à ses compagnons de l'enleuer.

Ce qu'ils firent, ceste pauvre fille se prit alors à pleurer & gemir, Alexis qui auoit en ceste rencontre despoüillé toute honte & vergongne

gongne se sentit esmeu d'une vile
& impudique lubricité.

Dieu test-il possible que ton bras
soit inutile pendant que ce sce-
lerat fait des actions si barba-
res, que ne lances-tu ton fou-
dre pour escraser vians ces loups
rauffans, & ces tigres inhumains
qui fôt des violéces si execrables?

Alexis fit prendre la fille de Me-
lander, qui estant seule dâs le logis
de sô pere, croit envain au secours,
car outre que le logis estoit escar-
té du chemin ordinaire, le sombre
voile de la nuit leur fauorisoit. Il la
fait tenir à quatre, & d'une barba-
rie plus que tigresse lui rait sa pu-
dicité; non content de ce, il en fit
faire de mesme à tous ses compa-
gnons; de pouuoir icy exprimer
ceste action, & quels cris iettoit la
pauvre fille, se voyant reduitte en
ce miserable estat, il n'y a langue

pour diserte & eloquente qu'elle
soit qui le peut faire.

Ceste Fille parmy tous ces tour-
mens ne pouuoit faire autre chose
que souspirer & gemir, puis qu'il
ne luy reste q; ceste seule voye, ces
sanglots eussét rompu vn cœur de
diamant tant il estoit déplorable
de la voir en cest estat, mais ces a-
mes de brôze, nourries de fer &
de sâg, ne se peurent fléchir, il fal-
loit passer outre, puis qu'ils auoiét
esté s'auant. Ils la massacrerent à
coups de marteaux, & sâs autre cõ-
passiõ de sa ieunesse ny de sõ sexe,
l'estendirent morte par terre.

Les voila seuls dans le logis, A-
lexis est le maistre, il a les clefs de
toutes les chambres: ce fut alors
qu'ils barricaderent les portes: &
toute la nuit ils firent ripaille, bri-
sant, rompant, & renuersant tout
par le logis, enfin ils visiterent

routes les chambres, & firent leurs
aprets pour s'en aller la nuit sui-
uante: tout le long du iour du len-
demain ne se passa qu'en ris, ioye,
festins, (car ils auoient la clef de
tout) sur le soir apres auoir amassé
quârité de meubles des pl^r beaux,
& enleué vne bonne somme d'ar-
gent, ils sortirent sur la minuit, &
vinrent apporter tout leur larcin
dâs leur batteau qui estoit attaché
au riuage: là ils se deschargerent,
& retournerent cinq ou six fois au
logis de Melander, d'où ils tirerēt
les plus beaux meubles qui furent
dans le logis, & durant tout ce tēps
personne ne les vit iamais, c'est
enquoy Alexis se tint ferme, mais
Dieu qui voit tout ce qui se passe,
comme present, sçaura bien dé-
couvrir vn acte si impie.

Estant ainsi chargez d'argent, &
des meilleurs meubles qu'ils a-

uoient trouué au logis de Melander: Alexis fit le departement de tout le butin qui se pouuoit monter tāt en argēt mōnoyé qu'en autres meubles à huit ou dix mille escus, (& ne se faut estonner qu'un architecte fust si riche, car la vogue qu'il s'estoit acquise le faisoit ordinairement hanter chez les Princes & grands Seigneurs, outre qu'il demeuroid ordinairement dans son logis des champs à cause de sa vieillesse.)

Le partage estoit tellement dressé; que celuy qui auoit fait le plus de mal estoit le plus recompensé. Alexis n'oublia pas de se garder la meilleure part, comme l'Autheur & premier Agent d'une si insigne & signalee entreprise; chacun estant partiils se quittent, s'enioignans sur tout l'un à l'autre de ne descouurir rien de cest affaire;

mais en vain les conseils humains
présent fuir les arrests irreuocables
du Tout-puissant, il faut bon gré
mal gré qu'ils sortent leur effect, il
penetre au plus creux de nos pen-
sées & découure,

*Quæ sint, quæ fuerint, quæ mox ventu-
ra trahuntur.*

Deux iours se passent qu'on
n'ouit point de nouuelles de Me-
lander, ses Vandangeurs & Vigne-
rons s'estoient qu'il n'estoit pas
au logis (car personne ne leur ou-
uroit) enfin vn d'iceux vient à Pa-
ris pour voir s'il n'y estoit point, là
il rencontre Alexis qui s'esgayoit
dans les Tauernes & Cabarets à
qui il demande ou estoit son mai-
stre? Alexis vfa icy d'une feinte &
fit l'estonné, disant qu'il ne l'a-
uoit point veu, & qu'il croyoit
qu'il fust en sa maison des Champs,
& pour tesmoigner dauantage au

vignerons qu'il aymeroit passionné-
ment à entendre de bonnes nou-
velles de Melander, & qu'il se sen-
toit tout esmeu d'auoir ouy qu'il
n'estoit point en sa maison, il quit-
te ieux & compagnie, & s'en vint
en grande haste au logis de Melan-
der, ou estant fuiui de quatre ou
cinq des enuiron, apres auoir long
temps frappé à la porte, & veu
que personne ne respondoit, il for-
ce l'huis, ou de prime abord ils ap-
perceurent la seruante au milieu
de la cuisine estenduë morte par
terre. Vn saisissement alors les prit
tous en general, Alexis le premier
se debat, & dit tout haut qu'il ya-
uoit des voleurs dans le logis (en
cecy il ne se trompoit point puis-
que luy mesme il y estoit si auant.)

Ils montēt tous d'un mesme pas
en la chambre où ils trouuerent
Melander mort & tout martelé de

coups, Alexis alors qui auoit emprunté vn masque de feintise, se iette à corps perdu sur luy, Helas! dit-il, mon Maistre que vois-ie deuant mes yeux? te voicy donc assassiné miserablement, & par ma trop tardieue absence ie net'ay peu prester secours? Ah miserable & infortuné Alexis! quelle perte fais tu ce iour.

Ah! quantum Ausonia, & quantum tu perdis lüle?

Tu perds tout ton appuy, ton soustien, ta fortune, & où tu auois attaché l'ancre de tes esperances: tu perds ce que tu affectionnois le plus, bref, tu perds ton cher & aimé maistre. ô Dieu vengeur des assassins; punissez ce crime, & faiçtes en sorte qu'on en puisse decouvrir les aut heurs.

Il disoit ces parolles avec vn faux semblant tiré si au naturel,

Ee iiij

que ceux qui estoient presens, voyans mesme les larmes, que la feintise auoit distillé par ses yeux, croyoient que telles & semblables plaintes procedoient d'un pur & sincere amour, & d'une intime affection qui fust en luy, ils visiterent grandement estonnez, toutes les chambres, veirent la pauvre fille miserablement massacrée; icy Alexis recommence ses souspirs, & par un torrent de larmes veut persuader aux assistans qu'il ressent de grandissimes douleurs de cest assassinat, & de ce spectacle.

Le bruit d'un tel massacre courut & s'espandit aussi-tost aux oreilles des voisins, chacun y confluë, plusieurs de tous costez y abordent pour voir une si sanglante entreprise: Alexis demeure cependant dans la maison, comme maître du logis, reçoit tous ceux qui

venoient voir, & par ses tristes
inacoustumées tasche à voiler sa
perfidie, & leur faire preuue de sa
fidelité.

Mais quelques-vns plus prudens,
profondans & penetrans vn peu
plus auant en ceste affaire, mirent
en doute la perfidie d'Alexis, &
sourdement le sembloient accuser
du meurtre : les vns disoient que
les larmes qu'il iettoit estoient lar-
mes de Crocodile, & que tant de
sanglots en vn simple seruiteur ne
pouuoient prouenir que d'une
grande feintise; les autres l'excu-
soient, & remonstroient que ledit
Alexis ayant esté au seruice de me-
lander vn long espace de temps a-
uec esperance de meliorer sa for-
tune, se ressentoit à bon droit de
cette perte si desaduantageuse à
son bien, cōme estoit la mort ino-
pinée de son maistre.

Scinditur incertum studia , in contraria vulgus.

Les opinions balançoient , mais côme il y en a tousiours de mieux sensez dans vne cōpagnie , il y en eut deux qui opinerent contre Alexis , & qui furent d'aduis de le faire emprisonner , & que si d'auenture le proceder estoit iniuste , on tascheroit à reparer la faute. Et de fait au milieu de ses larmes & de ses souspirs , on se saisit de sa personne , & le prit on au collet ; lui estonné au possible de cecy , atteste les cieux , & les inuoque pour vangeurs d'une telle tyrannie , qu'il disoit luy estre faicte , & qu'à tort on le traittoit de la façon , que iamais vne telle penssee ne luy estoit montée en l'esprit , toutes ces vaines clameurs n'empescherēt pas qu'on ne le menast en lieu de seureté , ce pendant on dresse vn procez ver-

bal, on fait des inquisitions, & recherches de toutes parts & principalement ou estoit allé ledit Alexis depuis deux iours, & ce qu'il auoit fait, toutesfois les assassins auoient fait leurs affaires si secrettement, que personne ne pouuoit deposer contre eux: il n'y auoit que Dieu, & leur propre conscience, qui les pouuoit accuser: cecy fit qu'on esclargit le prisonnier, (iuste que d'autre costé son affaire ne fut pas examinée trop exactement.)

Il ne fut plustost sorti dehors, qu'il commença a trompeter par tout son innocence, & accuser mesme ceux qui l'auoient emprisonné de peu de iugement, il croit estre eschappé, & bastit desia des triumphes de ses cruautéz, & dresse des autels de sa tyrannie; mais pourtant le ciel n'est-il point sourd aux plaintes de tât de

sang respandu, qui luy crie vengeance, tost ou tard il sçaura bien en prendre punition exemplaire.

Six mois se passent, que ce crime comme assoupi dans le silence, & enseveli sous l'oubliance, n'auoit esté aucunement remué, les assassins croyoiēt qu'on n'en deust jamais parler, mais ils furent bien frustrez de leur opinion: car comme quatre desdits meurtriers, qui estoiet pere, fils, & gendre: & vn masson (ainsi que nous auons dit) se rencontrerent en vn certain village des enuiron de Paris, ils voulurēt se ressouuenir de leurs anciennes ligue, ils allerent dans la prochaine hostellerie, ou ils commencerēt à se resiouyr, & à se bien veigner par ensemble, on commence à couvrir les tables de toutes sortes de mets exquis, ils disnent & boient en baston rompu.

Or comme ils sont sur la fin de leur désert voicy arriuer dix ou douze Archers des Preuosts des Mareschaux qui estans lassez & fatiguez d'une longue traitte qu'ils venoient de faire, vinrent par cas fortuit & de hazard pour se rafraichir & boire vn coup dans l'hostellerie ou estoient nos assassins sans autrement longer à eux (Car leur meurtre n'auoit iamais esté decouvert) comme ils sont entrez ils despoüillent alors leurs manteaux afin de se mettre à table qui estoit la mesme, ou les meurtriers estoient assis leurs robes alors parurent & comme si le Tonnerre fust tombé dans la maison, nos assassins demeurent esperdus & ne scauent quel maintien tenir; qu'est-ce quand nostre propre conscience nous ronge le cœur, & que de nous-mesmes nous sentôs

le mal que nous nous faisons, ces quatre personnages sôt bourrelez dás leur propre interieur, de voir les Archers du Preuost des Marefchaux, ils ne parlent qu'en cachette, & la crainte leur a desia imprimé vne telle apprehension sur le front, qu'à peine peuuent-ils manger, ils palissent, tous leurs sens se gellent, bref la terreur captiue & lie leurs organes, & se persuadent qu'on les cherche, ils se rendent coupables d'eux mesmes, & desia ne se parlent plus qu'à l'oreille, ceste resiouyssance en laquelle il s'esgayoient auparauant est abbatüe, bref ils sont plus morts que vifs.

Les Archers se font apporter du vin, & ne songeoiet rié moins qu'à nos meurtriers; mais ils furent estonnez qu'en moins d'un tourne-main, ceux qui estoient aupres d'eux prirēt la fuitte, & lais-

ferent vin & viande sur la table, mesme ils s'en allerent sans payer ny compter avec l'hoste, qui estât formalisé de ceste façon de faire, nonobstant qu'il les cogneust de longue main, se faschoit: les Archers quiveirent qu'ils s'en estoient allez si secrettement, & qu'ils auoient laissé leur viande sur la table, demanderēt à l'hoste ce qu'auoient ces personnages à fuir de la sorte, l'hoste leur respond qu'il ne s'en peut assez estonner: il leur dit quelles gens ce sont, & qu'ils auoient quantité d'argent sur eux, bien que de leur propre ils fussent tres pauvres.

Alors les Archers consulterent par ensēble qu'il y auoit quelque chose en ceste affaire, & que sans doute lesdites personnes ayant esté espouuentez, deux auoient pris la fuite, qu'il les falloir pour-

fuiure. Aussi tost deliberé, aussi-tost mis en execution, on demande ou ils estoient allez, ils vont deux d'un costé, quatre de l'autre, & firét tant qu'ils les trouverent, eux voyant les Archers, les autres prirét la fuitte plus fort qu' auparauant, ce qui fit croire aux Archers qu'il y auoit de la maluersation en leur fait: on les attrappe, & de prime abord vn des Archers leur dit, qu'il auoit charge de les saisir au collet, & que s'ils ne vouloiét confesser le vol qu'ils auoiét fait, il leur alloit serrer les poulces de si prez, qu'il tireroit d'eux par force ce qu'il ne pourroit auoir d'amitié, (& de fait il prend le plus vieil, & luy dōne les osselets) le vieillard se sentant pris, ne contesta pas long temps, ains du premier coup dit qu'à la verité ils auoient tout quatre meritè la mort

mort, & qu'ils auoient fait de grands vols, il leur declara le massacre qu'ils auoient fait avec Alexis: dequoy ses compagnons penserent enrager en la place, par ce qu'ils s'estoient resolu à la façon d'Alexis, de ne rien confesser, nonobstant toutes les gehennes & tortures qu'on leur pourroit faire endurer, toutesfois il fallut confesser le tout, voyant le vieillard qui les auoit descouuert.

Outre plus, ledit vieillard confessa qu'il auoit faict mourir plus de soixante personnes d'age, & de sexe differens, dans sa barque, de laquelle nous auons parlé cy dessus, lors qu'il les passoit sur la Riuiere, & qu'il les cõduisoit dans l'entre-deux d'une Isle feignant de les passer, où il les submergeoit, & leur mettoit vne pierre au col, puis les iettoit dās l'eau, iusques à

450 HISTOIRE DES
la nuit, qu'il les despoüilloit, &
leur ostoit ce qu'ils auoient de
meilleur.

Dauantage il leur raconta com-
me vn iour mal-heureusement il
auoit assassiné vn ieune garçon de
seize à dixsept ans de la sorte, qui
n'auoit au plus que dix sols, & que
de tous les vols & massacres qu'il a-
uoit fait, il ne se ressentoit que de
cestuy-cy, comme estant cause du
mal-heur d'un des plus beaux, &
plus dispos ieune homme qu'il
eust iamais veu.

Cependant qu'il faisoit ceste
confessiõ vn des Archers escriuoit
& remarquoit dans vn papier tout
ce qu'il disoit. Alexis ayant ouy le
bruit de ceste prise, ne voulut de-
meurer le dernier, (car il est à re-
marquer que des quatre qui fu-
rent poursuiuis, il y en eut vn qui
se sauua, & qui vint aduertir A-

lexis, & son autre compaignon qui estoit Masson, de gagner au pied,) Alexis s'enfuit en Angleterre; & le Masson va en Touraine; où nous le reprendrons tantost.

Cependant les Archers ayans fait vne si bonne prise, retournerent en l'hostellerie pour reprendre leurs manteaux, tout le mode de ceste Bourgade ne scauoit assez s'esmerueiller de voir nos gés prisonniers de la sorte, les cognoissās à l'exterieur, & en apparence assez bonnes personnes.

Plusieurs quelques fois ont des humeurs hypocrites, & bien que nostre ame face paroistre des signes euidēs au dehors des passiōs que nous cachons au dedans, toutes fois en quelques vns. *Frons vul-tus, & oculi persaepe mentiuntur.* Il est bien difficile au temps ou nous sommes de cognoistre vn homme

par son exterieur les plus clairs uoyans y sont trompez, & porteront iugement d'un homme de bien qui en son ame sera grandement peruers.

Nos meurtriers sont amenez & conduits seuremēt à Paris, on travaille à leur procez, on fait ouyr les tesmoins qui pouuoient interuenir sur le soupçon qui estoit formé dès l'instant de la mort de Melander, le tout veu & considéré, ils sont cōdānez par arrest de la Cour à auoir le poing couppé & à estre rôpus tous vifs deuant la Maison de Melander, ce qui fut executé avec vne grande affluence & concours de monde. Vn d'entre ceux qui furent rompus, dit deuant que mourir, qu'il demandoit pardon à Dieu, au Roy, & à la Iustice, & qu'il meritoit de mourir encor plus griefuemēt qu'il ne mouroit

pour les grands & atroces crimes dont il auoit offencé la Toute puissance Diuine, & entre autre chose il dit qu'il estoit coustumier en allant par les champs, & dans les bois mesme qui sont autour de Paris d'estrangler les passans avec vne corde qu'il portoit à ce suiect, & que quád par rencontre les passans luy demandoient ou il alloit, qu'il leur respondoit qu'il alloit acheter vne Vache dont il leur monstroit la corde, & qu'ainsi il en auoit estranglé vne grande quantité en allant & venant.

Le Peuple estoit bien aise de se voir dépestre de tels assassins, parce que plusieurs en auoient resenti de grands dōmages & des pertes signalees, on leur demande où est Alexis & le Masson leur autre compagnon, mais ils font responce qu'ils n'en sçauēt aucune nouuel-

le ny aucun vent.

Ainsi ils moururent & furent punis miserablement de leur forfait, pour monstrier que l'esperance qu'ils auoient conceüe de n'en courir aucune peine qui fust inutile, Dieu scauoit bien où les attendre au passage, quād la mesure est pleine, il faut que la cruche se casse.

Reuenons maintenant à nos fuyars, l'un desquels est en Angleterre, & l'autre en Touraine, Celui qui estoit à Tours ayāt eschappé le peril qui luy panchoit sur la teste, auoit changé son nom & traualloit de son mestier ou de tous costez il estoit biē venu & appellé, parce qu'il estoit accort, & qu'outre plus il estoit assez excellent en son Art; comme de plus en plus son renom s'accroit parmi les Architectes & Massons qui de-

meurent en ces quartiers, vn iour
s'estant rendu amoureux d'une
ieune fille du Pays, par le consen-
tement de ses parens il la prit en
mariage, le voila au sommet de ce
qu'il pouuoit raisonnablement
desirer & pretendre; mais il luy es-
toit resté en l'esprit vn remord
qui le piquoit sans cesse, & ne le
laissoit aucunement respirer. Car
le sang respandu de ces Innocètes
ames luy crioit sans cesse vengean-
ce; mais son mal-heur qui le ta-
lonnoit, suruint principalemēt de
ce que l'un de ses voisins estant
marié, par enuie ou iouialité il luy
noüa l'esguillette, lequel tour es-
tant fait, il vint trouuer le marié
trois ou quatre iours apres, & luy
dit qu'asseurément il scauoit de
bonne part qu'on luy auoit noüé
l'esguillette, & que s'il vouloit
conuenir de prix raisonnable avec

luy qu'il luy desnoüeroit, le marié qui n'aymoit pas mieux que d'estre deliuré de ceste peine, sans toutesfois s'imaginer si c'estoit luy qui luy auoit nouëe, conuient de prix avec luy, & luy promettre de luy faire toucher quatre escus deuant & autant apres qu'il se trouueroit deliuré de ce mal, il receut tousiours la moitié de l'argët d'or ils estoient cōuenus par le marché, & quand son voisin fut guari, il le somme de luy bailler l'argët qu'il luy deuoit, lequel alors lui dit qu'il estoit vn affronteur & vn forcier, & qu'il falloit infailliblement qu'il l'eust enforcélé, de façõ qu'au lieu de le payer voyant que ledit Mafson resistoit tousiours en ses importunes demandes, il lui soustint qu'il n'estoit qu'un pipeur & qu'un forcier, & qu'il falloit le brusler celuy. cy qui auoit du cœur au ven-

tre & qui ne pouuoit souffrir vne telle iniure, le fait appeller en Iusti ce pour auoir reparatiō d'hōneur.

Les Iuges ayans meurement passé la veuë de l'esprit sur ceste affaire, d'un commun accord opinerent qu'il falloit que le masson eut ietté quelque sort en cecy, & qu'il estoit la seule cause d'où prouenoit l'origine du mal, ce qu'estant presque auéré (parce que dix iours apres les nopces, ledit Masson s'estoit vanté publiquement à quelques-vns qu'il auoit fait ledit acte, ce qui fut prouué & rapporté contre luy) il fut condamné à estre banny & fouëtté par les carrefours de la ville.

Il en appella aussi-tost au Parlement de Paris, où il fut amené, mais ce fut où il trouua sa mort, le téps estoit venu qu'il falloit estre recompensé de ses demerites: ainsi

qu'il est à Paris il est recogneu des habitans de la susdite bourgade, qui en mesme temps vinrent aduertir les heritiers de Melander qui le poursuiuent de tous costez, le font enfermer dans le cachot, & dépeschent si bien leurs affaires, qu'ayant faict ouyr des tesmoins qu'ils auoient confronté contre les autres, il fallut auerer le faict, & ainsi il fut iugé à la mesme peine que ses compagnons, sçauoir est à auoir le poing coupé & à estre rôpu tout vif deuant le logis du defunct, & ceste derniere execution se fit en l'an 1616. cinq ans apres l'assassinat de Melander.

Il ne restoit plus qu'Alexis qui seul estoit le pl^r coupable, il auoit pris la route d'Angleterre, croyant qu'il eschapperait la vengeance du Ciel qui le talônoit de près, mais il se vid biē esloigné de ses proiects,

car en passant par Calais, il arriua
(comme les volleurs ne se peuent
empescher de mal-faire) qu'il en-
tra chez vn gros Marchand, ou il
desroba vne quâtité d'argent mō-
noyé pendant qu'on estoit au Ser-
mon, là dessus il est pris & con-
damné à estre pendu, mais il ne fut
pas si peu sage que son compagnō,
car il n'en voulut pas appeller, iu-
geant bien qu'il empireroit son
marché; comme il fut à l'eschelle
il commence à declarer toute sa vie,
& ainsi furent-ils tous punis d'a-
uoir attenté vn si mauuais acte cō-
tre le pauue Melander, si ceste hi-
stoire semble longue à quelques-
vns, ils trouueront à tout le moins
que ie n'ay passé vn seul point de
la verité.

*De la vie, actions, vols, & massacres
du Petit Jacques, Roué à Paris
sur le vingtcinquiesme
de son age.*

CHAP. XXX.

LA Jeunesse est au iourd'huy de-
prauée, & tout l'ordre & l'é-
conomie de la Nature est tellement
renuersé qu'on ne peut rien re-
marquer de ceste ancienne simpli-
cité qui animoit nos ancestres; &
à peine peut-on voir vn ieune ho-
me pour le iourd'hui qui aye quel-
ques traits de bien seance, de pru-
dence & de sagesse, ils se laissent
rousrauir aux Aquilons de leurs
propres passions, & parmi l'occeâ
de leur ardeur fracassent le plus
souuent leurs Nauires contre les
escueils & rochers d'une signalee
& notable impudence.

La cause de cecy est que le vice est impuni, & que les parés leur iettēt la bride sur le col pour leur laisser faire ce qui leur vient en l'esprit; ainsi outre que cest aage de soy est assez lubrique & suiecte à se laisser perdre, si d'autre part on la pousse au mal, il ne faut pas s'estonner si on voit croistre & surgir tāt de malheurs, & puis apres les parens se mangent les poulces & se sentent bourrellez d'un repentir immortel de ne les auoir chastié en leur ieunesse. Voila ce quien arriue le plus souuent.

Siecle admirable & peruers! combien produits-tu auourd'huy de Monstres? combien d'enfans n'aissent auourd'huy pour manger les entrailles de leurs parés, & les faire consommer en pleurs & tristesses? quel est l'homme qui ne fust rauy en admiration de voir le petit

l'acques dont nous parlons en ce chapitre qui n'eust esté dis-ies-merueillé de le voir mourir en la fleur de sa ieunesse, & en la plus tendre escorce de son aage pour auoir fait tât de vols & de massacres qu'il auoit fait si ieune qu'il estoit. Certes ie peux dire avec verité, (comme ayant veu la fin de ses iours) qu'il n'y auoit pas vn de ceux qui assistoient à son execution à qui les cheueux ne dressassent en la teste, tout le monde s'estonnoit de voir les furies des enfers, & le vice racourcy en vn si petit corps, aussi le commencement de sa naissance n'auguroit rien de bon pour luy, ses parens l'auoient laissé viure en trop grande liberté, depuis que nous perdôs le respect & le deuoir qui no^s oblige enuers les peres & meres, nous perdons bien-tost celuy qui nous lie &

astraint enuers Dieu, & à vray dire lorsque nous mesprisons les bons preceptes & enseignemens de nos parens, riéne nous succede qu'au mal, & principalement durans nostre ieunesse, cest aage est le plus enclin au mal.

Petit Iacques dès l'aage de 15. à 11. ans se débaucha & quitta ses parés pour s'adóner à vne vie toute sau- uage, il courut quelque temps par la France, & apres auoir employé vn an à son cours il reuint chez son pere, qui pour la trop grande bon- té qui estoit en luy, ne fit aucun conte de le chastier comme il me- ritoit, ains il luy pardonna & le receut comme auparauant.

Ainsi les parens gastent leurs en- fans & sont cause de tout le mal- heur qui leur arriue par apres, pe- tit Iacques fut quelque 6. mois a- uec s^{on} pere, mais s^{on} esprit qui ne se

pouuoit arrester le fétit esmeu de
s'en aller encore vn coup, il prit le
plus beau & le meilleur de l'argét
que son pere auoit dans son buffet
& s'enfuit, deslors il commença à
se débaucher tout à fait, & à sui-
ure la piste des mauuais garnimés,
il s'enrolla sous les estendars d'un
Seigneur qui pour lors conduisoit
vn gros Regiment (car c'estoit au
têps de ces premiers troubles, ou
la Frâce perdit le beau seiour de la
paix par la diuisió des plus grands
de cest Estat qui s'estoient retirez
du seruice du Roy pour se canton-
ner en diuers endroicts & Prouin-
ces de ce Royaume.)

Comme il est dans l'armee il fit
mille extorsions & rauages, & ia-
çoit qu'il fust petit, si est ce qu'en
meschanceté & inuentions maudi-
tes & peruerfes il estoit le premier,
iamais il n'estoit arresté, par tout
où il

où il alloit il laissoit des marques de son effronterie & impudence, de sorte qu'il s'accrut le nom de petit lacques, comme par excellence d'un meschant personnage. Ceux qui eurent le plus à souffrir en ceci ce furent les pauvres villageois, il leur faisoit dix mille maux, tant pour leur faire confesser où estoit leur argent il les faisoit tenir à quatre & leur chauffoit la plante des pieds, tantost il les mettoit dans un vand & les tenoit enchainez long-temps de la sorte, quelques fois il donnoit de grandes taillades à ceux qui ne luy vouloiēt apporter leur rançon, & par tout où il passoit il exerçoit des cruautéz estranges, quelques fois aussi il estoit si cruel & si perfide qu'il violoit de pauvres filles qui luy venoient à la rencontre.

La hardiesse qu'il auoit & le grād

courage qu'il tesmoignoît en toutes les récontres où il se trouuoit, luy auoit desia acquis vn grand renom par dessus ses compagnons; & bien qu'il fust ieune & de gresle taille, personne ne l'eust osé affronter, car en 4. ans qu'il fut en l'armée il en tua cinq en duel, qui ne voulans endurer de ses brauades l'auoient appelé au combat desquels meurtres il eust bien tost sa remission (bien qu'il deuoit estre puny.)

L'armée estant congediee il fut contrainct de chercher autre forme de viure, comme c'est l'ordinaire des soldats quâd ils sont cōgediez, la faincantise s'empare de leur cœur, & ne voulant s'anddonner au trauail sont contraincts ou de volder ou de mandier l'aumosne, ainsi fut petit lacques, qui ne pouuât se reduire ny à trauailler,

ny à mandier, parcequ'il se croyoit trop grand seigneur, il s'en vint dans la forest de Senlis, & détrouffoit tous les passans, plusieurs Marchands de Soissons, Compiègne & des autres villes prochaines y furent surpris; vn iour il vint iufques à Clermont avec cinq ou six de ses cōpagnons armez de pistolets & carabines, ou ils vollerent le coche d'Amiens & enleuerēt tout ce qu'il y auoit dedans.

Les Preuosts des Mareschaux de Senlis & de Compiègne ayant eu le bruiet de ces volleurs, les coururent pour les prendre, ce qui estāt venu à la cognoissance du petit laques, il en aduertit ses camarades, & se retire dans Paris, comme le limaçon dans la coquille, ou depuis il fit des actes hors de la commune imagination des hommes.

Estant en ceste ville il commen-

ça plus que deuât de faire ses vols accoustumez de maniere qu'il fut choisi vniuersellement des coupeurs de bourses pour leur maistre, & gardoit telle subtilité en toutes les affaires que iamaïs ses cōpagnós, mesme les plus affidez ne pouuoient sçauoir ou estoit son logis, il leur donoit le rendez vous d'ordinaire sous l'arche prochaine du Cheual de bronze ou ils se rencontroiēt tous sur la minuit, & prenoiēt leur departemēt pour le iour ensuiuant: ceux qui le iour precedēt n'auoient riē fait, ny executé aucune entreprise estoient punis, quelquesfois ledit petit Jacques leur donnoit vn coup de poignard, & les iettoit dans la riuiera, on le craignoit par tout & personne ne l'eust osé attaquer tant il estoit furieux.

Tantost on le voyoit dans le Pa-

lais habillé en forme de Medecin,
& mesme il alloit souuêtes fois aux
lieux ou il croyoit qu'il y eust des
malades, & par ceste façó d'ha-
bits il remarquoit les endroits &
le moyen côme il pouuoit entrer
dedans, & le lendemain lesdits ma-
lades ne manquoiet pas d'estre dé-
robez, quelques fois il se cachoit le
long d'un iour dans vn logis, & le
soir il venoit ouurir la porte à ses
compagnons, rantoist il se faisoit
suiure de quatre ou cinq vauriens,
& espioit l'heure qu'il n'y auoit per-
sonne au logis de quelque Coseil-
ler, ou de quelque Aduocat de la
grand Chambre, & venoit de hau-
te lutte demander à parler à Mon-
sieur, on les faisoit entrer en la sal-
le, puis quand le maistre de la mai-
son estoit descendu, petit Iacques
lui sautoit au collar avec ses armes,
& ne le quittoit point iusques à ce

qu'il ne leur eust promis l'argent qu'ils demandoient, il fit ceste impudence en plusieurs endroits de Paris, & à l'endroit mesme des plus huppez, mais on ne l'eust sceu decouurir, car quand on l'eust pourfuiui, le lendemain il s'habilloit d'une autre façon, & ne pouuoit on iamais le trouuer ny auoir prise sur luy.

Vn iour il y auoit trois ou quatre de ses compagnons qui estoient condamnez d'aller aux Galeres pour auoir coupé quelques bourses, luy se sentant offensé de ce iugement, prit vn de ses camarades, & vachez celuy qu'il croyoit estre le principal moteur de ceste affaire, où n'ayant rencôtré personne, il entre subtilement dans la salle & prend vn plat bassin d'argent qui y estoit, le maistre du logis arriue du Palais & les voyant dans la cour,

leur demande ce qu'ils cherchent, ilsluy respondirent qu'ils auoient perdu vn petit Barbet & qu'ils croyoient l'auoir veu entrer dans son logis, ainsi ils eschapperent, mais quād il fallut disner & qu'on vint pour lauer les mains on ne trouua point de bassin, on cherche de tous costez, mais le Maistre de la maison se ressouuenant d'auoir veu petit Iacques & son compagnon dans son logis, dit alors qu'infailiblement les chercheurs de Barbets auoient pris le bassin, il n'en fut iamais descouuert autre chose.

Ce que nous auons raconté iusques icy des actions de petit Iacques ne sont que fleurs au regard des espines que nous verrons en la suite de sa vie & en la fin tragique de ses iours, long-temps deuant qu'il allast en l'armee pour

vn certain vol qu'il auoit fai& en
sa rendre ieunesse, il auoit esté
condamné à estre pendu par des-
sous les aisselles, & de fai& cecy
fut executé deuant le Chastelet, &
n'auoit ledit petit Iacques que
neuf à dix ans.

La honte & la vergongne d'a-
uoir esté conduit sur l'eschelle, &
pendu en vn lieu si infame au mi-
lieu d'vn nôbre inombrable d'assi-
stés deuoit auoir pris pied sur lui, &
effectuer quelque chose à l'encon-
tre de ceste peruerse & maudite
inclinatiô qu'il auoit de tousiours
dérober, mais tât s'en faut que ce-
la eust aucun poids sur ses mœurs,
qu'au contraire ce luy fut comme
vn ascendant plus facile pour le
faire porter au mal.

Il ne fut plustost deliuré de cest
eschec qu'il fit pis que deuant, il re-
prit ses premieres brisees & ne

peut se destourner de poursuiure
& consommer la vie dans les mes-
mes vols.

Chose estrange qu'on ne peut se
dépestrer du vice depuis que nous
nous y sommes laissé captiuer! le
meschant a cela de mauuais en soy
qu'il ne se peut faire quitte de ses
mauuais inclinations quand il
veut, & faut qu'il y ait vne grace
bien particuliere lors qu'un homme
qui s'est laissé enuieillir au mal &
qui a croupi long-téps dans le vice
reprend les anciennes traces & ve-
stiges de la vertu, il faut que le
Ciel y coopere grandement, aussi
sont-ce des graces particulieres
qui ne se font pas à toutes sortes
de personnes indifferentes, ains à
ceux qui s'en sont rendus dignes
par leurs œuvres ou merites.

Les parens du petit lacques taf-
cherent à le ramener au sentier de

la vertu par plusieurs fois, mais toutes les extorsions qu'ils peurent faire n'eurent aucun poids sur son ame, tousiours il estoit en débauche & parmi les coupeurs de bourses.

Vn iour comme il estoit à la Foire saint Germain, il prend deux ou trois de ses compagnons & firent cinq ou six tours dans l'enclos de la foire, ou mesme il y eut deux Bourgeois qui perdirent leurs Bourses insensiblement mais comme il tourne çà & là, il apperçoit vn certain Aduocat qui marchandoit vn plat bassin chez vn Orfeure. Or ne pouuant conuenir de prix avec le Marchand, il remit l'argent qu'il auoit préparé pour le payement dudit plat dans ses pochettes. Petit lacques ayant veu ceste bourse, & la grande quantité d'argent qu'il y auoit, il

accoste vn de ses camarades, & luy montrant au doigt ledit Aduocat, il luy dit qu'il falloit necessairement qui luy apportast la Bourse, & qu'autrement ils ne seroient pas bons amis ensemble, l'autre luy respondit qu'il ny auoit aucune apparence de faire vne telle entreprise, & que de hazarder parmi tant de Noblesse qui estoit là outre les Gardes du Roy qui sont pour conseruer l'argeterie, il n'osoit s'acheminer à ceste entreprise. Petit Jacques appelle vn autre qui luy fit le mesme refus; & certes il estoit bié difficile de faire ce qu'il commandoit, car plusieurs prenoient garde aux actions de tous ceux qui estoient parmi lescits Orfeures.

Luy voyant que pas vn d'eux ne vouloit obeyr à ses commandemens, cachoit vne haine mortelle contre eux, & nourrissant vn sou-

uenir de les punir en bref, il leur dit, vous ne voulez pas entreprendre cecy & m'apportez des difficultez imaginaires, il ne m'en chaud, vous me le payerez, cōsiderez seulement la façon que i'y procede ray, & remarquez par quelle maniere i'entens d'attrapper la bourse de mon Aduocat.

Leur ayant dit cecy il les quitte & s'approche insensiblement du lurscōsulte qui auoit chāgé de boutique & marchandoit vn plat basfin chez vn autre Orfeure, parce qu'il n'auoit peu conuenir de prix avec le premier; comme il est assez proche de luy, il vient de roideur, le pousse & luy fait tōber sō chapeau, l'Aduocat se retourne pour voir celui qui le pouffoit, Petit laques luy dit que ce n'estoit point luy, & qu'il estoit luy mesme pouffé de plus haut, Or comme l'Ad-

uocat va pour recueillir son chap-
peau, il met sa main dans sa po-
chette, & prend la bourse, & n'y
en eut point de plus estonné que
l'Aduocat qui estant conuenu de
prix avec l'Orfeure ne trouua
point d'argét pour le payer, & pé-
sa recevoir vn affront del'Orfeure
qui luy vouloit faire prendre sa
marchandise malgré lui, l'appellant
Normand & affronteur, & n'eust
esté que quelqu'un de sa cognois-
sance suruinist, laquerelle fust mō-
tee plus haut, & y en eust eu quel-
qu'un qui eust porté les coups.

Petit lacques ayant ioué son offi-
ce & attrapé ce qu'il demandoit, il
reuinst vers ses compagnons, &
leur monstra la bourse qu'il auoit
couverte, ils s'en resiouyrent en-
semblement; mais leur resiouys-
sance fut bien courte, car cestuy-
cy couuant vne haine immortelle

contre eux leur commanda de le
suiure, ce qu'ils firent sans songer
à ce qu'il leur preparoit.

Il les meine derriere les Char-
treux, ou feignant d'aller voller
quelques manteaux aux Escoliers
qui sont assez coustumiers de se
promener en ces lieux, & sur le
Mont de Parnasse qui est tout pro-
che, il en tire vn à quartier, cōman-
dant à l'autre de l'aller attēdre sur
le Mont dudit Parnasse, & qu'il
auoit quelque chose de cōsequēce
à luy cōmuniquer, cependāt cōme
il se promene avec ce premier, il
luy dit tout en furie, qu'il estoit vn
coquin, & qu'il luy prenoit enuie
de le tuer, l'autre se retourne &
luy demande la cause de sa fasche-
rie, & pour quelle raison il luy di-
soit ces parolles? Petit Iacques
voyāt qu'il cauſoit, tire son espee
& luy donne au trauers du corps

fans que personnel l'eust apperceu.

De là il vient trouuer l'autre camarade à qui il auoit commandé de se tenir sur le Parnasse, & qui l'attendoit en bonne disposition de faire quelque coup (car il ne songeoit à rien moins qu'à la perfidie qui deuoit en bref estre executée sur luy.)

Petit lacques le vint trouuer tout en colere, & de peur que son compagnon découurist qu'il luy vouloit du mal, il l'accoste du commencement d'un visage assez riât; l'autre luy demande ou est son camarade, petit lacques à ces mots prend un poignard & luy dit, tiens le voila, il faut que tu le suiues & que tu ailles avec luy, ainsi il vsoit souuent à l'endroit de ses plus intimes amis, & les massacroit de peur d'estre découuert, principalement quand ils estoient contre-

uenus à ses commandemens, iamaïs il n'estoit en s^{on} logis, depuis qu'il sortoit le matin, il estoit quel que fois huiet iours entiers, s^{ans} retourner; le plus souuent on le voyoit dans l'Vniuersité avec vne infinité de frippons d'Escoliers : son jeu ordinaire de nuit estoit de tirer la laine, de crocheter les bouteilles de ceux qu'il rencontroit.

Il auoit ceste coustume, le plus souuent quand il voyoit que ceux à qui il s'adressoit, ne luy resistoient pas, de leur pardonner, & de les renuoyer, sinon quād il se sentoit pressé de la faim; car alors à la moindre parole de trauers qu'on luy disoit, il iettoit son homme par terre.

Le traitterois en celieu d'une infinité de petits vols & bouffonneries; (ainsi les doif-je nommer au regard de tant d'autres infames actions

actions qu'il a fait, comme de trāf-
poser des bouteilles, prédre la viā-
de en la broche & raur le pain aux
Boulangers: mais ce n'est point là
où ie me veux arrester, iagoit qu'il
ne viuoit iamais d'autre chose.

Vn iour ils s'imagina de prendre
l'habit de Minime, & de s'en aller
aux grandes maisons, faire sem-
blāt & feindre de faire la queste, ce
qui reussit si bien, qu'en peu de
temps il acquit vne grande quan-
tité d'argent; ce mestier commen-
çoit à luy plaire, & auoit vne si
bonne grace avec cest habit que
tout le monde croioit infailible-
ment qu'il fust Religieux du con-
uent des Bons-hommes de Cha-
liot; il fut bien vn mois avec ledit
habit, à aller de costé & d'autre
dans les ruës, & aux bonnes mai-
sons de Paris, mais voyant qu'il
s'estoit accoustumé en vain de la

fortes'il ne poursuiuoit sa fortune plus auant, il prit la hardiesse de venir coucher aux Bons-Hommes de Vicennes, & leur fit croire qu'il estoit Religieux de la Prouince de Tours: on luy demande son Obedience, qu'il monstra aussi tost fort bié cachetee (peut-estre qu'il auoit massacré quelque Religieux dudit ordre, & qu'il auoit retenu son obedience pour s'en seruir en temps & lieu,) on luy donne vne chambre, & fut quelque quinze iours qu'il logeoit là dedans, & venoit assez souuent à Paris, durant le seiour qu'il fit en ce Conuent, il alla à saint Maur & à Fontenay, ou sous ombre de deuotiô, il prenoit tout ce qu'il pouuoit trouuer de bon.

Mais deuant que de partir du Conuēt, il ne s'en vouloit retourner à vuide, cela estoit hors des es-

perances & pretensions qu'il auoit
conceu au comencement: il trou-
uoit le moyé de crocheter la porte
ou estoit l'argent, laquelle à cause
qu'elle n'est commune à tous, &
qu'il n'y a qu'un Religieux qui en a
la clef & le maniemét, n'est pas au-
tremét bien cadénassée; comme il
vint vn iour à Paris il apporta vn
ferremét pour crocheter la porte
dudit Religieux; il ne manque pas,
sur la minuit comme tous les bös
Peres ont la coultume d'aller à ma-
tines, il fit semblant d'auoir quel-
que indisposition & de n'y pou-
oir assister, pendant quoy il cro-
chette l'huys, & prend vne gran-
de somme de deniers qui estoit
dans vn coffre, de là il le referme
subtilement, & se vint recoucher.

Le lendemain matin il se leue,
& prend congé du Superieur; re-
tourne à Paris, où estant il re-

cômença derechef à faire ses ques-
tes accoustumées, par ainsi il o-
stait toute la pratique à ceux de la-
dite Religion, qui s'estonnoient
d'où venoit ceste fraude, car le pl^s
souuent quand quelqu'un d'eux
alloit en un quartier, on leur di-
soit que des-jails auoient eu l'au-
mosne & qu'on la venoit de dōner
à un de leurs Freres: cecy les met-
toit en alarme, & ne se pouuoient
aucunement imaginer, qu'on leur
iourast un si mauuais tour.

Ainsi petit Iacques en allant ça
& là, faisoit de grāds vols dans les
maisons Bourgeoises, on luy bail-
loit entree par tout, sans doute ny
suspçon de la malice qu'il cachoit
sous son habit, mais comme il est
bié difficile de faire tousiours vne
mesme actiō sās estre découuert, il
aduint que les Religieux du Bois
de Vincennes, ayans recogneus

que ce voleur les auoit seduits, ils en aduertirēt les Archers, affin de prendre garde, leurs baillans vn memoire particulier de son port, sa façon, & l'habit auquel on l'auoit recogneu; cela fut cause qu'ó en fit quelques enquestes dās Paris; mais il scauoit si bien se détourner de ces coups, & trouuer les brisees qu'il rendoit tous leurs efforts vains & inutiles, toutes fois on le trouua vn iour aupres de S. Eustache qu'il sortoit du logis d'vn Bourgeois ainsi que le Questeur des Bōs. hōmes entroit dās la porte; quād il vit ce nouueau Minime, il se ressouuint aussi-tost du drolle duquel on parloit. C'est pourquoy il aduertit les Lacquais du logis de le saisir au collet, ce qu'ils firent, ils coururent apres luy iusques à la ruë de Montmartre, là ils l'outragerent grandement à

coups de bastón & à coups de pieds, mesme le penserent traifner en prison; mais deux ou trois de ses Camarades & associez vinrent au secours & le deliurerēt de la main de ces Laquais.

Petit Jacques qui les auoit remarquez, leur garda bonne, & se promit de se vanger du tort qu'on luy auoit fait; le lendemain il prēd vn autre habit & vint subtilement assez proche du logis ou demouroient lesdits Laquais ou il sceut leur nom, leur demeure, d'où ils estoient, & quels estoient leurs parens, ayans sceu tout cecy, il donne assignation à deux ou 3. de ses Compagnons pour se trouuer dās vn certain logis ou on le cognoissoit, assez proche des Marets du Temple, & de là il escriuist ceste Lettre à vn des Laquais dudit Bourgeois qui se nommoit Fran-

çois le Maire, en voicy la coppie qu'on m'a donnee depuis peu. Ce Volleur escriuoit au nom du pere dudit le Maire comme s'il eust esté à Paris, & qu'il le fust venu voir, la teneur de la lettre portoit ces parolles.

Mon fils, ie suis venu exprez en ceste ville pour vous communiquer quelques affaires qui sont venuës en nos quartiers: il y a long-temps que vous demeurez icy sans faire aucun fruit, ie trouue un bon party pour vous en nostre pays, que vous ne deuez negliger, il n'est pas tousiours temps de semer, il faut quelquesfois recueillir? ie fusse bien allé en vostre logis, mais il eut peut-estre semble à vostre maistre que ie vous eusse desbauche: c'est pourquoy ie serois bien aise que vous me vinssiez trouver aux Marests du Temple ou ie suis logé, ce porteur vous y conduira, ie feray apprester le des-ieuner, si d'adventure vous voulez amener vostre compaignon il se-

ra le bien venu pour la reception, nous tacherons de vous recevoir au mieux qu'il nous sera possible, à Dieu.

Ceste lettre fut apportee quand on instruisoit s^o procez, & depuis peu de temps i'en ay eu l'original, quand elle fut cachetee il prend vn de ses petits coupe-bourses, & luy enseigne le logis ou il deuoit porter ladite lettre.

Le Lacquais l'ayant receue manque pas de venir & d'amener son compagnon, qui furent conduits au logis qu'auoit assigné le petit lacques, là du commencement on leur dit, & principalement audit le Maire, que son pere estoit en ville, & ce pendant qu'il auoit commadé le des-juné, qu'il leur pleust de s'asseoir à table, ce qu'ils firent, croyant que ce qu'ó leur di soit fust vray, apres

qu'ils eurent desjeuné, petit lacques entre, & les saluë, eux le voyans le recogneurët à peu prez à sa face, mais l'habit qu'il auoit pour lors, faisoit qu'ils estoient suspendus en leur opinion: mais ce fut le plaisir quand petit lacques retourna dans vne petite chambre voisine, & qu'il reuint avec son habit minime. Alors les lacquais quitterent la table, & iugerët bien qu'ils estoient perdus, petit lacques incontinent les fit saisir & dépouiller tous nuds, puis apres il leur donna les estriuières, en sorte qu'ils estoient tous deschirez de part en part, & les fouëttant, il leur demandoit s'ils se souuenoient bien de l'autre iour ou ils l'auoient si bien frotté.

Tous leurs cris & clameurs ne leur seruirent de rien: petit lacques d'une cruauté plus que bar-

bare, les fit chiqueter avec vn cousteau qui ne faisoit toutesfois qu'éfleurer la peau, & ainsi tous sanglans il les mit dans vn tonneau plein de plume ou ils passerét leurs matinees: rien ne leur seruoit de crier, car le logis estoit esloigné de la rue, personne ne hantoit en ce quartier là, à cause que le chemin est détourné: ainsi apres plusieurs autres indignitez qu'il commit sur leurs personnes il les réuoya tous remplumez côme des oiseaux: & pour n'estre recogneus ils quitterent tous dés l'heure le logis, & vinrét demeurer en vn autre quartier afin que si les lacquais venoiét avec main forte pour les surprendre, ils ne trouuassent que le nid.

Voila comme petit lacques les paya, & leur rendit ce qu'ils luy auoient presté au double, & au triple; il ne tint point au maistre de faire toutes sortes de recherches

pour attrapper lesdits volleurs, mais les enquestes furent inutiles aussi bien que tout ce qu'on auoit fait auparauant.

Après auoir discouru de sa vie, & veu comme il s'estoit manié durât sa ieunesse, venons maintenant à sa mort, & voyons si elle est autant tragique & estrange, comme l'auoient pronostiqué les actions de sa vie.

Les anciens Romains gardoient ceste coustume en leurs sacrifices, que quand on faisoit quelque hecatombe aux Dieux, ou qu'on leur dresseoit quelques vœux, le Pôitife auoit la teste couuerte, & le reste des assistans en signe de reuerence & de respect, auoient la teste decouuerte: ceste coustume se pratiquoit en routes les ceremonies & sacrifices qui se faisoient tant aux Dieux de la premiere classe, qu'à leurs inferieurs, & de-

cendans excepté à Saturné, qu'on n'ome le temps, quand on luy faisoit quelque sacrifice, le grand Prestre deuoit auoir la teste decouuerte.

Les anciens ne nous ont voulu ombrager autre chose par ceste fable, sinon qu'il n'ya chose si cachée & si abstruse que le temps ne decouure, rien ne luy peut estre caché, il decelle en fin tout, & les secrets les plus couuerts sont eueitez par le temps.

Ainsi petit Iacques deuoit craindre qu'en fin ses affaires ne vinssent à paroistre, & que le iour ne decouurist tât d'impietez, meurtres & massacres qu'il pensoit estre cachez dans la nuit du silence. Comme de fait le Ciel qui voyoit à decouuert toutes les vaines imaginations & pretensions de ce volleur, ne voulut plus l'og temps

le laisser sur la terre, c'estoit trop
endurer des Rodomôtades de cét
Ixion, il falloit que le foudroyant
Iupiter le releguast aux peines &
supplices qu'il auoit merité durât
sa vie.

Ainsi iadis les Geants enfans de
la terre voulant accumuler monta-
gne sur montagne, & amonceler
fautes sur fautes, furent deiettez
de leurs vains & inutiles desseins,
Dieu ne peut laisser le pecheur lóg
temps en cest estat quand il mes-
prise ses graces, & que la mesure
est pleine.

Petit Iacques auoit mené vne vie
estrange, mais sa mort fut aussi
grandement horrible, & à bien
considerer on trouua vne estran-
gere resolution & de sanglantes en-
treprises en vn ieune homme de
25. ans comme il estoit.

La renommee de ce volleurs' au-

gmentant de iour en iour dans la ville de Paris & 120. lieües à la ronde où il auoit des corréspodâces & auoit faiât de grands vols. Les Preuosts des Mareschaux estimerent qu'il estoit de leur deuoir de le pourluiuere, ils eurent le bruiât qu'il estoit allés enuiron de la forest de Fontainebleau & de Melun, ils donnent le departement de leurs troupes, & font vne cheuauchee vers ladite forest, mais la subtilité de petit Iacques les trompa, car ayant eu le bruiât des Archers il quitte la forest, & se déguisant en villageois passa au milieu d'eux sans estre recogneu, mais en vain s'échappe celuy qui traïsne son lien; les Archers n'ayans rien trouué de ce qu'ils cherchoient apres auoir couru tout le pays d'autour Fontainebleau, ils reuinrent en ceste ville où ils eurent aduis par vn

mesme de la compagnie de petit
lacques ou estoit son logis. Celuy-
cy s'estoit retiré de sa bande il n'y
auoit que deux ou trois iours pour
vne certaine querelle qu'il auoit
eüe avec luy.

Les Archers & preuosts des Mares-
chaux ayās sceu au vray la demeu-
re & retraitte du susdit volleur,
l'épierent à diuerses fois pour le
surprédre sans qu'il s'en donnast
autrement de garde, parce qu'il
croyoit qu'on n'eust osé l'attaquer.

Vn iour comme il estoit dans vn
tripot assez proche de la rue S. mar-
tin, il commença à appercevoir six
ou 7. Archers qui entrèrent dedàs
le ieu de paume, le sang luy mon-
tre incontinent au front, & se
sentit comme tout changé outre
son audace ordinaire qui ne flé-
chit iamais qu'en ceste rencontre,
toutes fois il fit si bien qu'il s'é-

chappe, & sans faire aucun semblant du soupçon qu'il nourrissoit en son cœur, il entra en la rue S. Martin, les archers en mesme tēps l'ayās recogneu le suivent de l'œil & vont apres luy le long de ladite rue, où ils remarquerent qu'il entroït dās vn certain logis qui estoit de sa cognoissance (c'estoit le lieu où demeuroit vne ieune fille qu'il auoit débauchee & qu'il entretenoit) l'ayans remarqué entrer là dedās, ils attēdent quelque temps pour voir s'il ne sortiroit point, mais ayās veu qu'il ne sortoit personne du logis, ils cōmēcent à frapper à la porte, il vient demander par la fenestre luy mesme ce qu'ils vouloient, bien qu'en son cœur il n'ignoroit point la cause de leur venue, icy il s'arma d'vne forte & fier resolution, voyant aussi bien qu'il ne pouuoit eschapper le
peril

peril de mourir, & de leur vendre bien cherement sa mort.

Les Archers voyans qu'il ne vouloit ouurir, commencent à vouloir foncer la porte, luy il se barricade dedans son logis, renuerse tables & escabeaux, & met tout contre la porte, c'estoit le premier estage ou il estoit, incontinent il se transporte & dit alors à sa garce qu'il falloit mourir avec luy, & qu'autrement il voyoit bien qu'il ne pouuoit eschapper.

Ceste fille au commencement crainctiue d'une affectiō plus qu'admirable cherissant son pretendu mary (car elle esperoit de l'espouser) met la teste à la fenestre, & fut veuë de tous ceux qui estoient presens avec armes en la main coniuurer contre les assistans.

Vn grand tumulte se faict, les Archers aduertissent que le petit

Iacques estoit dans le susdit logis; ce nom fit assembler plusieurs personnes autour de la maison pour en voir la fin, d'autres Archers y accoururent, & comme il ne vouloit point ouvrir la porte, on prend des eschelles pour entrer par les fenestres, luy incontinent charge deux autres pistolets & autant de Carabines qu'il auoit, & attendât ses gens au piege les couchoit en ioüe & les renuersoit par terre, il y en eut quelques vns de tuez & plusieurs blessez, la Garce à mesme temps qu'il deschargeoit ses coups rechargeoit, & par ce dernier office luy tesmoignoit combien elle auoit d'affection pour luy, la furie l'auoit totalement saisi, & ne sçait ce qu'il fait, la rage le precipite, & mesme se iette au trauers des coups & met la teste à la fenestre afin de receuoir quelque coup de

mousquet & de mourir en sa chambre sans auoir ce deshonneur d'aller en greue.

Le peuple de plus en plus s'assemble, & desia plus de cent personnes auoient inuestis la maison, armez de mousquets, piques & hallebardes, quelques coups se tirent, petit lacques apres auoir tiré dix ou douze fois, les balles luy manquent plustost que la poudre; cependant il fait tousiours bonne mine & ne laisse pas de tirer. mais quand on eut recogneu que ses coups estoient vains, & qu'ils ne portoiēt pas, & que le dāger en estoit hors, vn des Archers dit à ses compagnons qu'il n'y auoit plus de hazard & qu'il n'auoit plus de balles, alors on approche les eschelles pour monter en haut cependant que par le bas on auoit desia foncé & rompu la porte en plus de cēt

Chacun admire la constance de ce volleur, & ne peut-on assez s'estonner comment il a l'assurance de se rebeller contre tant de gens: Mais il resistoit en vain, car son heure estoit venue, la rage pourtant faisoit de grâds efforts en luy, il ne se pouuoit reloudre à se rendre, on l'eust bien tué durant tous ces combats, mais on desiroit l'auoir vif pour en tirer vne exemplaire punition en public, pour son regard, il ne desiroit autre chose que d'estre frappé de quelque coup de mousquet, & ne sçait-on comment il ne se donna pas vn coup de cousteau au trauers du ventre, car il estoit comme desespéré, mais celle qui estoit avec luy l'empescha de ce coup.

En fin apres vne longue escarmouche de part & d'autre, il fallut

ceder à la furie, la porte estant rompue on viét à la foule, & le saisit-on au collet avec sa garce, il est incotiné mené en la prisó, ou apres plusieurs plaintes & informatiós dressees contre luy, il fut condamné à estre rompu tout vif, ce qui fut executé vn peu apres, tout le monde s'estonnoit de voir vn tel courage, & vn cœur si déterminé en vne si tendre ieunesse.

Le iour de son execution, le bruiet qui s'estoit espandu par la ville de sa prochaine mort, fit assembler vne grande quantité de peuple en la place ou on le deuoit executer, de façon qu'à peine pouoit-on remuer pour la gráde multitude qui s'y estoit asséblée mesme des villageois d'icy autour qui auoient eu le vent de ceste prise.

Tout le peuple de Paris ne se pouoit assez esmerueiller de voir vn

si ieune personnage mourir si ignominieusement pour auoir fait tant de meschancetez & des cruauttez si barbares cōme il auoit fait, quelques vns déploroient sa ieunesse & regrettoient sa perte, les autres estoient bien aises d'auoir coupé l'herbe sous le pied à ce voleur, & d'estre par ce moyen garantis du soupçon qu'il leur eust peu donner.

Pour moy il faut que ie confesse que ie n'en fus aucunement touché, ains ie fus grandemēt ioyeux de le voir puni de ses forfaits & de merites, car aussi-bien y auoit il trop lōg-téps qu'il trainoit son liē. Voilà la vie de cest infame voleur, ou plusieurs cognoistront comme il est important aux peres & aux meres de chastier leurs enfans en ieunesse, & de ne les laisser viure selon leurs libertez.

*De l'Aduenture estrange arriuee en la
ville de Rouën, en la personne
d'un Aduocat.*

CHAP. XXXV.

LA pauureté apporte bien sou-
uent de grandes alterations, &
changemens en nos humeurs, & la
nécessité verse vne grande cōtrain-
te en nos passions, iusques là mes-
me que l'homme se laisse raur à
des actiōs que d'autre part il reiet-
teroit pour infames, si la nécessité
ne le contraignoit à les embrasser.
On a veu plusieurs de tout temps
qui contraincts de ceste pauureté,
bien qu'en leurs cœurs ils re-
cognoissoient leurs fautes, rou-
tesfois s'y sont laissez emporter
malgré eux.

De cecy l'histoire que ie vay vous
décrire en fera foy, là où on verra

504. HISTOIRE DES
bien de grands maux apporte &
engendre avec soy la pauvreté, &
que ce n'est à tort que chacū la fuit
avec tant de soin & de cure, veu les
dangers & les mal-heurs qu'elle
entraîne avec soy.

En la ville de Rouën premier
port de mer, & vn des plus fameux
havres de la France demouroit vn
fort honneste personnage & d'af-
sez bonne famille, que ie nomme-
ray Meris qui dès le commence-
ment de son aage promettoit de
faire quelque bonne fortune, cō-
me ayant de grandes correspon-
dances en Espagne, & en Angleter-
re, par le moyen des nauigations,
& voyages qu'il y fit à diuerſes
fois, Mais la fortune luy changea
bien-toſt le bō viſage qu'elle luy
faisoit pour luy verser l'aigreur de
ses absintes, qui fut deux ans apres
estre marié, ou il tomba en yne fi

chétive condition & pauvreté que
à peine pouuoit-il auoir de quoy
viure.

Ainsi les effets de la fortune
sont variables, tel pense estre au-
iourd'huy en seureté, & à couuert
à l'abry de tout le bon heur qu'on
puisse esperer en ce monde, qu'en
moin d'un rien il se trouue rabais-
sé d'autant plus bas qu'il croyoit
estre guindé & esleué auparauant;
telle est l'inconstance des choses
d'icy bas, qui ne prennent nour-
riture ny accroissement que dans
les vicissitudes & changemens, &
entre tous ceux qui sont sous le
globe lunaire, pas vn ne se peut di-
re affrâchy ny exempt des tributs
que nous deuons à la fortune, elle
graue mesme ses loix sur les Empi-
res, & sur les republiques les plus
soudouilleuses & triomphantes.

Meris l'auoit esprouuee douce

au commencement, mais à la fin il fut cōtraint d'aduouër que la rose ne se retrouue que dans les espines, & que.

Sape sub ambrosio melle venena latent.

Toute sa perte ne prouenoit que d'un Nauire ou estoit le meilleur de ses richesses, qui par le moyen d'un grand fracas, & d'une bourasque furieuse qui se fit sur la mer, fut impetueusement enseuely sous le courant des ondes, sur la coste d'Angleterre.

Ceste tempeste fut le premier choc que la fortune voulut donner à son bon-heur, lequel depuis fut secondé de plusieurs autres, en sorte que le pauvre Meris se vit miserable, reduict au plus bas qu'il pouuoit estre, toutesfois la fortune ne peut rié esbransler de son courage, ny de la genereuse resolutiō de sa fēme qui s'apelloit

Helene, ces deux cœurs estoient infésibles aux coups de la fortune, nonobstant que réduits au petit pied, & qu'esloignez de ceste grande faueur qu'ils auoiét autrefois, ne perdirent iamais courage, constance admirable en deux ieunes mariez ! ils vescurent dix ans ensemble de ceste façon le mieux qu'ils peurent, & pour mieux dire durant tout ce long espace ils ne firent que viuoter.

Or nonobstant que le sort eust depouillé l'un & l'autre de toutes commoditez temporelles, la nature pourtant s'estoit esgayee à prodiguer ce qu'elle auoit de plus beau sur Helene, c'estoit l'abregé & le compendium racourcy de toutes les perfections qu'on eust peu desirer en vne femme, elle auoit la grace, le maintien & le port tout noble, rien ne luy man-

quoit de ce qu'on eust peu desirer pour la bien sceance. Mais ce qui estoit plus à admirer en ceste femme, c'est qu'elle aymoît son mary, de sorte, que nonobstât toutes les poursuittes que plusieurs de Rouen luy firêt, & mesmes des plus releuez, qui luy promettoient des richesses infinies, elle ne voulut iamais faire faux-bód à son hôneur, Ains côme assourdie aux plaintes & desirs amoureux de ceux qui la poursuiuoient à instance, elle les mesprisoit vniuersellement, & se mocquoit de leurs prieres. En quoy Meris se voyoit grandemêt heureux parmi son mal-heur, & benissoit le ciel de l'auoir si bien adressé & conduict à vn port si favorable.

Entre tous ceux qui luy mōstroiet de l'affection, & qui se disoiēt passionnez pour elle, cestoit vn cer-

tain Aduocat que ie nommeray Carilde, affin de ne troubler le repos de ses cendres, & de ne rafraichir le iour de sa mort dans la memoire de ses parens : cest Aduocat vn hōme d'assez basse taille, mais rempli & bien nourri, aussi dès sa ieunesse auoit-il esté esleué en vne fort bonne maison, outre qu'il estoit de fort bon lieu, entre ceux de Normádie il estoit le premier, qui avec plus d'ardeur & de flammes courtisoit Helene, mais il ne sceut iamais esbrásler son amour, c'estoit vn roc au milieu des ondes qui se mocquoit des vêts & des tēpestes, à ceci se bloit fauoriser en quel que chose la demeure de Meris, & le seiour qu'il faisoit quelques fois aux chāps, tantost il luy faisoit des presens, tantost des offres d'amitié, tantost il l'importunoit par prieres : Mais on pouuoit dire de

luy ce que les Ambassadeurs du
beau-pere de Turnus rapporterēt
de Diomedē à qui ils demandoiēt
secours contre Ænee.

-- *Nil omnibus actum*

*Tantum impensis operum, nil dona
nec aurum.*

Nec magnæ valere preces.

Tous les efforts furent vains &
inutiles, car la chasteté plus qu'ad-
mirable estoit le bouclier & la tar-
gue ou se rôpoient tous les coups
de l'Aduocat, toute sa sciēce ne luy
seruit de rien en cecy ce qu'ayant
recogneu il y voulut employer
la Retorique d'un sien voisin qui e-
stoit fort esueillé.

Iusques icy Helene auoit dissimu-
lé toutes les importunes requē-
stes sans le declarer à son mary,
mais voyant que leur impudence
croissoit de iour en autre, elle reso-
lut de luy en decouurir quelque

chose, ce qu'elle fit vn soir cōme
il fut retourné des champs.

Mon cher Meris (dit-elle) vous
sçauiez combien entiere a esté mō
affection depuis le temps que la
nopciere lunon nous a conioincts
sous le doux lié d'Hymé, vous l'a-
uez peu recognoistre, & la grande
amitié que ie vous ay consacree, en
peut seruir de garād; aujourd'huy
eme trouue importunee de trois
ou quatre personnages qui veu-
lent attenter contre mon hōneur,
entre autre de Carilde, que vous
cognoissez, il fait ses efforts de
pouuoir esbransler ma constance,
mais ses démarches ont esté inuti-
les en cecy.

*Ille meos primus qui me sibi iunxit
amores*

*Abstulit, ille habeat secum ser-
uetque sepulchro.*

Ia à Dieu ne plaise que ie vous

voulusse faire faux-bond, & lperdre ceste belle fleur que i'ay cultivée avec tant de passion, que plus l'Enfer s'entr'ouure pour m'abîmer viuâte dás les obscures grottes de ses prisons: *Ante pudor quam te violem*. C'est pourquoy ie me conseille à vous, & vous demande par quel moyen nous pourrons sortir de ces importunitéz.

Meris qui prestoit attentiuemēt l'oreille à ces parolles, cognoissant que sa femme luy portoit vne grande affection, & que d'autre part iamais elle ne le trôperoit, (luy respondit) m'amie ie sçay biē que ie ne sçaurois assez recôpēser la bonne affection que vous auez pour moy, ainsi de ma part vous promets vous asseurer que ie n'iray iamais au contraire de ce que vo⁹ me promettez, & de ce que reciproquement ie vous ay promis, toutesfois

toutesfois vous voyez ou nous a
reduit la fortune, & combien la
pauvreté nous tourmente; pour
moy ie suis d'aduis que vous fei-
gniez de promettre à Carilde de
contenter ses desirs, moyennant
quelque somme d'argent, du reste
laissez moy faire, ie trouueray bié
le moyen & l'inuention de m'en
dépestrer.

Helene qui entendit son mary
parler de la sorte, commença à ca-
resser Carilde des yeux plus qu'el-
le n'auoit iamais fait, luy s'aperce-
uant de ceste nouuelle & extraor-
dinaire bien-ueillance, ioyeux ou-
tre mesure se persuada qu'il fal-
loit battre le fer pendant qu'il es-
toit chaud, & qu'il ne pouuoit
esperer qu'une bonne issuë de ce
qu'il se promettoit, car il voyoit
ceste rigueur qui contrecarroit
auparauant ses volonteiz abba-

tües, & son amour, reciproquement receu de sa pretendüe maistresse, il en aduertit son compagnon, qui participoit des ja à sa joye.

De plus en plus Carilde se familiarise avec Helene, & ayant pillé vn baizer dans le iardin odoreux de ses jouës pourprines, il creut estre au sommet de ses felicitez, il luy promet toutes sortes de richesses, & de biens, en fin elle qui feignoit au commencement estre attirée de ses promesses, se communiqua de plus en plus, & luy dit que non seulement sa pauvre télà contraignoit de le recevoir, mais qu'il auoit acquis vn tel aduantage en ses bonnes graces qu'elle ne pouuoit viure sans le voir.

Ces feintises embraserent tellement l'affection de Carilde, qu'il ne partit point d'avec Helene sans

auoir tiré son consentement, & sceu le iour & l'heure qu'il ladeuoit venir trouuer, luy ayant au prealable promis cinq cens escus, Ce qui estant complotté par ensemble, le iour venu, Carilde ne manqua pas de se trouuer à la porte d'une Eglise où estoit donnee l'assignation le soir, là il trouue sa Maistresse qui l'attendoit de pied ferme, en bonne intention de brauer son homme & d'emporter son argent.

A peine se furent-ils entreueus, que Carilde demande à Helene si son mary estoit au logis, & quand il deuoit reuenir, elle d'une feintise accorte luy repartit, il n'y est point, Monsieur, s'il vous plaist y venir vous y serez le tres-bien venu, mon mary ne reuiendra point d'icy à huiet iours, car il a quelques affaires qui luy sont

suruenues à Paris, & moy-mesme afin qu'il ne sçache que vous venez en mon logis, i'ay fait en sorte qu'ils s'en soit allé, vous pouuez venir en toute assurance, Carilde qui d'autre costé brusloit & se consummoit dans sa propre flamme, la suit & luy baille vne bourse pleine de pistoles, qui faisoient bien environ quatre cens escus, & de ce pas allerent au logis de ladite Helene, ou Meris s'estoit caché afin d'acheuer ce qu'il auoit entrepris, car il vouloit ensemble auoir l'argent & les habits de Carilde.

Comme ils sont entrez on faict faire du feu, & desia l'Aduocat commēçoit à se deshabiller pour assouuir ses desirs charnels, quand Meris vient avec vn baston & luy descharge vn grand coup sur l'eschine du col, qu'il fit tomber par terre tout estourdi, il redouble

son coup & fit tant qu'il le tua tout à fait.

Helene ne croyoit pas qu'il le deust tuer, elle fut grandement estonnee quand elle le vit mort estendu à ses pieds; son mary pourtāt la rassura, & luy dit qu'elle ne prist aucune crainte de ce corps, & qu'il feroit en sorte qu'il ne seroit iamais recogneu, il le prend donc sur son dos & commande à la femme de se mettre au liēt, ce qu'elle fit: luy cependant s'en vient directement par vne porte de derriere dont il scauoit le destour, & entre dans le logis dudit Aduocat, où la nuit & le sommeil le fauorisant, il descharge le corps immediatemēt au lieu où on a de coustume de s'esuacuer, & le met en sorte que celuy qui le trouueroit iugeast qu'il fust mort en ce lieu.

Or le iour precedent ledit Ca-

ril de auoit aduertit son compagnon de toute l'affaire comme, & Helene luy auoit promis de luy donner acciez en son logis: il arriua donc que le compagnon du susdit Ad-uocat se leue sur la minuit, à cause d'un flux de ventre qui l'incommodoit depuis quatre ou cinq iours, & comme il vient aux lieux communs il apperçoit que Carilde y estoit, il fut quelque temps à l'attendre ne voulant l'importuner, mais voyant qu'il ne venoit point, il va pour parler à luy & le tire par la manche, ce qui fit que le corps tomba à ses pieds.

Cet homme bien estonné préd la fuitte & ne scait quel maintien tenir, mais s'estant vn peu rassuré il approche & vit que Carilde estoit mort, aussi tost il se douta qu'il pourroit auoir esté trahi en la maison d'Helene par la faction de

Meris, qu'il cognoissoit dés long
temps estre assez haut à la main,
c'est pourquoides peur qu'il ne fust
accusé de l'auoir tué (car on l'auoit
veu leuer) il le recharge sur s^{on} dos
en resolution de le reporter deuant
l'huis de Meris.

Iusques icy nous au^{ons} veu c^{omme}
la pauureté nous c^{on}trainct & nous
pousse quelquefois à embrasser
des actions vitieuses & meschâtes,
bien que de nostre interieur nous
n'y ayons l'inclination aucunem^{ent}
penchante, voyons maintenant ce
qui arriua du pauure Carilde apres
sa mort, il y a de la plaissanterie e-
strange, & des aduentures peut-
estre inouyes & inexcogitees.

Le compaignon de Carilde ay^{ant}
rechargé le corps sur son dos, le
vint rapporter au mesme lieu d'o^ù
on l'auoit sorti, & le planta le long
de l'huis de Meris, de là il sen

retourna en son logis sans estre aucunement apperceu: Helene par cas fortuit pour quelq; defect de nature, voulant sortir sa porte (il estoit enuiron vne heure apres minuit) elle fut estonnee, que l'ayant ouuerte, le corps de Carilde tomba dans sa maison, elle s'escrie à lors & toute espouuëe dit à son mary, quel l'Aduocat reuenoit dans le logis, meris se releue en sursaut & la rassure, luy disant qu'elle ne prist aucune peur du mort, & qu'il porteroit si loing qu'il n'auroit point aucun suiet de retourner: elle se couche donc, luy cepédant recharge pour la seconde fois le corps du mort, & se promet en soy mesme de le porter si loing qu'il ne retournera iamais; cōme il va le long de la ruë pour le porter en la riuere, il entedit vn grand bruiet qui se faisoit au bout de ladite ruë,

la peur alors qui n'auoit encore rien effectué sur luy, commença à auoir prise sur son courage, il craignoit d'estre trouué avec le corps & d'encourir la iuste punitiõ qu'il auoit meritee, cela le fit reserrer en vne petite rüe qui trauersoit, afin de voir ceux qu'il entëdoit venir, & se sauuer de la rencõtre qu'il pouuoit faire d'eux, mais sa crainte se changea biẽ tost en allegresse, car ceux de qui il entendoit le bruiët estoient volleurs de nuit, qui venoient de faire vn vol de deux fiesches de lard au logis d'vn Boulanger nommé Philippes du Bois. Cõme les larrons passoient par la petite ruelle où estoit Meris, il entendit qu'ils se disoient l'vn à l'autre: il y a icy vn bon Tauernier, il faut icy laisser nostre lard & aller voir s'il y a du bon vin, la resolutiõ se prend, ils mettent leur sac dans

vne descente de caue qui estoit dás
ladite rüe, & le couvrirēt au mieux
qu'ils peurent avec de la paille qui
s'estoit rencontrée en ce lieu par
cas fortuit.

Meris qui s'estoit retiré en vn
coing, ayant apperceu tout cecy
s'imagina qu'il n'auoit que faire
d'aller descharger plus loing, il
approche du sac, & ayant manié le
lard il ouure le sac & change son
cadauer au butin que les larrons
auoient recelé en ce lieu, & prend
les brisées de son logis ou il trou-
ue la femme toute éplorée, qui
n'osoit se coucher.

Quand elle l'apperceut qu'il re-
uenoit chargé, elle pensa alors se
palmer, car elle s'imaginait qu'il
n'auoit peu se deffaire du corps de
l'Aduocat, mais il la rappaisa quand
il luy môstra le lard qu'il auoit eu
en eschange, & la rendit grande-

ment esmerueillée de l'accident qu'il luy raconta, ils se recouchent assurez du double vol qu'ils auoient fait, qui ne fut descouvert que fort peu de temps apres.

Venons maintenant reprendre nos gens qui se trouueront tantost bien empeschez. Durant que Meris estoit retourné en son logis, les larrós qui estoient allez chez le tauernier susdit, firent tirer à boire sur l'esperance qu'ils auoient de vendre leur denree à l'hoste; quand ils eurent bien beu & qu'ils eurent contenté leurs appetits, ils contér, & pour tout payement dirent à l'hoste qu'ils auoient vne quantité de lard à luy vendre, & que s'il vouloit conuenir de prix avec eux qu'il en tireroit bon marché, le Tauernier respond qu'il n'auoit pas accoustumé d'acheter chat en poche, & qu'ils luy fissent voir leur

marchandise, & qu'apres auoir
veu la denree il auroit plus de vi-
gueur & de hardiesse à l'ache-
ter.

Les larrons s'en vont donc au
lieu où ils auoient laissé leur sac, &
l'ayans trouué, sans songer qu'on
leur eust baillé vn Aduocat en es-
change de leur lard, ils l'apportēt,
trop bien sentirent ils la pesanteur
plus grande que celle de la charge
qu'ils auoient auparauant portee,
estans arriuez en l'hostellerie ils
dessient le sac, qui ne fut pas si tost
ouuert que l'hoste apperceut la
reste de Carilde, il commence aussi
tost à s'escrier (car il cognoissoit
le personnage) ah miserables! qu'a-
uez vous fait; vous avez tué le
escur Carilde, & vous estes si ef-
frontez de me l'apporter en guise
de lard. Les larrons plus estonnez
que luy se regardoient l'vn l'au-

tre, & ne ſçauoient quel maintien
ny quelle poſture tenir, l'autre in-
ſiſtoit contre eux & les menaçoit
deſia de les faire prendre au col-
let, & d'enuoyer querir les parens
du mort; eux d'autre coſté le prie-
rent de ne dire mot, & qu'ils ſça-
uoient bien ou ils auoient pris ce
butin, que de les accuſer du larcin
ny de l'aſſaſſinat on ne pouuoit,
veu qu'ils ny auoient aucunement
trempé, mais qu'ils reporteroient
le corps ou ils l'auoient pris, ce
qu'ils firent bien eſmerueillez d'v-
ne telle rencontre, & ſe diſoient
l'un à l'autre, compaſſon te ſem-
bloit-il que ce fuſt lard ou Aduo-
cat? il n'y a perſonne qui voyant la
greſſe ne iugeaſt que ce ne fuſt vn
pourceau, comment ſ'eſtil donc
changé? diſant ceci ils arriuent
à l'endroit du Boulanger où ils
auoient deſrobé le lard, là où

remontans au pignó de la maison par lequel ils estoient entrez, ils remettent l'Aduocat au lieu où ils auoient pris le lard, & se retirerét.

Durant ce temps le Boulanger qui auoit force besongne pour ce iour, appella vn sien seruiteur qui se nommoit Marin, afin qu'il alast au moulin, le seruiteur se leue enuiron sur les quatre heures, le Boulanger luy commâde de s'ap- prester pour aller au moulin, Marin luy respond, qu'il n'ira ja s'il n'a desieuné, & qu'il vouloit manger vne grillade du pourceau qui estoit pendu au croc, on luy donna donc permissiõ d'en aller couper ce qu'il desiroit, il prend vne eschelle, & comme il est monté pour couper son lard, l'Aduocat, l'eschelle & le seruiteur tombent l'un sur l'autre, le Boulanger

accourt avec sa femme qui croioit
trouuer Marin estendu mort par
terre, toutesfois il leur dit qu'il
n'auoit aucun mal, & qu'il ne s'e-
stoit aucunement blessé à cause
qu'il estoit tombé sur le lard: le
Boulangier ne s'esmeut aucune-
ment, mais quand il vint à regar-
der à ses pieds, & qu'il vit la teste
de l'Aduocat qui passoit hors du
sac, à cause qu'il s'estoit deslié, il
tomba pasmé hors de soy, & à pei-
ne sa femme le peut-elle faire re-
uenir: en fin estonnez à merueille
de ce changement, ils s'aduiferent
de l'oster de là, le Boulangier auoit
vn ieune poulain fort farouche, il
le fait venir, & luy ayât mis vne sel-
le & la bride, il lie l'Aduocat dessus
en forte qu'il ne pouuoit tomber,
puis il lui attache vne lâce sous les
aiselles & luy mit des esperons aux
talons, ce ieune coursier estant é-

quippé de la sorte on le condui-
t en la rue, il n'estoit au plus que fix
heures du matin aux plus courts
iours de l'hyuer. Le Boulanger
croyoit le perdant de veüe le per-
dre quant & quant tout à fait, co-
me il arriua, car ainsi que le ieune
poulain alloit son chemin, il ad-
uint qu'un des esperons de l'Ad-
uocat le picqua plus fort que de
coustume, cela luy fit prendre la
fuitte, & courut de telle sorte qu'il
vint décharger son Aduocat dans
vn puits qu'on bastissoit au milieu
de la rue. Voila toutes les aduen-
tures du pauvre Carilde, & ce qui
luy aduint apres sa mort.

Que

*Que les assassinats & massacres ne
peuvent estre cachez Avec un
exemple admirable sur ce
subiect*

CHAP. XXXVII.

C'Est vne chose recogneuë de
tout temps pour maxime,
que nous ne pouuons éuiter la
toute-puissance de Dieu:

*Nam sequitur Nemesis ultor à tergo
Deus.*

En quelq; lieu qu'un homme puisse
aller quand il a fait quelque mes-
chant acte, sa propre cōscience est
le bourreau qui le poursuit & qui
le tallonne; on en a veu vne infini-
té, qui par vn ie ne sçay quel de-
stin se sont venus enrether dās les
filets qu'ils fuyoient, & ne se sont
peu empescher de se venir preci-
piter dans les lieux qu'ils tenoient

auparauant pour suspects.

En voicy vne histoire tres-ample que ie pretés cotter en ce chapitre. Il passa à Rouën vn Marchād de Dauphiné, que ie nommeray Bertrand, homme riche & de grād traffic, qui apres auoir fait vne bōne fortune à courir les mers, resolut en fin de se confiner en son pays & y passer le reste de ses iours; il vient donques à Paris pour se faire payer de quelque argent qui luy estoit resté.

Ce Marchand auoit vn homme avec soy, fin & rulé, qui voyāt peut estre que son maistre estant de retour en son pays, on luy donneroit son congé, delibera de se garnir auant son depart: il luy prit enuie trois ou quatre fois par les chemins de le tuer, mais ses desseins estoient à l'instant renuersez par le peu de moyen qu'il rencontroit pour vne telle execution.

En fin passant par dedans les vignes d'Argenteuil sur le soir, il le terrasse & luy donne cinq ou six coups de poignard par derriere, de là il prit tous ses papiers & se vint faire payer des creanciers que le-
dit Bertrand auoit à Paris.

Or il est à noter q; le susdit serui-
teur n'auoit esté veu ny ouy d'au-
cun, sinon d'un aueugle, qui vn
peu apres l'exécution passoit par
lesdites vignes, & mesme demân-
da au seruiteur quel bruiet il auoit
entendu, lequel luy respondit que
c'estoit vn malade qui demandoit
l'aumosne, l'aueugle passe sans
songer à la perfidie de l'assassin.
Mais voyons comment Dieu scau-
ra bien decouurir ce secret.

On fut long-temps à attendre
Bertrand en son pays, & voyans
qu'il ne venoit point comme por-
toient ses promesses, ses parens se

douterent du malheur qui luy estoit arriué, ils enuoyent vn homme exprez pour prendre langue tant à Paris qu'à Roüen, celuy cy fait toutes sortes de perquisitions & recherches, mais n'en ayât ouy aucun vent, il en fait sa déposition au Parlement pour rechercher plus profondement ceste affaire, toutesfois ses inquisitions furent vaines, car on alla bien chez l'hoste où il auoit logé, mais comme il ne fit que passer à peine s'en souuenoit on.

Cependant on laisse la cure de tout cecy à Monsieur le Lieutenant Criminel, qui ayant pris la cause en main donna des Commissions par tout pour le trouuer, entre autres il commanda à vn Sergent de s'enquerir si depuis sept ou huit mois on auoit point apperceu quelque nouveau Marchand le-

uer boutique, le sergent fit tant qu'il recogneut le seruiteur de Bertrand pour nouveau Marchâd; sur cecy le Lieutenant suppose vne fausse obligation, & fait prendre ledit seruiteur au collet, qui estât mené en la prison, dit au sergent qu'il se scauroit bien dépestrer de ceste embusche pourueu qu'il n'y ait point autre chose, ces mots estans rapportez au Lieutenant, il le fait approcher, & luy dit qu'à la verité on l'auoit pris pour vne fausse obligation, mais qu'il estoit accusé d'auoir tué vn Marchand de Dauphiné, & que s'il vouloit s'ayder qu'il tascheroit à appaiser le tout, & faire en sorte qu'il n'en seroit point parlé, le seruiteur changea alors de couleur, & croyant qu'il en pourroit eschapper par argent luy dit qu'à la verité il connoissoit que Dieu estoit iuste d'a-

uoir découuert vn crime si caché, mais qu'il ne manqueroit à luy dire la verité de tout.

Le Lieutenant ayant par sa confession ce qu'il demadoit, enuoya en mesme téps querir le Greffier, mais nostre assassin voyant qu'il auoit faict vn coup de temerité de se declarer, denie ce qu'il a dit, & appelle le Lieutenant vn imposteur, & qu'à tort on l'accusoit de meurtre, sur ceste negation il est renuoyé aux prisons en attendant plus grande preuue.

Cest impudent estant dans la prison, appelle de son emprisonnement, & prend à partie le Lieutenant, ce pendant on s'enqueste le long du chemin de Paris si on auoit entendu aucun vent de la mort dudit Bertrand à Argéteuil, l'affaire se découure, où miraculeusement se rencontra l'Aueugle

qui auoit assisté à la mort dudit Marchand.

Il est amené à Rouën, sur les promesses qu'il fit de decouurir l'Auteur du massacre, chacun s'estonoit de voir vn Aueugle pour prouuer vn massacre si ambigué, toutesfois l'esperance qu'en auoit conceu le Lieutenant, ne se trouua inutile, car apres l'auoir interrogé on trouua qu'il déclaroit le lieu & le temps de la mort du susdit Marchand, & qu'infailiblement il falloit qu'il eust esté tué par ce sien seruiteur, le prisonnier de son costé tascha de se deffendre, & monstrier que c'estoiét toutes impostures dont on se seruoit contre luy.

On demande à l'auugle s'il connoistra par la voix celuy à qui il auoit parlé dans les vignes d'Argenteuil, enquoy Dieu monstra qu'il ne vouloit qu'un tel crime

fust impuni, car on fit parler le prisonnier au milieu de dix ou douze autres, l'aveugle au premier mot qu'il prononça, dit que c'estoit celuy à qui il auoit parlé, il fut confronté par quatre ou cinq fois sans que l'aveugle changeast d'opiniõ, la chambre estoit mi-partie au iugement, car on ne pouuoit se résoudre à condamner le prisonnier pour le peu d'apparence; toutes-fois ayant esté appliqué à la question il auera le faict, & par Arrest de la Cour il fut condamné d'estre rompu tout vif.

A cét exemple i'en pourrois adiouster vne infinité d'autres, que ie passe sous silence, pour m'arrester au suiuant qui n'est pas moins considerable ny moins estrange que celuy que ie viens d'aleguer.

*Continuation du mesme ſubieſt par
une Hiſtoire tragique &
merueilleuſe.*

CHAP. XXXVIII.

C'EN'eſt pas d'aujourd'huy que
le deſir d'auoir des richesses
tyranniſe le cœur des hommes, les
Anciens nous en ont donné des
exemples qui font horreur à ceux
qui les liſent, ſi bien que ce n'eſt
pas ſans ſuieſt qu'un de leurs plus
grands Poëtes s'écrie,

--- Inſatiable faim de l'or

*A quoy ne contrainſts tu le courage des
hommes?*

Mais ſans m'arreſter aux com-
ptes de l'Antiquité que l'on pour-
roit tenir pour fabuleux, ie rap-
porteray icy ceſte Hiſtoire, com-
me veritable, & arriuée il n'y a pas
long temps.

En vn Bourg proche de Paris, &

qui est sur le bord de la fameuse ri-
uiere de Seine, faisoit sa demeure
vn hostellier appellé Girard, le
plus barbare & le plus méchant
homme qui fut iamais. Car son
ardate avarice luy faisoit cōmet-
tre des assassinats & des larcins,
mille fois pires que ceux des plus
grands volleurs des forests, Aussi
estoit il d'une humeur si insuppor-
table, que ny sa fēme ny ses enfans
mēme ne pouuoient durer avec
luy, ce qui fut cause que de deux
qu'il en auoit, vn estant mort à
force d'en auoir esté mal traité,
l'autre qu'on nommoit Thierry,
eust à peine atteint l'aage de dou-
ze ans, qu'il resolut de s'enfuyr
& se dérober du logis de ce mau-
uais Pere.

Il arriua donc vn iour qu'ayant
rencontré dans le Bourgvne com-
pagnie de soldats, qui s'en al-

loient avec quelques troupes, il s'accosta d'eux, & se donna pour goujat à vn de leurs Capitaines. Dequoy le cruel Girard ne se mit point beaucoup en peine, comme brutal qu'il estoit, & ennemy de son propre sang. Luy cependât se laissa conduire où le portoit la fortune, contrainct à cela par la necessité qui ne souffre point de loy. Et d'autant que les meschans peres laissent quelquesfois des enfans qui ne leur ressemblent pas, celui-cy s'esloigna tout à fait des vices sien, & des laschetes qui du luy estoient ordinaires, car il se redit peu à peu fort honneste homme, & grandement capable du mestier de la guerre. Aussi en rechercha il les occasions vn assez long-temps dans les pays estrangers. A cause dequoy les grandes preuues qu'il rendist souuent de son cou-

rage luy donnerent le rang de Capitaine au lieu de simple soldat qu'il estoit auparauant.

Mais en fin apres qu'il eust passé enuiron vingtans à porter les armes, l'inclination naturelle que nous auons tous enuers les nostres, quelques meschans qu'ils puissent estre, luy fit quitter les pays estrangers pour reuoir le lieu de sa naissance. A quoy l'incita principalement vne fauorable occasion qui s'en presenta comme il estoit à Vienne en Autriche. Car vn grand Prince, qu'il auoit l'honneur de seruir, luy donna vne expresse commission de faire vn voyage en France pour quelques affaires quiluy estoient importantes. Voyla donc qu'ayant dit adieu à son maistre & à ses amis sans auoir pour toute compagnie qu'un sien confidant qu'il affectionnoit grã

dement ny pour tout équipage
qu'une valize, il se mist en che-
min avec son amy, & print la Po-
ste pour faire plus grâde diligéce.

Mais hélas! ô que les euenemens
des choses humaines sont incer-
tains! Et qu'il y a peu d'asseuran-
ce au bon visage que la fortune
nous montre! elle n'en donna que
trop de preuues à l'infortuné
Thierry, & ne luy fist que trop
cognoistre à son dommage, que
les honnestes gés ne sont pas ceux
qu'elle traite le mieux: le doux
souuenir de son pays où il s'en
alloit luy faisoit sentir vne secrette
ioye dans l'ame, & il se flattoit des-
ja de la ioye que ce luy seroit de
reuoir son pere. Il croyoit que
le temps qui change tout, luy au-
roit fait moderer son humeur, &
qu'en le voyât, Girard se ietteroit
à son col; & l'embrasseroit, ce que

néanmoins aduint tout au contraire de sa penſee.

Car eſtant arriué à quelques fix lieues du bourg d'où il eſtoit natif, le malheur voulut pour luy, qu'il ſe trouua fort indispoſé & ſaiſi d'un violent accez de fiebre. Toutes fois comme il eut aprinsq; ſon pere eſtoit en vie, & la mere morte depuis peu, tout malade qu'il eſtoit il ſe reſolut de faire un effort pour l'aller trouuer. Mais auparauât il s'ouurit entierement à ſon amy, & luy diſt, que l'hoſte au logis duquel il eſperoit d'aller coucher, eſtoit ſon Pere; mais qu'il le prioit de n'en parler à perſonne, pource qu'il ne deſiroit pas de ſe faire cognoiſtre à luy iuſques au lendemain.

La choſe ainſi accordee entre eux ils acheuent leur voyage, & ſe rendirent dans l'hoſtellerie de

Girard. La premiere chose que fit lors le delasté Thierry, fust de saluer celuy qui ne le prist que pour estranger bien qu'il fust son fils. En suite dequoy illuy donna sa valize & se retira dans vne chambre où il se mit au lict aussi tost, sentant que sa fiebure se redoubloit. Or d'autant que les affaires de son Maistre l'obligeoient expressément de se rendre à Paris le iour d'apres, & qu'il se trouuoit si mal que cela luy estoit impossible, il en donna la commission à son compagnon qui partit incontinent, apres auoir prié l'hoste d'auoir soing du malade qu'il luy laissoit.

Mais luy plus selon que les tygres, ne vit pas si tost l'estranger parti, que s'imaginant qu'il ne deust plus retourner, il s'aduisa de prendre son temps, & d'execu-

tervnacte du tout horrible. Car pour voler meschamment la valize, que le malade qui estoit son fils & son hôte, luy auoit donnée en garde, l'ennemy commun du genre humain luy inspira cét abominable dessein dans l'ame, de s'ayder de cette indisposition & de la faueur de la nuit, pour tremper ses mains criminelles dans le sang de cét Innocent.

Auec ceste resolution, apres auoir bié cōsideré la valize, qui pour estre fort pesante luy sembloit pleine d'or & d'argent, voila qu'environ la minuit se laissant conduire au Demon de son auarice, il entre dans sa chambre par vne porte secrete. Alors éclairé par le flambeau de quelque furie, il approche du liēt de son hôte, & le trouuant dans vne profonde réuerie, & hors de deffence pour
son

son extrême foiblesse, il le poignarde inhumainement.

Après ceste execution sanglante & tragique, tout tremblant & hors de soy-mesme il sort de la chambre & la ferme à clef, laissant ce pauvre corps noyé dans le sang. Cela fait, il s'en va se remettre au liét, où l'énormité du crime qu'il vient de faire le boutrelle de telle sorte, qu'il ne cesse de crier & de se plaindre tout le reste de la nuit, comme vn homme desesperé. Le lendemain les valets qui estoient dans le logis ne se trouuerent iamais si estonnez qu'ils le furent pour lors, de voir le pauvre malheureux estendu sur son liét, où il faisoit des actions d'vn homme enragé, s'imaginant d'abord que ce fust quelque fiebure chaude qui l'eust saisi, ils appellerent les voisins, qui accoururent inconti-

nent au bruit qu'on faisoit. Mais comme ils voulurent s'approcher de luy, il se leua tout à coup sur pied, faisant des grimasses & des heurlemens effroyables, iusques à mordre les vns & frapper les autres. Alors pour empescher que sa rage n'allast plus auant, on fut contraint de le lier de chaines de fer, en attendant que ceste fureur se calmast avec le temps.

Mais comme ils estoient en ceste peine, & qu'une bonne partie du iour se feust passé, sans qu'ils sceussent cognoistre son mal, ny quel remede y apporter. Voyla suruenir l'amy du pauvre deffüct, qui n'ayant peu si tost expedier son affaire à Paris s'en reuint au Bourg pour assister son amy qu'il y auoit laissé malade, & qu'il pensoit trouuer plein de vie. Vous pouuez iuger si à son arriuee en l'hostellerie

il ne feust pas bien estonné de voir tant de gens, & d'ouyr le bruit qui s'y faisoit. mais il le fust bien dauantage, lors qu'ayant mis le pied dans la chambre de l'hoste; Voila que par vn effect de la iustice Diuine, ce miserable se tourna vers luy, & reuenant à son bon sens, (Mon Amy (dit-il à cest Estranger en la presence de tous,) Vange la mort de ton compagnon car c'est moy, malheureux, c'est moy qui l'a tué en ton absence.

A ces mots l'Estranger fit vn grand cry, & se laissa cheoir cōme évanouy. Ce que les assistans ayant veu avec beaucoup d'estonnement, à la fin comme il fut reuenu à luy, ils deslièrent l'hoste, qui tout pallé & défiguré avec vne contenance troublée, les mena droict à la chambre où il auoit commis le meurtre, & violé méchamment le droict

448 HISTOIRE DES
d'hospitalité.

Ce ne seroit iamais fait si ie vou-
lois icy rapporter combien grand
fust l'estonnement de tous ceux
qui se treuverent presens à ce spe-
ctacle tragique, principalement
de l'Estranger, qui meslant les lar-
mes au sang de son Amy fit tant de
regrets, qu'ils eussent esté capa-
bles de fléchir les courages le
moins sensibles à la pitié.

Pendant comme le Iuge du
lieu se fust la rendu avec les autres
Officiers, il leur representa de-
uant tous, que l'énormité de ce
crime meritoit vne punition d'au-
tant plus grande, que le meur-
trier qui l'auoit commis estoit pe-
re du deffunct. Comme en effect
la chose estant veriffiee depuis, il
fut condamné à estre roüé tout en
vie, apres que l'executeur de la
haute Iustice luy auroit coupé

le poing dont il auoit inhumainement tué son hôte & son fils. Par où l'on peut voir clairement que les meurtriers ne peuvent iamais cacher leurs crimes, & que par vne iuste punition de Dieu, qui a en horreur les hommes de sang, ils sont eux-mesmes leurs accusateurs & leurs Iuges.

*La vie d'Arpalin signalé Voleur; ses
impostures, & sa fin
digne de luy.*

CHAP. XXXIX.

IE sçay combien il me seroit difficile de vous déduire par le menu toutes les subtilitez & les tromperies du Larron dont ie me propose de vous décrire la vie; C'est pourquoy ie me contenteray d'en rapporter icy les plus re-

550 HISTOIRE DES
marquables.

Ce Voleur se faisoit nommer Arpalin, & tient-on qu'il estoit natif d'un petit Village entre la Sauoye & le Dauphiné. Il estoit poussé d'une inclination naturelle au larcin; pour en mieux venir à bout, il se déguisoit en autant de formes que Prothee. A quoy luy seruoient d'un grand chemin les habitudes de sa ieunesse qu'il auoit passée à courir le monde. Et d'autant qu'il sçauoit plusieurs langues, il en accommodoit l'usage diuersement à ses impostures. Car ores se meslant parmy les troupes des vagabonds & de ceux qu'on appelle Bohemiens, il pratiquoit toutes leurs fourbes accortement, tantost il ioüoit des gobelets, disoit la bonne aduventure, dançoit sur la corde, & faisoit des sauts perilleux, en un mot

ceux de son mestier le prenoient pour vn homme habile à tout faire. Quelquesfois aussi il passoit pour Capitaine des Narquois, dõt il entendoit parfaictement le jargon. Avec ces coureurs & ces faineants, il s'en alloit souuent par les foires; & déguisé en Bateleur, il y faisoit mille tours de souplesse & de passe passe. Ainsi de moment à moment, changeant de garde & de mode en ses tromperies; au iourd'huy il paroissoit en Gentilhomme, en soldat, & en Capitaine; demain en manouurier en facquin & en mandiant.

Dauantage en quelque part du monde qu'il fust, il se disoit de tous mestiers, & de tous pays: Si bien qu'en la compagnie des Artisans des Gladiateurs, & des hommes de lettres, il estoit tous les trois ensemble, & en celle des

Allemands, des Italiens, & des Espagnols, Il se disoit estre de chaque nation en particulier, comme il luy plaisoit. Souuent aussi quand il auoit fait quelque volerie signalee, il se couuroit le corps des habits d'un Gueux, & tout le visage d'emplastres, pour n'estre recogneu si facilement. Par mesme moyen, tantost iouant d'une vieille, il contrefaisoit l'aveugle, tantost il alloit à potences, & maintenant il s'appliquoit de faux bras, tandis que dans les Eglises il se seruoit des bons pour couper les bourses.

Après qu'il auoit bien ioué tous ces personnages dans une Ville, il s'en alloit en l'autre, où changeant de batterie, il se faisoit admirer comme un homme du nouveau monde. Car se disant estre quelque Arabe, ou quelque Iuif

couvert, il se faignoit medecin du Roy de Perse, & comme tel il montoit en banque. C'estoit là que pour debiter ses drogues il estourdissoit de son babil toute l'assemblée; là, dis-je, qu'il donnoit loisir à ceux de sa cabale de fouiller dans les pochettes, & de tirer la quintessence des bourses. Luy cependant continuoit de publier les merueilles de ses secrets, & donnoit des affiches aux assistés par lesquelles il leur promettoit des choses estranges, s'ils vouloient prendre la peine de venir dans sa chambre. Comme en effet s'ils l'y voioient en particulier, il leur faisoit épreuver à leurs dépens que son pareil estoit à naistre en matiere d'artifices & de tróperies. Car alors se decourát à eux en secret, il s'offroit à leur vendre des esprits familiers, & à

faire voir des spectres & des Demons. Aux Auares il leur promettoit de leur enseigner où il y auoit des tresors cachez; aux Amoureux de leur faire iouyr de leurs maistresses, & aux esprits curieux de leur apprendre tout ce qu'il y a de plus secret en la Negromancie.

Cependant, de quelque façon qu'il se déguisast, toutes ces impostures n'auoient pour but que les voleries, & les rapines. A quoy il estoit si enclin & si rompu, qu'il se laissoit quelquefois prendre sa bourse, pour dérober de l'argent au double dans celle d'autrui. Ce qu'il sceut fort bien pratiquer vn iour, de la façon qui s'ensuit. S'estant par vn cas fortuit égaré d'avec ceux de sa troupe, il s'alla mettre volontairement entre les mains d'vn voleur qui ne le cognoissoit pas. Si tost que le voleur

l'apperceut, il luy porta le pistolet à la gorge, & luy dit qu'il eust à rendre la bourse. La voyla, luy respondit Arpalin; mais puis que ie la vous donne sans resistance, affin que mon maistre ne me prenne pour quelque poltron, ie vous prie de me percer mon chapeau, & d'y décharger dessus vostre pistolet; Ce disant il mit à terre son chapeau, que le voleur perça à l'instant d'une balle, ce qu'Arpalin ayant apperceu, & que les armes estoient égales de part & d'autre, puis que son ennemy avoit tiré son coup en vain, il mit la main à l'espee, & outre la bourse qu'il recouvra, il eut encore celle de l'autre.

Or comme la troupe estoit composée de toutes sortes de gens ramassez, il se servoit d'eux diversement selon qu'il les iugeoit ha-

biles en leur mestier. Car les vns d'entr'eux sçauoient faire de fauf-fes clefs, les autres arrachotent les ferrures sans bruit, s'aydant pour cest effet des limes sourdes, & de semblables outils qui minoit le fer insensiblement. L'adiouste à cecy, que ce fameux voleur sçauoit mil-les autres subtilitez, pour entrer dans les mailons, où quand il auoit vne fois mis le pied à la fa-ueur de la nuict, il s'aydoit alors de ie ne sçay quels charmes & for-tiliges, par le moyen desquels il endormoit si bien tous ceux du lo-gis & les chiens mesmes s'il y en auoit, qu'ils ne pouuoient s'éueil-ler, où s'ils s'éueilloient il leur es-toit impossible de crier.

Arpalin ayant long temps vescu de ceste sorte, & rodé par les meil-leures Villes de l'Europe, sans que pas vn de ceux qu'il entreprenoit

de tromper, peut éuiter sa malice, arriua finalement à Paris avec ses confidens. D'abords'estans séparés comme c'estoit leur coustume, ils s'en allerent loger en diuerses hostelleries. Mais d'autant qu'Arpalin, comme leur chef, auoit tousiours à ioüier le principal rolle, il se logea exprez dans vne maison assez fameuse, pour estre l'ordinaire retraite des Estrangers. Là il s'insinua peu à peu parmy eux, leur faisant à croire qu'il estoit aussi Estranger, venu à Paris pour y voir la ville, & y frequenter les honnestes gens. Cependant comme il sçauoit grandement bien couvrir sa malice par des pretextes si apparens, il prenoit ces Estrangers pour des Dupes, & les attrappoit en mille façons, que ie passe sous silence. Ce qu'il faisoit ores par le ieu; dont

les piperies luy estoient communes, & tantost par le moyen des filles d'amour qu'il leur produisoit par des personnes apostees. Souuent aussi il les traittoit magnifiquement à souper dans les meilleurs cabarets, au retour desquels, il les liuroit entre les mains des gens, qu'il auoit exprez mis en garde aux carrefours les plus commodes, où ils leurs voloient leurs manteaux, & à luy mesmes tout le premier, à qui le lendemain ils en donnoient vn autre secretement. Et de plus ils luy faisoient part de tout le butin du soir precedent.

Or d'autant qu'il diuersifioit ses ruses d'une merueilleuse sorte, afin de mieux tromper ces estrangers, quelque fois il en menoit cinq ou six à la Comedie, & payoit pour eux, pour les y attirer plus

facilement. Alors il ne manquoit point de leur faire prendre place parmy les plus grands confidens qu'il auoit pour cest effet enuoyé deuant; & qui sous pretexte d'acoster ces estrangers, & de les entretenir, leur prenoient la bourse, si bien qu'au sortir de la Comedie ils se trouuoient sans argent. Je rapporteray à ce propos vn tour de leur mestier, qui fut fait à vn Anglois, en la compagnie d'Arpalin. Comme cest Anglois fut sorti de l'hostel de Bourgongne, il porta fortuitement la main dans sa pochette, & ayant trouué qu'on luy auoit pris routes ses pistoles reserué vne seule; Assuré-ment dit il, ceux qui m'ont attrapé les autres n'auront pas celle-cy, & ce disant il mist la pistole dans sa bouche. Ce qu'ayant esté remarqué par celuy là mesme qui l'auoit

duppé, qui estoit de la troupe d'Arpalin, Tu mentiras dit-il à part soy, & en mesme temps il suivit l'Anglois pesse mesle parmi les autres voleurs, qu'il auoit desia aduertis de la fourbe qu'il vouloit faire.

Ayât d'ocresolu d'auoir la dernière pistole qui estoit restée à l'Anglois, il fit sèblant de tirer son mouchoir, & laissa cheoir exprez quantité de pieces d'or & d'argent. Alors ayant prié la compagnie de luy aider à le ramasser, quand il vid que l'Anglois se baissoit comme les autres, vn de ses compagnons, à qui il auoit donné le mot, se mit à crier au voleur, & dist que l'Anglois sous pretexte de leuer vne de ses pieces d'or, l'auoit cachée dans sa bouche pour la retenir. Tous les assistans se ietterent incontinent sur luy, si bien que ce de quoy on l'accusoit

l'accusoit estant trouué veritable, Il fut battu rudement, & contraint de rendre la pistole à celui-là mesme à qui il auoit pris les autres dans sa pochette.

Voyla quels estoient les stratagemes & les tours de Matoiserie auxquels Arpalin dresseoit ordinairement ceux de son mestier. mais cōme il arriue presque tousiours, que d'une mauuaise vie s'ensuit vne fin semblable, le malheur qui deuoit haster la sienne prist commencement del'adventure suiuite. Ayant ouy dire vn iour, qu'on s'en alloit executer vn homme à la Greue, l'aprehension qu'il eust que ce ne fust quelqu'vn deses compagnons fist qu'il y accourust promptement. Y estant arriué cōmetout le peuple s'y rendoit à la foule, voyla qu'ils s'accoste d'un ieune homme de bonne mine, qui

s'appelloit Florizard, & luy demanda qu'auoit fait celuy qu'on deuoit executer à mort? Il a tué, luy respondit Florizard, le Seigneur d'Alzize, homme de grande qualité, & le commun bruiet est qu'il s'en est allé l'estrangler iusques dans son liét. A ces mots Arpalin s'estât mis à sousrire, ç'a esté, luy repliqua-il, vn grand sot que de s'estre laissé prendre; pour moy ie scaurois bien empescher que le mesme ne m'arriuaist. Florizard estonné de ces paroles, regarde fixement Arpalin, & remarquant en luy la mine de quelque déterminé, Monsieur, luy repartit-il, vous me semblez homme d'execution; C'est pourquoy ie m'offre à vous faire riche, si vous me voulez estre secret & fidelle.

Bien que ces paroles troublassent d'abord nostre voleur, pour n'a-

voir iamais eu de commerce avec
celuy qui les proferoit, il ne laissa
pas neantmoins d'y prester l'oreil-
le. Mais auparauant que passer ou-
tre, pour mieux sonder Florizard,
Monsieur, adiousta il, si vous auez
quelque chose à me dire, ie vous
prie qu'il n'y ait que vous & moy
pour tesmoins. Là dessus l'un &
l'autre s'estant tirez à l'écart, Flo-
rizard mene Arpalin en vn caba-
ret, où dans vne chambre particu-
liere, & parmy le vin & la bonne
chere, il s'offre de la part d'un
grand Seigneur son maistre à luy
donner cinq cens pistoles, s'il veut
entreprendre d'assassiner vn bon
Vieillard qu'il luy nomme, & le
luy rendre mort en vne mazure où
il luy donne le rendez-vous. Ar-
palin ouure incontinent l'o-
reille à ces offres, s'accorde à faire
ce coup, & promet à Florizard que

dans la minuiet suivante il luy li-
urera son homme. Sur ceste as-
seurance, Florizard luy donne
cent pistoles d'erres, avec pro-
messe de luy fournir le reste de la
somme, comme il luy aura mis en
son pouuoir le corps du Vieillard.
Ils se separent là dessus, en atten-
dant la minuiet prochaine, & Ar-
palin s'en va de ce pas trouuer vn
sien compaignon nommé le Bala-
fré, homme insolent s'il en fust
iamais, & ardent à toutes sortes
d'entreprises & de volleries. Com-
me il luy eust communiqué son
mauuais dessein, il luy donna cin-
quante pistoles, qui faisoient la
moitié des cent qu'il auoit desia
receuës en attendant le reste du
payement.

Ainsi l'vn & l'autre estant de-
meurez d'accord du meurtre, sur
les dix heures de nuit ils s'en

vont dans le logis du Vieillard, & trouuant les portes fermées il les ouurent avec leur adresse accoustumee, & s'y donnent vne entree. Alors à la faueur d'une lanterne fourde qu'ils auoient prise à dessein, ils montent en haut & proferent ie ne sçay quelles paroles estranges, par le moyen desquelles ils empeschent que pas vn des domestiques ne puisse crier. Cela fait ils s'approchent du Vieillard qu'ils trouuent au liét, & le tuent inhumainement. En suite dequoy ils mettent le corps dans vn sac, & sortis qu'ils sont, ils le portent chacun à son tour droict à la mazure où il auoit donné le rendez-vous à Florizard.

Après qu'ils furent arriuez, & que pour salaire de leur méchant acte ils eurent receu le reste de l'argent qui auoit esté promis,

Ils firent tous trois vne fosse, & y enseuelirent le corps. Ce qu'ils eurent à peine acheué de faire, que les deux voleurs apprehendant que Florizard ne les decouurist à l'aduenir, se ietterent sur luy mesme, le poignarderent & le mirent dans la fosse où le Vieillard estoit enterré. A mesme temps Arpalin qui se deffioit du Balafre, & vouloit luy seul auoir tout l'argét le traitte comme les deux autres, & l'ayant percé à grands coups de poignard, il les couure de terre au mesme lieu qui leur seruoit de sepulture.

Après tous ces actes sanglans & tragiques, tout ce qu'il peut faire pour le mieux, fust de se sauuer à la faueur de l'obscurité, & d'autant qu'il arriue ordinairement que Dieu differe la punition des méchans pour la rendre plus exem-

plaire, il permist que le miserable
Arpalin vescuſt encore trois ou
quatre ans, à la fin deſquels laſſé
de courir par les pays eſtrangers, il
ſe rendit en vne des meilleures
Villes du Dauphiné; Là comme il
ne s'addonnoit qu'au vice & à ſes
débauches accouſtumees, la Ju-
ſtice Diuine voulut que quelques
criminels ayant eſté prins pour vn
vol qui s'eſtoit fait, l'accuſerent
d'auoir eſté de la partie; comme
en effect ayant eſté prins, & con-
uaincu, ſon procez luy fut fait de
meſme qu'aux autres, & ce fut
alors que touché des remords de
ſa conſcience, comme il ſe vid au
gibet, il ſe mit à declarer deuant
tous, que pour l'énormité de ſes
crimes il meritoit vn ſupplice cent
fois plus grand que celuy qu'il ſ'en
alloit endurer. Là deſſus il confeſ-
ſa volontairement les méchance;

tez qu'il auoit commises, & mes-
me les trois derniers meurtres,
ensemble la pernicieuse façon de
viure, & les estranges ruses dont
i'ay parlé cy deuant, ce qu'il decla-
ra sans doute par vne particuliere
grace de Dieu, qui permet souuét
que les méchans confessent
leur faute publiquement en
ce miserable monde, afin qu'en
l'autre ils n'en souffrent point
la peine eternellement.

Ie m'estois proposé du com-
mencement d'inserer en ce pre-
mier Tome quelques preceptes
& enseignemens pour rendre
vains tous les efforts & inuétions
des Larrons, mais i'ay trouué plus
à propos de les reseruer pour le
second Volume, où ie continué-
ray ceste Histoire avec plus d'or-
dre & meilleure suite.

e
 t
 e
 t
 n
 n
 t
 n-
 e-
 es
 re
 ns
 us
 le
 e-
 or-



